

Н-51



НЕНЕЦКИЕ СКАЗКИ
И ЭПИЧЕСКИЕ ПЕСНИ
“СЮДБАБЦ”, “ЯРАБЦ”

НАУЧНЫЙ ЦЕНТР ГУМАНИТАРНЫХ ИССЛЕДОВАНИЙ
КОРЕННЫХ МАЛОЧИСЛЕННЫХ НАРОДОВ СЕВЕРА
ЯМАЛО-НЕНЕЦКОГО АВТОНОМНОГО ОКРУГА

НЕНЭЦИЕ” ЛАХАНАКО”,
СЮДБАБЦ”, ЯРАБЦ”

Составитель
Н.М. Янгасова



ИЗДАТЕЛЬСТВО ТОМСКОГО УНИВЕРСИТЕТА
2001

H-51

НАУЧНЫЙ ЦЕНТР ГУМАНИТАРНЫХ ИССЛЕДОВАНИЙ
КОРЕННЫХ МАЛОЧИСЛЕННЫХ НАРОДОВ СЕВЕРА
ЯМАЛО-НЕНЕЦКОГО АВТОНОМНОГО ОКРУГА

НЕНЕЦКИЕ СКАЗКИ И ЭПИЧЕСКИЕ ПЕСНИ СЮДБАБЦ”, ЯРАБЦ”

Составитель
Н.М. Янгасова

- 718 - +

ГУ “Национальная
электронная
библиотека ЯНАО”



ИЗДАТЕЛЬСТВО ТОМСКОГО УНИВЕРСИТЕТА

2001

УДК 398.4

ББК 63.5 (2)

Н 51

Ненэции" лаханако", сюдбабц", ярабц" / Сост. **Н.М. Янгасова;**
Н 51 Под редакцией М.Я. Б а р м и ч. – Томск: Изд-во Том. ун-та,
2001.- 292 с.
ISBN 5 – 7511 – 7511 – 1381 – 0

В сборник вошли мифы-сказки и эпические песни, собранные по архивным материалам, частным библиотекам, записанные от сказителей – хранителей народного творчества.

Для широкого круга читателей, интересующихся мировоззрением, социальной и духовной культурой народов Севера.

УДК 398.4
ББК 63.5 (2)

Редактор – канд. филол. наук М.Я. Б а р м и ч

ISBN 5 – 7511 – 7511 – 1381 – 0

© Н.М. Янгасова. Составление. 2001

Предисловие

В условиях многоязычия происходит утрата языка и традиционной культуры ненецкого народа. Целью данного издания является сохранение материалов устного народного творчества, языка и культуры, пропаганды обычаяев и традиций, образа жизни ненцев. В период признания общечеловеческих ценностей активизируется возрождение самосознания представителей ненецкого народа. В поисках путей возрождения все чаще они обращаются к своим истокам, прежде всего к языку и фольклору. Материалы данного сборника восполнят частичную утерю духовных, материальных и нравственных ценностей народа.

Тексты устного народного творчества ненцев, включенные в сборник, записывались в Ямало-Ненецком автономном округе, в основном от жителей Ямальского и Приуральского районов. Кроме того, при составлении сборника использовались ранее опубликованные материалы, которые в настоящее время стали библиографической редкостью. Это архивные материалы газеты “Няръяна Нэrm”, сборника творчества северян “Северные россыпи” (1962 г.) и материалы частных библиотек. В опубликованные ранее тексты составителем вносились грамматические и орфографические уточнения, часть произведений публикуется впервые.

В текстах фольклорного материала сохранилось своеобразие индивидуальной речи сказителя данной территории, особенности говора. Чтение текстов не представляет боль-

ших затруднений для людей, владеющих разными говорами ненецкого языка. Тексты представлены в соответствии с нормами письменного ненецкого языка.

Предлагаемая книга состоит из предисловия, краткого обзора истории собирания и изучения устного творчества ненцев и текстов на ненецком языке.

Исходя из сюжетно-тематического принципа, тексты распределены по двум разделам: мифы-сказки, эпические песни. При классификации текстов по жанрам и видам составитель руководствовался исследованиями учёных по ненецкому фольклору, опирался на труды исследователей фольклора народов Сибири и Дальнего Востока, Кольского полуострова, на работы учёных по фольклору других северных народов.

Некоторые тексты снабжены комментариями на ненецком языке с переводом на русский, объясняющими смысл иносказаний, образных выражений, архаизмов и т.д.

Материальная и духовная культура ненцев, складывавшаяся в течение многих тысячелетий, подверглась сравнительно небольшим изменениям в последние столетия.

Этому способствовал кочевой образ жизни, занятия оленеводством, охотой и рыбной ловлей. Поэтому ямальские ненцы имеют богатейшие фольклорные традиции, бытующие до сегодняшних дней, сохраняют свою национальную самобытность, свой язык.

Знают и исполняют произведения устного народного творчества представители разного возраста и пола. Моими помощниками были: Няё Вэнго, талантливый носитель красивого ненецкого слова, житель Ямальской тундры; Полина Туртина, 1936 г. рождения, п. Тарко-Сале Пуровского района, лесная ненка; Раиса Лаптандер, 30 лет, из Приуральского района, п. Лаборовая; Марфа Худи, скромная девушка из Приуральской тундры. В её речи, как ручеёк, журчит песня ярабы, складно и ладно.

Выражаю им свою благодарность за их талант, за умение слышать и передавать услышанное другим.

Тексты сборника имеют большую научную ценность для изучения языка народа, так как язык фольклора является образцом словесного искусства.

Сборник представляет интерес для широкого круга читателей, интересующихся мировоззрением, социальной и духовной культурой народов Севера. Он предназначен для фольклористов и лингвистов, этнографов и краеведов. Кроме того, сборник будет чрезвычайно важным источником для исследователей сравнительного религиоведения.

Издание может служить практическим пособием для преподавателей родных языков вузов и студентов педагогических колледжей, учителей национальных школ и работников культуры. С большим интересом прочтет свои сказки и эпические песни тундровое население.

Таким образом, фольклор возвращается к своим истокам для дальнейшего обогащения через сферы просвещения и науки.

Выражаю глубокую благодарность и признательность кандидату филологических наук, доценту кафедры уральских языков и методики их преподавания, почетному профессору РГПУ им. А.И. Герцена М.Я.Бармич, редактору издания, за ценные консультации и конкретную, практическую помошь в работе над текстами. Также выражаю благодарность доктору исторических наук Н.В. Лукиной за консультации в ходе работы над книгой.

Искренне благодарна всем, кто оказывал мне практическую помошь в работе над изданием.

Основываясь на трудах учёных-исследователей устного творчества ненцев, приведу краткий обзор истории собирания и изучения ненецкого фольклора.

Первая запись ненецкого фольклора относится к XVIII в. В 1787 г. была опубликована сказка “*Вада Хасаво*” (Новые месячные сочинения). На основе анализа этой сказки И.С. Фатер попытался составить грамматику ненецкого языка (Фатер, 1811).

Следующая фольклорная запись относится уже к XIX в. - в большой работе Б.М. Житкова приведен русский перевод языка, сделанный на Ямале (Житков Б.М., 1913).

Первым исследователем, который серьёзно подошёл к изучению ненецкого языка и собиранию устного творчества ненцев, был финский учёный М.А. Кастрен. Талантливый лингвист, этнограф, он большую часть своей жизни посвятил изучению языков угро-самодийской группы.

Работая в исключительно трудных условиях в течение нескольких лет (1842-1844 и 1845-1849 гг.), М.А. Кастрен изучал ненецкий язык и его диалекты, собрал произведения народного творчества.

В 1849 г. он возвращается на родину уже больным и не успевает опубликовать свои материалы.

Обработка и публикации материалов М.А. Кастрена велись на протяжении многих лет (опубликовано 12 томов), его фольклорные записи почти столетие оставались неопубликованными. И только в 1940 г. вышла книга "Устное творчество самоедов". Его фольклорные материалы (19 - ненецких текстов, 8 - селькупских) были изучены Т. Лехтисало.

После М.А. Кастрена к изучению ненецкого языка обратился другой финский учёный Тойво Лехтисало.

В 1911-1912 гг. он работал по собиранию лингвистического и фольклорного материала у тундровых ненцев, а в 1914 г. - у лесных ненцев. Собранный материал он публикует в 1947 г. в книге "Народное творчество юрако-самодийцев".

О научной работе Т. Лехтисало, о собирании и публикации юрако-ненецкого фольклора есть специальная статья А.Йоки "Т.Лехтисало" (1962 г.), переведенная на русский язык Н.В. Лукиной (1997 г.).

В своём труде (1947 г.) Т. Лехтисало сохраняет тот же принцип публикации, какой он принял при издании материалов М.А. Кастрена.

Сам материал представляет большую ценность. По разнообразию фольклорных материалов собрание Т. Лехтисало не имеет себе равных.

Общее количество текстов 285, включая загадки. Только мифы представлены 20 текстами, никем из других собирателей они не были зафиксированы.

Первым исследователем самодийских языков советского периода был Георгий Николаевич Прокофьев. Работая в течение нескольких лет в Туруханском крае, организовал первую школу в п. Янов-Стан. Записал большое количество текстов, которые, к сожалению, опубликовать не успел.

Особенно широко развернулась собирательская работа с организацией Института народов Севера. Работу Г.Н. Прокофьева продолжили его ученики А.П. Пырерка, Г.Д. Вербов, Н.М. Терещенко и студенты А.С. Тайберей, И.Ф. Ного. Например, А.С. Тайберей был составлен сборник записанных им *ярабы*, а И.Ф. Ного на основании *сюдбабы о Вауле Неняуг* была написана пьеса под тем же названием.

В 1936 г. в г. Новосибирске вышел сборник "Северные сказки", составленный М.Ошаровым. В разделе "Ненецкие сказки" опубликовано 14 сказок и преданий.

В том же 1936 г. выходит сборник В.Тонкова "Ненецкие сказки", который до сегодняшнего времени остаётся одной из самых больших публикаций ненецкого устного творчества на русском языке. В нём помещено 27 текстов сказок, эпических песен и рассказов.

В 1937 г. в Салехарде Комитет нового алфавита выпустил сборник, составленный Г.Д. Вербовым "Ненецкие сказки и былины". В сборнике шесть прозаических текстов, из них одна - детская сказка ("Медвежонок"), два предания, один миф, две эпические песни и 60 загадок.

Много сделал для изучения устного творчества родного народа А.П. Пырерка - первый научный работник из среды ненцев. Под его именем впервые вышли в свет три сборника ненецких сказок на ненецком языке. В 1935 г. вышел первый его сборник "*Nepэса' wadaku'*" ("Ненецкие сказ-

ки"). В сборнике были даны шесть маленьких сказок о животных и десять загадок. В 1936 г. вышел второй его сборник "Hart wadakud" ("Твои сказки"), в котором представлено пять сказок из животного эпоса. В 1939 г. появился третий сборник под названием "Пухуця Ҥоб" ню" - ("Единственный сын старушки"). В этом сборнике к ненецкому тексту дан русский перевод. Во время многочисленных экспедиций в различные районы расселения ненцев им был собран фольклорный материал, который лёг в основу научного исследования о ненецких эпических сказаниях. К 1941 г. эта работа была в основном завершена, но, к сожалению, погибла в блокадном Ленинграде. Случайно сохранилась черновая запись лишь нескольких текстов, которую удалось расшифровать, перевести на русский язык.

Эти тексты помещены в издании Н.М. Терещенко "Ненецкий эпос" (1990 г.).

В годы Великой Отечественной войны (1941 - 1945 гг.) работа по собиранию, изучению ненецкого фольклора приостановилась. Погибли на фронте А.П. Пырерка и Г.Д. Вербов; в осаждённом Ленинграде умер Г.Н. Прокофьев; на фронтах и в тылу погибли студенты А. Тайберей, Н. Вылка, В. Варницын и др., которые могли бы продолжать начатое дело. Пропала большая часть собранных материалов. Однако при первой возможности эта работа возобновилась.

Уже в 1946 г. Архангельским отделением Всесоюзного географического общества была организована фольклорная экспедиция в ненецкий национальный округ под руководством А.М. Щербаковой и при участии А.И. Рожина. Экспедиция работала в течение шести месяцев в Большеземельской и Малоземельской тундрах, собрала 1300 страниц машинописи.

В 1947 г. вышел сборник загадок "Ненэця хобцоко" (1947), подготовленный Г.Д. Вербовым, в виде книжки-картинки, в котором дано 40 загадок-картинок на ненецком языке с иллюстрациями.

Последующие годы Н.М. Терещенко опубликованы два сборника ненецких сказок на ненецком языке с русским переводом “*Неко' Хадакэнда вадако*” (“Сказки бабушки Неко”) (1949). Сборник состоит из 22 сказок о животных, волшебные, бытовые, 15 загадок и одной скороговорки. В конце книги приложен русский перевод. В 1954 г. выпущен второй сборник “*Ненэця*” *вадако*” (“Ненецкие сказки”), в котором дано 14 сказок (десять сказок о животных и пять - волшебных и бытовых).

В 1955 г. ею представлен третий сборник ненецких сказок на русском языке “Маленький охотник”. В нём содержится двадцать текстов сказок, подавляющая часть которых была ранее опубликована на ненецком языке.

Материалы фольклорных экспедиций А.М. Щербаковой опубликованы в сборнике “*Ненэцие*” *вадако*” (“Ненецкие сказки”) (1960) на ненецком языке.

В 1960 г. появилось учебное пособие по ненецкому фольклору для педагогических училищ “Ненецкий фольклор” (Куприянова, 1960), а в 1965 г. собрание фольклорных произведений “Эпические песни ненцев” (1965 г.).

В сборнике “Сказки народов Севера” (1951 г.), составленном М.Г. Воскобойниковым и Г.А. Меновщиковым, под редакцией М.А. Сергеева, в раздел “Ненецкие сказки” включены 5 ненецких сказок. При его переиздании в 1959 г. в этот сборник вошло двенадцать ненецких сказок.

К сабиранию и изучению ненецкого фольклора в последние годы и в настоящее время начинают обращаться сами представители ненецкого народа, в частности студенты Государственного педагогического института им. А.И. Герцена. Большой интерес к сабиранию фольклора в своё время проявил А. Пичков (1954 г.). Собранный материал был расклассифицирован и со вступительной статьёй был напечатан в студенческом рукописном журнале и получил вторую премию на студенческом общегородском конкурсе. Сабиранием фольклора занималась Е.Г. Сусой. Изучению жанров фольклора ненцев и его бытованию посвящены статьи Л.Ф. Бобриковой (Бобрикова, 1965, 1966).

В 1983 г. Е.Т. Пушкаревой защищена кандидатская диссертация, содержащая анализ мифа-сказки в фольклоре ненцев «Миф-сказка в фольклоре ненцев: историческая типология и этническая специфика» (Пушкарёва Е.Т., 1983). Образцы ненецких сказок печатались и продолжают печататься на страницах окружных газет “Няръяна вындер” - “Красный тундровик” (Ненецкий автономный округ), “Няръяна нэrm” - “Красный Север” (Ямало-Ненецкий автономный округ), в ученых записках Ленинградского педагогического института им. А.И. Герцена.

Приведенный выше обзор имеющихся публикаций свидетельствует о богатстве содержания и разнообразии форм устного творчества ненцев. Не все виды народного творчества собраны полно в одинаковой мере. Так, сказки, эпические загадки собраны в большом количестве с вариантами, тогда как обрядовая поэзия, заговоры, жертвенные молитвы представлены слабее. Материалы данной публикации дополнят ранее зафиксированный фонд фольклорного материала, особенно мифы и эпические песни, расширят представление о традиционном мировоззрении и жизни ненцев в далёком прошлом.

Н.М. Янгасова



МИДИРТАСАВЭЙ”
ЛАХАНАКО”,
ЛАХАНАКО”

1. Хаби вэсако

Xаби вэсако Неро яхаконда ниня иле. Ҥэрёй халядада нарэй няханда тэвасеты", нарэй халядада ҥэрёй няханда тэвасеты".

Пыдо' ян' тетамбодо' - ийда, не нюода, пухуцяда. Тарем' няхар" по' иле". Ся"ны' ҥэбто' ңод" сыра' сава ерня, тарця тецьдахана поңгади' ватавнэх хаяха'. Хаби вэсако поңганда мадерм' тебде, яля' ямбан' поңганда хам' хасена ня"мбида. Ийюм' сүнкамда хурада, иримда ңате ңули" ханимя. Нув' пэвсюмзь ирида ҥэвамда ила, тикирихина вахальй":

- Хэ', ими пон' ядэрмакы, нин ханив"?

Мяканди' хаяха'. Пухуцяда хаскам' пиревы. Хумда хасканда хыдя' ниня ня"амба вэсако пон' ңамды, пухуцяда ма-си":

- Нена' пон' хасенананё", ир ядэрңа?

Вэсако ңаволы", ңаворманда сер' тарем' ханада:

- Ими ядэлавы". Нюхуюни' ҥэдараван' харвадм', сяндна-кэхэюд?

- Харт сел нив' ңа".

- Хуняна ңаноми манэтадм', мэсана ҥэбтав"?

Няби яляхана иянда ня' хаяха'. Ңанода ңумнэ ливармы", поё"маната марэй' салвы". Ийда ихинанда токалңада.

- Ебтов", тюкомд нёр токалпю", ңопой мэсана, нябири хунгагда лабсуй.

Ириюм' тики ңаном' нюхулемба танетанаrapha. Мяканди' тэвъяха'.

Нумдо' нарэйма. Неро яха' салаба хая. Вэсако нюхуюта ня' ма:

- Салабава хая, ңанонди' мю' тарана ңавориди' пэнди'. Мимбати' минри' яля' ңыл' ңэя. Нибти' пирас" нядэльяди'. Си"ив' ёльцыңгана ңанори' ла"нэлангу" - ńяхар" на"амъир. Сидя' ня"амвахананд ясяда ямд' тэваңгуди'. Ңяхаромдэй' на"амвахананд Неро яхако' ня"ван' ңанори' харта нулты", тетимдей' на"амвахананд яха' харан' нулты".

Тадахава вэсако нюхуюда ңэдарамба пяңхаюда. Вэсако ңаном' ня"амба пон' мунзи, пухуцяда ңани' ма:

- Нюхуюд пон' ня"амбихиодэ, ңоб' ңэдарахаюн'.
- Вэно"ни небякоцям' хайреван' харвав.

Пухуця ңани' тарем' ма:

- Тарабта хайредава.

Тадахава нюхуюди' хаяха'. Иринда вади' сер' ийюм' ңоб' пэрнэда. Си"ив яля' миңаха'. Ңаво" пирка"на ңаноди' я' ним-ня хыны", ханяхарт' мэита янгу. Неюм' масьнё":

Иринд вато' сер' ңэё - иландин' табэданада ти ңэдакы?

Яха' хара' ся" сюртяв ңыбкуй саля ңэвы. Не тики яхад ңоб" ңув' ясм' ныкалңа. Хасаваюм' лэркабт' хонаравы". Нен-да ныкалмы ңувэця мя"ңэ хая. Мяти' пеней я' ерня ңа. Хасава харта индя сер" пин' хая. Ңамгэда ңэса нянда ңылекарада ңамгэ яда - тю"уняюв' сидя' поръянада, я' няюв' тет' поръянада. Хаби вэсако' ий сеянда хэсь паромбари мят' тю, нехэнда ваде"лыда. Неюм' маси":

- Тикахабид нянд харванид ни"им' ңа" - тикид ты". Ты ханахана мэта. Неро яханд ня"авахана юд' мян" харв" таня-выць, ңобкарт момдо' нись хаё" тэваран".

Хаби вэсако' ий хая, харво маторъяда. Мяканда миманда сер' харта мята ңылекауз пя, сейда ңули" хая:

- Тики ңылека си"ми пянакы?

Неюм' мякад ңадимя, хасавамда хаңада. Хасава пида нё' ядан' е"ңалэйда. Хуняна тад пин' сылаванди' - мяти' няби хэ-увуна ңоб" ямб мюд халая.

- Тадахава ти, тэсавэнэ хаяни', ханони' таня". Ирир маси":
- Тэсавэнэ хэбти' ңопой яхана нёди' иле", мюсярнади'.

- Ямдахани'.

Не мята ха"авра, ёрколаңаха', не мюдамда пуйда, таминда нид ңудонда мюдм' манзабта. Тарем' мюсебата яля' ңылари' пэрңада. Ялэ' мюсеңаха'. Тарць" ямбахана хасаваюм' танырна.

Ңаво" таняхуна недам' нярахалаңаха', неда' тяхана не нултада. Недам' манэць хасаваюм' хонарку:

- Тюку ңамгэ' нюхула"ма?

- Тикар неда.

Мядо' ңадь ян' та' ңэсыхы'. Неюм' хасаваханда ңани' тарем' ма:

- Мяк" хань". Хибя ңэвар вадес". Нултаванд ёльцыңгана хасев" няюв' нултад, не' няюв' нёр нулта".

Хаби вэсако ий мяк" хая. Ханамда сябун' сярада, не хонарамба пя:

- Ңамгэ ненэцянда'?

Не" мунзи", иридо' ядэрңа":

- Са"ла ңэдакы?

Хасев" няна хая, хибя" ңэвамдо' хонара". Ңобто' ма:

- Мань Вы' Харюци вэсакодм'. Пыдар хибян?

- Хаби вэсако' иядм'.

Вы' Харюци няхата ма:

- Недя сядота не ңэдакы. Са"лако хаби хадавы ңэя.

Нюдя Харюци вахальй":

- Нисяхаваңэ, хусувэй ненэць' пыдар пярандар.

Си' няна хэхэ" ядо' танявы. Хаби вэсако' ийм' таня' нюхулембидо' - нядо' перена пяраха. Вы' Харюци нюдя нюомда хаңа:

- Нибат ту" сит хадаңгудм'.

Нюдя Харюци то, хабим' нюхуледо'. Хаби вэсако' ийм' ямб яля' пя' малан' ңыдадо'.

- Немда хуняна хоцакэва".

Нув' ялэмзь тыдо' то". Вы' Харюци тет хорсө"эм' сяра.

Сававна манэць яля пя' ни' ңыдавы

Хаби вэсако' не ню' якэда теда' ңадимя. Вы' Харюци мят' тю. Не лат" ниня лабцорта, юркаван' ни' харва". Вы' Харюци пелей' нямна, Хаби вэсако' ий' си' ня' ңамды". Ңаволыд" - харда лэхэ" теберңа. Тад нирцилаванда Вы' Харюци нямда еймананда харахана матидеда. Нем' маноңадо'. Хан' мю' пэман' харвадо', нюдя Харюци нига хонара:

- Пэртяра" ңамгэ таня? Ладленара" ңум' лахаць'.

Ненэся ңод' ңум' лахацям' ладлевы".

Мята ха"аврамба пя' - сидя халакада тадда' то"олахаха". Тикахавахана Вы' Харюци сидя ңоталмамда ңобт' пэйде, - халакаха' пересянди' янговы. Мядм' ха"аврадо'. Ты ёркалңа", мюдм' пуйда", ты подеръядо'. Мюдм' нерняку' ва"алтадонзь ңод" подеро" пясик" харто' еканға". Вы' Харюци ңани' сидя ңотамламда ңобт' пэйде мюд хэнгада.

Хуняна нюдя Харюци сиды, ху' ханимы. Сававна манэць мядода, нига мал' ңокахандо' ңэвто' тю"уня' ңэсь паллы". Нюдя Харюци Хаби вэсако' ий' мят' хая. Не тумда тандая'пятивэда. Нюдя Харюци пелей' нямна хая, тюмю' вакан' туёць пэй". Тарем' вэн' нюдрев' мят' тювым', тун' хылкатанам' сялилць не ма:

- Такэр вэванё", ңэрмонзь мальцякомд мэтнакы, пуна иринд им' нён вомда".

Хуняна ямдэйд", Хаби вэсако' ий харта ңудонда, нюдя Харюци танырңа. Нултаб"та ңутос' ирт' нултасетыда.

Нопой мюселмахананандо' ңудондана нултава' пойм' ямбумдавы, паңгараха соты' ни' нултада. Тарем' сырпато' ты' иня' няңы хэвахад си"ив ядана. Нюдя Харюци' нинядэнда ню" - мяңгода ңэвы", манзь ханадо':

- Ява" харе"ңан!

- Тэдамда" таидм', менарай хабт", яхадей" ңэнгу" - ңули" ңокаханда тодо' сидя" ты", - Хаби вэсако' ий тарем' ватора.

Нюдя Харюцир тыда махайха" питарпида, таредо' тянпидэ. Хэвни' ңэдалэй". Мюд" манзада". Ты" мюд' пумна харто' сяйна". Яданидо' Харюциндо' сидя тынзь' хабт' ханм' пыяха'

пэнадо'. Тайна хунандо' мякандо' тэвыйд". Тэсяда нисяндо' ябтако якэда ңадимя, манзь ханада:

- Тюкохобида" ненэй ты" ңамза" ңэдараха". Ханяд хойда"?

- Хаби вэсако' ий ңэдараха, таныртаданда ңани' нюдя тидява" мэ"мы. Маня" хадаңгува".

Нисядо' масынё":

- Хаби вэсако' ий ңэхэвабта таня хэя.

Нисяндо' писиденян' си"ив ябта нюда нисяндо' муно' ирманя Харюциндо' ня' хая". Тад ялмандо' наңэдя сырандо' ядавари сер". Тарем' миндяхандо' ңаво" таняхуна нидо' пыркыбтадоць ңобт' сулмыд", сидя тынзь' хабт тэхэюдо' хаңаха'. Нюдя Харюцидо' ңопойңэ неда' мюмня хая. Тайна хунанда пи' сава ерни Хаби вэсаконда ий' мяг' вэн' нюдрев' ңани' тю, пи' ямбан' пелей' няңы тюмю вар' хыдарадан' туё"ңа.

Хубтахана не маманода:

- Тедахава' харта вэвава, ненянг" мальцякомд мэць пыида, вануда лэбтана хамм' сидя тынзь' хабткохона мэтнакы. Мюд" нултаб" юр" тибян' нулангая.

Ңамгэмда харамда вэрку"манава", ңани' мюсельяд". Тарем' сырпато' нерандо' няна няхар" ю" мя" - ңадядо' яхандо' та' нултадо'. Хаби вэсако' ий нюдя Харюцимда нянда хаңада:

- Саць ңэдалёван' харвасетынанё" - теда' ңэдалад": Няби ңэр хан' ябцо' тэлахад таная, няби ңэр. пыя' ядахад таная. Вадо' ня"ван' нултаир. Вад' маахад синя' туёс", пэяр тасий марико сырахана токадарңая. Хасев' ня' тэв"махаданд хано' пыяха"на ян' туёс". Ервотахандо' манъин:

- Хаби вэсако' ий' ңэдарьтм'. Тадахава ңэдалад", тэхэюд пирби' ңэсонд' тяна бахаюн".

Нянда вато' сер' сертамахаданда, нюдя Харюци мяканда ңэдалэй". Ю" тибя ңэсонд' нултада. Тарем' сырпато' пунда няюна парабтахая ңэдараравы ңоб" мюд сяйна. Мюд' нябитит' тэвава' сер' Хаби вэсако' ий ма:

- Ңопой хасава' няюмна хань".

Тадтикахад Хаби вэсако' ий нюдя Харюцинда няна хая, няханда вахалъй":

- Неданд мюния ңамгэм' манэ"ңан? Я' таняюв' сылахарад".
- Мяды манэ"ңадм'.

Хаби вэсако' ий сидя ңоталмамда ңобт' пейде - сидя тынзь' хабт тикахана, нита ңобт' сулма"ма яхана хохортаха'.

- Тэхэюд яха", ңамзиди' ңаван". Нянандо' сеня' нивы ңэбат хун" ңавэн' си"ив мяңгацяр тутвакы"?

Хаби вэсако' ий сидя ңоталмамда ңани' пэйде. Тэсяда иринда мя" ңадимя, тыда ңокамы", якэда няњормы. Тарџям' мание Хаби вэсако' ий ңани' тарем' ма:

- Сеня' сидда" табламба"манда е"эмня Тэсяда вэсако сававна илелъй".

Сидя ңоталмамда ңани' пэйда - синё саркада, сэв' малувна ңадядако яңгу. Хаби вэсако' ий ваб"нанда ма:

- Ханонданғува". Нид илеңгуд", Вы' Харюцир, сидя некар нисякондо' ня' илеванда" ни" ңа" - ея мяцавэй' ңэвакуто' нид таня палалаңгу".

Хаби вэсако' ий нюдя Харюцихинда самбляңг ю" тым' ми"ңа, ма:

- Тад нерня' Харюцинэ няби ңэта" яда илеңгуда".

Тадахава яхато' пядо'. Та' илелъяд'. Хаби вэсако' ий нув' хэхэнэ хая, неда яляңэ хая. Нюдя Харюци илебям' пэртякоңэ я' ниня хай.

Та' малда.

2. Хабей' не

Неро яхаконда хэвахана Хабицяр илевы, сядэцяда танявы. Ся"ны ңэбто ңод" ңоворңаха', Хабицяр сядэцяханда ма"нив':

- Ңамгэ тодо' ңопой хоркыцям', тикахад халякоцям' хадабидм'.

Пуна сит пядм'.

Наворо"махаданда Хабицяр яңгэбциамда хана, тикахад яңга' сим серта. Мяканда то, ңани' сядэцямда ханада, тикахад яңга' сивна пакледа. Тикахавад сэвада ханя' сырңа" ет' таня' пяда. Ханя' хэнякы. Неранда няна хардаком' хо. Тики хардако сюравы, ңаво" пирка"на нёнда си харта пехэда. Мякад Хабей' не ңадимя, ма"нив':

- Пыдар сяхаңгарт хавандан нин ңа".

Хабицяр ма"нив':

- Манзяван хаңгудм', пурсавэй нябякоцини таня".

Хабицяр тикахана сенғанакы, ңамгэнакы. Хуняна юркыкы'. Хабей" нер ма"нив':

- Нернякуна няни мя" таня, тики нями иленгу.

Хабицяр хая. Миңа, нернякуна ненэсянда ңод" хардаком' хо. Тики хардако ңобтарем' сюравы. Тарем' сюрнаханда нёнда си харта няңгарь". Мякад Хабей' не ңадимя. Хабицян' ма"нив':

- Пыдар хавандан нин ңа"?

Хабицяр ма"нив':

- Мань хавандадм' нидм' ңа".

Хабей' не ма"нив':

- Маньзяв хавандадм', пурцавэй ңубъякоми таня.

Тикахана ет' сенганаакы, ңамгэнакы. Хубтыхы юркыкана Хабей' не ма"нив":

Нернякуна няни мя" таня, тикан' хань".

Хабицяр нянда вада' сер" ңани' пяды. Тарем' миманда сер' хардаком' хо. Тики хардакода неры няхаюта сер" ңобтики сюра, сюрванда сер' нёнда си харта нэй". Мякад Хабей' неко ңадимя. Хабей' нер ма"нив":

Пыдар хавандан нин ңа"?

Хабицяр ма"нив":

- Сяхаңгарт нидм' хангу".

Хабей' некор манзь ханада:

- Мань ңани' сяхаңгарт нидм' хангу". Тикахавахана ңобкана илехэни'.

Ңобт' илельяха'. Ся"ны ңэбто ңо", Хабицянд тарэнзяда вома, Хабей' нер хонрада:

- Хабиця, тарцян' нисетынанё ңа"? Ңамгэр хадкэй"?

- Ңавна яңгокоцини таняць, тикини пюван' харвадм'.

Хабей' нер сэбрэй", ма"нив":

- Нён хань". Лабкахана яңго танянё".

Ет' тарем' пэртэханда Хабей' ненд ңэвада есьмя, тарем' ңод" Хабицяр ни намд", хая. Нернда няд мята ңадимя. Тарем' сырпата мя" ха"алсавэй. Тики ха"л ныкласеты, ңани' ңадимсеты. Ядаванда сер' иңудм' хо:

Мяд' мюйм' макода сивна манэп" савараха.

Макода' син' танэй" ңани' сырна, Сядэцяда мята мюния мэвы. Сядэцяда ма"нив":

- Иленаханд сит ңамдадм'!

Сядэцяр ңо" санэй" Хабицямда неракуць пяды. Хабицяр тарем' сюрмбадаханда нернда няна харадаком' манэ"ңа. Хардакор сюра, харта ихинда нёнда си нэй". Хабицяр төрэй":

- Хабей' ней, хадм".

Харадако мюд ңобкарт му' яңгу, Хабей' неда хавы. Ңани' сюрбы". Нернякуна няби Хабей' ненда харадаком' хо.

Тикиюмгав' нёнда си тохобэй, хавы. Ҙани' нерня' сюрбы".
Нерняна харта Хабей' ненда харад џадимя. Тёрей":

- Хабей' ней, хадм".

Харадакор сюра, нёнда си харта нэй". Харад мюд Хабей'
не џадимя. Сядэцяда пуданда сита џоб' нёдава. Хабей' неда
џод" ня"мада, Сядэцяр Хабицямда пунда няд ня"мада.
Хабей' нер мят' нэкалпид, Сядэця пин' нэкалпид. Наво"
пирка"на Хабицяр сидя ян' ныклы. Хабей' нер пыхыдамда
мят' тюледа. Сядэцяр Хабиця џэхэ' яда џаворнахаюда.
Хабей' нер Хабицянда џэва нячым' тю"у' нумд мода. Хаби-
цияр ирынэ хая. Хабей' нер җани' ялянэ хая.

Та' валакада.

3. Вэсакохо', пухуцяха'

Я' мидахана вэсакохо', пухуцяха' илевэхэ'. Нюди', хибяхартади' янговы. Поңгнанди' лаханакурпати' манзетвэхэ':

- Нум' нюдами' таван' ни харва". Ҙамгэ тарця?

Пухуцяюм' мамы:

- Хадри' ńэя, теда' мале мани' вэсэймани', нюм' лэтамба ныхыми' янгу.

Вэсакоюм' ма:

- Ню' е"эйнэ сядэйм' сертаб"ни сава ńэдараха. Сяхари' ńод" хаб"нани' я' тер ненэця" тюку сядэйми хэхэнэ мэтадо'.

Пяхад вэсако сядэйм' сябарна, панэхэна" серибтеда, си' ня' ńабтада. Сянад-хунат илебати' ńод" сава яля еркана вэн" мадлыд". Пухуця пин' хая, я' сид ян' саңомда ńэдара. Таминда мят' тю, ма:

- Ңоб" ядана миңа. Хибя ńэдакы?

Вэсакоюм' ма:

- Такэхэв нум' няни' ńэдаравы ńацекы. Мани" нюми тодакы!

Ядана ненэць' мят' тю. Вэсакохо', пухуцяха' ńавалади'. Наворманда сер' ма:

- Такы си' няна ńэдари' Ҙамгэри'?

Вэсако ма:

- Мани' нюсини'. Ҙадьбяни' сядэйм' ńацекэдрев' серта-минзь.

Мядонда ма:

- Илеван' харвабати' сидди' табэдаугудм'. Хуняна сава яля ńэнгу. Ңули" ядембаңгу. Паркаси" пин' хэиди'.

Ядана ненэць' хая. Вэсакохो' мер' хонаяха'. Хуняна юр-
каяха'. Турмы ненэця' вади" тотрев' пихиня ненэся ңод'
ңули" сава яля ңэвы. Ядембавы. Вэсакохо', пухуцяха' паны-
ди' мал' екэйди'. Паркаси пин' тарпъяха'. Хаерад няюв' сы-
раць ңамдъяха'. Тарем' ңамдёдаханди' ңарка ту' сарёңэ хая.
Найти' тар" тэри вэлкада". Вэсакохо', пухуцяха' нумд'
пу"лаяха'. Тю"уй нумгана нумгыңэ хаяха'. Вэсакоюм' хуб-
тыхы ялэмдад' нумгыңэ хая. Пухуцяюм' пэвсюма' няյы
ялэмдад' нумгыңэ хая. Няхати' хонаркуху':

- Хаёвы нюокциями' я' тер" ненэця ңаволкосыңэ мэцакэдо'.

Теда' сяхари' нумд' сырал", сидя нумгы ңадьбяти'
ңаркаха'. Тикаха' вэсакохо', пухуцяха".

Та' валакада.

4. Вано сава

Параңода' харад' вэканы, няби вэта левсей хардакохона маңгабада луца илевы. Намгэхэрт җамгэда янговы. Ңопойри вано савада¹, полен' хэв пыркабтадо"ңа, хыдяды пя яндавакода².

Хусавэй яля' хоркы", тэваси" есть мярыби. Хоркыци хадасеты, тикида җавараданда ңоворцетыда. Ся"ны ңэбта ңод" естьеда манэ"манзь хая. Есангата ңобкарт тэваси, хоркы нивы ерев". Идя ядэрја:

- Мякани иб" хандадм', мяканани җамандами янгунё". Ңари" нерняку' манэкарцяв.

Яданаханда есть салика"ям' манэ"ңа. Салика"я' тяхад ңоб" нялодана ңадимя. Маханда ниня паркасяда хабей' не тиби³. Сидя еянгад ңумбая' пакласетыда. Явала"я⁴ ма"нив":

Вано сава, си"ми няда". Та' ңыда ңэбта хавандарахадм'. Тики едяр тарси" са"мы.

Вано савар я' ңаркадамда хо"манзь хая. Тарем' миндяханда неро яхам' нярахала. Ңыл' няю' ха"аврада. Танянанда неро яхакода ямд' ңадаравы. Хэ' сюр менга танявы. Тасий марахананда хуркари' падвы" пэ ёльце ңока". Тики" пэ' поңгана есть проволок⁵ саноръ"я юседавы. Вано савар ма"нив":

- Синий, си"ми нядахар".

Пыда Вано саван' ма"нив":

- Хар"ни тутадм'.

Ялй", пуня' сырџа: сыйонга' санор" пумнанда манара миңа. Есть саликан' тэвъяха'. Есть сыйонга' санорм' манэкава паркасяда хабей' не тэри тэмзы". Сейда хадри" хэньяраха. Ха-

бей' нем' питаро"махаданда Синий җани' ха. Пыди' сидяриңэ хайхи'. Явол"я ма:

- 'Си"ми илебте"манд е"эйңэ сит нядаидм', илебцадамд таидм'.

Вадида вадесо"маханда Явол"я хая.

Вано сава есъета сер' ялй". Хоркы", тэваси" есаңгата тэри таркавыд". Си"ив яля' иле. Ханесэйда хусавэй яля' есаңгата тарканга". Ңавормари сер".

Ся"ны ңэбта ңод" сидя солдат паранодахад товэхэ'. Манзь ханади':

- Параңодава" хангулы". Пухуцяда илебянда пелям' ваторнась. Параңодам' савумданан' тики' хавана не нюомда ваторпи. Маси" пыдар , Вано саваңэ пиртанакэр? Ңанихив" мал' выдара".

Параңода' мят' ңобкана хая". Танянандо' тэвыд". Мят' мятю". Тарем' сырпата - паранодам' Явол"я пявэда. Маханда ниня тибё ңумбаяхана ейңгад матидесетыда. Вано савам' манэць Яволда хая. Пыда паранодам' харданда мюмня ядэлабтамбида. Ңамгэ" пирка"на паранода савума. Вада" тарця" ңэса"ма: паранода я' илебянда пелям' Вано саван' ми"ңада. Не нюомда ңани' ми"ңада. Параңода миряхата ма:

- Вано сава' пэ хардад сертада". Харданда пеля хардахадани перея. Тарполавада хардани мюмня ңэя.

Тиканда пуд миртя" хардадамди' серта". Параңода' не ню' ня' пэ хард' мюнья илеңаха'. Тюб"ти', тарпабати' паранода' лабэ"мана хэсетыхы'. Илевари сер". Мале сян ялям' мэсо"махаданди' сидя солдат ңани' товэхэ. Манзь ханади':

- Параңода' марцяхы хангулы". Ситя савумданан' илебцанда пелям', не нюомда ваторпи.

Тад хая. Нерэнда тотрев' паранода' марцяхым' Явол"я пявэда. Нинянда ңамдё ңумбаяхана ейңгад мадембида. Ситя нядабада нямда хэвняку' питарңада. Параңода' марцяхым' ядэлабтамба пяда. Тарем' мэнханда харта савума. Хабця' тэри юху, паранода' марцяхым' ңэта ни' нултада. Ватормы

илебця' пелям' ханада. Параңода' марцияхы' не нюм' җани' неданда мэда.

Вано саваңынд сидя неда. Сидя нехэданда сидя хасава нюда сояңаха'. Сянахав пода тарем' пэ харданда мюня мэ"эяда. Ҙаво" пирка"на тарця иланда тябибтада. Идя вэва ңэсеты. Пухуцяхаюта ня' ңобо" манзеты:

- Ҙабтеди', нянанди' нидм' илеңгу"!

Ҙаворпато', харта яхана, хард' ёңгана хыдямда ня'амба ңамдёеты. Таняна Ҙаворцеты. Хонёбата харад' латахана хонёсеты.

Ҙаво" пирка"на мякаданда пилибт" хуны". Сянри' хунат ядабата ңод" неранда ня' сидя пёднам' манэ"ңа. Хэваханди' тэвахава хонраңахаюда:

- Ңамгэм' пидади'?

Сидя пёднар ма"нихим":

- Нисяни' ха"махад, теда' илебцамда тярпини'. Ҙопой паравы трубкам' тярць я"амани'. Сидни' нядангодакэн?

Вано савар ма"нив":

- Тикахав тарем' ңэнгү"нив': хуюмли' мовы трубкам' мер' тэвангуда тиканди' ңамгэри ңэнгү. Паравы трубка ңамгэхэна тарана?

Няхаюда тарем" маңаха':

- Трубкамд тюненгур, тад нэкалтар җани' хуркари" ңавар" тэнз" ңадимда".

Вано савар яхад пякоцям' ня"ма. Харасяда ян' мода. Сидя няда мовы пянда пумна сюрбаяха'. Няхаюта сюрбахава паравы трубкам' сепанда мю' сюрңада. Неры яд"манда мин" сер" яли". Тарем' яданаханда неранда ня' җани' сидя пёднам' манэ"ңа. Хахая тэвахава хонраңахаюда':

- Пиднари' ңамгэ?

Пыди' ма"нихим":

- Нисями' хась, илебцамда тярпини'. Ҙопой ңадсуй луца' саварида хай. Тиками' тярць я"амани'.

Вано сава ма:

- Ңадсүй луца' сава ңамгэхэн тарана, ңамгэмда пидади'?

Пыди' ңани' маңаха':

- Тики савар ёльце тарана. Тад сербат, сит хыбяхарт ни манэт".

Няхаюда табэдамба тарем' ма:

- Теда' савамди' хэвнэй' моңгув, хуюли' мер' тэвада, тиканди' ңамгэри ңэнгү.

Вано сава яхад няңгадам' ня"ма, харасяда ян' мода. Няхаюдатики' пумна сюрбаяха'. Ңадсүй луца' савамди' пюрь хайхи'. Хартасавамда сепанда мю' сюрңада. Ңани' неры минда сер" ялй". Яданаханда ңани' сидя пёднам' хо. Хонраңахаюда. Пыди' ма" нихим':

- Нисяни' илебцом' тярпини'. Тярпадахатани' палкасавэй хорова' хоба хаись. Хобан' тад мандан ңани':

- Си"ми' хана"! Сит хэсянд яханд' ханангү.

Вано сава няхаюда ңани' нельтеңахаюда. Хорованда хобам' сепанда мюд тюхалңада, тарем' ма:

- Палкасавэй хорова' хоба теда' си"ми Нув' паранода' хардах" хана".

Хобанда ни' тий". Хобада тю"үцей' санэй". Пон' нись мы", Нув' паранода' хардах" тэвы". Хобацямда сепанда мю' сюрңада. Ңоб" пархальй". Ху' тяхавы вэсаконэ хая. Паранода' харад' помна яда. Пыянда ня' тиндырња. Нув' паранода' сидер" ңыламна ядавы. Сидер' сивня паранода сита манэ"ңада. Не манзаранаханда ма"нив":

- Такы маяндорта вэсаком' мяканд ханад. Ңавламбад.

Вано сава' илевари серта. Сита ңавламбасеты". Харад' помна индя сер' ядэрцеты. Паранода' не манзарана сита ядэласеты". Ханя' хэбтэ ңоб' маниесетыда.

Ся"ны' ңэбта ңод" хэхэ' мяд' сенга" тёрейд". Вэсако ихнянда ма:

- Теда' хэхэ' мяд' сенга' тёreb", паранода' солдат' сайнорманзъ хэсеты".

Хуняна пилибтари” ңод” паранода’ солдат ятнолыд”. Хабте”эдо’ подерпи”, паньдо’ серопи”, палыдо’ силпи”. Тикыдо’ мале”мяхадандо’, пон’ нись мы”, ңамгэ яндо’ ед’ тидахалпато’ ңод” пилибт” ңэдалэйд”. Тики хэни манэць, Вано савар талерка харад’ помна хая. Паранода’ не манзарана ңоб” ехэра. Харад’ варан’ тэвахава ңоб” паражалый”. Ябта сэр” луцаңэ хая. Сэр” юнода хэвувнанда то. Мирбид, паньда ни-нянда хуры”. Хабте”энда маха’ ни’ ңамды”. Ябта сэр” юнода тю”үцей’ танэй”, тобарида мяры”. Танянандо’ хунанандо’ паранода’ солдат” тамна пиня’ мимы”. Солдат’ ңэван’ тёрей”. Ервадандо’ та’ таралый”. Я’ сяд’ ңыл’ пыдо’ ха”мыд”. Вано савацянд яв’ тяханя’ саңода хэвы. Тарем’ сырпата я’ няюд сидто’ тотрев’ яв’ сядо’ ңыл’ саю” ха”мата”. Ңани я’ паранода’ солдат” ңэвахана париденя юно миңа. Солдат” ерв ңэнгоданакы. Яв’ сэрг’ пилибт” тебе”. Вано сава палыхына саю тад сапабата юд’ пир’ хаңга”. Техэ паранода’ солдат’ ервам’ манэ”ңа. Тад пэванди, пон’ пёджаха’. Пэртэ” няда сёбар” ңэвы”. Ңари’ пыда ңод” хэ”ли хыбяхана пиртэ нивы ңа”. Няда сита сапаңгусь ңод” хабте”энда ңыламна няхар” халацабтэй”. Вано сава няхаромдэйхана нямда палы’ сапада. Тики’ пуд ңани я’ солдатахат ңобкартадо’ ни хань”. Мал’ хадэйдо’. Пыда сол-датахатата ңобкартадо’ ни ха”. Мякандо’ хая”. Паранода’ харад’ хэван’ тэвахава ңахат мирбяханда ха”амы”. Ху’ тяхабэй вэсаконэ хая. Харад’ помна яда. Нерня’ сулмырна. Паранода’ не манзарана ма”нив”:

- Ханяна ханцан?

Тикахад пыда ма”нив”:

- Харад’ помна тэри ядэрҗадамзь.

Няхаркав по’ тэри илө”. Няхаромдэйхана хэхэ’ мяд’ сенга” ңани’ тёрейд”. Сеуга” тёресь Вано сава ма”нив”:

- Ңобков’ нядава’ паранода’ солдат мань нядэйнась. Не ни пунрю”. Тяхабэй вэсако ңамгэм’ налангу?

Нябимдэйхана солдат” ңани' хая”. Теда' Вано сава' мэта да париденя юно. Яв' техэ нянда хабтада тай сэр” юно. Ңани я' солдат, ерvasавэй' хадэйдо'.

Няхаромдэй' хэбяндо' мэта юнода, няръяна юно. Ңани' я' луци” солдат' ерв' юнода вэлк хабт. Яв' техэ' солдат' ңэвахана парандадо' мэта мантанда товы. Саю' ңэван' Вано савам' ма-нэ”на. Манзь ханада:

- Вано сава пыдар тэвавэннё”. Ңацекыни пыдар хадаба-выданё”. Сит саць пилю”ңадм'. Сайнорманзь сяхангарт' ни-дам' тут”!

Тикандо' яв' сэркад сидя ян' хая”. Тики яхад няръяна юно тю”үцей мэй”. Танянанда харад' хэван' ха”амы”. Вано сава ңахат ңыханда ху' тяхабэй вэсаконж хая. Палкасавэй юнонда хобам' сепанда мю' сюрјада.

Параңода' не манзарана' мякана илевари сер”. Сита ңавламби, пин' хан”ла. Илеванда сер” ңобо” манзеты:

- Параңода' солдат ңяхар” нядахава нядэйнась. Ңобкар-тадо' нись ха”.

- Ңули” сиякан. Ңобкарт ядэро”мар яңгусянё”.

Харад' поңгана етри' лаханакурңа”:

- Сидна” ңоб” ябта сэр” луца нядабись. Хыбяхартава' нись ха”. Нерде хэб”на” мэтада сэр” юнось. Нябимдэй' - па-риденя юнось. Няхаромдэй - няръяна юном' мэ”нась. Хыбя ңэдакы?

Ся”ны ңэбта ңод” ңодиманзь вэсако хая. Ңяхар” ңодя' сэвам' сепанда мю' мэ. Сидя ңодяда ңули” няръяңаха', ңопойдо ңули” париде. Мяканда тэвүү”. Параңода' не манза-рана хонрада:

- Ханя' ханцан?

- Ңодиңадамзь. Ңяхар' ңодям' ходм'. Хуняна ңани' ңодиманзьхантададм'.

- Тикахавана ңодядами та”ма.

Вано савар не манзаранан' няръяна ңодям' ми”на. Тики, ңодям' ңамы няда, сава мирбян' ха”амы”. Ңули” паромба са-

ва мирбямда манэ”лабтаванзь паранода’ не нюн’ сюрбы”. Паранода’ не ню сядота нямда манэкава Вано саван’ сюрбы”. Сава мирбян’ ха”амаван’ ңани’ харбилы”. Тикахавад Вано савацяр паранода’ не нюн’ париденя ңодям’ ми”ңа. Ңодям’ пеңганды мэдэ, мяканда сюрбы”. Мякананда ңодямда ңамада. Яхадей хоровань эхий. Мята мий ңамнгэрида маламбой’ тахабтэйда. Паранода не нюмда ханзеркарт’ савумда я”амада. Иба я’ сей’ паранодам’ тэвара”. Савумда выдара, хабцянда ңамгэ ңэдакы. Ңопой Ңэрм сей’ паранодами теневавы. Мань ханада:

- Харт мят вэканы иления Вано савахад ехэравэнанё”. Пыдрида не нюмд савумда пиртада.

Паранода сидя солдатан’ тарем’ ма:

- Вано савам’ тюкон’ тэврари’.

Намгэ’ пирка”на Вано савам’ тэвради’. Мят’ тю. Паранода нянда ма:

- Вано сава пыдар ңэвэнанё”. Теда’ не нюми савумтаб”нанд - неданд мэнгур. Ниб”нанд ңэвамд туросатавы лата’ ед’ сапаңгува”.

Вано сава паранода’ не ню’ илелаван’ тэвы”. Няръяна ңодянда сэвам’ яхадей хорова’ нянсин’ мода. Ңодямда ңамада ңахат мирбяханда ха”амы”. Ханящей сядо”ңа. Пилийт” неданды мэдэ. По’ ңэсоңгана хасава нюди’ соя.

Наво” пирка”на яханда хэбян’ харбилы”. Паранодам’ хонрада, няда тэрихив ма”нив”:

- Сит табэда нидам’ пирас”. Тикахав ханас”, тур”.

Тиканда ятнолы”. Хардата хэвняку’ хая: сепан мюд палкасавэй хорованда хобам’ ңадимде. Хобанда ни’ ңамды”. Ма”нив”:

- Невыхы паранодани хардаха” си”ми тэвара”.

Пон’ нись мы” тэвы”. Ңани’ параноданды хард’ нимня ңадимя. Нехэюта ня’ яда. Сидя хасава нюдя мале ңармэхэ’. Мякананда си”ив яля’ иле. Си”ив’ ңэсоңгана паранодаханда ма”нив”:

- Няхаюд тихи¹. Пыдари² высэймбати³ няби паранодон⁴
тараңгува, няби марцэхэданда тараи. Мань тюку яхана
нидам⁵ илэнгү”.

Вадида мэсо⁶махаданда хорованда хоба⁷ ни⁸ ңани⁹
ңамды” - тю¹⁰уцей¹¹ тарада. Нув¹² параноданда харда¹³мна
ңани¹⁴ ңадимя.

Вано саванд ню ңарманда сер¹⁵ паранода¹⁶ е¹⁷эйнэ тараль¹⁸.
Пыди¹⁹ луца²⁰ хэхэнэ хаяха²¹.

Лаханакони²² малда.

Вада²³

¹ Вано сава - пя ванохот сертавы сава.

² Полен - лекабтавы пя²⁴ хэв.

³ Хабей²⁵ неңэ - луци²⁶ не нюмдебасеты.

⁴ Явол²⁷я - л.в.дъявол - ңылека.

⁵ Проволок - сытоңга.

5. Маңгабада Вэсако

Навнанда хунананда Маңгабада Вэсако танявы. Пыда нё"лёко не нюмда минарць сянахав по' харасяда ян' сэвата ед' ядавы. Тарем' яданаханда не нюда вадёвы.

Ся"ны' ңэбто' ңод" ңоб" ңарка яха' варахана ныланавэхэ', тад тикад Маңгабада Вэсакор яха' варан' пя мядиком' серта. Тики мядиконда сид' няюд сидя нёда. Маңгабада Вэсаконд паридена Налто"яда таня.

Таня илеңаха', яха' халям' хадабихи'. Няхар" ямб по' илеңаха'. Ся"ны ңэбта ңод", хане ядэрманда сер" ңоб" еся салм' хо. Тики еся салм' мяканда ханада. Мята хэван' ян' палнада. Тики салан' паридена Налто"ямда сяра.

Тад тики' пуна Маңгабата Вэсакор не нюхунда тарем' ма:

- Мань хане ядэртхани' вэнеконд мадлаб" вэнекор ңэдасетад, пыдар вэнеконд сярась сал' ни' ңамдасетад".

Тад хуняна Маңгабата Вэсако си"ив яля' ямбан' ханевнэхая. Ңамгэ' пирка"на парисе"э Налто харта мадлы". Маңгабада Вэсаконд не ню тянё серта янгу. Тарем' мэнэханда лэда пирця, Есям' тивта ненэць' мят' варехэта тю. Тивда тубка' пя' ямбувна пихина саркэ"лы", ңаворо"мида ңэдакы" тамна пиревдавэй". Есям' тивтар манзь ханада:

- Маңгабада Вэсако' не ню, ңари" маньзыван няхар" по' ямбан' пыдар мяканд тэва я"мыв". Есям' тивтар янамбоковна ва"ав ни' ңамды".

Маңгабата Вэсако' не ню илебcie" ңамзахахат едм' пире" нив'. Есям' тивтанд тики' ңамзаха"на лэрида пудобты".

Есям тивтар манзь ханада:

- Мань пыдар нисяхаданд лыңгарангув", нисянд то"омахад мань нямнани нёин лахан".

Тики вадида мэсо"махаданда тюмю' ваңган' тэри' та' яңгума.

Ңамгэ ханевамда мале"мяхаданда Маңгабада Вэсакор ти тованонда, си"ив хорам' ңоб" сиванда пян' ңыдахая илавыда.

Маңгабада Вэсакор манзь ханада:

- Мя"на" мюй ңани' нена' ңабтевонда.

Маңгабада Вэсаконд не ню нисяханда тарем' ма:

- Нюдя ңэвани мальңгы' паныни халтамбидамзь, мя" ханя ңабте". Ханяңыдо' ңавэн' хабто" ңэвакы".

Маңгабада Вэсакор ялэма няна не нюхунда манзь ханада:

- Мань хадёйңэ ңэдаравы хорами нёдавнзь хандадм'.

Вэсако' хэхэва есям' тивтар ңани' ңадимя. Есям' Тивтар Маңгабада Вэсако не нюон манзь ханада:

- Ңа", тюку еся ядабць' лэтамбад пуна вэнеконд муно"лаб" вэнекомд ладыба мэ"ир. Тикида вадида мэсо"махаданда есям' Тивтар мэдамда хада. Маңгабада Вэсако' не ню туцавэрихит ңамзи пире" нив'. Едамда ңамлись есям' Тивтар тюмю' ваңган' тэри та' яңгума.

Ңамгэ" пирка"на паридена Налто харта мадлы". Маңгабада Вэсако' не ню парисе"э Налтом' еся ядабцяңгана ладыбюлада, хада я"мада. Парисе"э Налто пыда си"цеймда хаця хада", саланда маля хунарабтада. Парисе"э Налто' хун"марихид Маңгабада Вэсако' не ню си"ив ямб яля' ярримда мэ"ңа.

Си"ив ңэсоңгана Вэсако тэвы", парисе"э Налто' пумнанда нюхулы. Маңгабада Вэсакор манзь ханада:

- Есям' тивта ё"эмня вэнекоми хацянан хада", вэнекони пуна си"ми хадаңгосанава. Тю"уй' тира"мана нясы"л яңговы.

Маңгабада Вэсакор не нюомда хадада, еся ядабцянд таркабтахая пян' ңыдада.

Маңгабада Вэсакор парисе"э Налтонда ня' харасяды ян' яда пяди'. Ңоб" ямб по' яд"махаданди' неранди' няна луца' юр" мя" макодито' сихи" нёдо тоховы". Тарем' сырпата ертена мяти' нита хэнгхана ерибермакы, тохо"мада яңгу. Мядо" помна еркы мят' яданари хинда ңоб" ңацекы яда"мам' пя. Тики ңацекэця еркы мякад ңадибермы. Вэсако мят' тю. Не ңацякэця хальмер небянда ңамяхат ңамя.

Маңгабада Вэсакор тики не ңацекым' мине харасяды ян' ңани' ядалый". Сянд хунат ядабати' ңод" нюдямбой яха' яха' варрин' пя мядикоцям' ңани' серта" нив', сидя нёхона пыда сертада. Парисе"э Нальтом' ңобтарем' еся салан' сярада. Не нюхунда тарем' ма:

- Вэнеконд мадлаб" нён' ңадибер", Вэнекор ңэдахая еся сал' ни' ңамдор".

Ялэма' няна Маңгабада Вэсако хане хаянё". Сянахав яля' сыңгарёда яңгу.

Намгэ' пирка"на Парисе"э Налто харта мадлы". Вэсако' не ню пин' ни"им' тарп". Пихи пиҳина ңылека товы, пыда тарем' ма:

- Хибы' нюхуван ңэхэянакэн?

Вэсако' не ню манзь ханада:

- Ңари" манъзыван Маңгабада Вэсако' не нюдм'.

Тикахавахана сюдбя ңылека тики вадахад ян' хубкада, манзь ханада:

- Ңамгэ ңылекан' маня" тэвына"? Маңгабада Вэсако си"ив я' я"амвэ, ям"вэда яңгу, таня ңо" хэбея. Хаданда ңылама, пуюмда пилю"ңа.

Си"ив ңэсонғана Вэсако тэвы". Тэвабата ңод" нюхунда масынё":

- Тюку' яхат хэб"ни тара.

Тебтад' няна сэвакуто' ед' ңани' ядалъяд". Ңамгэ' пират' яд"махадандо' итя ңабтенандо' яв' варм' пя".

Ся"ны ңэбто' ныланаривы". Нид нылана пыдо' сырпрато' итя ңарка яв' мюмня ңоб" ңарка ңано панаць миңанё".

Тарем' маниеб" ңябтид' тэва хальмер тер"ңа, хальмер" ңэбто' мал' илаңы". Ян' теб" ни"им'. Теб"махаданда тарем' маманонда:

- Тыни подерманзь мань хэхэрцядм'. Тики ңано' ерв Ңа ңэривы. Ңа яңгодан' тики ңано' терм' ян' тэвабидо'. Парисе"Э Налъто ңаби ңудахат ңобо" сякалпида тад тики' пуна ңахат ңыхындо' сюдарць ңамдорңа". Ңэвакуто' сер' сюргба хаңга".

Пили" пуданамдо' илебте"махад си"ив я' хорам' мэць Ңа ти тона. Тики яхана пыдо' тетүэ тад пёлмандо' си"ивахав яля' ңарвэто' хэрна" хэнжо" яльняраха", си"ив ңэсонгана сюдбяко Ңам' хэвдаледо', пудёкокована ңули" маторңгадо', сейнда маликм' я' ңыльня' ңэдарабтада. Маңгабада Вэсако манзь ханада:

- Нена" я"влынё", сейнда маликм' я' хыйнзер" ңэдарабтава", тад нерня' я' ңыл' ңяд нись ңадю" талэртанакы, тад тики пуна ңа' си"ив я' хорам' ңани' хадэйдо'. Мята тераха"на хаенадо' яңгу, ңаномда ңани тахабтадо'. Мята нё' сим' маняпэхэна саркабтадо'.

Сэвато' сер' ңани' ядалъяд". Сянахав по' ядабато' ңод" нумда сыррема. Ся"ны' ңэбто' нерандо' няна луца' юр" мя". Сававна манэць ңахат хомбавы луца юр" мята, не ңацекым' хо"ма мята ңэвы. Маңгабада Вэсако не нюхунда ма:

- Тюку мят' тюхуни', небяр, нисяр тюкона мэриңгуху'.

Вэсако' не ню тэри пысанңга.

Тики" ңока" мяд' Ңувоци" еркар" ңэвы". Неры хадавэдо', Есям' тивта Ңа ңэвы.

Маңгабада Вэсако Ңувоци' тэтан' манзь ханада:

- Сеня' ңавнани тюку яхад, тюку мяд' мюд ядавани сер' ңоб" не ңацекым' мань ходамзь, теда' тайкуй ти.

Тикахавахана Ңувоця' не ню, небямда, нисямда сидя падухута ңэдараработаугахаюда.

Ңувоци' тэта сиддо' илебте"мянда ё"эмни Манғабада Вэсакон' тарем' ма:

- Теда' сидна" илебте"мядан ңарка не нюми. ңармы прибытия, неданд ханад, таддихад ты"ни няби пелям' татадм'.

Манғабада Вэсако nem' мэ"махаданда яханда мюсельй", вы яхананда ңэда неро' яхаконда хэвахана иле пэй".

Та' малда.

6. Түнгэвыхы

С я"ны ңэбта ңод" ңоб" не илевы. Няхар" хасава нюдя ңэвы. Сидя хасава нюдя пили" хане ядерцетвэхэ". Няхаромдэхэвада ңули" лэк ңэвы. Хусувэй яля' мя"лихинанда мэсеты, тунда хэвахана ядембата ту' сибян' ңэда паклехэя ңамдёсетвы.

Нобаңгуна пэдараан' хэванзь идей". Пэдара' помна ядаванда сер' минданда ед' ңоб" ңарка"я хо ңадимя. Ңарка"я хо ңэб"нанда ңод" тю"уй малада ңумгад пере". Маланда ңэсонд ңосарпюлада - манэсалада. Хо' пахаңгана сюдбяко набако вадёвы.

Түнгэвэхэнд ирида ядэрја. Ихинанда ма:

- Набакодями нена" ходамнё".

Тикахавахана Түнгэвэхэр ныхында валакан' тудаком' нябиюм' тыра' тырахал" нидав'. Тикири үыхына набакон' тырада тада.

Няби ңудахана ңани' ладада, няби тырада ңани' тада. Ида ядэлы":

- Тарем' пэртям' нидамзянё" ңа". Ңарка"я хо, няданд ватадамзи". Нема юдэхэна манэ"пани тарця маяңгад хэвандадамзь.

Нэхэнанда набако"ям' нидав' енахал", ңэда ңобтарем' тада. Нябиюм' нэхэнанда енахалңада - ңани' тада.

Тад тикахавахад ида ңани' ядэлы":

- Тюкуховами тэри хумбанзяда набако ниняраханё" ңа". Хэбидя ңамгэ ңэдарааханё".

- Тарем' ңод" няданд ва"ңадм'.

Тад нензюманда пэяхананда набаком' ладада. Пэядада.
Наңдя яля' ямбан' набакохона тарем' тадё ңыды.

Нумда пэвсюмзь Пэдара' Ңылека тованонда, тарем' ма-
монда:

- Яңгоцями сава ңэсеты, едани терад ховы.

Ханесэмда ха"аврада, тэ паданда мю' пакледа, мяканда
хая. Мякананда ханесэмда ти" ни' ңыдада. Туңгэвэхэр ти"
нид мяд' мюйм' манэсарна.

Пэдара' Ңылека' няхар" не нюда ңэвы. Ңэб"нандо' ңод"
нембой" ңэвы": Яха' варахана вадёвы няхатата вата тыдэ' ям-
бараха". Лэтадахавадо' няңоте"э тыдэ", тыдэ" лэтараха".
Хадри' ңэсь ңо" няңуюто' лы" сававна манзара"ма нивня"м'
на".

Нумда ялэмзь Пэдара' Ңылекар яңгуда манэ"манзь ңани'
хая. Не нюда мяканандо' хай".

Нисяндо' хэ"мяхад Туңгэвэхэндо' няю' сядо"лыд". Ңам-
гэхэвада тэса:

- Сырҗади', юрта тэса!

Пееди' харулаңаха', тамна нянзыбиди'. Ңаво" пирка"на
Туңгэвэхэнд палкада ха"мы". Пэдара' Ңылеканд нюдя не
нюдя ма"нив":

- Нябаков, тюконд порца юрта ха"мы.

Пееда лехэбта, няңганда мода.

Тикыта ямбан' Туңгэвэхэнд нёхода итрев' харна.

Туңгэвэхэр ма:

- Сянакодава"?

Пэдара' Ңылека' не ню" ңули" маид":

- Ханзер" сянакодава"?

- Мам' мэць тоярь сянакодава". Нисянда" мада таня?

- Таня.

- Мам' мэць ханзер" сянакосеты"?

Мань теда' нянда мам' мэць ханзер" сянаковам' ма-
нэ"лабтаңгув.

- Нисянда" мам' тара"!

- Пэдара' Ңылека' не ню" нисяндо' ңарка"я мам' тэварадо'.
- Теда' ңоб" ирсу' лясэйда".
Пэдара' Ңылека' не ню" вадита сер' ңа". Тунгэвэхэр ңарка"я мам' ня"мада, ма:
- Теда' мам' мэць ханзер" сянаковам' манэ"лабтангум".
Няхар" нем' пэяхато' махана токадтэйда. Ңэвэйдо' тяныд".

Ңоб" не нюомда мюледа, ңарка"я едандо' мю' мэда, таржадрев' махамда юдимбтехэя ту' ни' ңыдада. Сидя не нюомда ти' ни' ңыдахаюда.

Пин' тарпы". Сид' нямна сысумби. Яха' хэвахана, ид' няю' е"наңа еся харвм' манэ"ңа. Харв' ни' танэй".

Нумда пэвсюмзь Пэдара' Ңылека мяканда тованонда. Тарем' сырпата не нюда сита ни" ядабта". Ихинанда ма:

- Пэдаран' сянакованзь хэвакы".

Ту' ниня ңыдёда едамда манэ"ңа. Нумбаямда ед' мю' си"ңадада, нянзада. Нянда вар нянзыба тамна лыбарна. Тарем' мамонда:

- Няйвондов, няйвондов.

Ти" ни' сылы":

- Сидя не нюда ти' ниня ңыдыхы'.

Ювэй"! Пэдара' Ңылеканд ненахада париде то:

- Тунгэвыхы ңамгэ палкан' ңэвэн, теда' еремян, си"емд пядм', панод лэтра"!

Тунгэвэхэр харв' нид вадам' ңэдара:

- Пэдара' Ңылека, си"ми ханзер" мэнгун, ханзер" тэвангун, пыдар вэсэйв" нинав', тю"у' тэва нир пират.

Пэдара' Ңылекар еся харвм' сидя ңудахана ня"амахая сидня парпа пяда. Харвар мэё ңэвы, ханзеркарт' мэита янгу.

Тунгэвэхэкор тадвэдрев' пяхад пере, письлимда мэ"ңа, харв' малахад лахана:

- Си"ими ханзеркарт' нин мэнгү", си"ми нин ңамд"!

Тарця вади" пуд Пэдара" Ңылекар сябарц тубкамда хосая хая. То. Еся харвм' сапыпа пяда. Тубка"янда еся харван' тебава' сер' туцей есабарңа", ңобо" манзеты:

- Харбе"э я' ня', я' ня' ха"мад", ид' халы" сит поваңгу" !

Түңгэвэхэр манзеты:

- Харбе"э, ид' ня', ид' ня' ха"амад", я' халы" сит поваңгу".

Тарем' мэнаханди' харбе"э" я' ид' ня' ха"мы". Түңгэвэхэр еся пыряңэ ит' сакада, торарида мяры". И"лида тянарңа". Харалаңг' яха, яха' тасиня' мяканда пяда, пилибт" пяда.

Тарцям' манэкава Пэдара' Ңылекар яха' хара' тяха' нямда нертемба ямб еңгаха"на тяха' сюрбы". Сюрамбава' сер' няби ңудахана, мярей пи"мямда, пи"мямда екада. Яха' сиди" няд, сидя лангахад ңэда падаръяда. Мярёй пи"мяхана яхам' нярта. Пи"мянда сабкаха' яха' ент' мяртада.

Түңгэвэхэр пыря мирвахана, Пэдара' Ңылека' вэньяңэюм' пи"мя сабкувна, пыда вэхэда.

Пэдара' Ңылека яха' хара' тяха" ямб' еңгаха"на ңани' сюрбы". Түңгэвэхэмда неранда няд ңани' ңателңада. Сюрамбава' сер" тэ"муй посавам', посавам' манэ"ңа, няби ңудахана маркадтада. Мярёй пи"мянда вэньяңы сабкм' тэ"муй посавахана талкадтада. Яха' сид" ня', сидя ланг сер", яха' ланг' сер" ңэда падаръяда, мярёй пи"мяхана яхам' нярта. Түңгэвэхэмда та' ңателңада.

Түңгэвэхэр нябиом' сабкувна ңани' вэхэда. Пэдара' Ңылекар париде хай. Ихинанда ма:

- Түңгэвэхэми си"емд пядм', я' сида янгу, нини' хонгунима.

Яха' хара' тяха' нерэнда тотрев' пароць сюрби". Мярико' пи"мянда сидямда сабкамда, нюлак посава' талаңахаюда. Мярико пи"мямда мэ"манда ямбан', пи"мяда тимы. Сава еркананда, пи"мянда лехэхэна си ңадимы. Хабарта' хабахад сэдавы пи"мямда ңани' пядада.

Түнгэвэхэмда та' ңателңада. Түнгэвэхэр Пэдара' Ңылека
пи "мянда сивна тэри нялкара. Пэдара' Ңылека париде хай.
Пэдара' Ңылека няби сята хэв пидрев' хая. Ихинанда ма:

- Түнгэвэхэв нядани' са"мэн. Хуркарин ңа".

Тад' нерня хусувэй хибя харта яхананда таня илея.

Түнгэвэхэр тарця серо" пуд Неро яханда тир" ни' пилибт"
илелъй". Пыря хэхэнэ та' таралъй".

Та' малда.

7. Маңгабада вэсако

Монгата яха' тир' ниня Маңгабада вэсако пухуцянда ня' илевэхэ'. Ты илебяди' ю" хабтади'. Тики' хавна янде"эди' таня.

Таңгава яляхана вэсакохо' монгате"э яханди' халям' пэрцетыхы'. Ңамзан' харвабати' хоркы" есам' мярсетьхы'. Хане хэбта Маңгабада вэсако янде"эмда вадарцты.

По' ямбахана илевари сер". Ся"ны ңэбта ңод" сава яля нинякы ңа", Маңгабада вэсако есьеда манэ"манзь янде"энда ня' хаяха'. Мале пон' ядэртакы, ңамгэ' пирка"на палкада то, таси' тёкалъй". Палкамда хамдабадаханда янде"эда ңэлакохоя вахалъй". Вэсако сеянда хэсь ма"нив":

- Тарси" ңэлири вэнеко"я уэвы. Тамна лахана теневавы.

Янде"эда ңани' вахалъй", тарем' ма:

- Маңгабада вэсако, си"ми неле", недами пюр".

Тарця вади намдахава вэсако вэнекомда пя' ладорць хэйдада. Мяканда тэвы", пухуцяханда янде"энда вади мал' ваде"яда. Пыда пумнанда янде"эда ңани' мят' тю. Няхар" вахалъй", тарем' ма:

- Маңгабада вэсако, си"ми неле". Няби я' вэканы Я' тэта вэсако иле. Ңоб" не нюода ңэдараха. Я' тэта вэсако' ян' хуняна пяб"на" сава ңэдараха.

Лаханана вэнекон' ет' пунарэйха'. Нихива харва", хуняна вэсакохо', пухуцяха' ямдана пэйха'. Мяти' ха"авраңаха", мюсельяха'. Янде"эди' хэважананди' яда, теневанадарев' тамна я' минм' табэдамби. Сянат' хунат' мюсебато' ңод", ңэсы". Мядикомди' вэсакохо' мяради'. Едамдо' ңаво"махадандо' хо-

нэйд". Хуняңы яля', ялянда ңодь' ңадимгава вэсако сидя хабтам' ня"ма. Хадари' ңэсь ңо" Я' тэта вэсако' мя" хахаядакы. Ханамда подерць мале Маңгабада вэсако ңэдалэй". Танянанда хунананда Я' тэта вэсако' мят' тэвы". Мяд' хэувуна хынрагада. Тарем' сырпата Я' тэта вэсако мята сингана ңамдёвы. Маңгабада вэсако нянда хэван' тэвы". Я' тэта вэсакор ма"нив":

- Маңгабада вэсако ңаха" тэвавэн. Ңамгэ серо" е"эмня тюкон' тэвын? Тюку яха" тэвортан нинасенё" ңа".

Маңгабада вэсако ма"нив":

- Енар" сер' нидnidамзь ту".

Я' тэта вэсако мят' тёрей", манзь ханада:

- Едаха' пия: мядондава" то. Вэва лахарюни, сава лахарюни мякана мэкані".

Тиканди мятоңаха'. Мякы мякана Я' тэта вэсако' пухуцяда, не нюда, хасава нюда танявы". Маңгабада вэсако' сидяда сэвада тум' сиди"ңаха". Нябидо' хэвадо' пелей' ңэвы. Ва"ав' ниня, не' някуна Я' тэта" пухуця ңамдёвы. Хасава нюди' ва"ав' ерня таня хонёвы, ңамгэ манзаямда пэрмакы? Си' няна - симзы' паха' хэвахана, Я' тэта' не ню таня сэдоравы. Ңамгэ сэдъямда пэрпата ңод" тэнлида сархарңа. Я' тэта вэсако си' няңы хэваханда таңгумдаңгулы", манзь ханада:

- Хэвахани ңамдад".

Маңгабада вэсако ма"нив":

- Маньзялан тюку яхад мэ"манда вадами хэтажарцяв. Вадами ти:

- Теда' танырц' яндоми таня. Яндоми си"ми ңэдарась. Яндени неңэ не нюр тад.

Я' тэта вэсако тарця вади намдахава нерцилы". Маңгабада вэсаком' ладорпа пиҳиня ханада. Хаванда пирувна ладоркая, хананда ни' хурахая ңэдалёванда мюмня ңэдараада. Танянанда хабэй вэсаком' тырида мяканда тэварадо'. Пухуцяда вэсакомда мят' тюледа. Тад манэ"ңада, мале

ханимы. Янде"эда ерванда вэи тад нянзыда үани' маугабада вэсако няңгэрць җамды". Ма"нив":

- Хонаравэва"нё".

Пухуцяда ма:

- Ҙамгэ хонаравам' ваде"җан, вунисян хонара". Я' тэта вэсако сит хадавысь.

Ҙамгэда җэвна едамдо' җама", хонэйд". Хуняна ялянда сэв' җадимзь җэто' ни' санэйд". Янде"эда җани' ма, җопой вадамда няңганда ховэда:

- Маңгабада вэсако, Я' тэта вэсакор җани' манэт. Не нюда җани' ханд.

Тиканда вэсако ханамда подеруа. Нянда мят' җани' җэдалэй".

Танянанда хунанда мят' тэвы". Мя" тодавы. Маханяю' нём' тядэда.

Сидя нёны' понд' җани' нулъй". Я' тэта вэсако мэта хэважанда ям' таңгумдамби, манзь ханада:

- Мядондава" җани' товынё". Мядондара" ед' терм' пяранда җэдакы?

Маңгабада вэсако манзь ханада:

- Манъязван тикиридм' җэхэдм'. Ҙопой мэ"манда вадами таня:

- Не нюор янде"эни неңэ тад.

Я' тэта вэсако тики са"лаком' вадита е"эмня җани' хаванда пирувна ладорңада. Ладоркая, хананда ни' хурахая, җани' җэдабтада. Тыда Маңгабада вэсаком' мяканда тэварадо'. Пухуцяда мяд'мю' хабэй вэсакомда җани' нюхуледа. Янде"эда вэида җани' нянзыда. Тэсана вэита сусахава няңгэрць җамды". Тарем' ма:

- Я' тэта вэсакон' вадини мэсо"махадани, си"ми җани' ладорңась. Тадтикахад ялям' юравэдм'.

Нумдо' пэвсюмзь хонэйд". Ялэманда сер' юркыд". Едамдо' ханя" пя". Ҙаворць мале"мяхадандо' маңгабада вэсако'

янде"э җани' вахалъй". Ненэй ненэця' вадавна хумна тоховы җэдакы, җобо" манзеты:

- Я' тэта вэсакор җани' манэт. Не нюда недани ханд. Маңгабада вэсако теда' мале сяцялмэнава: етри' җэватор". Сит җани' пябта, җопой яхана нён хасена", таняку' сарвона", хадетор". Ҙопой яхана мэнахаваханд ханян ха"?

Тиканда Маңгабада вэсако няхаромдэй' Я' тэта вэсаконда мят' җани' җэдалэй". Танянанда мят' тэвы". Мят' мятю. Я' тэта вэсако нямда манэкава җани' ма:

- Мядонда нява" җани' товы. Тедахав' савовна мядоңая. Едава" пяхава".

Тедахав' маңгабадар тэтанда си' няңы хэван' җамды". Ңа-хат вадета вадамда җани' ваде"җада:

- Я' тэта вэсако, не нюр янде"эни неңэ тад!

Я' тэта вэсако ма"нив":

- Тайкуй вэсако тарси" нерцькабтёвы. Ңули" са"лемы җэдакы: ханзер" не нюми янде"энда неңэ митав? Ненэця" си"ми пуна ни" писядангу"? Маньцеян са"лемэнэ нидм' ханд"?

Я' тэта вэсако няханда җани' санэй". Ңэванда ни' ха"мотана пям' Маңгабада вэсако ня"мада. Ниди' пилибт" ня"мыди', пихиня пёда хаях'. Ңаводы пон' нихи' пёд". Маңгабада вэсако нямда җыланда мода, хунгонда те"эмзяхад тэтамда җыбкада, ма"нив":

- Не нюмд янде"эни неңэ nibat ta", сит хадаңгудм'!

Хава' я"авлыва, ет' ваторҗада, тарем' ма:

- Не нюми таив, ет' ябтаен, җопой индатами хае". Мале са"лаңэ си"ми толаңгу"ма.

Нямда иле хаеда, неркав' сита сидя' хадасава. Тикаҳад не нюнда мире Я' тэта вэсако тасламба пя. Тарем' таслади': ня-хар" юр" нохо, няхар" юр" тёня, няхар" юр" ты, сидя хораката нохо, сидя хораката тёня, сидя нярава ед, тики' хавна сид-ндет хабт. Тэтада ма:

- Тарџят таняхаваб" ханад, яңгобато' не нюми' нив тат".

Маңгабада вэсако мунам' ни соя". Мяканда ңэдалэй". Тэва"ма- хаданда янде"эхэнда ма"нив":

- Я' тэта вэсако не нюомда тада. Ңопой вадета миреда тарця": Няхар" юр" нохо, няхар" юр" тёня, няхар" юр" ты, сидя хораката нохо, сидя хораката тёня, сидя нярава ед, тики' хавна сидндет хабт.

Маңгабада' янде"э ма:

- Хуняны яля' миредо' хосаяи".

Теда' нани' хэин, манданава:

- Тарця" мирени таня". Миреда" хосаяида".

Маңгабада вэсакор тиканда хая. Я' тэта вэсаконда мят' тэвы". Мят' мятю, ма"нив":

- Ваде"мыт то"олха" танявы". Хуняна миреда" хосаявань тоида".

Вадамда ха"авра, вэсако пуня' мяканда ңэдалэй". Мяканда тэвы". Пэвсюмя' няна, едамдо' ңаво"махадандо' хонэйд". Вэсакохо', пухуцяха' хонарахава, янде"э юркы". Нё' панувна пин' нялкара. Си' няю', пой' ңутота ябзоход юр' тибян' хая. Няби хунгалямда пуня' няхар" нэкалнгада. Нэкало"махаданда няхар" хасава сюра ха"мыд", манзь ханадо':

- Янде"экоя, ңамгэ вада?

Пыда тарем' ма:

- Хуняны хубтанда ңэсонд' тюку ян' тарця вадетыни тэвраида": енар" ты, не' хан, мань ханами, тет вэлц сэр" тыни таида". Тики' хавна: няхар" юр" нохо, няхар" юр" тёня, няхар" юр" ты, сидя хораката нохо, сидя хораката тёня, сидя нярава ед, сидндет хабт.

Тикида вадесо"махаданда мят' янамбовна ңани' мятю. Хубта' няна вэсаконд пухуця пин' хая. Мя"ена" ты" сита хаяця" хада". Пихиня ханасо"махаданда мят' паромба мятю, манзь ханада:

- Таңок" ты" ханяд ңадимя"? Хан" яңгу"циянё"?

Янде"эди ма"нив":

- Тына" харна" тына". Ханона" һани' харна" ханона". Нерденя хан' мюня носи" хоба" сюры", няби хан' мюня - тёнья", няхаромдэй хан' мюня - сидя нярава пэ ед һаха'.

Нумда савовна ялэмзь, нё' няюмд мири хосаяна" то". Янде"э вэсакон' ма:

- Ханахани тэт вэлц хабтами подер". Мирено' ма-нэ"лабтаин.

Мядонда" тикандо' нултадо'. Я' тэта вэсако няхар" юр" тым' тюр' ныкальяда. Сидндет хабтам' сяра. Маңгабада вэсако янде"энда тэнэ тет вэлц хабтам' подерңа. Не' ханан' тет парисе"эм' подерңа. Вэсако тэданда тет хорахам' вад' мюд валңа. Ханодо' мале", мирено' вата хано" мюня валаңа". Пон' нись мы" һэдалэйд". Нендо' мяя' тэвыйд". Я' тэта вэсако мяя' тёрей":

- Едаха" пия, теда' маня" тюңгува".

Янде"экор вэсакохो' ня' мяя' тю. Маңгабада вэсако Я' тэта вэсаконда си' няңы хэван' һамды". Янде"эко нё' хэван' тёкалий". Не сэдоравы, идя ядэрна:

- Ханзер" вэнеком' иле нятив. Хадаба"ни сава һэдарааха.

Не сэдорабць' харамда тале нэкалңа. Янде"эм' хар' матидеда. Янде"эр тарциям' манэкава нензюма, манзы ханада:

- Вэвада" һэвэда": мюйкута" пел һаворць хангуда". Си"ми сян' нига" хонгугу". Маңгабада вэсако миред ханан".

Тики вадида вадесо"махаданда харасяда ян' нявоты". Нерданда ня' монгате"э яха нярахалэй". Яхамда няби хэвувнанда тандада. Под' поңгана вэсако луцам' хо. Луце"эда хоркы" есье мярыбавы. Ҥоб" хоркым' хадавы. Янде"эр луца вэсакон' несяда. Вэнеком' мяканда ханада. Пухуцяханда ма:

- Хоркыр пиред, лэкоцида яндоми һамьида.

Тедахав' вэсакор хусувэй яля' мяканда хоркы тэварамби. Ябдана вэсако луцаңэ хая. Ҥобаңгана вэсакор хоркыта есье манэсарманзь һани' хая. Тарем' хо"лертаханда янде"эда ханяхав' хэвы. Пон' һатеда, тёры"һава. Мяканда яламанда нерня янде"эда тюковна һадимя. Тёням' тибяха"ната сякалпи.

Тёнямди' мяканди' ханади'. Луца вэсако пухуцяханда ма"нив":

- Тёняр хырад. Тюку тёня янде"эни хадавы. Мань хадавэми ни ѳа".

Тад неря' Маңгабада вэсако луца савовна илель". Тарця ханена яндом' намда парандода вэсако луца' ед' сидя солдатам' ңэдаравы. Сидя солдат манзъ ханади':

- Парандода сит хаңа.

Хуняна вэсакор парандода' мят' яльй", тёнянда хобацям' хана.

Парандада нянда ма:

- Янде"эмд тар? Мань тарця хане теневана вэнеком' тэмдаңгув.

Вэсако луца' ма:

- Янде"эми нив тат? Теда' тёня' хобацям' пухуцянд икадаң э тэварадм'.

Парандода"я тёня' хобам' ху' савовна манэсарңада. Манэсарңы малесь манзъ ханада:

- Тюку тёня' хобахав не нюони икадаң э сава ңэвы. Есядти", цамгын' харван мал' тэмдаугуд. Сямян ңавар' тэнзам' тэмда ширтан.

Парандода Маңгабавы вэсакон' солот' ютеро ми"ঁа. Тиканда вэсако мяканда сюрбы". Мяканда тэва, солотонда ютеро пухуцяханда манэ"лабтэйда. Пухуцяды таминаханда лабкан' сюрбы". Хуркари ңавар" тэнз тэмда. Вэсакода едэй харадм' ми, ңабта. Ңобков яля' таня иле". Нябимдей яляхана есьеда манэ"манзъ вэсако тарем' ңод" хая. Янде"эда нянанда ңани' то. Есьеда манэсартаханда луца вэсако' палкада харбиль". Тёкладаханда янде"эда ңэсохонда вахальй", ма"нив":

- Си"ми неле", парандода' не нюм' недани ханьир.

Вэсакор тарциам' намдахава лэрё санэй", ма"нив":

- Илевани ямбан' тарем' лаханана вэнеком' нивэдм' намдасето".

Янде"эмда нёраку"лада, ня"ма ңули" выдара. Мяканда тэвы". Пухуцяханда ма"нив":

- Янде"эями лахана теневавы, пыда тарем' манзь ханадась:

- Маңгабавы луца' вэсако, си"ми нелебат сава ңэдараха. Параңода' не нюм' недани ханд.

Янде"эмди' ладоркая пин' питарҗади'. Нумда пэвсюмзь хонэйха'. Хубта' няна Янде"эди' ңани' ма:

- Си"ми неледи'. Параңода' не нюм' недани хаңари'.

Няхаромдэйхава' вэсакохо' хаводи' есяма". Нись харвахава вэсако параңода' мят' ңэвтаванзь хая. Параңода' мят' тэвы". Мятю. Параңода сита хонара, ма"нив":

- Мангабада вэсако луца, ңавэ" е"эмня тюку ян' ңани' тэвын.

Ваданд таняб" ет' мэтава.

Вэсакор Янде"энда вади параудаханда серокута сер' ваде"яды, ма:

- Янде"эми пыдар ет си"ми ңэдарасть: не нюмд неданда хаңа. Хадари' не нюмд Янде"эни неңэ татнакэр?

Параңода"я тад нензюмянда хардата лат хаця тахабта', ма"нив":

- Ханзер" не нюми Янде"энд неңэ татав. Тики' еквавна хыбяри васский луцан' митав. Тарем' ниid' харва"!

Вэсаком' пин' тиркула ханадо'. Ңыльня' манара минзь харад' танцие мал' толэйда.

Мяканда пухуцяда ма"нив":

- Вэсакоми тарси" пон' яңгу? Нибтав' ха", манэпа"ни' сава ңэбтав"?

Тидерманда сер', Янде"эр параңода' харад' помна нявоты". Та- нянанда хунананда ервамда хода. Танцие" ңылана юседавы: ңодърита илевы, ңули" ладормэдо'. Янде"эда ервамда ңопой' нянзахалуада. Ервада ңэта ни' санэй". Мяканди' хаяха'. Ңамгэ ңавормамдо' мале"мяхадандо' хонэйд". Хуняна

Янде"эда вэсаком' җани' парандада мят' ңэдараада. Вэсако техэ яханда тэвы". Парандадамда җани' хонарада, ма:

- Не нюмд Янде"эни неңэ татар?

Парандада"я җани' нерцилы", пин' питарць табэдада. Нябимдей хав' пин' ладоркая модо'.

Мякананда пухуцяды җани' тосалъй", Янде"эхэнда тарем' ма:

- Вэсако нями тарси" пон' яңгунё", җанихив' нибто' хада"? Янде"э, җани' манэтава.

Янде"эр харад' помна җани' нявоты". Ненэции" тюңгалава нё' си' пиняна ханимзь хавы, ервамда та' хода. Мяканда няби тюхуд солаба тэварада. Мякананда хор' хэван' пухуцяды юада. Ю"махаданда Янде"эда ңоб' нянзада, ңамда порцеръй". Ңамда"махаданда манзь ханада:

- Хонаравэв": немами малев.

Пухуцяды ма:

- Вунисян хоню", ха" нисяняв'.

Пэвсюомя' няна ңаворо"махадандо' хонэйд". Хубта' няна Янде"эди' җани' вахальй", тарем' ма:

- Паранданд мят' җани' хань". Теда' маси" ңамгэңэ ханда? Няхаромдэйхав' ңули" нён хасена". Сит пябто' хадета, сятора тара"нив'. Хасена нунахавм' ханядо' пя". Парандада"ям' хади" ня"амъир.

Няхаромдэй' җани' хая. Парандада' мят' тэвы". Мят' мятю. Няда ханя хонарку", маңгабада вэсако луца ңопой вадамда няңганда ховэда, ңобо" манзеты:

- Не нюр Янде"эни неңэ тад.

Тарця вади намдахава парандада җани' нензюма, хардата лат хаця тахабта". Маңгабада вэсакон' җани' ялъй". Няхаромдэйхав' вэсако ни хасена": парандадам' сёхот ня"мада, манзь ханада:

- Не нюмд нибат та", сит хадангудм'.

Парандада"я" манзь ханада:

- Ет' хава я"авлыва, не нюоми Янде"энд иенэ таив. Ҥопой миртия таня, савовна инзеле": хардани сюрте ту явм' серта". Ҥобкарт ӈани я' саю тюку ту маряд' тяха' нибта тось тара. Ҥопой пи' тяха' нибат серта", ӈэвамд туросатавы лата' ед' сапаңгув". Валакада, вадами ти.

Параңода' лахана мале"мяхавахад вэсако ма:

- Тарця ту ямгавм' ханядм' серта": тарця ӈэвы - нябимдей' мякаданда тома"хаданда, Янде"энда табэда"махад тарем' мась.

Маңгабада вэсако мяканда тэвы". Пухуцяда сита хонара:

- Ханямна хаян? Не нюомда Параңодар Янде"эхэнд ваторҗада?

- Ханяда, мань нидм' ӈа". Ҥопой миртия тарця: пи' тяха' параңода' харад сюрте ту ям' серта тара. Ниб"нани серта" ӈэвами туросатавы лата' ед' сапаңгудо'.

Хонатавандо' сер' Янде"эдо' ма:

- Тедари' хонахана". Хуняна харта ӈамгэнэ ханда.

Пухуцяха', вэсакохо' хонарахава, Янде"эр яномбовна пин' нялкара. Няхар" ӈобесо"махаданда ханяд ӈэбта ӈод" сэр" паркам' мэта хасава ӈадимя, манзь ханада:

- Ҥамгэ вада"я, сер" хадкэ?

Нари" пыда ма:

- Тюку пи' тяха параңода' марадм' сюрте ту явм' сертада".

Пон' нись мы", няхар" ю" хасава манзара пэйд". Марадм' сюрте ту ямжэ хая. Тунда ядё я"авлы, харад" параван' харва". Тум' манэць хонёвы" мал' юркыд". Параңода ту' ядёход хаван' харва. Параңода Маңгабада вэсакон' ма:

- Мась ӈэя, тур хабтад. Хардани мал' паравандараха".

Вэсако мяканда хая. Янде"эхэнда тарем' ма:

- Параңодами мась: «Ту ямл хабтад. Хардани мал паравандараха"». Ҥоб" миртия теда' сертарава.

Тарцям' намдахава, Янде"эр харад' вар' ня' хэхэя ӈоб" пунэмда тибтеда, ту ям' хабты.

Хубта' няна Янде"эда вэсаком' ӈани' нэдарада, ма"нив":

- Параңодар ңани' хонарад: няби миртя хурка ңэбта?
Тиканда вэсако параңодаханда тэвү", манзь ханада:
- Няби миртя хурка, ңамгэм' пярандадм'?
- Няби миртя ти: ңопой пи' тяха' си"ив ңэвта хэхэ' мядм' серта". Нибат серта" ңэвар санаңгу".

Маңгабада вэсако луца ңэванда нибкала мя"амнанда ңадимя. Пухуцяда сита манэць хонарада:

- Ңамгэ хадкэ, Параңодар ха"ма ?

- Параңодами ңопой пи' тяха' си"ивам' ңэвата хэхэ' мядм' серта табэдась. Ниб"ни серта" ңэвами турасатавы лата' ед' сапангудо'. Няби миртя тарця.

Тей яля' тотрев' вэсакохो' хонарахава Янде"э пин' нялка-ра. Няхар" ңобебтей": сэр" паркатана хасава ңани' ңадимя. Хэваханда сюра ха"мы". Янде"эр хасаван' ма:

- Тюку пи' си"ив ңэвта хэхэ' мядм' серта тара.

Пон' нись мы", няхар" ю" хасава хэхэ' мядм' сертадо'. Хубта' няна Янде"э ерваханда тубкам', мам' ми"ңа. Хэхэ' мяд' ядахана вэсако луца' марида тоябыти. Параңода юркы", сидер' сивня хэхэ' мядм' манэ"ңа. Тарем' маниебта: хэхэ' мяд' ядахана вэсако луца' марида тоябыти. Вэсако' хэван' параңода мале тэвавы", манзь ханада:

- Не нюони' ңани ңоб" миртя тамна таня. Няхаромдэй миртя сертахавабт, тикахана не нюоми Янде"энд неңэ таив. Сертана хардар тарця ңэя: сидя яңорэй ңэда пэ, нёнда си мань хардани мюд ңэя. Тарпаба"ни, тюб"ни харданди' мюмни ханкадм'. Тики хардахана пыди' илөнгүхума.

Вэсако ңэванда нибкала ңани' мяканда хая. Идя ңули" вэва. Мяканда тэвү". Няхаюта ня' тарем' ма:

- Параңодани няхаромдэй миртя танявы, мась: «Нябой пи' тяха' сидя яңорэй ңэда пэ харадм' сертаин. Нёнда си мань хардани мюд ңэя. Тарпаба"ни, тюб"ни харданди' мюмни ханкадм'. Няхаромдэй миртя сертахавабта" Янде"энд неңэ не нюоми татав.».

Янде"эко"я' вэсакохо' ня' ма:

- Тикахав ханзер" ңэнгуга. Тедари' хонэйди'. Хубтахана манз"ива".

Тикандо' хонэйд". Вэсакохо' хонарахава пин' нялкара. Няхар" ңобебтей", няхар" ябтамбой хасава сюра ха"мыд", манзь ханадо':

- Ябта сэр" луца, ңамгэ вада?

Пыда тарем' ма:

- Тюку пи' сидя яңорэй ңэда пэ харадм' сертада". Нёнда си паранода' харад' мюд ңэя.

Няхар" хасава хая. Няхар" ю" хасава манзара пэйд". Пон' нись мы" сидя яңорэй' ңэда пэ харадм' ңабтадо'. Ялянда ңодь' ңадимзь Янде"э вэсако луцам' юркабтада. Ңудахата тыцям', мам' ми"ңа. Сертавы пэ харад' хэувун ядэрць марида тоябты. Паранода немамда мале, юркы". Сидер' сивня сырна: харданда ядан' сидя яңорэй' ңэда пэ харад ңамдавы". Нёнда си харданда мюд ңа. Вэсако' някуна хая, ма:

- Няхаромдэй миря сертавэр. Не нюми Янде"энд неңэ татнакэв.

Хуняна тюңгуга".

Хуняны яля' вэсакохо', пухуцяха' Янде"эндо' ня' ятно-лыд". Паранода' мят' яльяд". Сидя яңорэй' ңэда пэ харад' мюня толь" мале хамэдавы" ңэвы". Толь' ний' ңаваraphana па-на"ңа". Янде"эва паранода' не ню' хэван' ңамды". Си"ивахав яля' ябевари сер". Си"ив' ңэсонгана тювамдо', ябевамдо' ма-ледо'. Янде"э ненда ня' харти' сидя яңорэй ңэда пэ харданди' мюня илеңаха'. Хусувэй яля' хонёвари манзаям' Янде"э пэрна. Няхаромдэй похона Янде"э ңэвада ңэсохонда ненэця' ңэванэ хая. Ябта сэр" луца' ңэбтода солотоңэ тэса". Ңани' няхар" по хая. Няхаромдэй по' хэсь, нинда сяр"ма' пирувна ңадимя. Ңэйт солотой ябта сэр" луца' ңэта малари" тарцял-мадавэйңэ хай". Паранода не ню вэсаконда ехэранан' вэн' панэмда парадамба пяда. Панэмда тун' мода. Панэнда пара Янде"э хасава тэри тэмзы". Пухуцяда пурад' ниня паркаси" юседавы. Ңобкарт сидя яңорэй' ңэда харад яңгу. Си"ивам'

ңэвта хэхэ' мя" яңгува. Сэвата җадиво"махад, сидё"махаданда паранода' не ню, паранода нисянда мят' яльй". Нисяда мяканда хахаякохарта нидя ңэдара", вэвовна илеванда е"эмня ңаркавна тэдорңада, ма:

- Харт вэванава, вэсакор пюрманзь хань". Хибяр манза, хобада парадад"!

Паранода' не ню ңэванда сер' яльй". Ңоб" мур" лэт сехэрим' хо. Ховы сехэрэмда хана. Танянанда ңоб" ңэ' нид сюрня харад' нимня ситя җадимде. Паранода' не ню ихинянда ма:

- Вэсакоми ховандами ңэб"нани, хардако няни сядоць нулад".

Вадида мэсо"махаданда ңоб" ңэ' нид сюрня хардако нянда сядоць нултада. Мят' мятю. Мякы мякана ңоб" хабей' не илевы. Хабей' не манзь ханада:

- Паранода' не ню ңаха" тэвавэн. Ңамгэ серо' нид тюкон' тэвын.

Нари" пыда' ма:

- Янде"э хобам' мэта вэсакоми пюрҗадм'. Панэмда парада"махаданда тэмзыць. Ханяна хэвакы?

Хабей' не' (луци' не) ма"нив":

- Тарцям' теневав, тюковна хаясь. Ңули" хангурңась.

Паранода' не нюм' хабей' не (луци' не) ңоб" ңэ' мур' лэт сехэры' мюмня ңэдабтада, ма"нив":

- Неранд няна не няни' харад таня. Тамна тяхаку' пыда сит табэдан.

Паранода' не ню ңани' яльй". Ңэ' мур' лэт сехэрэда сита ңани' ңоб' ңэнда нид сюрня хардакон' тэвара. Паранода' не ню манзь ханада:

- Хасавами хованда ңэб"нани хардако няни сядоць нулад".

Вадида вадець мале, хардако нянда сядоць нултада. Мякы мякана ңани' хабей' не (луци' не) илевы. Ңамгэ сэдъямда пэрпата ңод" тэнлинда езарңа. Ситя манэць, хабей" не (луци" не) ма:

- Параңода' не ню, ханя' пэрңар?

- Янде"э мирбям' мэта хасавами пюрңадм'.

- Сер" тарця: теда' ханданава нюдя не нями тамна нерня-куна таня. Пыда ни ехэраңгу", ханяна мэвахаданда ңоб' теневангугу.

Ңэ' мур' лэт сехэрэко җани' хэвы. Мюмнианда ханада, ма-ле пон' ни мий". Мят' тэвы". Хардако нянда сядоць җани' нулъй". Мят' мятуванда сер' хабей' не (луци' не) сита хона-ра:

- Параңода' не ню ңаха" тэвавэн. Ханя' пэрңар?

- Вэн' мирбям' мэта хасавами пюрңадм'. Мань вэваңэ па-нэмда парададамзь, тики' пуд хэ"мяда ти. Теда' нюдя хабей' неңэ (луци' неңэ) теневанакэн, си"ми табэда".

Нюдя хабей' не (нюдя луци' не) нянда манзь ханада:

- Вадетар тюковна хаясь. Тедари' сенгабат сава ңэдараха, ныхыдар вадабю".

Ялянда ңадимзь параңода' не ню' хамекулы". Нюдя ха-бей' неда (луци' неда) яламанда нерня ма:

- Теда' тюку ңэ' мур" сехэрэнд пуд недарма хамэдаңгу". Тики недармам' нёдал". Пуна юдре"э хой хамэдаңгу". Хой' ниня няхар" ю" мя" таняңгу". Ерь мят' мятуңгунава. Хоре-цям', мякэци сераин. Ти" ний сямданана сяберм' пиреир. Ңа-вормадавэйн ңэнгунава. Вэсакор несэй nem' мэванзь мэнгу. Ңэватани ңатеид. Nem' тэвараңгудо'. Не' ханм' ңэдаңгурава. Мал' мятуңгу". Ңамгэ' пирка"на ябелтыд". Не' хан' мюня, наро' ңылана пурцавэй лабтэйкоця таняңгу. Мюннианда сар"нью сюраңгу. Тараванда мальңгана макананд тахабтаир. Тики сар"нью ервотандо' сей. Хана ервамдо' манэць мал' пин' са-наңгуд". Пыдар нит нерня тарпаин. Си' няна сидя хабт ся-раңгуху'. Хан' вэ' ня' ңули" мэёвна ңамдаин, тикахавахана вэсакомд хонгур. Вади"ни пирдо', таддикахавахад харт ня-данд ңа.

Нюдя хабей' ненда (луци' ненда) вади" сер" ңэ мур' лэт' сехэрэнда пуд параңода' не ню недармам' нёдалца. Пэдара'

варан' тэва"махаданда юдре"э хойм' манэ"џа. Хой' үэва' ниня няхар" ю" мя". Мяк" тэвы". Ерь џарка мят' мятю. Хорецям', мякэци сера. Тумда пята. Ти" ний сяберм' ед' мю' пядада. Еданда пихива үаворць пэй". Үаворць малехэва үзватана" то". Параңода' не ню пин' тарпы". Не' ханм' үэдада. Мят' мятю. Тюнямдо" пя". Тад- дикахавад ябильяд". Нита ехэрланан' паранода' не ню пин' тарпы". Не' хан' мюня, пурцавэй лабтэйкоця' мюня сар"нюм' хо. Маканда сюрҗада. Мят' үани' мятю. Манибта мал' ябе". Нё си' няку' нулъй". Макананда сар"нюм' тахабтада. Ервадо' тэри маханя' лясэй". Сэвада то' сэргрев' хэвы". Үули" паромба не пин' санэй". Ненэсянда үод" си' няна сидя хабт сяравэхэ'. Хан' вэня' үули" варехэта үамда еремя. Не' савам' няби үудахана ня"амба ханасава савамда серада. Ханямна мимамди' не нида хамэдамбю", мерцири төберңа. Танянанди' хунананди' нултади'. Параңода не ню тад сылы", еся мят' тэвавэхэ'. Еся мяд' мюня вэсакохо', пухуцяха' илевэхэ'. Вэсако манзь ханада:

- Нюхуюн товэдинё". Тедахав' үобкана илөнгү" нидим'.

Параңода' не ню, Вэн' мирбям' мэта хасава пелей' ня' тарем' сырпати' тасий я' няна ненэця' үоб' үади": маңгабада вэсако савовна илелмы". Ной ёхорати' сидян' пидади'. Я' тэта вэсако' мяд' тер" тибей мюйкуто' пел үаворңа".

Еся мяд' тер вэсако ма:

- Мяканди' хэиди'. Тэва"махаданди' паранодаң э таралъиди'. Иламди' мале, мяти' мю' хэхэнэ хэиди'.

Ябта сэр' луца тедахав' тэва"махаданда паранодаң э таралъй". Параңода' не нюхуд няхар" хасава нюда. Иламди' малесь мяти' мю' хэхэнэ хаяха'. Нюди' нисянди' илебям' мэ"ла". Үанидо' ете' паранодаң э таралъяд". Нув' няуы еся мяд' ерв, Вэн' мирбям' мэта ябта сэр" хасавам' маңгабада ненэцие" е"эмня ян' үэдааraphавэданё". Тарем' тасла: луца" ненэй ненэцие" ний" үэвы".

Та' малда.

8. Хаби вэсако

Вэсако луца пухуцянда ня' илевэхэ'. Нюди танявы. Ся"ны ңэбто' ңод" вэсако сүнкацямда нюдерць хане хая. Сяйнда едком' пэнэ. Яля' ямбан' ядэрна. Нули" ңамгэхэртм' ни ху". Неранда няд ңопой ядана. Хаби вэсако ңэвь. Хаби вэсакор ма:

- Луца вэсако, ханя пэрҗар?

Луца вэсако вахальй":

- Ханяхарт нив пэр". Хане ядэрҗадм'. Мяканани нюни ңока". Ню"ни мэд пюрҗадм'.

Хаби вэсакор ма:

- Мань ңани' хане ядэрҗадм'. Теда' тидңэ хаянё", тюкохона сенгахани'.

Луца вэсакор сяинда едм' ңыда. Сидя силяңг нянь' яхалаком' ңадимде. Сяйнда едком' пиремба луца вэсакор хуримна танямана лаханакурна:

- Луцеваха"на мутрата" таня". Параңода' сидя трата луца пя' пахамана пакалпати', пя' малувна ңадимдаха'.

Хаби вэсако вахальй":

- Хабихи"на ңод" ңани' мутрата" таня", луцари" ни" мутрат".

Луца вэсако маси":

- Тикавахана мутрадами мэс" ма.

Хаби вэсакор ма:

- Мутракодамд мэ"идамзь, нинав нензямд".

Луца вэсако ма"нив":

- Нидм' нензямд".

Хаби вэсакор луца вэсакомда сюдэхэюта понд' лапцада. Луца вэсакор пэдарэй варкуэ хая. Нята няда җани' сита то"олахаңэ хэвы. Яв' хэувна яльяха'. Няхар" по' ядаңаха'. Ҕули" җамгэхэртм' нихи' хомбю". Та җесонгана ямд' җыхытана саля' пыявна җадимяха'. Таб вангам' сертаңаха'. Хаби вэсакор нён си' няюна хонёсеты. Ҕоб" хонёвади' нинякы җа", Хаби вэсако лэры, маси":

- Луца вэсаков, теда' хавэни', саю" тута".

Пин' инзелерңаха', саю" мун" совондо'. Хаби вэсакор ма:

- Мань пин' тарпаңгув", си"ми хадаңгу", хобами хабарта". Ян' лехэбтаңгудо'. Саю' ерв манда:

- Тамна җани җопой танявы. Пыдар санаванд сер' хобани' пиняңы хэван' ха"амъин.

Хаби вэсаком' пин' тарпотаванда сер' хададо'. Тикавахад луца вэсакор тад санаванда нянда хоба' тяха' ха"мы". Саю' ервотам' пыянда малахад сякалңада.

Хаби вэсаконда тёрда җадимя:

- Луца вэсаков, җамгэр хадкэ, сяйни едм' вабтанэй!

Луца вэсако тад сэвада сылабтаванда, сяйнди' ед' сём сякаլпавы. Таминанда вахальй":

- Нена" җока маям' мэ"җанинё".

Луца вэсако писяласеты", ярумзеты.

Хаби вэсако няханда маси":

- Мутраком' мэсо"мами" нёр вадеџету".

Ся"ны җэбто' җод" Хаби вэсако' юн паранода' хаво" сихи" тэвы". Сидя солдатада вэсако луцам' хосая хаяха'. Луца вэсакор паранодан' то, паранода маси":

- Мутрата хаби вэсакор тюкон' тэварад. Ниб"нанд тэвара" икамд' палыхына санабтаңгув.

Луца вэсакор нямда няхар" по' пюда. Ханяхартана хось я"мада. Ся"ны җэбто' җод" хаби вэсако пэдара' варувна яда-

ванда сер', яр' муно намда, таня' хая. Луца вэсако ңэвы, маси":

- Луца вэсаков, ңамгэ ярjan? Ңамгэ тюкохона ңамдын?

Вэсако луцар ма:

- Си"ни то"олаха няхани сит ваде" ңадамзь. Тики нями вадам' паранодан' тэваравэда, паранода сит пюрць си"ми ңэдабтась. Сит nib"нани ху", паранода иками палыхына санабтаңгуда. Нена" сит хадаманё".

Хаби вэсакор ма:

- Сеня' мадамзенё", си"ми нён хэтыбю". Вэва ңэ" нив', хэхэнни'.

Паранода' мят' тэвъяха'. Луца вэсакор вахальй":

- Ти, хаби вэсакоми тэварав.

Паранода маси":

- Сидя мутрата луцами пя' малан' миндяханди' нихиод манэт".

Сидя мутрата луца ңопой пар"ъяха', сидя еся танзаңэ хаяха', пя' сер' тю"у' пяди'.

Хаби вэсакор маси":

- Тикахавахаюд ңадихинё".

Паранода палым' ңадимде, маси":

- Ңадябати' сапахаюн"!

Хаби вэсако пя' ед' сапаңхаюда', тэри сидя ютекади' пя' паханд мантэйха'.

Паранода ма:

- Хаби вэсаконэ, хавы няхают мутра мэс".

Хаби вэсакор маси":

- Лекар луцид тоя", ңадя си"ми сапая".

Паранода' си"ив лекар луца то. Хаби вэсаком' си"ив яхад си"ив палы' сапа"ңадо'. Хаби вэсаком' манэкарта нидё' ма-нэс", пя' малувна ңадимя.

Паранода вахальй":

- Хаби вэсаконэ мутрар ва"мы. Тедахав хань".

Хаби вэсакор маси":

- Луца вэсако, пыдар маяндортанэ е"эмнянд үадимядамзь, теда' үани' си"ми нин хонгу".

Лаханавы нядо' тэри тэмзы. Вэсако луца үули" дававна илена луцаңэ хая. Үамгэхэрт маям' ни хомбю".

Та' малда.

9. Сэдко' няхар'' ню

Навна хунанда, я мидахана, няхар" не пирибтэхарто' илевы". Я' хой' ниня, пуно' менгэ то' то' лаңг' ниня няхар" җарка мято' пыдо' җамдёвы. Нисяндо' танявам', небяндо' танявам', илева' ямбан' вада' нидо' хомбю". Пуно' менгэ то' халярим' җавораць илева' ямбан' пыдо' илевы".

Ся"ны' җэбэто' не" ёрмы". Тибэй понгамдо' се җано' нид пуно' менгэ тон' садахалавы", җамандо' пирад халэ хадавы". Җарк" пэта ни' яля туййтэсь, җарка не пирибтэхата масьнё":

- Мяка"на" хэхэва", нянда" мэ"мда вадами таня.

Няхар" не пирибтэхата җопой енгавна мякто' санотяладо'. Техэ мякто', мякто' тэва җарка не пирибтэхата масьнё":

- Илева' ямбан' харе"на" иле хасава' себяхад ехэра" ни"ивам'. Пуно' менгэ то' лымбад сякта тебтанда няна ханд" ни"ивам'. Няхар" не пирибтэхарацда янго, Сэдко хасавам' сертангу" ни"ивам'.

Пуно менгэ то' лымбад сяк"на Сэдко хасава', хасавам' сертвэ". Сэдко хасавам' мякто' тавэдо', нойри' тондавэ хан' ни' мэвэдо'. Сэдко хасавам' няхар" не пирибтэхури' небде манзаяцтыдо', пин' ханаңгудо', мят' тюленгудо'. Ялей нумгана пин' ханабато' мядо' синя' җабтасетыдо'. Пыркабтадо' нид харцарабтёсэти. Сэдко хасава пихи синганя хурканда янго харцаандыа янго пили" җамдёсэти. Си"ив ямб по' Сэдко хасава, няхар" не' помна сензерць иле.

Ся"ны' ңэбто' няхар" не пирибтэ ңопой яляхана няхар" нюм' ховы". Сэдко' няхар" ню яландо' хасава", хусувэ ялэдо' поңэ мэ"ядо'.

Сянд' - хунат' иле"мяхадандо' Сэдко' няхар" ню ңадя ңарма". Сэдко' няхар" ню хане хэбто' илебции" хор тэварасеты", таңы' ңэбто' пуно' менга тон' тибей поңгамдо' ңопой моб"то' ңоб" по' пират' мэдамдо' хадаби".

Ся"ны' ңэбто' Сэдко' ңарка ню няхата масьнё" вадами таня:

- Тебтэй яляхана ханд" ни"ивам', тодо' я' сеян' тарңгу" ни"ивам', си"ив по' ямбан' янгог" ни"ивам'.

Тебтанда няна Сэдко' няхар" ню ңэвто' серри' ядал" ни"дам'. Няхар" не пирибтэ си"ив по' ямбан' хуркаси" - хараси" харето' иле". Няхар" не пирибтэ хусувэ яландо' Сэдко хасавам' манзаяцтыдо', пин' илыбидо', мят' тюлебидо'.

Сяхари' ңэбта хувы" ңэвы", ңарка не пирибтэ сёнзянда манга хасавам' тэдорць пявэда.

- Иleva' ямбан' мякана ңамдё ханзер" ңули" ти нин тябиху". Хасава себяхав' хане хэна"нё", пихи сиңгана мэна"нё". Няхар" ню нисян пыдар нин ңа", няхар" не' хасава пыдар нин ңа", ханзер" тайку' нинди' яебтю". Тюкури илама' мэтахавахана" саваха" иланд вунина" тэваңгу".

Сэдко хасава тикита ямбан', ва"ав' сава ерня толида вэнгалы, вэва мунда янгугу, сава мунда янгугу. Няхар" не пирибтэ' Сэдко хасавам' сёнзято' муноць пихиня ханадо'. Мар' хоба' ниня ңамдё хаедо', сябарця' тубкамда ңыланда модо'. Яландо' ямбан' нямнанда юра" Сэдко няхар" не етри' тэдорңа". Хурканда янго, харанда янго Сэдко хасава си"ивнда яланда пихиня ңамдё"ңаниё".

Ся"ны' ңэбто' Сэдко' ңарка не няхата масьнё":

- Сэдко хасава тюлевэ ңэя, ваңгута ңэбта идада тута.

Нябитид тэва сававна манэць, Сэдко хасавам' яля ляд"мэда, мар' хоба' ни' тэринда' пудамэ". Тикахавахана Сэдко няхар" не ярдо', тёрдо' ңобт' вэтарьядо'. Сэвто' хаял" яси"

ендалаха", ясяда ямгато' хамдумбадараха". Сэдко' няхар" ню мякто' то"махад Сэдко нисямдо', нисямдо сюрнгадо', ңоб" ңэ нид саңглабтадо'. Сававна манэць Сэдко' няхар" ню тодо' иланд ха"мвэ" ңэвы". Сэдко' ңарка ню харад мивы, Сэдко' ёнэй Хаби' хой ңану пяхад хунгармэ. Сэдко' нюдя ню ха"йрим' пявы, ярка илебям' выңгна вадавэ. Ихиня харип" тиканда тарцянё". Сэдко' ңарка ню луца' нив ңа", Сэдко' ёнэй хаби' нив ңа". Ясяда явона", ңарканы" ясина" Сэдко' няхар не' хаял" ни"им' ңа".

Та' валакада.

10. Сидя Сэрм' Мэта

Я' хой ниня ю" мя". Нэсындо' ервота Сидя Сэрм' Мэта. Ся"ны үэбта үод" нэсындо' ервота поёрна. Ха-расяда ян' үэдалэй". Неранда няна үоб" мя". Мяд' хэвахана ю" ванде"э. Сидя Сэрм' Мэта ханамда ся-рада. Мят' яда. Сырада салмуй¹. Хуеряbt вэн' яда"ма, ты яда-махарт янгу. Мят' тю. Мякана вэсокохо', пухуцяха' үоб" ёхорт² үамдавэхэ'. Едэй товы хасава вэсако' си' няңгы хэван' үамды". Вэсако ма:

- Худ ядэртан?

Хасава вахальй":

- Тэри тайкуд ядэрнадм'. Мань Сидя Сэрм' Мэтам' ню-бе"үадм'.

Вэсако пухуцяханда ма:

- Едар пире".

Пухуця сяномбай санэй". Тумда түоне. Едм' үыда. Товы хасава сэварида мэ"ңа. Тяханяна, пелей' няна падавы вэно" небя сяравы. Нюкця венекоцяда танявы. Үули" париде. Пу-хуця үопой' таня худамй", тарем' ма:

- Тюку вэнеко' хани үули" налнэрна, ни тара. Мядондами ябсяламда. Си' панувна пин' мода. Үамгэ пирка"на еддо' пи. Үамзи теда. Пелей' няна үани' үоб" вэнекоця сярцей". Пуху-ця үопой худамй", манэ"үада. Сэр" вэнекоця үэвы. Хасава си' няңы хэван' мода, ма:

- Мядондани яб ! Хасава сенгабата сава.

Вэнекоця Сидя Сэрм' Мэта си' няңы хэвахана лябтарңа. Тамна сэvasи. Ңаворць ңамдыд". Ңани' вэнекоця сярцей". Пухуця сянамбой' тяханя' санэй", ма:

- Тюкохов хора сэр" вэнекоця ңэвы. Мань нюми.

Едамдо' ңамадо'. Сидя Сэрм' Мэта' ирида ядэрңа: "Сенғаңгодакэдм'.".

Хонэйд". Хуняна хубтахана юркыд". Пухуця вэсокохонда ма:

- Сенғнанд тэд хо"ин. Мань сенғняни мюдм' хурахадм'.

Пин' тарпаяха'. Мале пон' нись мы" хасава ңани' пин' тарпы". Пухуця ханяд ңамгэхэд ңадимдевакыда, юд' хурюдам' хуравы, тикита малан' нойтана ханм' хамэдавы. Вэсако хой' няд сидя юд' сэрм' вада та, таминанда мюдм' пуйда. Нойтана ханан' сидя сэр" хабтм' подерңа. Пухуця мяkad сэвасяда вэнекоцям' ңадимде, нойтана хан' ни' мода, ма:

- Вэсако, не нюомд сенғанани' пумна парабтаир.

Сидя Сэрм' Мэта ңэдалэй". Вэсако нойтана ханам' ненэця' пумна валңада.

Хасава ңоб" ңэдалавахана хая. Идя ядэрңа: "Вэнеком' ханя' минрев. Нини ха"манда""". Сидя сэрекоця хэувунанда хайнаңаха'. Нултади'. Не ханан' яльй". Ной пис' ңэвам' тю"уку' мэда. Сэвасяда вэнеко сэвармы. Ной пис' ңэвам' ңани' тасику' мэда. Ихинянда ма: "Ет' ханахав. Вэсакохо' пухуцяха' тавы мюдми саванё". Ңани мюдңэ мэнгү" нивав'.". Ңани' ңэдалэй". Ңамгэ пирка"на нултада. Идя ңани' ядэрңа: "Вэнеком' ханя' минрев. Нини си"ми писядангү". Ервотава" вэнеком' тавы.". Сидя сэреко"я хэувунанда нултади'. Хасава не' ханан ңани хая. Ной пис' ңэвам' тю"уку' мэда. Вэнекоця ңармы. Тэванда нид тёсьне, сидяри сэвамда мэ"ңа. Сидя Сэрм' Мэта ной пис' ңэвам' ңани' тасику' мэда.

Няхаромдэй тад манэ"манда ңоб" не есякохотата ңадядада яңгу, тю"уй сюрням' ядэланараха³. Тайнанда хунананда Сидя Сэрм' Мэ та мята хэувунна мюдм' сюртеда. Хасава' мята мюния небядада, не няда танявэхэ'. Няхар" пом' мэ"ңа". Сидя

Сэрг' Мэта не нюм' хо. Хасава ңэвы. Ся"ны ңэбто' ңод" нюди' ядэртаңэ хая. Хубтхана нехэнда ма:

- Тюку яля' мядонзь хандава".

Мяк" хая". Нерандо' няна ңоб" мя". Мяд' хэвахана ю" вандако. Ханади' сяржахада. Сыра салмуй. Хуеряйт ты ядама, вэн яда"махарт яңгу. Мят' тюңаха". Вэсакохо', пухуцяха' ңоб" ёхорт' намдавэхэ". Вэсако ма:

- Нюд" тю". Едар пире".

Намгэ пирка"на пихиня сенга" тёры"лаванодо'. Пухуця пин' сырна, тёрей":

- Вэсаков", тидяната яхана ханта нюми товы, неямда тавы.

Хасава мята синд ханамда мэда. Не ва"аванда тер пелей" нямна лехэбтэйда. Едамдо' ңамадо'. Хонэйд". Хуняна Сидя Сэрг' мэтанд немада хая. Пихиня ламбэй" пи"нари". Пин' тарпы". Пухуця ңани' юд' хурёдам' хамэдавы. Сидя Сэрг' Мэта ненда ня' мяканди' хаяха'.

Няхар" по' ңэсоңгана ңоб" ңэдалёда то. Хан' ңэ ңэван' ңэда хэбилеры". Сяквавнанда нохо' сяд хэв" хэвананарааха"⁴. Хэувунанда нултада. Мяцавэй ненэць' маси":

- Хибян ңэбат. Теда' тю"у' миндя ненэць' ңэвэн.

Мякад пухуцяда ңадимя:

- Сидя Сэрг' Мэта нена" са"лананё. Тики небой надоранё".

Не нянда савакм' екада. Мят' тюледа. Не ңани' ма:

- Нянд хан ңэдад.

Нопой пихив хасава сенга. Хуняна Сидя Сэрг' Мэта ңоб" ямб мюдм' хамэда, не нямда хасава ханада..

Ся"ны ңэбто' ңод" Сидя Сэрг' Мэта пухуцяханда маси" ирини сэвада ңадимя"⁵. Мэтари ханоти' ңэдалэйха'. Тайнанди' хунанди' ирихиюти' хадахаюти' мя"мна ңадимяха'. Ңока"я" ты" мядм' синдавы"⁶. Тыди' ңэдэйди'. Мякы мякана вэсакохо' пухуцяха' ңоб" ёхорт' ңамдавэхэ'.

- Пухуцёв" нюхуюд тоңаха'. Едар пире".

Едамдо' ңамадо'. Вэсако ңани' вахалъй":

- Сидя Сэрм' Мэта ңока тэр яңгунё". Пихи" ты" хуняна мяканди' танаиди'. Пелей' няңы падвы вэно" небям' таныр-цинданд ханаир. Мани' сидани' ңани' ниди' хонгут". Е"эмнянд ңадимядамзь. Тад нерня' вы яхананд илебям' пэртяңэ тараин.

Хонэйд". Хуняна ңаворо"махадандо' вэсако пин' тарпы". Ңока"я" тыда падвы вэно" небяхана сябаръяда⁷. Тей то"ма" ңу"мананди' тидахалейди'. Сидя Сэрм' Мэта ханамда подерҗада. Вэсако вахалъй":

- Ңэдалава" пирка"на хэб"нянди' пуня сырчади'. Тики нерцю нёди' сыр".

Хасава ты" пумна ңэдалэй". Иринда тавы вэнекода нись табэдамбю" илебя ёнарм' харта танабида. Ңэдалава' пирка"на хаяха'. Нултади' вэсакохо' пухуцяха' мяти' пала"мари ңади. Тэри ңэлта ңэвады⁸. Ңани' ңэдалэйха'. Тайнанди' хунанди' мяканди' тэвъяха'. Минревы тыди' тамна ңокамы". Хойко" пана", сэхэко' пана. Та' илельяд".

Та' малда.

Вади, вади" хара" хамэди'

¹ Сырада салмуй - ңобкарт ядама яңгу.

² Ңоб" ёхорт' ңамдавэхэ' - ңули" пухувэхэ, вэсэймэхэ'.

³ Есякохотата ңадядада яңгу, тю"уй сюрням' ядэланараха - сыдоротана, тя"нёнда еситана, сядота не.

⁴ Сякававнанда нохо' сяд' хэв" хэвананараха" - няръяна сякаданда саваканда сёбя' вар" няръянарахা.

⁵ Ирини сэвада ңадимя - иримда манэ"ман' харбелы".

⁶ Ңока"я ты" мядм' синдавы" - мяд' сиди"мана ңараханда ты.

⁷ Сябаръяда - танэйда.

⁸ Ңэлта ңэвады - ханяхартана ядэро"ма яңгу.

11. Есьтана поп вэсако

Параңода' харад' няби вэканы, маха левсей хардако' мюния маңгабада вэсако илевы. Няхар" хасава нюдя. Ся"ны ңэбта ңод" вэсако нюхата ма"нив":

- Теда' ңармаданё", тарем' ңэбта сава ңэдараха. Параңода' хардаха" недбятиванзь хэбта" сава. Нерде ңарка няра" хэя.

Нарка хасава нюңэ инзеле":

- Поп вэсако' мяд" хэрэбтэн", хальмер" нямна хэин.

Тад хуняна некадо' хая. Нисянда табеко"ма' сер' хая. Параңода' марцяхэхэ' маряд' нёхона нувэхэ'. Пыда тарем' маси":

- Параңода нянани тара. Параңдахана манзарана ни тара"?

Пыди' манзь ханади':

- Манзарана ни тара".

Тикахав нэя. Тарем' сырпата ялянда пакалмарыда хай. Ихинянда ма:

- Мякани хэб"ни сава ңэдараханё", манзаядами нивандархадамнё" ху".

Мята ня' ялй". Пон' яднакы, яляда сэя. Мунзи" идя ядэрја:

- Хальмер" нямна хэб"ни' пэбинё", поп вэсако тахав' ни" хона", манзарапида ңод' ңани' ни" хоню". Таняримна хэб"ни' сава ңэдараха.

Поп вэсако' мяд' нямна хая. Харад" няби вэк" ңод" тэвы", маханда няна есь" лаб"нам' намда. Тад сываванда маханда няна поп вэсако нувы. Поп вэсако ма"нив":

- Маңгабада вэсако' ңарка ню ңэт' ни' ха"мавэн. Ңамгэ сер" нид тюкон' тэвүн?

Вэсако' ню ма"нив":

- Параңодахана" манзаядами пюрць ханаңадамзь. Манзаям' нидм' хо".

Поп вэсако ма"нив":

- Манзаяхав тюкохона таня" ни"им'. Теда' мань ңудасяда, ңэсяда хасава нюми таня" нив'. Пыдар сите пин' тэварамбаин, мят' тюлебаин, ңавламбаин. Ңаворкава ңобкана мани' ңаворъини'. Ңопой мань ини сер', ватони сер' ңэин. Теда' мань ватоми' тарця:

- Ңопой по' ямбан' нянани манзараванд ямбан' вэва вадам' нянд ваде"пани, илебяни' няби пелям' нянд таидм'. Пыдар вэва вадам' мэпат, недбяси" хантан.

Тиканди' мят' тюңаха'. Едамди' пяңаха'. Лаханакурңаха'. Ңа-ворманди' сер' маңгабада вэсако' ню' хумда нянда син' ңод" мэнгудась, ңоб" лахананам' намда. Поп вэсако нянда маси":

- Маңгабада вэсако' ню манзаяр пядава.

Ңавормадавэй' манзаямда пяда. Манзара пэй". Поп вэсако' нюм' няхар" яля' манзая"ңада. Ңоб' ңавормадавэй' хаюрңа. Няхаромдэй ялянда ңэсонгана маңгабада вэсако' ню манзь ханада:

- Есьтана поп вэсако, мань теда' няхар" яля' ңавормадавэйдамнё", нидм' хангу"?

Есьтана поп вэсако няханда тарем' масынё":

- Теда' мани' тарем' тасламиси", няха"ни вэва вадам' ни-ни"сянё" вадет". Теда' недбяр яңгу. Хань"!

Хуркаси", хараси" мяканда хаё. Ңэванда нибкала мяканда тэвү". Маңгабада вэсако нюхунда масынё":

- Нер" мадамзянё", поп вэсако' мя"амна нён хань". Теда-хав' ханзер" мэнгува", ет' мале тарем' ерев" нив'.

Хуняна Маңгабада вэсако ёнэй нюхунда маси":

- Теда' пыдар паранода' хардаха" манэ"ир. Маси" манзаям' хонгун. Ҥопой неканд тутрев' поп вэсако' мя"амна нён хань".

Тад хуняна техэ яханда нэкалнада. Нянда тутрев' паранода хардаха" тэвы". Манзаям' җани' ни ху". Мяканда ядаванда сер" поп вэсако' харда"амна хая. Тикан' манзара лабцей". Няхар" яля' поп вэсако' ниом' җавламбид, пин', мят' тэволада. Няхаромдэй яляхана тэдолы", поп вэсако питарнада. Мяканда пуня' хая. Тэвы". Нисяда масьнё":

- Нена' вэвананё". Савахававна сит табэдамбидамзи".

Нари' теда' ниюдя нянди ёльцин э хая. Нисяда маси":

- Няхают то"олахан нинякэн җа". Пыдахартар няхают тутрев' тарем' нён җа". Манзаям' хобат җод", тарем' җод" поп вэсако' мя"амна нён хань".

Маңгабада вэсако' ниюдя ню мяканда хэбянда поп вэсако' мядм' хэрэбтада. Паранода' харад" помна яля' ямбан' ядэрнэ. Ханяхартана манзаям' хось я"ма. Ма"нив":

- Паранода', харта җыланда манэпа"ни' сава җэдараха.

Паранода' мят' тэвы". Паранода' сидя солдат сита нултаха'. Нянда' маңаха':

- Маңгабада вэсако' ни ханя' миҗан?

- Манзаядми пюдм'.

Паранода вэсакоход манзаям' ни ху". Тад пин' тарпа"махаданда яляда мале сэйвы. Идя ядэрнэ:

- Ханямна хэб"ни' сава җэбта? Хальмер" нямна хантадм"?

Тарем' сырпата поп вэсакода хонёдараха. Поп вэсако' мяд' нямна хэсь пяда. Тарем' яданаханда поп вэсако' мят' тэва, маханда няна җоб" лаханана тарем' мамононда:

- Маңгабада вэсако' ниюдя ню җаха" нэкалмэр!

Тикахав поп вэсако җэвы. Вэсако' ни тарем' ма:

- Ҙахакав' ханяв нэкал", манзаядми пюрнадамзь. Теда' мякани миҗадм'.

Поп вэсако нянда масьнё":

- Ҙоб" манзаякоми' таня. Тедари' мят' тюхуни'.

Тюңаха'. Сяйманди' сер' поп вэсако тарем' лахана:

- Ңудасяда, ңэсяда нюми манзая"ин. Теда' тарця ңэя, ңопой мань ватони сер' ңэин. Ватоми тарця: ңопой по' ямбан' нянани манзараванд ямбан' вэва вадам нянд ваде"пани илебяни няби пелям' нянд тайдм'. Пыдар вэва вадам' мэпат, не-дбяси" мяканд хантан.

Тарця вадам' намда"махаданда лаханана' мунм' намда. Тарем' ма:

- Итами тахарңада".

Маңгабада вэсако' нюдя ню итамда ми"ңа. Тикамда мале"мяхаданда поп вэсако' пухуця, нянда тарем' манзь ханада:

- Няр ңани' ңаворман' ни харва"?

Нянда ңаварад ми"ңа. Ңэсяда, ңудасяда ңаворңа. Яля ямбан' манзая"ңада. Хонэйд". Ңамгэ' пирка"на няда ма:

- Ваңган' си"ми хана".

Ханада. Танянянда хадада. Няхар" яля' нюди' мунзи. Поп вэсако ихинянда ма:

- Ңамгэ нюми мунзябата?

Манэ"ңада, ханяхартахана нюдя янгу. Поп вэсако пухуцяханда тарем' ма"нив":

- Тайкуй манзаранахавами тарси" тосакабтёвы. Теда' пи' мани' хунаба"ни' сава ңэдараха. Тарана ңамгэрикуд мал' тюку ңарка лабтей' мю' мэид. Сидяңэ та' ними' илаңгу"?

Ядэрманда сер' сундукам' манэ"ңа. Маңгабада вэсако' нюдя ню тосалъй". Ихинянда ма:

- Ханзеркав ңэвандаха' ңэдараха'. Хунувндаха' нийтим' ңа". Сундук' мю' лыңгараб" савараха.

Сундук' мю' хонаравы". Инзелебта сундукам' миневонди', тарем' мамонди':

- Тюку сундуками тарси" саңгово"мы. Тедари' ңаворкани'. Маси" сибимда.

Поп вэсако сундукамда тад нэда, маңгабада вэсако' нюдя ню тикахана хонёвы. Сэвада няңгарпа ма"нив":

- Ңавортава"?

Пухуцяха', вэсакохो' няхати' тэри сырнхаа'. Поп вэсако ма"нив":

- Ет' ңаворкаво". Ханзер" ңэнгугва" ти', пэвсюмянё".

Ңаворна". Ңаворць малесь ңани' яльяд". Ңамгэ' пирка"на немдо' то". Нумда пилибт" пэвсюмая. Надо' сюмб" ни' та' хонэйд". Ваңг' няна вэсако' ню' хан"ман' тарем' таслади':

- Пуна пыда надо' вар' няна хонёи. Хонара"махаданда надо' ңыл' тирцедеир.

Маңгабада вэсако' нюдя ню ванг' няд ңоб' инзеле. Хонэйд". Няхаюда пон' се"нэрмонди". Тахав' хонарэйха'. Няхаюта' понд' юсибитэй". Пухуця надо' ня' еремя. Поп вэсако нянда ма:

- Няр тяха' тирцидед !

Пухуця"я' тёррида хая. Юрк"махаданди' няди' янговы. Сидяринэ хайхи'. Поп вэсако вэсако' нюн' ма:

- Пухуцями ңамгэ хадар? Ңамгэ надо' ңыл' тирцидер?

Вэсако' ню масьнё":

- Харт манзянё", няр тирцидед! Тад' ңо' ңэсь ңо' няхани вэва вадам' мэ"мандани' нинизянё" ңа".

Поп вэсако ңопойринэ хай. Маңгабада вэсако' нюдя ню мяканда хая. Ся"ны ңэбта ңод" сидя солдат паранода' няд төвэхэ'. Пыди' тарем маңаха':

- Маңгабада вэсако' нюдя ню паранода сит хана.

Ет' вэва ңэ" нив'. Паранодахандо' няхарнэ хая". Танянандо' тэвыйд". Сер" тарця" ңэвы": есътана поп вэсако, паранодан' падарм' падвы. Тарем' падвэда:

- Маңгабада вэсако' нюдя ню нюми, пухуцями хада. Судевы ңэя!

Паранодада падарм тарем' толада. Вэсако' ню тарем' ма:

- Сер' тарця" ни" ңа". Поп вэсако харта вэвась. Нюданда пэртяда харта си"ми хадаба пясь. Тикахад пухуцянда ня' харти' си"ми хадаванзь таслаңаханзь. Хонаравани сер' надо' ңыл' си"ми тирцидеван' харваңаханзь.

Параноданэ теда' савовна инзеле":

- Мань нумгад ядэртадм'. Ҥари" теда' маңгабада вэсако' нюдя нюм' нумд' ханавась. Пыда теда' хэвэхэми ти. Ҥабцата поп вэсако вэвовна иленя. Ҥока ненэцям' нельтесь. Нюданда вадетала хунорта, ӈани я' луца.

Параңода тад нянда сырңа, һоб" ю' маңгабада вэсако' ню' ня' сидибы нити' то"олахаха". Тарцям' намдахава, манзакава параңода тарем' ма:

- Ненэся вадар ӈэвы.

Поп вэсако муунм' ни соя". Параңода сидя солдатаханда манзъ ханада:

Поп вэсаком' тяха' ханари', нён си' сидя хэван' тебарңари'.

Тикахавад та' пя"аларади". Нум' яханда хая. Параңода маңгабада вэсако' ӈарка нюм', няби ёнэй нюмда марцихэданда мэнжахаюда. Вэсако' нюдя ню поп вэсако' илебцом' мэ"ла". Попңэ хая. Та' илельяд". Маңгабада вэсако илебям' пэртяңэ хая.

Та' малда.

12. Василеция

Василеция сэвата ңадиво "махад пили" хонёсты. Мэта мядикода пирдавнанда, латадавнанда, хундавнанда нянда ёльцевэдарев' ңули" та' мась.

Ңэванда хэвахана порцанда хороко ңамды. Ңаворман' харбилабата порцанда хорокон' ңумбаямда палабтасеты. Ңумбаямда нянзаңгу. Ңаворман' харвабцода ваерасеты.

Василеция' ңоб" илевада вуни ңа", нёнда син' саңода ха"мы". Нёнда сихина, няръяна тёняко. Тёняком' манэ"манда сер' ңаворман' харбилы". Ида ядэлы":

- Тёняком' хадаба"ни ңаворт" нидам'.

Инда ядэробцон' Тёнякор вахалъй":

- Василеция, си"ми' нён хада", ңобкана илехэни'. Пыдар юрка я"амаранё", ханенаданд тараходм'.

Василеция тёняконда ня' ңобт' илелъяха'. Тёняко ханесеты. Ңоб" ханевада вуни ңа". Тёняко ханеванзь хая. Си"ив яля' янгу. Си"ив ңэсонгана тэвы". Тёнякор маси":

- Василеция, яр ханедасяда я ңэвы. Си"ив' хуна"мана сюртев, ханесэйм' нидм' ху". Хабэвку - пайдык" нелукохоби тэврадм'. Хабей' таңгоцяңг" тэворңадамзь, тэри нихиванда порцам' ңав" нидам'. Ңацэкэдо' соясь. Нюрте"экоңэ нюмдедонзь.

Василеция' вадада янгу, хабэвкути' - пайдыкти нелуку ңамаха', хонаяха'.

Нув' ялэмгава Тёнякор ңани' хая. Теда' хэванда сидя си"ив' янгу. Сидя си"ив' ңэсонгана тэвы", хабэвко' - пайдык' нелукуци тэвара. Тёнякор маси":

- Василеця, яр тарси" ханедасяда я ңэвы. Сидя си"ив хун"мана сюртев ханесэй хонами яңгу. Хабей' таңгоцяңг" тэвэрнадамзь. Тэри нихиванда порцам' ңав" нидам'. Ңацекэдо' соясь. Нябимдэйкоң э нюмдедонзь.

Хабэвко' нелаку ңамаха', хонаяха'.

Нув' ялэмгава Тёнякор ханеванзь ңани' хая. Тедахав' няхар" си"ив' яңгу. Няхар" си"ив' ңэсонгана, Тёняко то'. Хабэвко' нелукуци' тэвра. Тенякор маси":

- Василеця, яр ңоб" ханедасяда я ңэвы. Няхар" си"ив' хун"мана сюртев, ханесэйм' нидм' ху". Хабей' таңоцяңг" тэвэрнадамзь тэри' нихиванда порцам' ңав" нидам'. Ңацекэдо' соясь. Пуданакоң э нюмдедонзь.

Тёняконда вадаха" Василециянд ида ядэлы":

- Тёнякоми няхар" ханеванзь хан" ңаси". Няхар" ханевахананда ханесэй тэваранада яңгуси". Масынё", хабей' таңоцяңг" тэвэрнадамзь. Тэри' нихиванда порцам' ңав" нидам'. Ңацекэдо' соясь. Нюрте"эйкоң э нюмдедонзь. Тикахананда порцани юрте"эй хораком' ңамлахавынё". Нябимдэхэнанда маси": «Хабей' таңоцяңгана порцам' ңамадамзь. Ңацекэдо' соясь. Нябимдэйкоң э нюмдедонзь. Тикахананда нябимдэй порцани' хороком' нив' ңав"». Няхаромдэйхана маси": «Хабей' таңоцяңд' тэвэрнадамзь. Тэри нихиванда порцам' ңав" нидам'. Ңацекэдо соясь. Пуданакоң э нюмдедонзь"». Тикахананда порца"ни хорако" пуданамдо' нив' ңав". Тёняко теда' хад' си"ми хада. Порца"ни хорако" илевани ямбан' ңавормандини' нися"ам' ңа". Тёняко нена" нерцькабставонда. Нёхов хада".

Тёнякор Василециянда ладва' нерцю' пин' санэй".

Василеця' мядико хой сид" няю' ха"морта еси" малахана ңэвы. Нюдяко' мядиконда нён' сихид неро яха ха"амавы". Тёняко Неро яхам' ха"avra нявоты". Танянанда хунананда нёдана яхада тальбяте"э яхаңэ хая. Неро яхако' тальбете"энэ хэ"мяхана, хуңг лабэхэй ңаном' хо. Ит' тирцедеда. Тёнякор няби ңэмда тор"ңэ мэць яха' ендал' сер' ху"лэй". Сидата няна

хуркари" җамдэдо' тэнз" хаюрңа". Тёняко таняхарт' ни сыр". Сянанд' мимбата җод" нултада. Ҙамдэдо' тэнзахат җамдэдо ныда"җа". Ҙаномда җамдэка"на пандада. Ендар' җабтани' сидя җэмда лабяңэ мэць нэкалңада. Неро яхаконда Неро яхаң эхэ"мян' нултада. Ян' санэй".

Тёнякор неро яхакомда танда җэвамда паңгаць нявоты". Василециянда нё' син' җэда мадаръяда. Тёнякор Василециямда юркабтамба пядада. Нябинд намдортада яңгу. Тёнякор Василециянда җумбаям' сякалңада. Василеция едям' намда. Лэрё санэй". Ҙумбаянда вэям' манэць Василеция нензюмия:

- Тёняко тарси" нерцькабтавонда. Порца"ни хораку җаво"махаданда теда' җумбаями сякалңава. Тиканда е"эмня нирвав хада".

Тёнякор Василециянда ня"амава' нерцю' пин' санэй", Василеция Тёнякомда ня"ама пубтада. Теняконда пумна җани' пин' санэй". Тёняко Неро яхамда ха"авра нявоты". Василецияр Тёнякомда ня"ама пубтасетыда. Тёнякор хунг лабэхэй җанокохонда җэда мадаръяда.

Тёнякор маси":

- Си"ими вунин хадаңгу". Теда' хандани'. Ҙано' ни' тид".

Тёнякор яха' ендар' сер' җанонда пыям' сюргеда. Няби җэхэнанда ненземдамбидада. Неро яхаконда тальбите"энэ хэ"мяхаданда, Неро яхада танянанда хунананда Итя Ҙабтена ямд' җадара. Ендана сатан' җанонди' тэваванда сер' Тёнякор ма:

- Василеция, җамдэдод ит' моёсан".

Василеция җамдэдо ит' мохова, Тёняко я' няюв сидя җэмда лабяңэ мэць лабяхалңада.

Минданди' е"ня паражода' мар" танмэраха". Ямд' җыхытана саля җэвы. Саля' малахана паражода' җану" есерето' пя' җо харвараха". Тёнякор паражода' марад' варан' нултада. Тёнякор маси":

- Василеция, пуна паражода' хардан' тюб"нани ханяхартамна нён сыр". Паным' табто', панэхэт нён сылаңг". Ҙавор-

манд сер' ңаварат пел няни тамбаид, сяркам' пэрпат сяркыт пел няни хамдапаид. Ңули" мунзянин. Мань хар"н лаханаңгудм'.

Параңода' хард ё"лава вуни ңа". Параңода' хардан' яльяха'. Мят' тювахана хара вуни таня". Параңода' ялей ңавормада ңэвы. Параңода маси":

- Ңавормани' ёльциңгана мякани түңга вато янгуси". Тад ңо" ңэсь ңо" мань мар"ни терди' нидинё" ңа".

Тёняко манзь ханада:

- Ся, ся, ся. Тарем' нён лахан'. Тён' хэнорота Василеция параңода, нензюмда. Василеция параңода лаханана ни ңа". Мань вадам' пэртяданда ядэрҗадм'. Тад' ңэбта ңод" Василеция параңода сямянахат тэта параңода. Ңабцакаванда тён' хэнорота Василеция параңода хубта янда пойм' ңоб" не нюнд ед' мададась. Теда' хорабляда тахара еремя. Тай', сыркар" ңанонда мюня пэнёвы ңамгэрида техэти", яв' ендакана хэня".

Параңода маси":

- Тикахавахана ма"ла тара ни"им".

Тёнякор манзь ханада:

- Хуркари" ңэя". Пуна Василеция параңода нензюмда. Таня хэя". Яхананда товарада ни янгу". Ңопой ңано' тер" пыда нянанда товараңэ ни' толю". Илебцада харта иланганды мале мась ханя' ңа", тамна нюта ню", иланд' мась" ңэнгу".

Тёнякор маси":

- Параңода, нинав сыр", Василеция параңода' паныда вэва"нё", панэдада мис". Сава' паныда ңанонда тахара икана хая".

Параңода паным' ханя мис". Тёняко ңани' хонарада:

- Хурка, не нюмд Василеция параңода' неңэ митар?

Параңода таси' нибкалий". Ңамгэ нибкалавамда ёльце"махаданда ңэвамда ила. Параңода манзь ханада:

- Нэнэся параңода ңэбта ханяв мис".

Параңода' маха' няд, пухуцяда мунота нись со' вахалий":

- Не нюр мит, манё" сямянахат тэта парандыа. Не нюми' сава илангана нив' илэнгу".

Мунзя"махаданда парандыа маси":

- Мядонгава". Таминна" тюнгуву"ма".

Василеца һаворманда сер', һаварата пелякоци тёньяконда ня' син' мосетыда. Сяркам' һэрпата, сяркыта пелякоци тёньяконда ня' син' хамдасетыда. Василеца ся"ны тарця паны мэ"мы, һаворманда сер' саңода панэрихита ханџа. Лэмбара-хананда парандыа сяд" тодана турала".

Парандыа тарцям' манэць маси":

- Парандахарт няр һэбтав'. Һаворманда ямбан' панэрихита сырџа.

Тёнякор вахалй":

- Ся, ся, ся. Тарем' нён лахан". Василеца парандыа нензюмда. Панэхэта сылангабата, тикахана харта серманянда пин' харва.

Тёняко Василецимда пин' валнада. Пин' тарпаванди' сер' тёнякор маси":

- Тарси" вэван нин һа", мадамзи", панэхэт нён сыланг".

Тёнякор сид" ня' па"наруй пям' ясяңа, Василецинда луху' сивня пакледа. Мят' тюнхана". Си"ив яля' мядонч". Си"ив' пирка"на Тёнякор маси":

- Мядонзь мась һэя. Василеца парандыа' янда понда хубта. Василеца парандыа һаноси" яханда вуни ханд". Тад һо" һэсь һо", не нюр тэри һанохона вуни ханд". Сямянахат сава һаномд митнакэн.

Парандыа маси":

- Пыдар вадавнанд һули" сава.

Тёнякор тарем' ма:

- Маня" нерня' хандава". Василеца яханда тэва"махаданда түнда хамэдамбаңгува". Пыдара" һануна" сэйма' ед' харта' тутада"ма".

Тёнякор хораблянда есере һыда, Василециханда масьнё":

- Параңоданд' не ню' ня' җанонди' мю' тюди'. Мань ям' хар"н теневав.

Тарця вадита пуд Тёнякор хораблянда торан' санэй". Җамгэ янда ед' җэб"нанда җод" торамда неземдембид. Си"ив яля' миңа", си"ив' җэсоңгана яв' ерня җэда җо' нимня җадимя". Җохона ялриндо' җоця". Җоцяхат җо нюдялеры". Тёнякор җо ядувна хынахалада, тёрм' җэдабта:

- Тюку" хибя' җоця" җэдакы"?

Манзарана" җобт' вахальяд":

- Я' мэдохо', ид' мэдохо' җоця"!

Тёнякор ма:

- Тарем' нёда лахан'. Пуна" няна саюв" миңа". Сидда" хадаңгу. "Манд" нидам":

- Тён' хэнорота Василеция' җоця".

Манзарани" җэвдо' ха"моңга":

- Тарем' манзакэва".

Тёнякор есеретана җанонда торам' җани' тидахаледа.

Җани' си"ив яля миңа". Си"ив' җэсоңгана җани' җо' нимня җадимя". Җохона ялриндо' хорова". Хоровахат җо тарка. Тёнякор җо' ядувна хынахалада, тёрм' җэдабта:

- Тюку" хибя' хорова"!?

Манзарана" җобт' вахальяд":

- Хибя' хорова" җэнгу" я' мэдохо', ид' мэдохо' хорова".

Тёнякор маси":

- Тарем' нёда лахан". Пуна" няюна саюв" миңа", сидда" хадаңгу". Манд" нидам":

- Тён хэнорота Василеция' хорова".

Манзарани җэвдо' ха"морңа":

- Тарем' манзакэва".

Тёнякор есерета җаномда җани' тидахаледа. Җани' си"ив миңа, си"ив' җэсоңгана миндандо' ед' җани' җо җадимя. Җо юнохот тарка. Тёнякор җо' ядувна тидахаледа. Тёрм' җэдабта:

- Тюку" хибя' юно"!?

Манзарана" җобт' вахальяд":

- Я' мэдохо', ид' мэдохо' юно".

Тёнякор маси":

- Тарем' нёда' ман". Пуна' няна саю" миңа". Сидда" хадаңгу". Манд" нидам":

- Тён хэнорота Василеца' юно".

Манзарани" ңэвдо' тue"ңa":

- Тарем' манзакэва".

Тёнякор си"ивм' есерета ңанонда торан' ңани' санэй".

Намгэ хубта янда ед' мимба"нанда ңод", си"ивм' есерета ңанонда пыям' ненземдада. Си"ив яля' миңа". Си"ив' ңэсонгана ңарка я' нимня пили" ңадимя. Я' сяд' ниня паражода' марад" тан"мэраха". Сэв" хунамана ңаражанда харад", Тёнякор ңану' нулаңгалава' малан' нултада, Василеца-ханда тарем' маси":

- Пыдари' товани' ңэсонд' ңанохонанди' мэди', мань пон' нидм' яңгод".

Тёнякор ңанонда варахад пул' ни' санэй". Марад' ня' ня-воты". Харад' хэважана манзарана луци хо. Тёнякор хонрэй-да:

- Тюку хибя' мар"?

Манзарана" ңобт' вахальяд":

- Хибя' мар" ңэнгу, я' мэдохо', ид' мэдохо' мар" ңэ" нив'.

Тёнякор ңани' ма:

- Тарем' нёда' лахан". То"мана" мюмня саю" миңа". Тарем' лаханаб"нанда сидда" хадаңгу". Манд" нидам', тён хэнорота Василеца' паражода' мар".

Манзарани" ңэвдо' ха"морңа" тикахавахана тарем' манзакэва". Тёнякор маси":

- Марта" тер" мал' хонарэйда", ехэранадо' яңгоя'.

Параңода' харад ё"лава вуни ңa", Тёнякор паражода' хардан' тэвы". Мят' ханя' тю", мяд' малахана я' мэдо, ид' мэдонда' ня' хартармэхэ'. Тёнякор нё' сихид тёрей":

- Тамна' хартарңаха' хаванзь пяри', саю" то". Сидер' син' сырңади'.

Я' мэдохо', ид' мэдохо' сидер' син' санэйха', ненасянда ңод" ид' маҳа' ниня' ңока" ңано", есеркатато' нув' няби панм', ңэрм' тирдарев' тидтевыдо', есерето' пя ңо' харвааха". Я' мэдо', ид' мэдо' тамальрихина сейди' хая", ңобт' вахалъяха":

- Нена" ханинё', мар"ни' понд' иб" лыңгараңони', сидни' хоңгу" ни"им'.

Тёнякор маси":

- Лыңгара ям' мань теневадм'.

Я' мэдохо', ид' мэдохо' ңэвади' ха"морңа":

- Тикахавахана сидни' такал".

Тёнякор маси":

- Сидди' такалкадм', саю" хэ"мяхад ңани' тутадима, пухуциди' ңани' тояха'.

Я' мэдомда, ид' мэдомда харад' варан' тарпараңахаюда, харад' вархана ңув' ңонер" танявы. Тёнякор маси":

- Тюкон' пакалъяд'.

Я' мэдор, ид' мэдор пухуцити' ня' ңув' ңонерт' пакалъяд". Тики" пакалкава, Тёнякор ңув' ңонерм' пяхана ңонада, тодабцяңэ пятада. Я' мэдохо', ид' мэдохо' та' паражаха'. Тёнякор ңоб" мирдей": "Ти сидди' тарем' мэнгосадм'.".

Тёнякор ңанохонда нявоты", пул' малан' ңод" тэвы", тёрм' ңэдабта:

- Марад' тер", инзеледа" я' мэдохо', ид' мэдохо' сян' нихи' тут".

Марад' тер" яр' варңэ ңобт' вахалъяд":

- Тёняко, нув' ненэцянд, я' мэдохо', ид' мэдохо' юд' по' ямбан' ңаворци сидна" танарамб"даханди' марна" няхаромд"мартида хай.

Тёнякор маси":

- Параңодаданда тён' хэнорота Василеца паражода тараңгу, муңганда намдорңада".

Марад' тер" ңобт" вахалъяд":

- Сава паражодан' ханява" намдор".

Лаханакор паңода' няна хая. Паңодар ю" ңаном' хамэда, ю" ңано' сер", ңэсында' тер" тись пиртяхабидо' мал' пэнъяда. Паңодар, Василеца' ңано' сэйма' ед' ңануда тидахалейда. Си"ив' миңа", си"ив' ңэсоңгана ңо' нимня ңадимя. Ңом' манэць' паңода торам' пэртяхата маси":

- Я' някумна хинахалара".

Тёр' сова хунат' тэвахава', паңода тёрей":

- Тюку" хибя' ңоця" уэдакы".

Манзарана" ңобт' вахальяд":

- Сян' хибя' ңоця" ңэнгү", тён' хэнорота Василеца паңода' ңоця".

Паңода' пухуця вэсакомда маханда няд' ңоб' сухудада:

- Сеня' мадамзянё", не нюр мит, ийми' ханзер" тэта ңэдараха, нинав сыр", ңоцяхат ңо тарка, ңани' илебцанда таняб".

Паңода мунм' ни соя", торам пэртяхата маси":

- Тяха' мэра".

Ңани си"ив' яля миңа", си"ив' ңэсоңгана миндандо' ед' ңани' ңо ңадимя. Ңо хороваха"на пана"ңа. Паңода маси":

- Ңо' някумна мэра".

Тёр сова хунат' тэвахава паңода тёрей":

- Тюку" хибя' хорова"?

Манзарана" ңобт' вахальяд":

- Сян' хибя' хорова" ңэнгү", тён' хэнорота Василеца паңода' хорова".

Паңода' пухуця ңани' вахальй":

- Вэсако", сеня' мадамзянё" не нюр мит, ңамгэ сава иланд' тэ- ванарыхы".

Паңода мунм' ни' соя". Торам' пэртяхата ңудам' санабта, паңода хорабля ңани' манзада. Си"ив' яля миңа", си"ив' ңэсоңгана ңани' ңо' нимня ңадимя". Ңо юнохот тарка. Тёр сова' хунат' тэвахава паңода тёрей":

- Тюку" хибя' юно"?

Манзарана" вахальяд":

- Сян' хибя юно" ңэнгү", тён' хэнорота Василеца па-раңода' юно".

Параңода' пухуця маси":

- Не нюми ханзер" сава иланд' тэванарыхы", нинав' сыр", ңо' юнохо"на пана" ңанё", Василеца' ңавэн' тюкури" илебцада ңэдакы".

Параңода' хорабля ңани' манзада. Си"ив' яля мина", та' ңэсоңгана ңарка я' нимня пили" ңадимя". Я' ңадимзь па-раңода' ңано' есередо' тамдъядо'. Пул' малан' нултадо'. Па-раңода пухуцянда ня' ян' ха"маяха", неры хэувунанди' солдат" ной танцеи лехэбтамбидо', пуняңы' хэувуна тамдапидо'. Ной танцеи' нимня ядаванди' сер', муунута нись со" параңода' пу-хуця маси":

- Сеня' мадамзянё", Василеца па-раңодан' не нюр мит, ни-нав' сыр", марта сяңар, пыдар марканд тасла ңяхар" таңар ңэнгү. Не нюми' тедахав' ханзер" сава иланд' тэванарыхы".

Параңода' мунда яңгу.

Параңода' ңэсы' тер" сидто' то"олаха нито' мят' мядо-манзь хая". Параңода пухуцянда ня' Василецианди мят' ханя-ха' мятю". Василеца' мяд' мюм' сэв' хаю" ңада. Мядонзь ңамдыд". Тюку мядомандо' си"ив' яля' мядона", си"ив' ңэсоңгана па-раңода маси":

- Василеца, ңули" савована мядоңава", мась ңэя, ңани' похона мядоңыива". Мар"ми пон' ерvasi, хурка вэва им' мэта яңгода. Яхани пяңгув.

Параңода' хорабля' тер", хораблито' есере ңыда", ңавэ яндо' ед' ңэбто' ңод" тидахаледо'.

Параңода' хэ"мяхад си"ив' иле", та' ңэсоңгана Тёнякор маси":

- Василеца, мань ңод" яхани пяңгув. Савовна инзеле": ңавнанда нисяр танясь. Сямянахат тэта па-раңодась, тюку мар" нисянд мараць. Сеня' мимб"нана" ңяхар" ңом' ховаци". Ңохона ңоця" таняци", хорова", юно" тики" нисянд илеб-цаць. Юнда' ед' я' мэдохо', ид' мэдохо' манзадаңаханзь. Тэри

ныхыхавахана ханзер" хадавнади', хара не"элтат', не"элтединзь. Я' мэдохо', ид' мэдохо' нисянд марат' мядонзь тэваяханзь, мяноманди сер' нисянд хыдя' мю' ңабадм' мэнханзь. Нисяр, небяр тарем' хась еремяханзь. Нисямд хада"махаданди' илебцада пыди' ңудаханди' ха"аврэйдинзь, пыди' илебцаданди' пили" хаяць. Пыдар сит хада я"ма лэтатада тибя нярава тинан' сюрцахама. Хою' сидня' ха"морта еси" малаха" сит ханаңаханзь. Тинар сеней хонё"мяр ти, пыдар мя"ңэ пэрмакэр. Лэтатада тибя нярава тинамд юд' по, тибяхана сипивась. Юдимдей похонани ядаханда си"ңавась. Тики тинар хабцядаданд тинаданд сертавэдинзь. Тарць' харахана тюку мар", пыдар мара"л.

Василеция, нинав' сыр", харад понгана терсяда" харад" танянё", тахабтаванзь табэдан". Тики е"эйңэ темд вадюдана" пэ' харад сертая". Ңэсынд тер" маңгабададо' янгоя, хусувэй хибя пир"манда пирувна манзарай", манзара"мамдо' сававна недва"лебан". Хибя серм' серта"манда пирувна ңэсынд тер харт судебан'. Ңэсынд тер ярдамбавахаданд нидм' ехэраңгу". Пыдар ханяңэхэна хэхэ' мяканд тюңгаңгунава, вади"ни вала-кадо'.

Василеция, тёнякомда пюла, сидта' ня' сылы", ңамгэхэрт янгу. Василеция тёнякомда ёць, мяканда хая.

Василеция манзаранита ервота, солдатта ервота ңобт' ма"лэйда. Василеция маси":

- Мар"ни понгана сяյок тахабэй харад таня, тахабтаванзь табэдэйда", тики е"эйңэ едэй пэ харад ңэсы' ңацекы сертаванзь табэдэйда".

Василециар тёняконда хэ"мяхад няхар" по' иле. Няхар" по' ңэсонзь, Василецианд хувы ңавормамда мале"махаданда, ңамдёванда' сер' ида ядэлы":

- Ңавнанда тёнякоми таняси", ханяна мэбта.

Ңэта ни' санэй", пин' тарпы". Хардата помна сэврита сер' ялай". Тюкы' манэ"манда марта ңаражанда пэ' марңэ хэвү. Купец луца", маңгабада луца" ханяна илева' пунда янгу, ха-

рад" мал' ңобтолсадо'. Харад' помна яданаханда манзарава' ёльцяңэ хая. Харад' поңгы луцаханда пана"ңа. Василеция тарем' сырна купец луца", манзарана луца" ханяңы' ңэвандо' пунда янгу, мал' ңобтолсавна ембды". Тарем' яданаханда марта варан' тарпавы". Мартаварахана макодада енэхэй' хэхэ' мя" танявы. Василеция ихинанда маси":

- Тюку хэхэ' мядм' ңэсыни тер" нивыдонё" несэймда", ңамгэ нивы ңэбто' несэймда"?

Тэри ңод" манэкарцяв. Мят' ханя тю".

Луци" хэхэ' сидяңг манэсала. Хэхэ' мяд' мюмня ядэртажанда хэхэ' сидяңг мал' манэ"яда. Пин' тарпангуць ңо", нё' си' хэвахана вэсако луца' сидяңг' сэварида лябо"ңа". Василеция хэхэ' сидяңган' сэварида пявы. Хэхэ' сидяңгм' мание Василеция нерняку' танасеты", пуняку хэсеты. Вэсако луца' сидяңг' ёнда текабтё, тиканда вахальй":

- Василеция си"ми теневан.

Василеция маси":

- Сит' хамэдамбахава хамэдамбидм', ңавнанда тёнякоми танясь.

Тёнякор вахальй":

- Хамэдамбават сава, си"ми ңадьбята хамэдан, няхар" по' ямбан' иле"мар сава, ңэсынд тер нид ярдамбю". Невыхы нисянд тотрев' сава парандан ңэнговэн. Ңабцаквата тёнямд нидм' ңа", нум' вэсакодм', теда' пыдар е"эмнянд тёнякоң ңадимядамзь. Я' мэдохо', ид' мэдохо' нена" маямана сит хадаванзь пяңаханзь.

Нум' вэсако маси":

- Василеция, темд нерня' нини' нема юдэхэна хомбахани', мань хэхэ' мякана луци" туё" цяңэ тараңгудм', хэхэ' мят' ядан' си"ми манэтанава. Тики хэхэ' мядм' сян' нир хонгу".

Василецир тад ңэвамда тю"уку' мэда, ңамгэхэрт янгу. Хардата варахана нувы. Ихинанда маси", хонёвакэдм', тёнякоми манэтараҳадамази", маси":

- Хэхэ' мят' ядан' си"ми манэтан.

Василецяр хэхэ' мяканда хая, ненэсянда ңод" хэхэ' мята ядахана нум' вэсако' сидяңг танявы. Хэхэ' мякана нуванда' сер ида ядэлы":

- Нум' вэсако яңговы ңэб" тюку мар"ми я' мэдохо', ид' мэдохо' мэ"манда ңэвүнью".

Василеця мяканда хая, мяканда тэва"махаданда я' параңданж хая. Тюку тенд яхананда иле.

Темд нерня' я' мэдодарев', ид' мэдодарев' илена яңгоя.

Та' малда.

13. Сидя не

Сидя не илевэхэ'. Ханахавади' - ю" вандако. Сэвати' ңадимзь мяти' мюня ян' сидярихи' ңэвэхэ'. Тэди' луца ю" ёнар". Тайкуна џахакуна тицянати' мяд" таня".

Сяны" хунат' илебати' ңод", нябакоюм' есята ңэвамда та"нёмба пяда. Сепъя хавопида яля' иняраха'. Ңэва"ямда та"нёё"махаданда няханда вахалъй":

- Ңэвамд ңани' есята та"нёңгав.
- Ңэвами нёр та"нёй".

Нябакоюм' яля' ямбан' сэкта:

- Ңэвамд та"нёңгав.

Ся"ны' ңэбта ңод" нё' няюв' вэн" төрэйд". Тарем' сырпа"ни, ңоб" ңэдалёда. (Лаханаком' мэтаңэ нюдяюм' не хая. Тад нерня' пыда лаханаңгу).

Сидя хаво" ний" нойтанараха", сэр" саваканда пыв' хо"ма янгу. Ҥарка Хопляв тиля"яв ңэвы. Ханамда сяра мят' тю. Ҥамгэ лахарёмда мале"мяхаданда нябакоми хана. Нябакони хэ"мяхад ялэ" ярнадм'. Яртахани сэвани тыра".

Ся"ны' ңэбта ңод" вэн" ңани' төрэйд". Пин' сырнадм'. Нюдя Хопляв тицями товы. Ханамда сяра мят' нив" тю". Тицяв маси":

- Нянан ту".
- Мань нидм' тут".

Тиця"ями си"ми ня"амара пя, тум' сюрте си"ми нёраку"ла. Тарем' си"ми нёракутаханда пин' тарпыв". Ҥарка"я мя"ми сюре"ле пядм'. Ҥарка"я мя"ми мярыбаб" ҥарка

ңэсеты. Иланэ пясь тарода яңговы. Луца' ю" хурёдам' сюре"ле пяни'. Хурабава' мальңгана ңока"я ңэсеты". Ңока ты"ни' няюв варцятеv. Тидя"ями тамна си"ми нёда. Ңока"я тыни' сюре"ле пяни', ма"ламбаб" ңока ңэсеты", иланэ пясь - тародо' яңговы. Тикахавахад яркосавэй' харасядада ян' варцятеv. Тидя"ями си"ми ня"амварида хаи. Ңаво" пирка"на нерни' няна хабэвку манэ"ңадм'. Ңули" паромба поңгандо си"уаяв". Хабэвконэ пилибт" хаядм'. Та' илелъяв".

Та' малда.

14. Няхар" ненэй не

Няхар" ненэй не ядавы". Ядаванло' сер' ңарка ненэй не' те"мецянда екара. Те"мецянда посова салик' ет' е"ңалё сярыбида. Те"- мецянда сяра"махаданда салика"яда сидя ян' яңгара. Салик' мюд парнэко не"я ңадимя. Парнэко не"я ма"нив":

- Нябаков", ңобкана ядахава".

Ненэй нер маси":

- Нёхова".

Парнэко иянда сят' санэй". Иянда сядм' тид", няр" хаде"ңада.

Ңарка не манзь ханада:

- Тяханд ңод" ядахава".

Ңани' яльяд". Сянанд хунат ядбато' ңод" ёнэй ненэй ненд те"мецянда екара. Посова салик' ет' е"ңалё те"мецянда ңани' сярыбида. Е"ңахалманда сер' посова салика"яда ңани' яңгара. Салик' пахаңгад ңани' ңоб" Парнэко не"я' ңадимя, ма"нив":

- Нябаков", ңобкана ядахава".

Няби нер маси":

- Нёхова".

Ёнэй ненэй не ненда сядм' Парнэкор ңани' тид", няр" хаде"ңада. Нер ма"нив":

- Тяханд ңод" ядахава".

Сянанд хунат ядбато' ңод" нюдя не ияндо' те"мецянда ңани' екара. Посова салик' ет' е"ңалё ңани' сярыбида. Салика"яда сидя ян' яңгара. Посова салик' пахаңгад Парнэко не"я ңадимя. Тикахаваҳад маси":

- Нябаков", ңобкана ядахава".

Нябир ңани' ни харва". Нюдя ненэй не' сядм' ңани' хаде"ңада. Сеянда хэсь нюдя не манзь ханада:

- Ет' ңо" ядахава".

Пыдо' мат"ңэ ңани' ңобт' яльяд". Сянанд хунат' ядбато' ңод" нумдо' пэвсюмая. Ңарка ненэй нер маси":

- Нума" пэвсюмаянё". Мятава" серта манэкавама".

Ямдкоци ма"лярңа". Мя"ңэ сертэйдо'. Тикандо' хонэйд". Хуняна тад юркавандо' нюдя ненэй не нядо' хавы. Нямдо' ха"ма яхананда таня хаедо'. Пыдо' ңани' яльяд". Сянанд хунат ядбато' ңод" нумдо' ңани' пэвсюмая. Парнэко" не" ма" ни"им":

- Ямд мятва" сертахава".

Мятамдо' ңани' серта". Ямд мято' мю' ңани' хонэйд". Ялянда ңадимзь ңани' юркыд". Тад манэ"мандо' ңоб" нядо' ңани' хавы. Ямд мята мюня таня хаедо'. Яляндо' ямбан' ңани' яда". Сянанд хунат ядбато' ңод" нумдо' ңани' пэвсюмаянзы хамэдэй". Нерандо' няна хабей" таңоця" ңадимя". Мяк" тэвыд". Ңоб" мякана тет хаби илевы". Тикандо' сидя ңарка хаби сидя ңарка нем' неданди' мэнхаюди'. Ңарка ненэй не, ңарка Парнэко не хабихи' мят' илельяха'. Сидя нюдя хабихи' сидя нюдя Парнэко нехэ' неданди' мэнхаа'. Тодо' мякто' хая". Хабихив" ялэ" ханесеты". Ңарка Парнэко не тёнязы ненэй не' мяд' няна хая, пыда тарем' маси":

- Нябаков", едав пись. Мяди"мярманзы ту".

Ненэй нер Парнэконда мят' хэ"нив". Парнэко не нюом' ховы. Нюнда ңамзаком' пиревэда. Нюнда ңэвакоця ед' мюня тэри мулкадарңа. Ямб хыдя' мю' ңамзакуда тедыда. Ңаворць пэйд". Ңарка ненэй нер ңамза' ютекэцям' мэсеты, нита ехэранан' идыта понд' сюрцетыда. Парнэконд няхабида ненэй ңаворңа", едандо' терам' и" евэйсавэй ңамадо'. Ненэй нер ма"нив":

- Малейв".

Ёнэй Парнэко не җани' нюм' хо. Нюнда җамзи пирейда. Тёняңы ниге җани' хонрэйда. Парнэко" не", ненэй несавэй мал' то". Ңарка ед' мюня нюнда ңэвакэця тэри мулкадарна. Ямб хыдян' җамзакуда тедыда. Ңаворць пэяд". Ңарка ненэй нер нита сэв" хыңгохана җамзи ютекэци идэнда понд' мэсетьда. Парнэко' няхабида ненэй я"авла ңаворна". Едандо' терам' и" евэйсавэй җамадо'. Ңарка ненэй нер ма"нив":

- Малейв". Мякани хандадм'.

Ҙани' ся"ны ңэбта ңод" нюдя Парнэко не нюм' җани' нив' ху". Ңарка няхаюта сер нюнда җамзаком' җани' пиреда. Ҙани' няндо' мят' мяди"мярманзь мал' хая". Ненэй нер пэрта җамзида җани' идэнда понд' нидав' сюрпю". Тарем' ма"ламбадаханда җамзида ед' терңэ хая". Ненэй нер мяканда хая. Пыда ңод" нита сер' җани' ңацекэда соя. Макода' сивня еся ебц ңурна ха"морцеты, пуна җани' макода сивня ңурна хэсеты.

Неры ма"лавы ңацекыта җамзи Ңарка ненэй нер едан' пядыда. Евэймда пиреда. Тёняңы ниге хонра, манзь тёрей":

- Тёня' мякани мядоманзь тода".

Няндо' мунм' намдахава, парнэко' нехэв" таминхандо' то". Мятю". Пыя"ядо' пай' нэкалъядо', ма" ни"им":

- Пэ, пэ, нюйвонда.

Нер маси":

- Ханёв. Нисянодо' ңопой", нябанодо' ңопой".

Ңаворць пэяд". Ҙани' ма" ни"им":

- Пэ, пэ, нюйвонда.

Ненэй нер җани' маси":

- Ханя". Нисякодо' ңопой", небякодо' ңопой.

Ңавороць малесь парнэко" не" мякто' хая".

Ся"ны' ңэбто' ңо" хане хан"мы" хаби" то". Ңарка ненэй ненд ебцада макода' сивня җани' ха"амы". Нюмдя ня"мада. Хаби" тохова ненэй нер ңацекэмда ня"амба хасев' нерад яда. Парнэко" не" ңоб" яда посова салик ланзяңа". Вэсакуто' нер-

няд посова салик ня"амба яда". Нюсавэй нямдо' манэкава ма" ни"им":

- Няна" нюдя танявынё". Мале тосахава тосаваць: ңамонгадана" нюмда сюрпавэданё".

Хасава" манзь ханадо':

- Тюку не" са"ла" ңэвы". Парадавы" ңэя", харто' нюдо' ңамы". Не" нивы" ңа", ңылека" ңэвы".

Хасава" тодабцям' пята'. Тики парнэкудо' тун' моё"ядо'. Парнэко" паравандо' нерня ма" ни"им":

- Сибякохортанов" я' тингэвнов, неняңгацинов' я' тингэвнов!

Ңарка ненэй нер ңарка хаби хасавамда няць неры няхаютаха"ман' хая. Нюдя нянда ха"ман' тэвыд". Ямд ямб мядикодо' тамна палавы. Мята мю' сырҗаха', нюдя ненэй нер мята мюния тамна сэдоравы. Нямдо' содадо'. Ңобт' яльяд". Ёнэй не няхандо' хая". Ңани' ңоб" ямд ямб мядиком' хо". Мята мюния нядо' ңани' сэдоравы. Нямдо' ңани' тарпrado'. Мякандо' ңани' хая". Неры мякато' тэвыд". Тет хабинд нюдяха' сидя ненэй nem' неданди' мэнхахаюди'. Пили" нюдяридо' неси" хай. Тадахава та' илелъяд'.

Лаханакони малда.

15. Пухуця' Ҥоб" Ню

Пухуцяко"я Ҥоб" Нюндэд ня' сянанд хунанд ңэбта ңод" неро яха' варахана илевэхэ'. Поти' тиүгэхэнэ неро яханди халям' пэрнгаха'. Пухуцянд ню мер' вадёда. Ся"ны ңэбта ңод" Пухуцянд Ню яхаконда мюмни ңануторць хая. Ихинанда ма: "Пухуця небямы ңамгэндэ ө"эмни яха' ңылни" си"ими ядэрць писедеб"нанда?".

Сянанд хунанд мимба"ида ңод" неро яхаконда Ҥарка"я ямд' ңадара"махана ңоб" я саля танивы. Тики саля' ни' Пухуцянд ню тана" ни"им". Пухуцянд ню ихинанда ма: « Тюку ҥарка саля пирця"я ңэвь сямян" я" ңыланани ца".».

Хуна сяхаңгав' иле"мя ңэвь, еся ңу" паха" ябту" икараха". Тюкохона мэвь" хавы" ңэдакэ". Ҥари" хавэхэв" ңавэн" ңэдакэ", ңылека' ңамы" ңэдакы"?

Пухуця' Ҥоб" Ню мяканда нядада, мяканда тэвь" небяханда масынё":

- Яхако' ня"ав' ня' ңануторңадамзь, салям' ходамзь. Хибяхав" иле"мя ңэнгодаанакы?

Пухуця небядада манзь ханада:

- Ебцота" нюкаця, мань ңо мадамзи", таси я"мана нён ядэрцету", тики ҥарка соты хөбидярка я.

Пухуця' Ҥоб" Ню манзь ханада:

- Тики ҥарка сохом' сейми хомбид¹, еся ңу паха" лаханараха", маньзяв нядани нёд такашнор".

Пухуця небядада манзь ханада:

- Хуна мальңгана тики сохо' ниня некыта ня' нисяр илесь. Ңобкана илець, вэва хабцяңгана ңобкана хаць².

Пухуця' Ңоб" Ню манзь ханада:

- Хавы ңэбто' лыдо' таняңгуць. Теда' сохо' ниня лы ңоб" яңгу.

Хурканда яңго харанда яңго Пухуця' Ңоб" Ню паныда сера, таңы мэтида таңад сера³. Пухуця небяханда пыда тарем' ма:

- Тюку хэвани мер' нидм' тут", ңоб" по' хэ"мяхад си"ми ңатеин.

Пухуця' Ңоб" Ню хой ңанута яхам' ха"авра, ихид мөре"ңга. Ямд' ңадахэй яха' ня"авахана пирця саля' ни' уани" тана" ни"им'. Танабата ңод" тяханяңы яда ңодъринда ңади. Тарем' сырпата яв' тяханяна няхар" ю" тэ мя". Тики мядо" ед' нэкал" нидав'. Сидя хой лабя', лабя' хамбахат пунда няна си-сюда харабты"⁴, ңанонда хамбахат хамбада сиркэ"лы".

Мяк тэварись ян' теб"нив'. Няхар" ю" тэ мя" ңарка мяд" ңэвы". Пин' ңадиберта ненэцянда яңгу. Пухуця' Ңоб" Ню ер-тенада мят' тю" нив'. Мякы мякана ңоб"ляри вэсако, вэсако ңэбта ңамза хаевэда. Вэсако ман"ма:

- Хибян ңэсан, ханяд товэн?

- Мань Пухуця' Ңоб" Нюдм', тюку яха' таханяна яха' мюна иледм'.

Вэсако масьнё":

- Ңувэци" хаирт ңэнгоданакэн, яха' ня"авахана Ңувэця" илець, няхар" ю" мятонзь. Ханяңэндо' нюн ңэхэянакэн?

Пухуця' Ңоб" Ню манзь ханада:

- Тики" харахат ехэра" нидам'.

Вэсако масьнё":

- Пыдар нисянаад Ңылека ңамы", тюку ңо" ңэсына" пеляда терси. Ңари" тандая' тики турңгась, тет ненэцям' пыда ханась. Ңылека хусувэй по' ңоб' тэвана. Пухуця' Ңоб" Ню нянд мадамнё: "Сидана" ңаворта ңылекам' хадад. Ңылекам' хадабат ңоб" не нюми неданд татав.".

Тарем' сырпата вэсако' не ню мэта сякананда тю"уй сюрнэм' ха"моланараха.

Пухуця' Ҥоб" Ню' ирида ядэрңа: «Сюдбя Ҥылекам', пэдара' Ҥылекам' ханзер" мэнгув, пир"ма то"олаха ңавэн' ңэдакы.».

Пухуця' Ҥоб" Ню манзь ханада:

- Вэсако ирив, вадет, сюдбя Ҥылекам' хадаңгу" нивав', ңопой тикамда ехэра" нидам', сюдбя Ҥылека хуркахав ңэдакэ?

Вэсако масьнё":

- Сюдбя Ҥылека сюдбя ңаркарка, ңыланда нямна я" саля ңади"⁵, лэтадахавада ябта мяд' лэт, вэвако тёрда нарохон"на хана"ңа⁶.

Пухуця' Ҥоб" Ню манзь ханада:

- Вэсако ирив, няни инзеле": сюдбя Ҥылекам' хадаңгу" нивав', юр" Ҥувэцями тэмдаңгу" нинав'. Ҥылека' тобата хадаха"на пяңгув. Юркана панта хурыдами та".

Хурканда харанда яңго юрцавэй хуры' мю' сидя няюд няндоць силмэхэ" сидя яңгабця' ңобт' маноё"мам' мэ. Пухуця Ҥоб" Ню манзь ханада:

- Вэсако ирив, няни маңгар", сюдбя Ҥылека сяха' тосеты?

Вэсако масьнё":

- Сюдбя Ҥылека пукуна тута, ңули" ябтьен' хада манэт. Ҥари" манъявана" хада я"мава". Мань сидя нюми сюдбя Ҥылека ңамахаудась.

Намгэмдо' едамдо' ңаво"махадандо' Пухуця' Ҥоб" Ню пин' ңадимянё". Юркана терта хурымда мине ңоб" ңэ сарпяմ' тидахаленгандо". Сянанд хунат яда"махаданда ңопой ярин' нулта" нидав', лахаця' ни' пыда ңамд" ни"им'. Тарем' сырпата неранда няңы лабта я ңэвы. Лабта' сусахана пэдара ңэвы.

Намгэ' пирка"на сюдбя Ҥылека' сюдбя тёрда, тёрда, писянда тэдарць солы"⁷. Сюдбя Ҥылека выябтюр"яңа. Техэ хабяда⁸ ненэця' хабя. Лэтада"яда ябта мяд' лэт, тасинда нямна я" саля" ңади". Ҥаяконда ний яларинда тар", пя' нядараха",

сидяда сэвада тарета помна ялкабтырҗаха'. Я' хора хоба падамда минарңга, мосавэй харвм' ядабцие"ңада. Пухуця' Ңоб" Ню' пятанда хэрнари ңэ сарпя' мюмня хурымда мине. Ңылека' тэвавам' нига хамэдамбю", сюдбя хурымда мунзи" манзая"ңга. Ңылека масынё":

- Техэ салами тэувудавэй, едани' терад нена" ходамнё". Тедахав ханаңгу" нивав'.

Пухуця' Ңоб" Ню манзь ханада:

- Ся, ся, ңари" манъзяван ңули" нидм' пин". Сюдбя Ңылека ирини мят' мингадм', ирини сава ңаварад минредм', тад мань си"ми яебтаб"нанд сюдбя ирими си"емд хадаңгу.

Сюдбя Ңылека манзь ханада:

- Сюдбя Ңылека, пэдара' Ңылека мань ңэ"нидам". Ңамгэн маямзь няни мингтан. Ңари" манъзяван Ңули" хибяхартм' хаё"мами яңгу.

Пухуця' Ңоб" Ню манзь ханада:

- Ңари" манъзяван Ңувэци" хаиртм' - Пухуця' Ңоб" Нюдм', пухуця небяни ватовна мань мэдамд минредм', ңули" сава мы, и"ли юр", небяни нянд ңэтабтавы. Пыда тарем' мась: «Ирихинд ханад, ңавна иле сидани хае"мянда е"эмня ирикэр ңамамда.».

Тикахавахана сюдбя Ңылека хури' ванибтей":

- Ңувэция пухуцям' тене" нивав', ңоб" нюнда ню' ня' иле хае" нисяхаюнав'. Хына мэдани тавэр? Ңаворт" нидам"!

Сюдбя Ңылека ңаворць пэйнё". Пухуця' Ңоб" Ню манзь ханада:

- Ңылека ирикэ", инзеле", ңаворта ңамгэр саць сава ңамгэ, пыдар е"эмнянд варехэ"ни тавэми, ян' нись вабта сававна ңаворт.

Сюдбя Ңылека манзь ханада:

- Тюку ңаврар саварка ңэвы, нюкаця" мадама, тюку хаёвэмда няңгани вабтад.

Сюдбя Ңылека хуры' тер юрм' ерканда ңамэда, тад хаёвэмда Пухуця' Ңоб" Ню Сюдбя Ңылека' нянд вабта"ңада. Сидя' няюд силмы яңгацяңг' Ңылека' нямана мирнариди' хая. Сюдбя Ңылека манзь ханада:

- Ңувэця' Ңоб" Ню нянани тутан, мань мяканани мя-донд" нинав'.

Хурканда харанда, харанда яңго Пухуця' Ңоб" Ню Сюдбя Ңылека' ня' ңобт' ядалъяха'.

Пухуця' Ңоб" Ню ирида ядэрңа: «Сюдбя Ңылека маймбадараха, си"ми ңаманзь хамекодараха.». Сянанд хунат' ядабати ңод" Сюдбя Ңылека манзь ханада:

- Ламбани' ңылы теда' есьмонда, ңаворцямахад серта ңэсеты, хуркари ңэя сер" вуни ңа".

Ңавэ" пират яда"махаданди' Сюдбя Ңылека пэдюоць ңамды", сян маяңгана индата нэкалпи, нинмянда ни' вэямда тодыби. Сюдбя Ңылека ңодь' лахана:

- Пухуця' Ңоб" Ню хэдат ңэвэн. Нена маямана си"ми мэ-нанё", таңг"ма яхад нена" хадамнё".

Пудана вадамда хэта"махаданда Сюдбя Ңылека тэри ёхобтэй"⁹, няби ей"мана няндоць силмы яңгабць' пин' поркабтэй".

Пухуця' Ңоб" Ню харета ядалй". Сянанд хунат ядабата ңод" неранда няна ңоб" я' сохо. Нябитид' тэва нё пехэда, мякы мяkad Сюдбя ңадимя. Сюдбя' пухуця ңэнгоданакы, вэсакоходанда тэри нюдямбой.

Пухуця' Ңоб" Ню ихинянда ма: «Хадахана пяб"ни нивав пират", пухуця ңылекам' хадаңгу" нивав'.».

Хуркаси" хараси" Пухуця' Ңоб" Ню Ңылека' пухуцям' хадаба пяда, манзь ханада:

- Иleva ямбан' ненэцие" ню ңаворманди малм' тэванара-хари'.

Си"ивахава яля' Ңылека пухуцям' пёда ня' ңада. Си"ив ңэсоңгана хэвдаледа. Ңылека' пухуцям' пирдалевамда Пуху-

ця' Ҥоб" Ню ңодьри' тенеда, тад пунахав ялям' юравы. Сянанд хунат' хонёбата ңод", хамбабата ңод" Пухуця' Ҥоб" Ню нема' тахамана муно намдоръяда, хибяхав ңэбта манзь ханавонда:

- Ҥобкана хавэхэ'. Пухуця' Ҥоб" Ню Ҥылека пухуцям' мэхэва" мэвэда.

Пухуця' Ҥоб" Ню неманда сидёб" Ҥылека пухуця' сёхона хадида паңгавэ". Сидянда няна ңока"я" нуна". Сеней ховы вэсакода хэвахананда ну. Вэсако масьнё":

- Пухуця' Ҥоб" Ню саць ңо са"мэн, ңари" маньзявана" сит нядаванзь маня" товаць, ҥобкана ха"мава ңэвы ңэись.

Пухуця' Ҥоб" Ню ңэта ни' санэй", тарем' сырпата: сохораха мяд' хэвахана хальмер" лэхэв" я' сохораха". Пухуця' Ҥоб" Ню манзь ханада:

- Мань сава нин инзелехэрңада": «Тюку" ңока лы" нисяната" лы", небяната" лы", хурка мань ңод" нисянани лы" небянани лы" тюкохона ңэдакэ". Мань сава нин, сидя Ҥылеканда хальмераха' парадаңахаюда"».

Сидя ҥылекамдо' парадаңахаюдо'. Пухуця' Ҥоб" Ню манзь ханада:

- Тад нерня' Ҥылека яңгоя, яна" ненэця" сававна илея", вадёдана" нюдо' сававна вадёя"!

Хурканда харанда яңго Пухуця' Ҥоб" Ню вэсако' не нюм' неданда мэда, мяканда ханада. Мяканда тэва небяханда масьнё":

- Нисями хадавым' хаданаraphав, юр" Ҥувэцями тэмданархын.

Пухуця' Ҥоб" Ню яха' ня"авыхы пирци саля' ни' мята мярада. Хуркаси" хараси" сававна иле.

Та' малда.

Вади" хара"

¹ Сейми хомбига - сейда таня' хэсь ңоб' сита табэдамби, ихинанда ңоб" таня' хэварин' харва.

² Вэва хабцяңгана ңобканы хаць - ңавна ненэця' хэдо хабцяңгана ханғавы", ңысындер" ненэцяңгат иле хэдадо' яңгосетывы, ханяңэхэн ңоб"ляри' ңацекы хаёвы яңгу.

³ Таңгад - мярейхад сэдавы" та' мэта" пива".

⁴ Пунда няюна сисюда харабты", ңанонда пыяхы хамбада сиркэ"лы" - тикахананда ныхында валакан' мерець миңа.

⁵ Ңыланда нямна я' саля" ңади" - тики вада" сюдбя", пирци ңэвам' ваде"ңа".

⁶ Вэвако тёрада нарохо"на хана"ңа - тёр"яды ңаха"на на-ру" (пэдари") поңгана сось пэрңа.

⁷ Тэдарць солы" - ңай" яхат тёранда му' солы", та"льняри' миңа.

⁸ Хабяды - пыхыда ненэця' мирбяраха.

⁹ Ёхобтась - мо"нэй", юсибитэй".

16. Луца вэсако

Луца вэсакохो' пухуцянда ня' ян' сидярихи'. Мяти' си' няна нянё" вадёлава харвади' таня. Ся"ны' ңэбта ңод" нянёди' суса". Пухуцяда маси":

- Вэсако" нянява" яңгу, харвахаданд нянядар хосая".

Вэсакор харваханда хая. Харваханда тэваңгуць - неранда няд Сюдбя вэсако. Сюдбя вэсако манзь ханада:

- Ңамгэмд мань харвахани хосаян?

Вэсакор маси":

- Илевани ямбан' харвахадани нянядами хан"ласетыдм".

Тюку мань харвами.

Тикахад Сюдбя вэсако ңани' ма"нив":

- Хуняна пирдырьини'. Тюку харвм' хуюми' тырахананда ситада - тикаюни' харв ңэнгү.

Луца вэсако мяканда хая. Пухуцяханда ма"нив":

- Нер" сюдбя вэсаком' хомбидамзь. Ма"нив":

- Хуняна пирдыртани'. Хуюми' харвм' тырахананда ситада

- тикани' харв ңэнгү.

Пухуцяда ма:

- Теда' харв"яр парэнгана сит. Пуна сябтахана тальир. Хуняна тикан' ладъир.

Вэсако луцар тарем' мэда. Хубта' няна ңани' харваханда хая. Сюдбя вэсако мале тикахана мэвы. Сюдбяда манзь ханада:

- Луца вэсако, пыдар ладахарт.

Няда тей си"мы яханда ладада. Луца вэсако' тырада няби хэвувна поркабтэй". Сюдбя вэсакорэй тад харвм' тырахана питарманда: тырада ертэя ңэсоңгартан' ни" тэв". Сюдбя вэсакор тиканда пуд ңани' тарем' ма':

- Хуняна юнуни' пюрьини'.

Луца вэсакор мяканда яраць тэвы". Пухуцяда маси":

- Ңамгэ ярџан?

Вэсакор маси":

- Ярпа"ни ханядм', Сюдбя вэсако ма"нисяв":

- Хуняна юнуни пюңгуни'. Мань ңамгэ таняна юноми' ханаңгудм'. Пыда юномда илевани ямбан' вунив хонгу".

Пухуцяда маси":

- Хуняна мань юноңэ хантадм'. Мань си"ми ханаин. Пыда юнода енар" вуни ңа", нисянда нися' няхарм' ңэта' я' хоре"яда.

Едамди' ңамаха', хонаяха'. Хуняна юномда харв' някурка' сярада. Сюдбяда мале тюкохона мэвы. Сюдбя вэсако манзь ханада:

- Мань юноми' хохорт.

Луца вэсакор пыда тарем' ма:

- Пыдар юнор ңамгэ енар" ңэнгү, нисянд нися' няхарм' ңэта янда хоре"э"яраси".

Сюдбяр ма"нив":

- Вэй, хорэй!

Луца вэсакор ма"нив":

- Теда' мань юноми хохор"!

Сюдбяр юном' тэри сюри"леда. Пунда няд манэцетыда.

Луцар ма"нив":

- Хэй, пуняна нён ну", юно"ями енедарцеты.

Сюдбяр тикахавад ма"нив":

- Хось я"амавэ. Харвари' пыдари' ңамгэри' пилийт" ңэя.

Луца вэсакохоюд та' илельяха'.

Та' малда.

17. Вынахалуй Хабиця

Сяхаңгав' җавнанда Вынахалуй Хабиця илевы. Вынахалуй Хабицянд мята яңговы, ялэта ямбан' җобىэда ядэрцеты. Ҙобаңгуна ядэрманда сер' җоб" җарка" я мядм' ядабта. Мяд' хэвахана си"ив ненэця" ламбам' хо, тад нерняку' хэ"мяхаданда си"ив савакм' хо, таддикад си"ив мальцям", си"ив пиби хо, таддикад мято' хэвахана си"ив ненэця" тобак хо.

Вынахалуй Хабицяр ламбида екахая мят' тю. Мяд' мюния си"ив Сюдбяко пинна едамдо' җате", ту' сидя хэвахана тода выраи". Вынахалуй Хабицяр мят' тю"мяхаданда пелей" нямана хая, пэвдю" ни' тикан' җамды".

Вынахалуй Хабицяр ман"ма:

- Паныда" җамгэ пихиня җоб"лад' моёцяда"?

Си"ив сюдбяр манзь ханадо':

- Ханяна" моёс", манъзявана" җули" җамгэхэртажад нива" пин".

Си"ив Сюдбянд едадо' пи, җаворць пэйд". Вынахалуй Хабицям' җобтарем' җаваладо'. Вынахалуй Хабицяр сянахав яля' си"ив Сюдбянда мякана таня иле" нив".

Ся"ны" җэбто' җод" Ҙарка Сюдбяр тарем' ма"нив":

- Хуняңы яля' Ңэрм' я' сей салаба хоян' хант" ни"ивам".

Тебтад' няна си"ив Сюдбяр ниня мэта" тыдо' пыдо' подерңа"нё", хурканда яңго харанда яңго хэванзь пядо'.

Вынахалуй Хабицяр ман"ма:

- Мань җод" нянанда" тоходама.

Си"ив Сюдбяр манзь ханадо':

- Вынахалуй Хабиңэ, пыдахавар ядабат нинав' сас", маня" пумнана" яда тоин.

Тики вадидо' мэсо"махадандо' си"ив Сюдбяр Ңэрм' я' сей салаба хоян' ңэдала" нидам'. Си"ив Сюдбяко' ңэдалахава Вынахалуй Хабицяр ламбида сера, нензари явна ламбита пяда. Вынахалуй Хабицяр ңани' лясасеты", ңани' пындерцеты", ңани' юркасеты", ңамгэ янда ед' ңэб"нанда ңод" ңоб" пэрүгэда.

Вынахалуй Хабицяр тарем' мо"нэрць миндяханда Си"ив Сюдбянда нерия Ңэрм' я' сей салаба хоян' пыда тэв" ни"им'. Тарем' сырпата Си"ив Сюдбяр техэ лабтахана тандая' ңадимя". Ңэрм' я' сей салаба хоян' тэварихива Си"ив Сюдбяр тэри пусэйд":

- Варехэта ядана Вынахалуй Хабиця нерна" няна ханзер" тэвы"!

Тикахавана Ҥарка Сюдбяр манзь ханада:

- Теда'мяк"на хэба"на" сидна" тэвавамда манэ"тава"ма!

Тики вадида мэсо"махаданда Си"ив Сюдбянд ха"аларидо' хая.

Вынахалуй Хабицяр неры то"манда мюмня мо"нэрманзавэй ңани' пяда. Мальцянда ңадсуй ңэб" ңод" ханимахад, нёховахад ңоб" ңэда ехэра. Ңани' лясасеты", ңани' пындерцеты". Вынахалуй Хабицянд мят' то"махад Си"ив Сюдбяр ед' пива' пиркован' тамна яңгу".

Сянд хунат' иле"мяхадандо' Ҥарка Сюдбяр манзь ханада:

- Тебтад няна Иба я' няңы Ҥарка пэ" хойха", Нярава' хойха" хант" ни"ивам", Вынахалуй Хабицява" пирлываць нят" ни"ивам".

Тебтад няна иба я' няңы Ҥарка пэ" хойха" Нярава хойха" хэванзь пядо'. Ҥарка Сюдбяр тарем' маманонда:

- Теда"яхав' недарме"э' мюмня, сава сехэры' мюмня хант" ни"ивам'. Вынахалуй Хабиця ся"на сидна" тэваңгу.

Вынахалуй Хабицяр ңамгэ янда ед' пэрпата ңод" ңани' лясасеты", ңани' пындерцеты", ңани' юркасеты". Едёй' яха"на харцинда ниня едейко хэсеты. Вынахалуй Хабицяр Си"ив Сюдбянда нерня Иба я' няңы Ңарка пэ" хойха" нярава хойха" ңаха"на тэвыць.

Ңамгэ пирка"на Си"ив Сюдбяр ти ңадимда", тыдо' саць пэдавыд", тыто' пыи" си"мана тыто' пэдё" ту' лээнэ ңадиберңа".

Вынахалуй Хабицяр' манзь ханада:

- Си"ив Сюдбяв, тюку яхавара" хубта я ңэвы, саць ңаркавна мань пэдэйв", ханзер" мят' тэваңгодакэв", си"ми пэнада"ма.

Си"ив Сюдбяр ңобт' тёрэйд":

- Ханзер" сит пэндава", теда' тандая' нина" хурка ңэвам' сававна манэт" ни"ивам'.

Ңарка Сюдбяр манзь ханада:

- Теда' нядана" хаёбат илева' нямна ир нёя ңа", мая' хабицяңгана саддодан. Ңари" манъязвана", маня" ңо"маваци" хибякохор тан' ңули" нива" пин".

Тики' вадидо' мэсо"махадандо' Си"ив Сюдбяр хадандо' ңылама". Вынахалуй Хабицяр нись паромбю" мяканда яда, ңахат сермнанда ңани' мо"насеты", ңани' лясасеты". Вынахалуй Хабицяр ихинанда ма: "Си"ив сюдбяр маци" ңани' хибяхартан' нива" пин', ңадябя"на" панына" пихиня ңоб" яда екабина", нива пинавамдо' манэтава"ма".".

Вынахалуй Хабицяр мят' тэвы", Си"ив Сюдбяр паныдо' ңоб" яда пихиня моё"мыдо'. Вынахалуй Хабицяр нё' си' няр' ңамдахая ңынанда ен' ни' ңоб" муңгам' мэ. Ңынамда ңэ' тяха' нэкалпадаханда татуда ңадимя". Нё' сим' няңгаркая пинана нярава едм' ядаба пя.

Си"ив Сюдбяр пинана едамдо' ңате тундо' сидика"на тода выраи". Вынахалуй Хабиця' ңын' пендава' сер', муңганда

едан' тебава' сер' Си"ив Сюдбянд сейто' хэва' нид сян яха"
тёрыць санэйд", тахаё" сивня татуңэ лакада".

Вынахалуй Хабицяр ма"нив":

- Хына, ни"ма пин"мара" ти? Сидда" тарем' мэнгосадм'.

Вынахалуй Хабицяр Си"ив Сюдбянда илебям' пыда илебяданда мэйда, теда' лахана сававна иле, ңахат вынахалуйнээ мо"нэро"мамда нема' юдэхэна ңояк" тенеда.

Та' малда.

18. Неле"мяко

Неро яхако' тир' ниня пухуця нюнда ня' таня илеңаха'. Нюда Неле"мяком' нюбе"ңа. Неро яхаконди' халым' хадабихи'.

Ся"ны' ңэбта ңод" Неле"мяконд небя ма"нив':

- Неро яханд тю"у' няю' нён ханцету", ңылека таня!

Ңоб" ямб по' таня илеңаха'. Ңавэ" пирка"на яханди' халяды ңоб' сусана пэй". Тарем' мэнэханди' халяди' пилийт" суса. Яхади' ңули" халясялма. Неле"мякор индата пирта ненэцяуэхая. Небяханда ма"нив':

- Яхами халясялманё", теда' манэць сава ңэдараха.

Тиканда Неле"мякор ембатолы". Пибида сера. Яхамда танда пилийт" ялй". Салаба" мале ханимя". Яхамда тандамбадаханда салаба' ниня' ңоб" ңамдёдам' манэ"ңа. Хахаяко тэвэхава тад манэ"ңада, тикахав Сюдбя вэсако ңэвы. Яхамди" неро понгахана нярхалавэда. Халя" тикан' ма"лёвы".

Сюдбя вэсако Неле"мяком' манэ"ңа. Манзь ханада:

- Теда' пирдыркани'. Хуюми' ңоковна халым' ңамли.

Сидя ңарка сяvtам' тюхулңа. Ма"нив':

- Теда' мань сит нертеб"нани сит ңамдам'. Пыдар си"ми нертебат сит иле хаенгудм'!

Няби ңарка сяvtамда Сюдбяр няханда ми"ңада. Ңаворьц пэйха'. Неле"мякор яңга' си' варан' ңамды". Няби мунамда яңга' сивня ңыльня' моёпида, няби нюдяко пелда няңганда момбида. Сюдбя иримда нертеда.

Неле"мякохонда ма"нив':

- Нюни сянако няңэ саван ңэвэн. Мякани ңобкана хэхэни'.

Нэйт' яльяха'. Седа' ядахад я' нямд' мал поръявы. Тале иэ-
калңада. Нё пехэда. Мякы мякана Сюдба вэсако' пухуця
нүонда ня' ян' сидярихи' нэвэхэ'. Пухуцяханда ма"нив":

- Пухуцев", нүонд сянако няңэ ңацекым' тэварадм'. Ҙаман'
харвавась, тарси" хэвада вэва нэвы. Тедари' таня нылэймд".

Неле"мякор иринда мякана ңоб" по' иле. Сюдбя' ню' ня'
хусавэй яля' сянакосетыхы'. Ся"ны ңэбта ңод" сюдбяр пуху-
цяханда тарем' ма:

- Неле"мякоми нылэйнё". Ҙамбани' сава ңэдарааханё".

Неле"мякор хэвнякуд ңоб' инзеле. Пэвсюмя' няна,
ңаворо"махадандо' хонэйд". Неле"мякор сюдбя' ню' ня'
ңобкана хонёсетыхы'. Пи' ерь' томзь хонё"миди' тадэйди'.

Неле"мякор тарем' сырпата сюдбя вэсако юркы". Ҙа-
ворць, хане мэта едамда иэкалңа. Неле"мяко' хонё"мян' яда.
Пэвдяхана харта нюомда хада. Харахана мадеда. Хубтахана
тад манэ"ңада ңани' харта нюомда хадавы.

Ханзер" ет' мэвнада, Сюдбя вэсакор Неле"мяконда' ня'
нүонда тинад сертаванзь хаяха'. Пэдара' поңгана няңоте"э
харвам' хоңаха'. Харвам' хавдади'. Сидя ян' мадади'. Сюдбя
ирида ма"нив":

- Нюми ся' ямб ңэвы ңэбта? Ханзер" ёльценгув?

Неле"мякор ма"нив":

- Хадари' ңод" сит ямб нивняв' ңа". Нюр ңэ" нисяв'. Теда'
пя' ни' пындерад": ся' ямб ңэвамд мань ёльценгув.

Сюдбя вэсакор пя' ни' пындерий". Неле"мякор сябарць
тыбкам' тю"у' илада. Иринда ңэва' сэхэрт' тыбкамда
ха"аврада. Сюдбя' нэвада санэй". Та' хадада. Хада"махаданда
тарем' ма:

- Сит тарем' мэнгосадм' тароховар янгувиинё"!

Тад хэбянда сюдбя' пухуцям' ңани' хадада. Сюдбида ха-
да"махаданда Неле"мякохойт Неро яхаконди' халяда ңани'
ңокама. По' ямбахана халярим' пэрңаха'. Небянда ня' Неро
яхаконди' тир' ниня тамна сававна илельяха'. Нянди' харвана
хибяхарт янгу. Тад тикахавахад илевари сер".

Та' малда.

19. Мэбета ханена

Навна хунанда, илева' тяхана, ңарка Саля яв' яха' варахана Ханена хасава харета илевы. Ханена хасава манэсүү "мнанда, ненэцие" ңабц ламдорка ненэць', сята латамбай марцёта ненэць'.

Явм' ха"авра хане хэбта Ханена хасава пон' ядасеты. Вымна миндяханда яв' ня"авахана, ңарка вы' ямда сусарабтасеты. Ңарка вы' янда, янда варахана ясяда ямгата пили" тэвасеты". Ясяда явот техэ вардо' ненэцие" сэв" тэри тяхалмы". Ясяди" ермана нензамбада" сэр" салабарка хоё, хоё сертавы". Салабарка' хоё" хый лабтаха"на ңарка сэр" варк - Сэроко явэ ханена хасавам' ядабтасетыда:

- Ханена хасава, ңамгэ тосан! Яйха' ңабтувна пыдар ңабтен! Салаба хоёни нёнва холкабта", салаба лабтини нёнва хуримда"! Ханена хасава, ниба"анд" хань" няк' нюдрев' си"емд пядм"!

Ханена хасава Сэроко явэм' сюдбя тыранда ладаванда сер', салаба лабта' ни' хавдасетыда.

Яхам' танда хане хэбта ңока си"ив яля' пыда ядасеты. Ңарка вы' ямда сусарабтасеты, сюдбяко" пя" тю"уй малдо' сионараха ной нумгад пере", сэрококо" тир" я' сяр нид ңаха"мна ха"ябы", ибако мерцянда лимбека ңудада, ңэванда тармана ңудада салмыку. Тики тарця ңэсь паридена варк, я' мята мюд' пин' ңадимзеты сидя пунэ ни' тю"у' нулцеты":

- Ханена хасава, ңамгэ тосан! Яхаха"ни, тохо"ни, ибако нарохо"ни Ханена хасава тэцядам' тан! Ханена хасава си"емд

пядм", мядэхэ"на хаёвэ, пян' сяравы ты' нюдрев' си"емд мэнгудм'!

Ханена хасава паридена варкм' хэдци" хэта вунида пилус". Сюдбя ңынамда нида выярцету", Ханена хасава няндота муңгамда, ңынанда ен' ни' нида мэсету". Сюдбя тыранда ладаванда сер' паридена варк" я мята нён мадавы пядрев' таси' хавасеты. Ханена хасава сян нянда ня' хуркаси" хараси" сававна илесь, сян ханедамда, сян сармикамда илеванда сер' пирдалембись.

Ся"ны' ңэбто' хане хэвы, сюдбя ңынада ңоб' пендавы" си"ив илебцям' пыда хадавы. Си"ив илебцям' ханена хасава мяканда тавы. Мяканда тэва едамда ңыда, илебця' ңамзи едан' пяда. Пинна еданда, еданда лохомзъ яха' тяханя' ядана" ңадимя". Яха' лаңг' нимни си"иври ядана, ңопой сүгавна сядотяладо'. Сававна манэць си"иври ядана" техэ пыхыдито' ненэзие" ңабц, мэтадо' шанэдо' ңопой яңга", ңайто' таркав" pena' тар' ёр", ңудито' хадахав", ңэто' хадахав" ңамгэда ңэвна варк' хадараха". Ханена хасава' ирида ядэрја:

- Ненэць' хобадо' тюкут яңгунё", си"ми ңо" хадавнзь товы" ни"им' ңа"! Ватондо' серри' ңэба"ни саванё", пинна едами ңамбато' саванё", яха" вадетидо' хадри" ңэсь ңо" си"ив ңая тар" ңэнгоданакы".

Си"ив ңая тар" мят' сиңа"ңадо'. Ханена хасава си"ив ңая тарм' пивы ңамзаха"на ңавала" нидав'. Си"ив ңая тар" ңамзахана са"мы", ңаби ё"мнато' лыридо' пудабты", си"ив ңая тар" пили" ңарка нядо' мунзямахаданда манзъ ханада:

- Ханена хасава, нянд това", мэбе"ма юнар хаха"на" тэвэрја, харанда яңго тарот" ни"вам". Хибяна" мэбе"мам' манэт" ни"вам". Таро"маханана" хибяна" мэберп" яна" ңаркаң толаңгу" ни"вам", тад нерня ңарат" ни"вам".

Ханена хасава мунзя"махаданда си"ив ңая тарт' манзъ ханада:

- Мя"ни хэвыхы ңарка сохо' ниня юсидана пэ, пэ танява, юсидана пэм хорат" ни"вам", пили" нерде манэт" ни"вам"

сиугы сиугана хан' ниня ңэда, ңынами хо"ңара", тюкон' тара"!

Ханена хасава' сюдбя ңыне"ем', ңарка"я хой' харуво"мараҳам', си"ив ңая тар" тасюць тадо'. Ханена хасава' ирида ядэрңа:

- Маньзяв мадамзь ненэся сатакэ". Тароць нядани савада" ңэвэда"!

Пиле" нерде ңарка ңая тар" енерць пэй"нё". Сохо' ний пэ ңодъринда ңади. Юсидана пэм' сян' ядабата юсидана пэ ңахат ныхыда. Ханена хасава енерць пэй"нё". Ханена хасава сюдбя ңынамда ңамзи" ед' пива' нэкалпю" нидав'. Ңарка"я хой' харуво"мараҳам' выярпадаханда татуда ңадимя"! Сюдбя ңынанда пендва' серев' сохо' ний пэ' ңо"маридо' хай. Тики' тарця ңэсь ңын' пендахад ңарка Саля' яв', тибей сякарт" ит' лабара".

Ңарка ңая тар" инда нись ңа" тивта помна ңобо" лыхыдэй":

- Енерма серкавм' ебцани яркад сабе сававна ехэравась, таро"ма серкана ңарка"я' тиңгыхына си"ни пирахав ңабцата яңгу.

Ханена хасава ңарка ңая тарм' ңавад" тяхамна пилибт' ңя"мада. Хурканда яңго харанда яңго наңэдя ту"ма ңобт' төберңаха'. Ңарка ңая тар" сюдбя' хадида ханюй я' ни' паклеб"нанда, ханена хасава нэкалманда сер' я' лахаця" ңудаха"нанда турңа". Я' ни' ниди' моб"нанди' сээрэдо' нямна яда судара. Сидя ңарка няндо' таро"ма ямбан' мат" ңая тар" ёлидо' теклы", пыдо' ихинато' тарем' мандараха":

- Ңарка ңая тарм' пирдалеванда Ңарка я' тиңгэхэнэ харта яңгу!

Тики' тарця ңэсь Ханена хасава тарэнзянда ний пидрев' хая. Ханена хасава ихинанда ма:

- Таняна ныхымда ненэся таруць ңарка ңая тар" мэ"мы ңэбта ненэсяри ңод" са"манда ңэвы. Ңылэда яхад хонгэдахая тю"уку' или ян' моховаб" хурка пыда ңод" пирда ңэись.

Сидя ңэнда ни' мэёвна нулкая, Ханена хасава ңарка ңая тарм' ңэваконда ни' пили" илада. Ңэваконда нимни си"ив сюрте япти я' ни' мо" нидав'. Сававна манэць Ңарка ңая тар" хобамда падаць лэси" хулвэдавэ", янга ян' ңэвада санавы". Сидяда сэвада тамна лябабтыхы', сидя нянда вар мунзи" манзабтыхы", Ханена хасава манзь ханада:

- Ңая таре" ню", ңавэда" ңатеда", тандая' сававна манэт' ни"вам', хаванда" ңэсонд тарот" ни"вам', хыбяна" мэбе"мам' манэт" ни"вам' !

Ңая таре" ню" ңэвадо' ха"морңа":

- Нядэна хасава сидна" ңэдара", нянд харвана янгоя, ңари" манъязана" тю"уй тирамана илевакоен сейна" харва".

Ханена хасава няндо' масьиё":

- Харета' ныхыда" нёйда" ңарас", няданда" мэбета яхана таняңгу, тю"уй тирмана сававна иледа". Хибяри" яхад сидда" хонгудм', тамальңгана сидда" пядм'.

Ханена хасава' лахарём' малесь ңая таре" ню" шуймдо' пиллюць харасяда ян' сюрбяхаледо'. Мамбато' тарем' ма":

- Тики' пуня' си"ив ңая тар" юндо' янгума.

Ханена хасава теда' лахана сава илаңгана хараси" иле. Ти, Ханена хасава ненэся мэбе"эн, сейда харвана ненэся не-нэць', ныхымда пирта ненэся ненэць'.

Та' малда.

20. Нядэна хасава

Навнанда хунананда ңоб" яха хэвахана ңоб" хасава нядэвы. Халям' хадаба мэта' понгацида яхаконда мюния ңамдёсеты". Понгахата ядэлава сарнякода таня. Ңобңгуна Нядэна хасава понгада вата, мале ңока халям' хада. Хадавы халэта понгана ңоб" сявта, ңоб" ехэна танявы". Нядэна хасава ехэнамда, сявтамда ңоб" едахана пиренажаюда. Еданда лохомгава пихиня ненэця" тованодо'. Товы" ненэця" ңоб" пумна мят'ти тюня".

Сававна манэць си"ив ңая тар" ңэвы". Нядэна хасава ихинянда ма: «Хадри' ңэсь ңод' еремдакэдм', си"ив ңая тар" халэ" едахана ңавлархарцян.». Си"ив ңая тар" халэ' едахана лэридо' пудабты". Ңаворта' едамдо' ңаво"махадандо' си"ив ңая тар" пыдо' тарем' ма":

- Нядэна хасава, тарот" ни"ивам".

Нядэна хасава манзь ханада:

- Вунива" тарот"! Таро"ма' нерня ңуда' ңынахана енерт" ни"ивам". Синякуй ңарка еся салм' ядаңгу" ни"ивам". Синякуй харв' пахаңгы ңынами' хо"ңгада".

Си"ив ңая тар" Нядэна хасава' ңынам' тасюць тадо'. Нядэна хасава ихинянда ма: «Пыдъехэртара" ңод" пирара" яңговынё".».

Нядэна хасава' мяд' силихина ңоб" сиеся сал танявы. Пили" нерде ңарка ңая тар" енерць пэйнё". ңарка ңая тар" сиеся салм' сян' ядабата ңахат пирда.

Тики нянда пуна Нядэна хасава енерць пэйнё". Нядэна хасава сюдбя ңынамда нянгарпадаханда татуда ңадимя". Ня-

дэна хасава' сюлбя үүнандында пендвана сер' иеро яхако тибей"
сядода ит' лабара", сиеся сал' ю"марыда яда.

Намгэ снермамдо' мале"мяхадандо' ныхыдыраць пыдо'
пэйда"иё". Нядэна хасава Ҥарка ңая тар" ия' ныхыдыраць
пэйха'. Нядэна хасава Ҥарка ңая тарм" цэваконда нимня сян'
моб"нанда Ҥарка ңая тар" мярё ханиңга. Ныхыдырмамдо' ма-
ле"мяхадандо' тароць пэяд". Нядэна хасава Ҥарка ңая тар' ия'
тароць пэйха'. Нядэна хасава Ҥарка ңая тар"м' си"ив' сюрте
мориванда сер', Ҥарка ңая тар" ияхар" ютер"иэ пыда ныка-
лынё". Нядэна хасава манзь ханаада:

- Ҥанита" харвабто' тароць пэхэна".

Мат" ңая тар" цэвдо' ха"мориңга".

- Нядана" сатана" ияна" пирдась, ңари" манъязвана" цули"
нива" харва", иерна" ияңы' ялэнэ" сяңава", илевакоси' цули"
харваңава".

Тикахавахана Нядэна хасава пыда тарем' ма:

- Тад иерия' хибяхарт ияханда" вэвам' иёда" серта", намгэ
вэва серм' серта иябта ңари" манъязван иидм' ехэрэнгү".

Тики' вади' пуна мат" ңая тар" сянди' яхана пыдо' илель-
яд".

Нядэна хасава яхаконда мюнэ хараси" илельй". Яхаконда
халим' пыда хадабюрија, сыра' ёлыцяңгана ханедам' хадаби.
Теда' лахана сававна иле.

Та' малда.

21. Писяко' вомдё"ма

Писяко хаерад' няңы яля' няюв' сядоць пилянда ни-
ня ңамды. Нюкцида ваңгутанда малахад хахатато'
сякалпа пин' тэвавыда. Тики тарця ңэб" ңод" нарэй
саво' и" тю"уняри' миңа. Писяко' пиля уэсь ям'
яхан' ңыхытана ңом' саво' и" павэнда нямна мале сэхэвэда.
Писяко' пиля саво' ид" ерня хай. Яха' салаба манзада"махад
писяко' пиля' ед' ңоб" ңо сэр" теда' тям' тона. Писяко иланзя-
ламзь пилянда нимня и"насавэй' саналы". Ңо сэрм' хынумба
пя:

- Ңо сэрэ"эй, пинякумна хань", нюкциини хадаңгун.

Ҳо сэръ"я ся"ня намдаңгу, ид' ендад минрена нив ңа",
писяко пиля ңэсянд ңом' ясавэй тынылңада. Писяко' хани"
ңопой и"надо', маламбай ха". Тики' пуна писякор ңо сэръ"ям'
тэдорпа пя:

- Ҳо сэръ"яхаваңэ, ңарданд ңарка ңэб" ңод" хаерад' сит
юдава' сер' тэри сисюңэ хэсетынанё".

Хаер" ман"ма:

- Ңэда мань сяха' ңо сэрм' юдабасетыв.

Писяко ман"ма:

- Калей, ханзер" ңэда хаер" ңэса. Вэва янд тер" манзе-
ты"нё":

- Тиред посыба пяб"нанд тират помна яңгэй сэвахана
ва"лортасетынанё". Тарць" харахана ңобтарем' ңаркар
яңгусенё".

Намгэ пирка"на тир" вахальяд":

- Ханзер" ңэда писяко ңэса, сяха' маня' помнана" хаер"
сырцеты.

Писякор ма:

- Калей, тамна лахана", Ҥэрм' хоранда сидда" посыба пяб" нуво" няби тахаңгана нэлортасетыда"нё".

Ҥэрм' хорар ма:

- Сяха' мань посма"хадани тир" нуво' тахаңгана нэлортасеты"?

Писякор ма:

- Пыдар ңод', Ҥэрм' хораңэ, ңаркар яңгусенё". Тиред посыба"махаданд маня пэнд" ни' пэдюць ңамдасетынанё".

Маня пэ вахалый":

- Писяко, ңамгэ е"ни тарем' лаханан, сяха' Ҥэрм' хора нини' пэдюць ңамдасеты".

Писякор ман"ма:

- Хабинд янде"э сит вомдахая хаесетынё".

Хаби янде"э ман"ма:

- Ҥамгэ ненадо яляхана пэм' вомдасав.

Писякор ман"ма:

- Хаби янде"эхэванџэ, нена" нерцякабтвонор. И"насавэй" неру вану" ңыламна си"ми пюсь сабканортаханд пыянд тынам', тэвамд таси" ңэдараасетыранё". Вэнекор мунзялма.

Писякор ңэванда серри ядалъй". Тарем' яданаханда мяды' тири"мана ңадимя. Мяды" тирка"на нельня"мя' хаёвы". Писякор ма:

- Нельне"мякоцяи", тикахана тароси" юсида" хаёвэда"нё", сидда" нелавы няра" тароси" сидда" тикан' моё"мынё", илеван' харвахавабта нянани тода".

Ҥока харанда яңго ңобт' ядалъяд". Тарем' миндахандо' ңоб" неро яхам' нярахала". Пыдо' недам' минре". Мюсена" ненэця" нацдэй" нимня яхам' мадавэдо'. Писякор ман"ма:

- Ҥамгэ ңылека тюкон' сидда" ит' тэвара, харта" ялаханда" пыдара" тюкона ханѓуда", нянани тода".

Яха' тяханяңы таныкана подер" ныкалавы, подер" таня хаёвы. Писякор ман"ма:

- Подерэй" тю"уня' ңа" хэхэва".

Тамна миндяхандо' нэда' мюнэ нехолцавэй пэхэнабц' хаёвы, ютнабця' пэ хаёвы. Пыдо' мал' үокахандо' ядалъяд". Тарем' миндяхандо' үоб" пя' пия' янгом' хо". Тики янгохона үоб" пия икахаданда тарку. Писякор янго' тебкабтавы' пиям' пирбяхананда тю"у" илада. Янгоход ха"мы" пияко наңэдя яляхав үопой яхана сюра, тарем' мэнханда үахат мирканда ха"мы. Пия' янгом' сертаба"ма яхананда хасава парэнда таня хаевэда. Писякор маси":

- Нацикье", тамна нерня' хандава", яля үэваханда тюку хэд" ненэнэм" үули" тэвахава".

Пыдо' мал' үоб" пумна ядалъяд". Үэсовы мяя' тэвабато' хаерта пакалй". Писяко няхата ма:

- Тедари' нылэйда". Пыдар пиякоңэ ненэнць' вэдет.

Пиякор үуво" помна сянамбой халцаптэй". Пон' нись мы" пияко тэвүү", ма:

- Нядэна хасава үопой үэвы. Ёро"махаданда тандая' мяя' тэвавы", поңгамда тёмби.

Писякор ман"ма:

- Пияко, үани' хань".

Пияко үани' хая. То"махаданда ман"ма:

- Нядэна хасава халэда пэрңа, едда пина, са"нүй паныда екаби.

Писякор ма:

- Үани' хань".

Пияко хая. Нядэна хасавам' си' панувна вэдепида. Тарем' сырпата Нядэна хасава үаябарць няларңга, нябида мынода та"вавдавэй хан"ңга".

Писякор ман"ма:

- Пияко, үани хань".

Пияко үани' сырңа. Нядэна хасава үаворць малевы", ва"вамда сертаби. Хонаванда нерциона пин' ядэрңа. Мяя' тю"махаданда мо"нарка юсибтэй", минаханда үарңоёда нэ-кальяда. Үарңоцяңга"ната мядикомда илыбадараха. Пиякор

серокута сер' писякон' мал' ваде"яда. Писяко ңэта ни' санэй". Нида тёрде.

- Ептов", мер' тай' ңада"! Пуня' яльяда".

Мал' ңокахандо' ңобт' ядалъяд". Мяд' хэван' тэв"махадандо' писякор ман"ма:

- Пыдар, нельне"мяңэ, ту' сибя' понд паклад". Пуна хасава тумда посыбаб" сэвта таре парадаин. Нацдэйңэ, пыдар Нядэна хасава' пиби" мюмня паклад". Пибиды серыбаванда мальңгана ңэда мадеин. Парз"ңэ, пыдар синдад понд' паклад", пин' хэванда мальңгана пэянда латан' паклаин. Сябу' подер"ңэ, макода син' танайн, пуна макода' сивня пябта иканда сэхэр"мана сапартаир. Нёхолцавэй пэхэнабцияңэ, нё' син' лясад, ютнабця' пэнэ, не' ня' ти" сяр"ман' танад". Пуна пэхэнабця' нид лясабата сейнда ед' юталаир. Мани' пиякони' ня' ңыламнанды и"насавэй санартани'. Ңаяхаданда хаця' сяторпаңгуми'.

Писяко' саю" тодо' яха" манрамби". Нядэна хасава неманда паңом' мэ"ңа. Писяко, пияко мяд' мюмня и"насавэй санлыйха', хонёда хасавам' ңэванда таркад ңопоё" сякалцетыди'. Нядэна хасава ңамда санэй", пэвдя мякана тум' посахалы. Нельне"мя" хангандо' сер" хасава' сэв' таре парада". Тикахад лэрё макоданда син' тарада. Макода сихиня подер" хацяда есай". Пэвдя мякана синдак' помна пин' пяда. Парз' пэянда латан' матидеда. Ва"ванды ни' сюдарць ңамды". Пибиды серыба пя. Ңэда нацдэй" ңэта"ядо". Пивасипой нё' сивня пин' пяда. Нёхолцавэй пэхэнабцияңгад ңэда насада" лясё ха"амы". Ти" нид ютнабця' пэ лэмбаранда ни' мантэсь, нядэна хасава хась ңарцада. Писякор ңэванда серри яльй". Тарем' миндяханда хой харуво"ман тэвавы"! Хасрё' тиркана ңоб" илебця' хорам' ядабта. Писякор илебциянд' ма:

- Хоре"ей, лынзекохони', мань сэвани такалтадм', пыдар лынгарад"!

Хоре"эр тики яхад ныхы' тяха' нявата тарада, сана"мада яхана само"лад" тамна писяком' хаця" хада". Писякор ңылэрида ян', няхатата пирця лахаця' ни' танахая тёрей":

- Хореков, ламбэйт' мал" ңади".

Пон' нись мы" Хоре"эр тюковна туроць ңадимя. Писякор ма:

- Теда' мань ңани' лыңгараңгув", пыдар сэвад такал".

Хоре"э сэвада хаемла, писяко ңув' лахаця' тяха' сакада. Хоре"эр хубтыхы ялэмтакад пэвсюмя' няңы ялэмдад' ёль-цинд' туроць писяком' пюда. Тамна наңэда яля' ямбан' ңобкарт мынм' мэвадавэй нумда пэвсюмя' ңэсонд' пюрңада. Хоре"эр ңамлы". Хасрё' тэлан' ха"махая ңамдэдонзь тебе. Хоре"эр ңамлавы", нердена" мунода" та"вавдавэй нихимбида. Писякор Хоре"энда ңаворта ңамдэдо' тахамана лакри' пакалъй". Хоре"э тики лоңг ңамдэдм' та"вахальць пубтада. Писякор хоре"энда сё' сивна вырнарида хая. Ңамгэ ёльциңгана Хоре"э' идю пароць пярдейда, хоре"э' еймана пухуптэй". Тад ңадиво"махаданда хоре"э ңаха"на ханяна сэвада тыравы". Писякор хоре"энда хабидяр' ни' танэй", тикахад тёры"ңа:

- Я' ңарка" тода", мэдамда хададм' ханесэва" яхада".

Нерде ху"ларка", харуэс" то". Хоре"э' сэв" тук" лабцейд". Писякор ма:

- Пыдахавар яханабцар вэва, ңани' ңармэрка нид тохарңая".

Тарем' мэнан сямян я' сармик": пия", нохо", тёня", ингней", сармик", варк" - мал' ма"лы". Писякор ма:

- Мань ңули" пэдэйв", тедари' тюкомда яхыбаханда" немани' сатам' мэкарцядм', пуна яхама"хаданда" си"ми сидеида".

Писякор няхатата пирця ңумсавэй лахаця' хаерад' няңы хэван' ялян' сядоць хонэй". Писяко пон' нись мы" минаханда хонарэй". Нябид писяко хонёдан' Хоре"эм' мал' ңамадо', мэё" лэрида хай". Тарем' тасладо':

- Маня' хэ"мяхадана", пыдар пияконэ, лэнд нюдянэ писякомд сидеир, манъин: «Писяков, юркад", тудод ханзе", җавор".».

Я' сармик" хоре"эм' җаво"махадандо' тодо' е" сеян' тарадо'. Тики" хэхэва пиякор хонёда писякомда янамбовна сиде-да маси":

- Писяков, юркад", тудод ханзе", мыт ядембован' җавор".

Пиякор тики вадида мэсо"махаданда минаханда лахацие" помна сакада.

Писякор нид сэвата хая вэнэрџа, ңэта хундаха" пыхы-дамда высылпа вэнпида. Ңамгэ' ёльциңгана сэвада нэ, ңамды", җаворманзь санэй". Тад сававна манэ"ңада, нига хоре"эм' мал' ңамэдо', мэё лэрида хаёвы". Писякор тэри хаяльй". Тики яхад тамна нерня' яльй". Тарем' миндяханда ңоб" неро яхам' нярахала. Яханда мададм' пюла. Мадась ям' хось я"ма. Яха' лаңгахана ңоб" тибей салм' хо. Тики салм' ненавэй ңэ' питарңада. Ладванда сер' сябтада малңэ хонгара. Тики сябтм' ит' тэри түрцедеда. Мюндя сакада, яха' ендат' ңамды". Тарем' миндяханда неро яхакода җавэд' латама, тарем' мэнан' мюй ёсерета яхаңэ хая. Писяко сёмда хана:

- Сябт ңано хатаработы, Неро яхам' ха"вра Писякор хата-работы.

Хамб" сер' хулвара.

Тарем' миндяханда сидита няна пае" соты' ядахана ханғорондани ядабта. Писякор иркандо' тэва писякон' тё-рыңа":

- Писяков, я' няку' няна" нултад, ханортар ңав".

Писякор хонрэйда:

- Ханорода" ңамгэ"?

Няби" ма":

- Ханорона" лысу", пыря".

Писякор ма:

- Мань тики ханорода нин ңамд", ирини ңавар" ни" ңа", сёми нюдя.

Писякор тамна тяха' хатарабты, тарем' миндяханда ңани' хаңорондани хо. Ңани' ян' сита хаңа", ңани' хонрэйда, няби" ма":

- Маня" хаңорона" нёя", нёй" мыд".

Писякор манзь лыхыдэй":

- Тикахав, тики вадитида" хаңгорода" мань ирини ңавар".

Писякор сябт ңаномда няби я' хэван' ихредада. Сарпя' мюмня тю"уй" тодана ненэцяң" хая. Тайна, пыда тэвабата ненэцие" едадо' тамна лохомадавэй" ңэвы". Писякор ма:

- Теда' мань саць пэдэйв", тедари' едата пинван' немани сатам' мэнгудм', пуна хаңорота" пиб" си"ими сидеида.

Писяко' хонарахава ңармэрка" ненэця" ңацекэхэто' ма":

- Пыдара", писяконда ңано" ит' на"волңара".

Писяко' сарпя' мю' няхар" тэ нибям' пуду' тю"уня' ядабтё пальяд". Тики яхад хонёда писяком' паромпари тай' тырца-да ма"ним":

- Писяков, мер' тю"уня' ңа", тайна ңанор хая.

Писяко тикым' намда ңэта ни' сэвта хая санэй", нид сэв пуиба сарпя' мюмня манараби. Едёй' сер' миндяханда нерде-ня нибя' пухуна идюда хай, нябимдей нибяхана пуй вэта хай, няхаромдэй нибян' ңэвада пудонда сихид ңыдэй".

Хаңорондна" хаби" ма":

- Ти, тарем сит мэнгосава", нямэхэна нява" хадабабнанд ныхыр ңаркаси".

Та' валакада.

22. Писяко

Яв' салякохона Писяко' ванготада ңэвы. Писякор тарем' сырпата ңыламнанда хайнана Но сэрэ"эм' манэ"на, манзь тёрей":

- Но сэрэ"эй, тяхакумнов!

Но сэрэ"э тарцям' намда вахальй":

- Писякои, пыдар пиляханд табтавэв", сюдбя я саляхартан' нив" табцуути".

- Хэй, ңон' таркаебат Сэйта мара' ниня Хаер" сит холкабтасетынё". Пыдъер тэрихива манзетынанё": - Пюль", пюль"!

Писякор манэ"мэмда, намдавэмда тарем' ваде"ңада.

Тарця вада" Хаер" сеян' вэвавна тебе":

- Ңамгэ си"ми вадиндамбин?

- Сит вадиндамбаңгудм'. Тир" сит такалп" ханяңэхэрт вакар нинё" ңадясету".

Тадахава Тир макабтылы", хуркари ясоре"энэ хан"лы":

- Тюку ханзер" ңэда ңамгэ ңэса? Ңамгэ мань е"эни вадиндан?

- Мерцянд сит посыба пяб" пелярид ляңгабтамбасетынанё".

- Ңамгэ си"ми ваде"ңан?

- Мерця' им' Писяко' вада' ңани' вомдадо'.

- Мерця, си"ив яля' посана"махаданд, терта"махаданд Ңамдлёда пэт пыяхана вывнаесетынанё".

Ңамдлёда пэ вахальй":

- Мань пыяханани Мерця сяха' выварца? Хумбанзи" си"ми серк" поёлтамбин.

- Хэй, нена" хынаџов, Пэхэваңэ мунзяраванава. Пыдъер сит Иңгнэ"яр ңэмда тибтехэя хаесетынё".

- Мань ңэни тибтепа"мами сяха", Писяконэ, манэцар? Си"ми пилць ванготанд мю' пакалцетынанё", таняна манакорид ледресетынё".

- Иңгненэ, хумбанзи" ңарамдын. Хабинд пя' яңгохона . няндси"яри няңгра"ясетынё".

Пя яңго тарця вади мэтам' ңобтарем' волтада:

- Мань сяха' Иңгнейм' сякалпасав, сяха' няндаси няңгараса?

- Хаби' пя яңго мунзяраванава, - Писякор тарем' ма. Хора янде"эр си"емд сидит няд сюртехэя, енядаркай хаесетынё".

Пя яңго' ненахада то, Хора яндехэнда ңопой' тёрей":

- Писякор ти тода, Писякои' ңамгэмда пэрмана, Хора янде"э ңопой' палкадтада.

Писякоцяи тарем' пыхылёдаханда пилякоемда Ңо сэрэ"э няёлмэда.

Та' малда.

23. Писякохо', хорекохо'

Писякор ңэвандада серри етри яда. Тарем' миндяханда хой харуво"ман тэвы". Хасрё' тиркана ңоб" илебця хорам' ядабта. Писякор илебцянд' ма:

- Хоре"эй, лынзекохони', мань сэвани такалтадм', пыдар лыңгарад"?

Хоре"э тики яхад пыя' тяха' нявата тарада, сана"мада яхана самолад" тамна писяком' хаця" хада". Писякор ңылэрида яхад, няхатата пирця лахця' ни' танахая тёрей":

- Хоре"эй, ламбэйт мал" ңади".

Пон' нись мы' хоре"эр тюковна туросавэй ңадимя.

Писякор ма:

- Теда' ңани' мань лыңгарангув", пыдар сэвад такал".

Хоре"э сэвада хаемла, писякор нув' лахаця тяха' сакада. Хоре"эр хубтыхы ялэмдакад яля ямбан' ңобкарт мунм' мэдавэй', нумда пэвсюмя. Хоре"эр ңамлы". Хасрё' тэлан' ха"махая ңамдэдонзь пэй". Хоре"эр ңамлавы", нердена" муунода та"вавдавэй' хана"на", мер' нихимбида. Писякор Хоре"энда ңаволанан' лакри' Хоре"энда ня' сивня ңамдэдо' тахамана пакаль". Хоре"эр тики лонг' ңамдэдм' та"вахальць пубтада. Писякор хоре"энда сё' сивня вырнарида хая.

Намгэ' ёльциңгана Хоре"энда едю пароць пярдеръяда, Хоре"э' еймана пухуптэй". Тад ңадиво"махаданда сырна, Хоре"энда ңаха"на ханяна сэвада тыравы".

Писякор Хоре"энда хабедяр' ни' танэй", тикахад тёры"ңа":

- Я' ңарка" тода", мэдамда' хададм', ханесэйва" яхада".

Нерде хулы", харңэс" то". Хоре"э сэв' тук" лабцейд". Писякор ма:

- Пыдахавар яханабцор вэва ңани ңармэрка нид тохоряя".

Тарем' мэнанаханда сямян я' сармик": пия", нохо", тёня", ингней"; сармик", варк" мал' ма"лы". Писякор ма:

- Мань ңули" пэдэйв", тедари' тюкомда" яхабаваханда" немани' сатаком' мэкарцядм'; пуна яха"махаданда" си"ми си-деида".

Писяко няхатата тар" ңумсавэй лахаця' хаерад' няны хэван', ялян' сядоць хонэй". Писякор пон' нись мы" минаханда хонарэй". Нябид писяко хонёдан' хоре"эм' мал' ңамадо', мэё" лэрида хае". Пыдо' харто' помнандо' тарем' тасладо':

- Маня" хэ"мяхадана", пыдар пиякоңэ, лэнд нюдяңэ писякомд сидеир, маньин:

- Писяков, юрkad' тудод ханзе", ңавор".

Писякор нид сэвата хая вэнэря, ңули" нись паромбю", инда таңга ңэта хундаха" пыхыдамда высылпа вэнапида. Ңамгэ' ёльцяңгана сэвада нэйда, ңэта ни' санэй", ңаворманзъ яльй". Тад сававна манэ"манда сер' неры я' ңарка" нига хоре"эм' мал' ңамэдо', мэё лэрида хаевы". Ян' манороко мункэцяхартм' писякоця ңамдаңэ нивы" хае", мадко ненэцям' ңули" хадавэдо'.

Писякор тэринда' хаельй".

Валакада.

24. Халэв' сё

Я в' марахана юрмян" халэв" морена". Тарем' сырпато' ңоб" халэв нядо' ханяхавана хан"мы. Теда' ти тованонда. Халэвко"я" няхандо' сыраць тарем' маманондо':

- Такы няхавава" ханерахавы. Ҥарка"я пэхэм' ти сякал-пинё". Някунда хэб"на" саванё", сидна" вуни хадаңгу". Няндерта ңод" намда тарава.

Тики вади" пуд юр" халэв няхандо' санэйд", ңопой тёрадо':

- Кха"- кха",- кха"- кха", кха"- кха"!

Тад сававна сывлавандо', ңамгэдо' ңэса. Неры пэхэнэ маниевэдо' - муңг ңэвы. Ненэсянда ңод" малда еся муңг ңэвы. Тад ңо" малда па"мянё". Юр" халэв' нэкальц я"мадо'. Няхавандо' ңоб" тёрада:

- Си"ми нядадов"! Яңгэй-яңгэй.

Юр" халэвар тарем' тасладо':

- Ҥарка лекарава" - лимбява" ханзь тара.

Лимбям' хаңанё". Лимбяр то" нив', тарем' масьнё":

- Юр" халэв, нин - сава" нин! Ҥока' манзетыламнё": талэрма' малада таня. Вадавнани ти хая.

Та' малда.

25. Харңэ' не ню

С я"ны ңэбта ңод" Харңэ вэсако илевы. Не нюда танявы. Хов, Харңэ хэбидя ялян' хамеко пяда. Пензерта хамэда, тараванзь хамекулы". Не нюхунда ма:
- Паскойха" ңобадами сэд".

- Пенав янгу.
- Пенам' тадамзи". Ңобан падтавы" ңэя".
- Падро маторць няблюяв вуни таня".

Вэсако ябтакоцявна мивы тэнако та.

- Нибями янгу, - не нююм' ма.

Вэсако нибям" хо"ңа:

- Теда' сэдор"!
- Ңумбъяяв ситадм'.
- Еся ңумбъядар сер"ма.
- Ңумбъями симда.
- Ңэя, нён манзара". Мань сит нидм' ңавламбаңгу".

Не нюнда сеяда хая, сэдора пяда.

Тадахава хэбидя яля тэвүү". Харңэ вэсако едэй ңобда сера, пензerm' ладорпа тэри тырцана.

Та' малда.

26. Шаньгы" ёмзя' вакця

Параңода' хард' вэкана вэсакохो' пухуцяха' илевэхэ'. Ңамгэхэртади' яңговы, ңули" маңгабавэхэ'. Луца вэсако' есьецида таня", ңопой поңгацяда.

Ся"ны' ңэбта' ңод" пухуцяр вэсакохонда маси":

- Хадавы хабэвкуд тарси" ңокаманё", ңамгэданд мэнгуд? Вэсакор масынё":

- Ся, ся, пухуця, ямб наар тута, хабэвкуд тамна тянё! ңэнгү"!

Вэсакор есьеда манэсарңа. Мяканди' ямб луца"я тэвы". Пухуцяр маси":

- Ямб наров пыдар? Сит ңули" пон' ңатедм"!

Луцар маси":

- Мане, мань.

Пухуцяр маси":

- Падар хынава? Падар тарси" ңарка ңэвы, хабэвкуни тя-нёхорт тянё".

Луцар хая. Пэвсюмя' няна вэсако то. Пухуцяда маси":

- Ямб наар турңась, падда тарси" ңарка ңэвы, хабэвко-ни' тамнахарт тянё".

Вэсакода маси":

- Ямб наар ненэць' ни ңов"? Ямб наранд тоб" ңавэни' ңавортани"?

Ся"ны' ңэбта' ңод" вэсако ядаванда сер" сехэры хэвахад есь" ңэсям' ховы. Масынё":

- Сян мякани' тэвраб"ани пухуцями си"ми' ни хусарынгү", нини' хораңгү"? Теда' пухуцями нельтеб"ни таравы.

Есь' ңэсям' сыра' ңыл' сехэры' ядан' такалңада. Вэсако масьнё":

- Хабэвкуд' мисе"мяхаданд хадабадами ңули" яңгу". Хү' няна пыдар ябаханд ханеванзь хантани', маси" ханедам' ха-даңгуни'?

Нумди' пэвсюмзь хонэйха'. Пухуцяда ңарңоёда пай' нэ-кальяда. Пи' сава ерня вэсако юркы". Паданда мю' шаньгаци мо. Миманда сер" сехэры' сидя хэван' моё"яда. Есьеда ма-нэ"ңа ңопой хабэвко еремы. Поңгаха"та ңоб" халя таркавы". Хабэвкомда поңгаханда таркабтада.

Халямда есаңганды сярада. Мяканда хая. Пухуцянда хэ-ван' яномбовна ңани' хонэй". Хубтахана вэсакохо' пухуцяха' ембъяха'. Ханеванзь хаяха'. Ядаванди' сер' пухуця тарем' сырпата сехэры' ядахана шаньга" тэри юседа". Пухуця вэса-коханда маси":

- Шаньга" ханяд ңадимы"? Тарси" ңоканё".

Вэсакода масьнё":

- Шаньги" ёмзя' вакацяхад ха"мвы".

Есаңгати' тэвъяха'. Вэсакор масьнё":

- Пыдар ябаханд есьед манэсан".

Пухуцяр тад манэ"ъяда, есаңгати' ңоб" халя еремы. Пу-хуця масьнё":

- Есаңг" халэ" таркангавам' нидонё" вадецето'.

Вэсакода маси":

- Пыдар ябаханд таркавы" ңэ" ни"им'.

Поңгати' хэван' тэвъяха'. Вэсакода маси":

- Пухуця', поңгар манэс", вата". Маси" ябаханд ңамгэ ни' тарка"?

Тад пухуця поңгамда ватада, ңоб" хабэвко еремы. Пуху-цяр маси":

- Вэсаков, поңган' ханзер" хабэвко таркавы?

Вэсакор маси":

- Пыдар ябаханд таркавы" ни ңа".

Мяканди' ядаңаха'. Сехэры' ядан' пухуцямда сюри тирци-деда. Пухуцяда тапхалый". Вэсакор ма"нив":

- Ңамгэм' хон? Есь' ңэсям' ховэнанё". Пыдар ябаханд хонини' ңэ" ни"им".

Тарем' яданаханди' паранода' хард' поңгана хорова"я муно"монда. Пухуцяр ма"нив":

- Ңамгэ муно"ңа?

Вэсакода ма":

- Лешой паранодам' садамби, ңадябята тарем' тёры"ңа.

Мяканди' тэвыхы'. Есь" ңэся' мюня' солотэй" хопейка" ңока". Тикахавахад илевари сер", ңаваради' ңокава.

Лахрё тарем' ма:

- Худ лэкахад вэсакохо', пухуцяха' сававна илельяха'.

Паранода марцяхэхэнда маси":

- Есят" ңэсям' ё"ңанаси", есят ңэсям' ховэхэ' нихи' ңа".

Вэсакохо', пухуцяха' хо"мэхэ' ңэяха'. Вэсакохо', пухуцяха' тэвра" нихиудом'. Паранода ма"нив":

- Есь" ңэсям' хосади'?

Пухуцяр маси":

- Хонинзей, хонинзей!

Вэсакоюм' маси":

- Ся, мунзю"! Есь" ңэсям' хо"мами' яңгусянё".

Пухуця ңани' ма:

- Ңани' ненодода тиси", шаньгы" ёмзя' вакця ха"мыцянё".

Вэсакода маси":

- Шаньгы' ёмзя' вакця' нине" ха"морцето". Пухуцями ти са"ла.

Пухуцяда ңани' ма":

- Ңани' ненодода тиси", есаңга"ни' ңопой халя еремысянё", поңгахани' ңопой хабэвко еремысянё".

Вэсакода маси":

- Ваде"мэми ти, есанд халя" ни"нё таркасето', поңгаха" хабэвко" ни"нё" еремсето', ңабцата пухуцями са"ла.

Ңани' ненадода тиси" пухуцяда маси":

- Параңода, тики яляхад пыдар' ңод" теневаваңиабян. Лешой тики яляхана сит садок' садыбиси", ңарковна ңарнерңансянё".

Параңодар пя' латада хаце тахабта". Параңода маси":

- Ханзер" ңэда пухуця ңэвы, тяха' ханара", сидя ян' ңадартара".

Пухуцям' ханадо'. Луца вэсаконд пухуцям' сидя ян' ңадахартадо'. Пухуцянда хахава' ярнэ ңурналтада, няхар" яля' ярна.

Параңода марцихахэнда маси":

- Не нюор танясянё", луца вэсакон' мипат саванё", латана" мал' са"нибтейда.

Луца вэсакор тарця вадам' намдахава индя ңыл' писялы", сэвада сюри тэпа пя, яраць ңэвадэй". Идя маямби, пухуця' ей" ңэ ңацекы нем' мэванда ңэ"нив".

Параңода' марцихы' не нюом' луца вэсако ханада. Луца вэсако тандая' васкуйдарев' илельй".

Та' валакада.

27. Маңгабадако

Параңода' харад' вэканы маңгабада лученг пухуцянда ня' илевэхэ'. Лученг хоркыта", луканда еса", халэта поңга" таня". Хоркы ңокавна хадаби. Пухуцяда ниңгана выдара вэсакохонда маси":

- Нена" ңокавна хоркы хадабиданё". Мань ниңгана выдрадм'.

Вэсакоюм' ма:

- Таня ңока ңэя". Ямб нара' тоб", тамна тянё" ңэнгу.

Хуняна лученг ңани' хане хая. Пухуцяда яля ямбан' пин' са"лана, инда ңыл' манзеты:

- Вэсакони ваде"мы ямб нарами тобтав.

Яля' еръй' ха"махава хэвнияд ңоб" юнитана миңа, ханада ңули" ямб. Пухуця тёрей":

- Ямб Нара, тон?

- Тодэйм! Тодэйм!

Лученг' пухуця вэсаконда есанғана хадавы хоркы' Ямб Нара' хан' мю мал' пэнъяда. Тамна тянёхорт тянё". Яля' пэвсүомгава вэсакода то. Ңули" ңамгэхэртм' нивы хада". Мяканда тю, маси":

- Пухуцёв, мэдами пире".

Пухуцяда ма:

- Пиревандами яңгу.

Вэсакода вахальй":

- Хоркыд таняценё".

- Ямб Нара турңась, хоркыни мал' ханэйдась. Тамна тянёхорт тянё".

Лученг маси":

- Сававна са"лан ңэван. Маньзяв ненэцям' ни дамзь вадес". По' ямб' ңэвам' ваде" ңгадамзь.

Тики' пудлученг ңули" ңамгэхэртм' ни хадасету". Ся"ны ңэбта ңод"лученг маси":

- Ханеванзь ңобкана хэхэн", маси" ябар танянакы. Не" ңод" ябдасеты"нё".

Нобт' яльяха'. Лукоти' есанг" палкур" хавы". Пухуцяда тёрей":

- Вэсаков палкур" ңод" лук есанг" хангавынё"?

Лученг ма:

- Палкуркав хури' ханя" тарка".

Нани' яльяха'. Хоркыти' есанг" лук" хавы". Пухуцяда ңани' тёрей":

- Хоркы"ни' есанг" лук хавынё"!

Вэсакода вахальй":

- Хоркыхыв хури' ханя" тарка".

Таддикахад ңани' яльяха'. Палкуроти' поңган' тэвъяха', хоркы" хавы". Пухуцяда ңани' ма:

- Хоркы" ңод" палкуро" поңгаха" хангасетавынё"

Вэсакода ма:

- Хоркыхыв хури' ханя" тарка".

Тикиди' мине пуня' мяти' няюв' яльяха'. Лученг нерняна яда.

Пухуцяда пумнанда миңа. Тарем' миндяханди' ялэмдали" ңэхая. Минади' ңоб" пя' пахамана ңэвы. Лученг ңэда хоркада, ңэнда хоркадамам' салць манэ" ңада. Пя' пахангана есь" лабтэй ңамдёвы. Пухуцяда тёрей":

- Мякани' ханахами"!

Есь" лабтэйм' мине мяканди' яльяха'. Ңули" тидңэхая, хардати' варан' тэвъяха'. Хорова муно" ңа. Пухуцяда ма:

- Вэсаков", ся! Тики ңамгэ" мун"?

Лученг маси":

- Ңавэ" мун" ңэнгү", Параңода' яр' мун".

Хардакохонди' тэвъяха'. Та' илелъяха'. Ҥамгэхэрт яңгодади' ни яңгу.

Лаханако паранода' няна хая. Паранода есята лабтэйм' яңгулкабта. Хардата тер мал' ма"лэйда маси":

- Лученг, ңэва турць ңэвадэйнанё". Ҥамгэм' хосан?

Лученг ма:

- Ҥамгэхэртм' нидамзь ху".

Паранода маси":

- Пухуцяда теневанғу. Тюкон' хо"ңара".

Лученг вахальй":

- Пухуцями са"ла. Ҥэвадалара"! Пуна нензюмда.

Пухуцямда хуркавна ңол" тэварадо'. Паранода ма:

- Ҥэва турць вэсаконд ня' ңэвадэйдинё". Ҥамгэм' хосади'.

- Еся" лабтэйм' хонинзь.

Вэсакода вахальй":

- Нена" сиякананё". Сяха' ңани' еся" лабтэйм' хосани'.

Мадамзянё пухуцями са"ла.

Пухуцяда маси":

- Ненодода тиси"! Ҥобкана ядэрџанисянё". Ҥани' ненадода тиси"! Лукони есанг" палкур" хавысенё".

Лученг маси":

- Хуна ни ман" палкур" луко" есанг" еремы".

Паранода вахальй":

- Ҥари" тяха' вадет.

Пухуцяда ма:

- Ҥани ненадода тиси"! Хоркы"ни' есанг" лук таркавыщениё". Мань мадамсенё": "Лук ңод" хоркы" есанг" хась пир"мэданё".". Пыдар манаси": "Лукъяхав хури' ханя" тарка".".

Лученг маси":

- Тюконда" вадида вэва"нё. Са"ла, ңэвадалара".

Паранода ма:

- Ҥари" тяха' мэд.

Пухуцяда тамна тяха' пядай:

- Ҥани пунада тиси"! Хоркы" палкуро"ни' поңгаха" хавыщенё". Мань мадамси":

- Хоркы" ңод" халя' поңган' тарка пир"мэданё". Пыдар манси":

- Ханедахав хури' ханя ха".

Лученг маси":

- Тюконда вада"я вэва"нё". Хуна ни ман" хоркы" палкуро" поңган' хавы". Са"ла, ңэвадалара". Таня мэя.

Пухуцяда ма:

- Вэсаков, пя' паҳаңгана ңэр хоркаласенё". Ҥэнд пакаломам' салць манэ"ңарсенё". Тикахана еся" лабтэй ңэвысенё".

Параңода вахатый":

- Пухуця сияк ни ңэнгү".

- Ҥани' иенодода тиси"! Параңодан э ярамд ё"ңанаси".

Параңода ңылыда латада хая тахабта:

- Ханзер" мань яртадм'. Пухуця сияк ңэвы. Түросатавы лата' ед' ңэвада палыхына сапавы ңэя.

Лученг ярума, маси":

- Нер" мадамзи" са"лам' нёра" яебтамбю". Ядэрци то"махадани мя"ми ядемдамбадами. Вэва пираханда пухуцякоеми иятаминзы. Теда' хибя мя"ми ядемдамбаңгуда.

Та' малда.

28. Ёхоборта ңацекэхэ'

Ся"ны ңэбта ңод" ңацекэхэ' сянакованди' сер' ёховэхэ'. Няхати' тарем' манзетыхы':

- Тюковна хэхэни', мя"ми' тайна ңэнгу.

Тарем' нити' вадаха" инзеленаханди' мякданди' ңаха"на хэвэхэ'. Тад хадуманда, мяти' ханяхартана хось я"мади', та' минди' юхуху'.

Ңацекэхэ' няхар" яля' миңаха'. Няхаромдэй ялянди' пэвсүомя сер' нюдяюм' няханда маси":

- Ңули" ңыхы яхана пыдар ңамгэм' маниен?

Нябир нив" ман":

- Мань"яхаван ңамгэхэртм' нидм' мание". Пыдар ңамгэм' манэ"џанэй?

Нюдяюм' маси":

- Мань ңули" ңыхы яхана ңоб" ту' ялям' маниедм'.

Тарем' яданаханди' пи' ерңэ хая. Pi' ерңэ хэхэва нюдяюм', маниевы ту' яля' хэван' тэваъяха': Сававна манэць тики тодабць' ңэвы. Тодабця' хэвахана ңопой вэсако. Вэсакор ту' хэвахана ңамдёванда сер' пя' малахад сидя хоркым' парадамби.

Ңацекэхэ' вэсако' хэван' нульяха'. Вэсако няхартанди' ни сыр", парадамбада хоркырихиода мание. Ңацекэхэ' сиряха': няби хоркында' мале тарта мал' паравы, нябиом' ханзели' тун' парадамбабата ңод" параван' ни харва".

Ңацекэхэ' вахальяха':

- Ирикэй, мани' юхуни', сидани' табэда"ма, мя"ми' ханяна ңэдакы.

- Ирыр такы, хаел такы, ханзер" ёходади".

Нацекэхэ' тики вади ниди' хамэдамбю". Вэсаком' сян' хонарасетыди', пыда үопой' манзеты:

- Ирыр такы, хаел такы ...

Нацекэхэ' пи' ямбан' вэсако' хэвахана нуҗаханзь. Вэсако"ям' хонарамба үэвадалади'. Тарем' сырпати', вэсако' няби хоркы үули" паравы, лэхэртада ни' үадю". Нябиом' тамна үахат үыда.

Нацекэхэ' үани' үэванди' сер' яльяха'. Ся' хунат' ядавакэхэ', ю" мяды" нимня үадимяха'. Саць үыхы" мяды" үэвы", үули" тоховы". Нацекэхэ' мяды" помна ядэрманди' сер', үопой хавы ты' үэвам' хонха'. Наркаюм' ямб сяймам' хо, тикым' тынзянданда сертада. Сяйм тынзянгананда хабэй ты' үэвам' яркыба пя. Ты' үэва"ям' яркванды сер' үобо" манзеты:

- Хэхэни', тэ"я' яркыта са"үась.

Нюдяюм' үяханда тёрей":

- Нявэй", үамгэр хадкэ, үамгэ хабэй ты' үэвам' иления тэдэрев' яркыбир?

Наркаюм' үянда вадаха" ни инзеле, үопой вадада:

- Хэхэни', тэ"я' яркыта вэвась.

Наво" ширка"на нацекэхэ' үани' яляха'. Няхаркав' яля' ядавари сер". Няхар" яля' үэсоңгана неранди' үяна үока"я мядо манэ"үаха'. Нацекэхэ' тэри маймбихи', ихинанди' манзетыхы':

- Гедахав' үаворьининзь.

Мяк" тэваяха', мядо" помна ядэрнха'. Үоб" үарка"я мят' тюнха'. Мяд' тер" ненэця" үавормы". Нацекэхэ' манзь ханади':

- Пыдахавара" үаворнада"нё". Мани' ёхобортажани' вынахалыни', сидани' үавлада"ма".

Тарем' лаханаваханди' ту муно"я. Ненэця" лаханана нацекэхэ' нямна вададо' яңгу. Ту' муно"ма сер' тёресетыд":

- Хов, хà, үамгэва' хадкэ тува" үамгэ мунопата, үанихи"на тарция нинё" үэсету"?

Нацекэхэ' ңод" тёреяха':

- Ңэ"лери ненэцянда" ңэвэда", мани' ти мэн' харвани'.

Ту ңани' муно"ңа. Ненэця" ңани' тад тёревандо':

- Ебтов", теда' ңамгэва" хадкэди', ңарикавананда тюку тува" хавам' пянацы?

Ненэця ңаворо"махадандо' тасалко пэяд", ма":

- Вары мякана илена тадебя вэсаком' хонара таравы.

Намгэхэв сидана" пянараха.

Тики вадито' пуд тадебя вэсаком' тадо'. Вэсако пензерта та- вы. Сюдбя пензерм' ти" ни' мэванда сер' пя ти' выйры".

Тадахава ңысы' тер" ненэця" тюку мят' ма"лы". Нацекэхэ' тэри пысаяха', няхати' манзетыхы':

- Тюку ханзер" ңэда" ненэця" ңэбто"? Мани' ңамгэ пыдо' сэваха"нато' нини' ңадю"?

Нацекэхэ' нё сидя хэвахана ңамдё тэри лаханакурнаха'.

Тадахава тадебя вэсако пензерета пяда, самборна, тё-рыбытырна. Ңаво" пирка"на ма"нив":

- Ңэсы' тер" нюкцин, сидя ңа"коця сидна" пявэхэ'. Няби-юм' ңа"коцям' няюни нив сюрте".

Тики вади намдахава ңацекэхэ' ханямна хэвамди' нивэди' хамэда". Ңамгэ' ёльцуңгана нюдяюм' тад сававна сылы", ңока"я хальмер" пэмбдо' поңгана хонёвы. Нямда пюла. Ня-коцяеда хэвахананда хабэйңэ юсида, ханимы" сэвахаюда то' сэлахаха'. Тикым' манэць ңацекы' сейда хая, үэта ни' санэй", савкэцямда ека - нянда сэв синда, ихинанда ма:

- Сеня' вэсако"я сидяңгамд парадасава. Тики' та"льня" ңадьбыят хабэй ты' ңэвам' яркыбасарава.

Нацекэцяи ңэванда сер' ңани' хая. Сян яля' мимакы, ңани' ңаво" пирка"на харта мя"мнанда ңадимя. Нисяхаюда, небя-хаюда саць маймъяха'. Ңацекы ханзер" иле"мямда серота сер' ваде"ңада. Нянда ханяна хаёмам' тензебтева.

Тики серо" пуд ңацекы мята хэвня' ни ханцету", маям' сян' нись мэс". Та' малда.

29. Сидя тосанда

Сидя тосандаха', сидя пебясаха' илевэхэ'. Сидя тосандаха' ялэ" ханеңаха'.

Сидя тосанданда үоб" не няди'. Некахаюта ханеб", нябахаюта няна хаюрңа.

Ся"ны үэбта үод" нябахаюда лаханако пэйха':

- Нявэ", үамгэвна ир ядэрңа?

- Ими ни ядэр".

- Не үацекэ"я тарчяню': савари тосо" хоб нянда пэрцетынью". Хадавы үэя. Пыдар ха"маңан?

- Мань тарем' тасламбив. Ненэй үуда' есям' тун' мохоми'.

Сидя тосандахают не ня тюсерта нив' үыдаңгу". Мани' нянда ниним' манд":

- Мя"ма" якэхэма, тюсел үыдахар"?

Тосандаха' не ня тюсерта нидав' үыдаңгу", нив' манд":

- Сидя не нябав, тюсели' хурка?

Мани' манынни':

- Тюсел мяд' мюд нянд си' няңгараҳая манэт.

Мокоданда син' нянда сим' хортелабтахая ни"им' сылаңгу". Мани' тухуд тюхулмы үуда' есям' нянда син' моими'.

Тарем' тасалко"махаданди' не үацекэн' тёреяха':

- Не үацекы, тур пятыхар".

Тум' пятая. Мяд' мюй якэхэма.

- Мя"ма" якэвонда, тюсел үыдахар".

Не үацекы' тюсерм' үыдабаван, ненэй үуда' есям' тун' мөдий'.

- Сидя не нябав, тюсели' хурка.

- Мят' тю", харт манэт.

Не җацекы мят' тю. Нянда си' няңгара макоданда син' сырңа. Нябахаюда нянда син' морёмы ңуда' есям' паромба моди', хурна хая. Не җацекы тэри хава.

- Некахаюта тоб", тарем' маньини": "Не нямди' ңэва' едяхана ңэдарабтами'".

Нув' пэвсюмзь ламбити' хырна сованонда. Пой' ңутот' нултава- нонди'. Тарем' маманонди':

- Не җацекы, тосод хосая".

Сидя не нябада мякад пирас' вахальяха':

- Не нямди' ңэва' едяхана ңэдарабтаминзь.

Сидя тосандар ниванонди' пуирю":

- Хадавэри' ңэванңгабя.

Не нянди' ханан' хабте"эям' подермонди'. Сидя тосондар тарем' маманонди':

- Ңуда' хадавы ңэб"нанда - ңуда' хадавэхэ" ханад. Ҥа' хадавы ңэб"нанда - Ҥа' хадавэхэ" ханад. Хабте"э ханамда нэкалңа.

Сянд' мимба"нанда ңод", нерняна ңока"я мядо манэ"ңа. Еркы мяд' хэван' нултада. Мякад пухуцяко тарпы":

- Нюни хэвкод мара" тонёв", сидя тосондаха' не ня ңэдараханю".

Нюхунда маси":

- Недар товы!

Мякад хасава ңадимя. Не җацекым' мят' тюледа. Едэй мэвы нен' нив' ман":

- Еддами пире".

Тосондаха' не ня' намдортада янгу. Хасава нерцилы". Тосондаха' не ням' сюдэхэта питарңада. Не җацекы' пуй" ян' пудамъяд". Ненэй ңуда еся нянда сивна ңурна то. Хасава ма"нив":

- Ңуда' хадавэн ңэвэнаню", ңуда' хадавэхэ" хань".

Халмер немда хаеда.

Та' малда.

30. Купец' няхар" ню

Параңгода' харад' вэканы ңоб" купец паралгода' пиркана сававна иле. Няхар" нюдя. Ся"ны ңэбто ңод" купец падарода манэсала, маси":

- Мань си"ив яля ңэсоңгана ханговэдм'.

Ненэся си"ив яля' пирка"на купец янгума. Ңани" нидатин' мю' хальмерамда мэхэя хэхэ' мят' ханадо'. Ңарка хэхэ' ңыл' тинамда ңабтамбадахандо' ялядо' хая. Маци":

- Хуняна хынабтаива".

Хуняна хынабтаугованзь то". Купец' тинда терси. Паралгодадо' маси":

- Таня' ет' ханданакы, ханяд хонгуга".

Ёховы няндо' няхар" ню маци":

- Иб" хэвэй ңэисье, иканда тяхана нисяна" солотой хэхэдатаняйс.

Луци" понгад юкад' вата самбляңгм' пота ңацекы вахалъй":

- Ңопой мань хось пиртав.

Параңгодадо' вахалъй":

- Тикахавахана нирав пүнгү".

Ңацекым' купец' хэ"мя сивня иня' малахана ңэдарадо'. Ңамгэ' пирка"на ңэда" ям' хо". Ңули" ңамгэхэрт ни' ңадю". Ет' нерня' яльй". Сянд' хунат' мимбата ңод" яля явнанда ңадимя.

Ңоб" ңарка ям' сита нярахала. Яв' сяд' ниня вэсако луцам' манэ"на. Муноциеда пя' нядараха", маси":

- Юкад вата самбляңгм' пота ңацекы ханя пэрчар?

Ңацекы ма:

- Маня" яханана" ңоб" купец хась, хальмерамда пюдм'.

Няби ңани' вахальй":

- Тюку явм' танда ханданакэн. Ңамгэ пирка"на неранд няд няхарм' есерета ңано тута. Сыртанава, ңамгэм' манэ"лен. Таддикахад ңани' яльин. Си"ив яля' миндан. Ңани ңопой няхарм' есерета ңано тута. Нултаир, ңани' ңамгэм' манэ"лен. Тад яламанд си"ив яля' ңэсонгана Ҥо пэдарам' манэтан. Ңоб" купец ямб ханам' нюхулембанғу. Тики хан' ниня луца мэнгу. Манданава нют солотой хэхэм' ханавэн. Таб"нанда тюковна пуня' тоин.

Ңацекы ялй", си"ив яля' яда. Неранда няд няхарм' есерета ңано ңадимя. Ңано' ниня ңоб" луца"я нята ерня ну, тыбкам' сякалпи, ңэдараб"нанда хэвыхы нига нянда син' ңани' си"ңацетыдо'. Тикым' мунзипой' манэ"ңада, тамна нерня яда. Ңамгэ' пирка"на неранда ня' ңани' ңоб' няхарм' есерета ңаном' манэ"ңа. Ңано' мюня ңока луци" понгана силарця' пэм' сякалпадам' манэ"ңа. Сякалпадамда ңэдараб"нанда нига ңани' нянда син' паклесетыдо'. Ңацекы тамна тяха' яда. Си"ив яля' ңэсонгана Ҥо пэдарам' манэ"ңа. Купец хан"ям' нюхулемби, хан' ниня ңамлёда иняхана садыбида. Ңацекы купецим' ңудаходанда ня"мада. Купец ма:

- Нена" ңаха" тэвавэн.

Юкад вата самбляңгм' пота ңацекы вахальй":

- Тэваба"ни ханяв", нют солотой хэхэм' иканд тяхана ханавэн, мань хосаяв.

Купец ма:

- Ненсэя ханавэвась, нюни си"ни' тотрев' нёя" иле". Ҥэва турта нидо' терси" нёйдо' ңэдарамбю". Вэвавна илева' маянда хов.

Купец иканда тяхад солотой хэхэмда ха"аврада, ңацекэн' ми"ңада.

Нацекы пуня' ялй". Сеней миманда сер' маниевы есеретна ңануда ңани' нидя манэс". Тайнанда хунанда вэсако луцавнанда ңадимя. Вэсако луца нянда ма:

- Намгэм' хон.

Нацекы вахалъй":

- Сидя няхарм' есерета ңаном' ходм'. Нюргей ңанохона ңоб" луца тыбкам' сякалпи. Намгэ сякалпабта? Ңэдраб"нанда хэвыхы нида нянда син' минахандо' сы"ңацетыдо'.

Вэсако луца ма:

- Тикар илеванда мальңгана тыбкамда няхатата мэць сямэда. Нита мамб" тыбкамд мэкавама". Пыда манзеты, нянда" нив тат", тынаңгур". Тикар купец' танарамбада.

Юкад вата самбляңгм' пота ңацекы лахарёмда тамна вэтибида:

- Няби ңанохона ңоб" луца силарця пэм' сякалпи, ңэдэрнанда нида таминандо' нянда син' паклесетыдо'. Намгэ сякалпабта?

Вэсако луца ма:

- Тикар илеванда мальңгана силарцянда пэм' няхатата сямэда. Нита мамб" пэр тадава. Пыда манзетвы, пэми мальңгур". Тикар купец' танарамбада.

Нацекы маси":

- Тад хэбяни ядани ходамзь. Нобто' ханм' нюпи. Намгэ тарця, ңэбта?

Вэсако луца маси":

Тикыд ңавнандо' сававна илевы луца"я", няхато' ңамгэхэртм' ивы" мипю". Теда' танарамбада'. Нита поңгана мэна купецара" ңобтарем' танарамбада. Сававна илевэхэби мань хан"ласетын. Мань нумдм'.

Вэсако луца падарм' пада. Маси":

- Тюкоми яханд тэвабата парангодаханд ми"ир. Си"ми ңани' нин хонгу".

Юкад вата самбляңгм' пота ңацекы ялй", нёвнанда ңадимя, манзабтада. Нид" сита тю"у" нэкалңа". Таминанда

параңода' мят' хая. Падарта ми"ңада. Паранода толада, ма-ци":

- Купец няхар" ню, нисяра" мамы: нюни си"ни тогрев' нёя" иле", ңэва турта" нидо' терси" нёйдо' ңэдарамбю".

Хэхэ' мякана ңэда тинанда мю' пи' тяха' купецандо' халь-мер ңани' ңадимы. Тандая' сававна сюрңадо'. Та' илелъяд". Купец' няхар" ню ңэва тода нидо' терси" нидё ңэдо"ла". Ня-хар" по' ямбан' иленяхандо' нисяндо' илебц суса, хардандо' пя латарида хай".

Ся"ны ңэбто' ңод" сидя ядана тоңаха'. Купец ңарка ню ңамдёрця' ниня ңамды, ңопой нянсико имбытадм' мэ"ңа. Нянда маңаха':

- Нерахавани ңэва тонинзь, харт ңод" тавандакоер яңговынё".

Намдёда няди' вахалъй":

- Тавандами яңгу, имбытами ханаңодакэди'.

Сидя луца пин' тарпаяха', хаерад' ңыл ңэвади' няхар" ха"аврэйди'. Ңамгэда ңэвна нюдя няхаюта ня' ңани' сидя маңгабада луца турңаханзь. Пыди' пудана имбытадоди' ми"ңаханзь.

Купец' няхар" ню идё ядэлыйд":

- Манзраб"на" савараха. Нёховаб"на" манзара", ханғува". Манзара иле пэяд".

Та' малда.

31. Вэсако' табеко

С я"ня ңэбта ңод", я' сяр' ниня ңопой вэсако илевы. Пыда няхар" нюдя ңэвы. Илевандо' ямбан' ханедам' пэрңа", халям' хадаби". Хуркаси" - хараси" тарем' иле". Вэсакохоют нюди' ңарма". Вада' саир" малда ямбава. Ңобаңгуна вэсакор пухуцяханда манзь ханада:

- Пухуця', теда' нюни' ңарма"нё". Ңарво"махадандо' хусувэдо' харта сехэрым' илаңгана нив' мэт". Тики' е"эмня, мань тюку' яля' нюху"ни ңопой хобцоком' хэтаңгудм' ханяңэндо' инда ңу" таняри.

Вэсакор тарця вадита пуд нюта няна хая. Няхар" хасава нюда ңобкана мэвы". Хусувэдо' харта инда сер' манзаравы. Ңаркадо' мирна, нюдядо' есьта, ёнэйдо' ядэрна.

Вэсакор нюхута сырңа. Нюда мал' манзара", хусувэдо' харта ңамгэмда сертаби. Ида ядэлы". Пон' нись мы" нюхута төрэй":

- Хасава нюңэ, таляңгахарңада" !

Няхар" хасава нюда харто' помнандо' няхато' сылыд". Нисяхандо' яльяд". Хусувэндо' ида ядэрна.

Ңобт' ңамдыд". Вэсако сябярте"мя ңудахата ма"ла. Ңаво" пирка"на пэвдёком' хо, нюхута вахальй":

- Хасава нюңэ, пыдара" няхала", ңопой вадами нянда таня. Ханяңэра" мань хобцакоми хорида. Теканда" инда ңу" танява.

Тики вадита пуд пэвдёком' харахананда сян ян' лядңада. Нюхута ма"нив":

- Пэвдёком' лядңаванё", сырңада"ма. Теда' пыдара" мардэйда". Ңолой нёда" паромбю". Неры мэ"мы вадини нёда" юр".

Нарка нюда пя' таесм' ня"мада ермнянда маляда. Тики' пуд ерь хасава нюда няханда сыраць ңани' маляда. Ёнэй хасава нюдя пя таесм' пон' ня"амбиды, ида ядэртакы, нисянда вади сабе сававна тас"ла я"мыда. Ня"амбавы пымда ңани' ермнанда маляда.

Вэсако хасава нюта сяк" сылы". Пон' нись мы" манзъ ханада:

- Тедари' пыдара" илам' сабе сававна манэ"мадавэра". Хобцокони хара сабе ңаркахав нись ңа". Мадамзянё", иңу" тара. Пэвдё' таесм' мал' мардара"нё". Теда' тюку пэвдём' не-ренда' тотрев' маляда".

Таминда пэвдём' ңарка нюхунда ми"ңада. Ңарка хасава нюда ня"мада, маля я"мада. Таддикахад нюдя нюхунда ми"ңада. Няби ңод" пэвдём' сян малиба пясетыда ңоб' я"мада. Нюдя нюхунда ми"ңада. Ёнэй хасава нюдя сян' малибабта ңод" ңобтарем' выдара.

Вэсакор пэвдём' нюхутата ханада. Идя ядэрџа, манзъ ханада:

- Илангана ня' танява сава ханя ңа". Ңадьбято' ңарка" не-нэця" манзеты":

- Ляда"мы пэвдё мардамбаб" нензел". Наңэдя пэвдём' маля я"мангур. Нер' мадамзяне", иңу" тара. Хобцокор ма"нив", тикар ила' табеко. Сянари няр ңэбата ңод", нид нёд юрыбю". Сэхэ' яляхана нид сит нядаңгу. Ңопориңэ ңамгэхэрт серм' нин сертаңгу". Ңокахаваңэ мэбет" нидам'. Ңопой иңу - иңу вуни ңа". Ңока иңудм' мэць ханяңэхэна нямдо' пуняку' таб"лаңгу". Вэсэймы ненэця" иңут инзеле серо"ңа.

Пыдара" ңод' ңобанзер' илебта" вадара" минта. Пэртэ манзаяра сяхаринда минаць минда. Хибяхарт нянда" вадам' ни мэт", ни лахананңгу". Вадмбой' илебата" харта" помнанда" поёмбаба"нанда" пя' таес' тотрев' хибяри" сидада" мардаңгу". Текада илангана ңули" та' ед' ни ңа". Харта" таслахарџара".

Мань табекоми сабе вэва ни ңа". Мале илангана ма-нэ"мэми. Ирината" табеко тамна тяха' тенебата" сава.

Та' малда.

32. Лаханако

Вэсакохо', пухуцяха' илевэхэ'. Ҥобугуна вэсако поңгада ватаванзь хая. Пыда ватаңгованда сер' салаба' ниня нюдяко вэнекоцям' ма "нэмү. Тики вэнекоцям' мяканда тэварада. Вэсако манзь төрена:

- Пухуцёв"! Мань вэнекоцям' ходм'!

Пухуцяда манзь ханада:

- Тики вэнекомд мань вэнекодани мэнгув.

Вэсакода җани' ма:

- Вэнекоми мань хар"ни ховэми вэнекоми. Пыдар вэнекодар пюванзь хань".

Ҥамгэ пирка"на хибяхава ханяхавад мамонда:

- Вэнекомди' нёри' pid". Вэнекори' җобзер' вэнекори'.

Та' малда.



СЮДБАБЦ". ЯРАБЦ"

33. Лэхэ' няхар" ню

Лэхэ' няхар" ню пили" нядэсеты", яв' хэвахана пили" ңамдёсеты"! Лэхэ' няхар" ню маламбай наны". Наны' ңэб"нандо' яхат сядо"ңа". Лэхэ' няхар" ню сидядо' сэвадо' япта пя' хар енахалмэраха", едуюця"мнато' ңопой ня"малма". Та' ёльциңгана, сыра' ёльциңгана Лэхэ' няхар" ню ненэсянда ңод" ханевахавамдо' пирдалембидо'. Лэхэ' няхар" ню тыто' танявамдо' хуна сяхахаңгарт вада нига хомбю". Мято' пэртядо' ңоб" не нядо'. Не ңэб"нанда не надорка не, лэтадавнанда ябта мяд' лэт, пыякоховада ту' есяраха¹, ңэвакоховада лимбя' пидяраха. Тики' тарця үэсь Лэхэ' няхар" ню пили" нюдя нядо', нядо' танява. Пили" нюдя нядо' Сидяхамбоңгэцядо' пелей' няна нядо' илесеты. Вэвако тобта, хобанда тобта писянда, ярамда ңобт' вэтибид. Вэвако хэбта, хобанда хэбта идм' пэрнада, пям' пэрнада.

Ся"ны' ңэбто' Лэхэ' няхар" ню харто' серм"нандо' пыдо' нядэвы". Ңарка"я мято' яв' лаңг' ниня ид няюв' ензетанаrapha. Ёраць мэтадо' поңгадо' таня, няхарм' лавтадо' ңанодо' таня. Ңарка танда ер' ваерахава Лэхэ' ңарка ню манзь ханада:

- Хаби ерв', ню не танява. Ёнэна" неңэ ңэвтанакэва". Тебтэй яляхана ханд" ни"ивам", Хаби ерв' нюм' валт" ни"ивам". Ңопой содади', есяри' содади', таман' мунота лабтэйри' содади', си"ив паридена" тёнди' мэди', еся лабтэ' мю' тёнди' сюрь-

яди'. Хаби ервахана ңэвтаб"нана" еся лабтэ' мюд ңадибелеиди'. Ңарка Хаби ерв' ида манд" нив': «Лэхэ' няхар" ню ханедам' пэртэя", Лэхэ' няхар" ню есядо' лабтэдо' ханеда хобахат пана"манңгабя", хуркари" ханеда" таняваннгабя".». Ңодь' ярменгая, няра" ярменгая, Сидяхамбоңгэцяра"няра" хаёная, Хаби ерв' ня' ңэвтаб"нана" Сидяхамбоугэцяра" серона" вомдаңгу.

Тики" ямбаха"на Сидяхамбоңгэцяр пелей' няна ехэра-нараха, тёрда, ярда ңобт' вэтарпида. Лэхэ' няхар" ню теб-танда няна няхар" лавтамдо' ңаном' хамэда", мал вы' ңар есярто' ңыда". Тикахавахана Сидяхамбоңгэцяр яв' марава-на ңаном' иртемба ярда, тёрда ңобт' вэтарпида, сояңгурало".

Нерандо' няна хэляңгата яха². Ямгад лекана хэляугата яхам' Сидяхамбоңгэцяр ңохольць пяда. Хэляңгата яха', яха' ендакана Сидяхамбоенгэцянд ңэварида ңади, хэляңгата яха', яха' сава ерни Сидяхамбоңгэцяр сэваха' тяха. Лэхэ' ңарка ню манзь ханада:

- Хадри' ңэсь ңо" тю"уй' тирамда сабе сававна мэсъита яңгусь³, Мадко ненэць' таня ңо" хэя, вэва пыхыдамда ет ңо" ханая.

Тики' ямбаха"на сидя нюдя нянда сэвати' хаял" мунзи" хамдомъяд". Лэхэ' няхар" ню няхарм' лавтадо' саля яв' мюмня си"ивахав яля' харакахананда сисерида ңамды"⁴. Нерандо' няна Ңыйвэй" Саля ид' няюв' ямд' ңыхыта. Лэхэ' ңарка ню манзь ханада:

- Тюку саля' ңыл' нултахарцева".

Неры пиҳиня, тюку яхана Ңыйвэй" тэта сенгараҳавы, сенга"мада яда манэ"мэ ңэя. Ңыйвэй" тэта' сенгама яхана ненэй сярлы таня хаёвы. Лэхэ' ңарка ню манзь ханада:

- Ңыйвэй" тэта' ненэй сярлы Хаби ервахана тарана ңэриңгу.

Нэргэндээ ханзе, мерцянда ханзе, Лэхэ' няхар" ню лабя-ха" ңамдыд", няхар" Лэхэ' лабя' лабя" хэрна", ид' сяр' нийм'

надпадараха". Яв' си"ив харам' мадава' ямбан' Лэхэ' няхар' ню ныла"мадо' яңгу. Лэхэ' ңарка ню няхата масьнё":

- Нерна' няңы Сюхней" Саля, Сюхней" Саля сядота ңылана Сюхней' тэта сенгараҳавы, сенға"мада яда манэ"мэ ңэя.

Сюхней" тэта' сенға"ма яхана солотэм' нирета харда хаёвэ. Лэхэ' ңарка ню манзъ ханада:

- Сюхней" тэта' солотэм' нирета Хаби ервахана тарана ңэриңгу.

Лэхэ' няхар" ню ңани манзада". Лэхэ' няхар" ню лавто' муңгат Ңарка Саля яв' тибей" сядода ид' няюв таси" лабаңга". Си"ив ямб яля' миё"махадандо' Лэхэ' ңарка ню манзъ ханада:

- Нерна" няңы Марёлава Саля, Марёлава Саля' сядота ңылана Ңадеро" тадебя сенгараҳавы, Ңадеро" тадебя' сенға"мада яда манэ"мэ ңэя.

Ңадеро" тадебя' солотэ ңынада сенға"ма' яхана таня хаёвы. Ңадеро" тадебя' солотэ ңынада хаерад' ня' тодана тураха". Лэхэ' ңарка ню манзъ ханада:

- Ңадеро" тадебя' солотэ ңынада Хаби ервахана тарана ңэриңгу.

Си"ив яв' харам' хае"махадандо' нерандо' няна Ямд' ңыхытана Сейраха Хой' пиця лапта' ниня Хаби ерв мя" малеся мя". Макодасипой" мулья"яңа. Ид' варахана юрмян" ңану". Хаби ерв' нюм', нем' ңэва"манзъ сян я' вэкат тюкон' товы". Лэхэ' няхар" нюм' лабетаихандо' Ңадеро" тадебя ядабта" нидав". Ңадеро" тадебя манзъ ханада:

- Хаби ерв' нюм', нем' ңэва"манзъ Лэхэ' няхар" ню иб" товакэда", Хаби ерв' ню маня" я"мавэва", тэри тарцихана соянана ни ңа". Лэхэ' няхар" ню нянда" мадма, няби я' вэклад тюку ядэрмары" таросядада сер" ңэнговндараха.

Лэхэ' ңарка ню манзъ ханада:

- Хаби ерв' нюм', нем' ңэвалава таросядада сер" ненэся ңэвада хибя' манэ"мы, хибя' хэтавы.

Тад ңо" ңэсь ңо" вунясява" ман":

- Хаби ерв нюн' ңэватаб"нана" сидана" нядаванда нядава" тоя!

Лэхэ' ңарка ню ян' худабтэй", ңамдерциемэмда сэр" варк хобам' няби ха' палкад пунда солада, солотэй ңынам' Хаби ерв' мят' нюдерць ханада.

Лэхэ' ңарка ню тарем' сырпата, мал еся мяд' пой ңутокана Сэре"э хабте"э харида яро"лы", няда соядата няротялада. Ңарка Хаби ерв Сэре"э хабте"эм, ханяд ңэбта хось ңо" ховэда! Сэре"э хабте"э ңардавнанда тэри ты ңарм' тяхабтаркавэда, тасинда нямна пя" саля" ңади". Хаби ерв"я' ерв ңэсянданды ненадумда"мада нивняв ңа"! Хаби ерв"я ной' тондавы ва"ав сава ерня ңамдёсумбавы, хаби' сэр" панэм' ёхорадо"мы. Лэхэ' ңарка ню Хаби ерв' ңыл' си"ив' сюрхальць си"ив' туябтэй". Си"ив туябтэсь манзь ханада:

- Ңарка Хаби ерв нисяв мадма, ңоб" не нюнд танява юнда маня" яханана" тайна ядэрңга... Ёнэна" неңэ нюнд ңэва"манзь няби я' вэkad маня" товаць.

Си"ив ямб яля' ңарка Хаби ерв мэтамта ңэвамда пян' ладыбид^s, сава мунда яңгу, вэва мунда яңгу. Хаби ерв"я си"ив ңэсоңгана ңамгэ мунзявамда мале"мяхаданда инда нись ңа" манзь ханада:

- Ямб по' ямбан' ңэвами есямя. Няби я' вэkad товэда" ңэбта" хурка ңо" пыдара" ңамгэм' выкыбиды". Тяханда няд нюми харта яңгу, танявэ ңэбта ңадяңгу" нисяв'.

Ңарка Хаби ерв' вахалта"маңэ Лэхэ' ңарка ню солотэй ңынам', сэр" варк' хобам' Хаби ерв ңыл' матибте" нидав'. Тикхавахана ңарка Хаби ерв манзь ханада:

- Нибта" пунрю" харобта пюра", ненэся хобта" мирци" ханара".

Хаби ерв вади намданадрев' пой' ңутокы Сэре"э хабте"э сидита нямна ңосэлавы". Сэре"э хабте"э ху' нись тоса" харасяда ян' янамбоковна, пыямда нюдерць няльмилебтеда. Хаби ерв мяд сэйрихивась Сэре"э хабте"э ядаванда сер' ңоб" ңэ сарпям' тидахале" нив'. Ңэ сэрпя' мюмня пэдари" помна сидяри нямдамда яротяла" нив'.

Сянд' - хунат' мимб"нанда ңод" неранда няна ңарка"я то нябida варда ңодъринда ңади, лаңготе"э то, то' варахана си"иври хасава поңгамдо' нэкалпи". Сэре"э хабте"э ёрти' хэвувна янамбоковна хараси" яда. Ядаванда сер' маниеб"нанда ёртя" хасава" сядота" ңэвы", ңэвакохобидо' пя' мюйраха" ян' хама"нари вэяридо' яңгу'. Лахарём"нато' хаби" ңэванондо', Сэре"э хабте"эм' манэ"мандо' сер' пэртэ поңгамдо' тикан' модо'. Харто' помнандо' тарем' маманондо':

- Тарця сава ты ханяд товы. Ңамгэ яхананда вадёхоявы! Ид' няюв ёркалмэ ңэя. Нохорабцяугана ярквэ ңэя!

Сэре"э хабте"э лаңготе"э тон' лулку" ңэсонд ит' ха"ама ни"им'. Си"ивар хабир идарта хабтем"э' нохорабцяңгана яркари" нидом'. Ңамгэ идартамда мале"мяхаданда Сэре"э хабте"э ху' нись тоса пыямда нюдерць харасяда ян' янамбоковна хараси" ядалъй". Си"ивар хабир иня' малахана лэмбарито' ниня ңобкана нюхулы". Сэре"э хабте"э хадырць пэ"махад си"ивар хабир ңэдамдо' ховы"! Няхатат ңарка Хаби масьнё":

- Сэре"э хабте"э ханавэ ңэя, ңано пуня сяравэ ңэя! Ңоб" не няна" хаюпа хэб" нензаминдяданда мэтаңгу" нидав', Хаби ерв ню ңэванда е"эмня ненадумдамада ңэридаңгу" нив', мильтя ханзула"ма ңэридаңгу" нив' !

Ңаркар хабир Сэре"э хабте"эм' ңано' няюв вадал" нидав'. Сэре"э хабте"э сававна манэць серта серкав яна ты ңэвы, ңано' няюв' ихинда яда. Си"ивар хабир Сэре"э хабте"эм' матадм' лавта ңанон' сярадо'. Лаңготе"э то', то' тяханя матадм' лавтам' тидхаленгадо'. Мат" харв лабя' лабя" хэрна", хасуй

хэндрем' лабя" ңадана". Тики ямбаха"на Сэре"э хабте"э матадм' лавтам' ңаном' иртемба сяр"ма иняда ңуя нюхолы. Нерандо' иня то' сава ерня ңоб" илибей ңо танявы, ңо' түнд' иня си"ив ңарка мя". Хаби ерв ню' мэлавадо' ядо' хадринда ңод" нивняв' ңа"! Си"ив мяд' ңыл' ңано тебрись Сэре"э хабте"э мие"ма минанда си"ив хаби' ңаном', матадам' лавтам' иня' малахана хасуй явна юр" тибяхана нюдерць ханада. Сэре"э хабте"эм' ңэда"махадандо' Сэре"э хабте"э ху' нись тоса мядо" поё"мана мя"е сюра. Си"ив ңарка мяд' мякав" ңэвы", нойри еяць есевэ" ңэвы". Хаби ңэсы' тер" тэри пусанга":

- Тэхэв ңэвы, ңамгэ яхананда вадёхоявы! Тэри ты' ңарм' тя- хабтаркавы!

Нарбята хаби мят' тёрибтей":

- Ңоб" не папава" пин' ңадимгар"? Нензаминдядамд тэдамд хова"!

Еркы мякад ңоб" не ңадимя, ңадимбата ңод" нехэв ңэвы! Сидяда ңэбтада явна нюхулы". Сюртия сята, мэта сякавада тэри вадахана хэтава' техэ. Ян' ха"амнари вэярида янгу. Хаби ерв' ню ңэнгоданакы, сян я' тер" ямб по' ямбан' ңэвапада не- до' ңэнгоданакы! Хабей" не пирибтя манзь ханада:

- Тарция сава тым', тарция сава хабтам' нензаминдядани мэ- тангу" нивав', тюку яханана" хуна сяхаңгарт тарция тым' мэ- там' ниdm' манэцету". Ерв тяхананда, ңамгэ яхананда таңар лэмда вадахаявэда...

Ңарк" пэта ня' яля туйбтесь Ңамгэ мя"евамда ма- ле"мяхаданда ерый мяд' нён', еся таса ңыл' Сэре"э хабте"э та- си ва"ан ни"им'. Сэре"э хабте"э тарем' сырпата, еся таса иня паны ңыдынё". Паны ңэбта паны ңэвы, сян тэнз' ной ңодяку тасоць хаби' сэдир"мана сэдавэ ңэвы, саликахатата си"ив хынганада иба мерцяхана хынота' то"олаха", пирибтя' паны ңэнгоданакы!

Ҥарка пинда ер" ваерахава, таңгоця' тер" хонарахава Сэре"э хабте"э тю"у" юрк" ни"им', си"ив хыңганатам', ной' падтавэм' сидя нямдаханда пэбтари" нидав'. Сэре"э хабте"э ху' нись тоса ҥарка то' ит' хатарибтада. Ҥарка том' мада"махаданда нере то"мавна тидахаледа. Нере' то"мавна мимба"нанда ңод" хобамда Ҋадаць хабте"э няваты, пунда няна я' са"молад" ябту" Ҋарувна маренуйраха". Ҥарка Хаби ерв' мал еся мяд' неранда няна Ҋадимлихива, янамбоковна сиднэдалъянё", сидяри нямдамда яро"тяланҹанё". Минена панэнда си"ив хыңганада пирибтя' сёвна хынота то"олаха". Ҥока" Ҥэвтана" тэри пусаңга", пусавандо' нид тэри ҳарцаңга": ханяд товы ты Ҥэб"нанда, нямдота техэ Ҥамгэда Ҥэбта? Тики' тарця Ҥэсь пыда сырпата Лэхэ' няхар" ню хэванзь пявлэдо'. Лэхэ' няхар" ню Ҋано' хэварин' Сэре"э хабте"э нулта" нидав', Сэре"э хабте"э мие"ма минада идарць теба. Тикита ямбан' Ҥадеро" тадебя сидямда нирциямда тюкдехэя Ҥуда тидахана сысумбалмы". Ҥоб" сярм' мэва' нувамда мале ям' еняда, си"ив пархальць Сэре"э хабте"э тэринда тэмзы". Ҥока ненэцье" сэв" сыртан' ну"мада яханда Сидяхамбоңгэцяр икад яхад Ҋадимда то"олаха! Нябинда харахана, Ҥуданда харахана си"ив хыңганата, Ҥодяко' падвэм' хуна манэцяда паным" ня"амби. Сидяхамбоңгэцяр манзь ханада:

- Ҥарка некав нянд мадма, сеня Ҋавнанд тарем' мансянё", хадри' Ҥэсь Ҋо" тю"уй тирамна сабе сававна нясыта яңгусь, Мадко ненэць' таня Ҋо" хэя, вэва пыхыдамда ет' Ҋо ханая. Тю"уй тирамна инд танябата нена" таремҹав вунясян манд". Са"лако Ҥэвами ханзер" мэнгув, вэвадани нид тарцядм' нидам' Ҥа", вэва серм' пюсь товэдм' нидм' Ҥа"! Сидяхамбоңгэцянда" нянда" хаерись Хаби ерв' нюм' вунясяра" хонгу"! Некав, мадм' вадини тенен", тад' неря' тарцян нён Ҥа".

Ҥарка неканда Ҥэвада ха"морңа:

- Ненэсяри' ңод" са"ладм' ңэвэдм', хар"ни няvnани ңамгэ тарцядм', мань сиквами нёен маяда", небяси", нисяси" ебцанд ярkad хэвы' яляхана вада" нисядам'.

Сидяхамбоңгэцяр манзь ханада:

- Тю"уку' юрkad", тюкор ханад! Ҥарка Хаби ерв' не ню' паны. Не нюонда паны нянда ханад, Хаби ерв' нюом' валт" ни"ивам', вы' я' сеян' ханангү" ни"ивам'!

Тикахавахана Лэхэ' Ҥарка ню Хаби ерв' мят' ңоб" худабтэй". Лэхэ' ҥарка ню манзь ханада:

- Ҥарка Хаби ерв тарем' мансянё"! Тяханда няд нюми харта яңгу. Танявэ ңэбта ңадяңгу" нисяв', нибта" пунрю" харобта пюра", ненэся хобта" мирци" ханара". Тюкор паны хибянд паны?

Ҥарка Хаби ерв нензюмдакы, тарензянда ний хаця" нярмасеты", хаця" пармасеты". Ҥарка Хаби ерв нись ңод" харва", хаця" ванебтей", ида вэнгалэй", тю"у' санаптэй", пин' худабтэй", ңока ненэцяңг" тарем' тёрибтей":

- Лэхэ' няхар" ню нюми ханаңгудо', Лэхэ' няхар" ню ва"мандо' е"эмня, са"мандо' е"эмня нюми ходонзь.

Тикахавахана Сидяхамбоңгэцяр ңани' тэмзасеты", ңани' ңадимзеты, Сэр" хабтүэ"э тэмзахалцеты", саля яв' ит' тэри санасеты", Хаби ерв' ңыл' ңани' ңадимзеты! Тикахавахана ҥарка Хаби ерв ида хэнгада, тёrm' ңэдара:

- Няхар" ю" хасава нюми хокарңада"!

Хурканда яңго харанда яңго, Лэхэ' няхар" ню си"ив ңэсонгана няхарм' лавтамдо' сян яндо' сензи", сензи", ңыто"ңадо', Хаби ерв нюом' пили" ханадо', няхарм' лавтандо' сян янда сенѓа" иба мерцяхана хынота' то"олаха", иба я' вэкад ңэрм' я' сеян' хаби' не нюом' ханавандо' нид саля' яв' мюй ибемда то"олаха.

Та' малда.

Вади”, вади” хари” хамэди”

¹ Ту' есяраха - пыяда няръяна ту' морёраха.

² Хэлэнгата яха - хэсавэй (хэда ңока) яха.

³ Тю"уй тирамда сабе сававна мэситаяңгусь - сававна иле
нидясь пирас".

⁴ Хоракахананда сисёрида ңамды" - мерець мимандо' нид
ңанондо' пыян' сисё" ңамдавыд".

⁵ Ңэвамда пян' ладыбida - вырэй ненэць'.

34. Сюдбя Хэтанзи

Сюдбя Хэтанзи' сидянда сэванда сыла"махад, мята салте"э то" сядо" ниня таня палавы. Сидя нюондя небя недя таня. Ханесэй хорта ңэв си"иби" минахад хэнго"лавыда¹. Тэнэ мэтада ңолой хабтада. Ханнэ мэтада пой ңутокы сиби тисьңэта². Сюдбя Хэтанзи" ханева ялянда хэвняхавахана хонёвари сер".

Ся"ны ңэбта немав хэвы. Мэта индкани мякы тоета пин' хаядм'.

(Сёда хэнгада). Ңари" тедахав', тэри лахнакодарев' мэкава". Техэ салами мале"мяхадани³, сэвари мэ"ңадм'.

Нэрэй ңэвы. Тарем' сырпа"ни - Салте"э тони тяханяны сядо" ни' мяд" ңэсовы". Няхар" ңарка мя". Ты илебядо' няхар" ёнре"э. Тикарини мань мягкани мятиодм'. Едами ңамав. Ңаворць малесь емб"толыв". Ханзони няд си"ив сую' хобам' сэд"ма' мальцям' нэкал" нивав". Туйлав. Си"ив хора' пени сэд"ма пиби"ни ной" тэтна"⁴, ңодь' та' мась". Сяйм иням' ханзони няд ңани' нэкалңав. Сёнзяни ераманя си"ив' пэбтав. Вадумда маламда луца' ювня сярав. Тикани пуд ханзони няд си"ив хора" хобам' сэд"ма" савакм' тальня' нэкал"ңав. Савка"ями туйлав. Сэдою" тэмбий" муноць, ңодьрита нялңа. Пин' тарпыв". Пой' ңутокы си"иби тисьңэтам' няби пыяхад тю"у" нэкалңав. Наронда ңылад иняда ңэвандам', си"ив тибя иням' мань ня"мав. Юнорка хабтами' техэ ханаханда та' подерңав. Сидя нюон небя мякад ңадимя. Манзь ханада:

- Сюдбя Хэтанзи, ханя' пяңгур?

Мань тарем' мадм':

- Ханя' хэбяханани сел вуни таня". Түцянд таняб" тикар лэтамбю".

Сидя нюн небя мякана хай. Юнорка хабтани инямда ня"мав. Салте"э то' тяханяны няхар" һарка мяд' ед' үэдалэйв". Салте"э тони сэрг' пилибт" ха"мыв". Мядо" нимня һадимядм'. Һарка мято' синд' пыдо' һамдавыд". Ервотадо' үэдакы, мэта хан' ниня үэrimda ладыби. Һацекэхэвада няхар" ю" хасава. Хэвковнанда нултав. Тыни ха"ларёхо" таль' васадэй". Һэта ни' санэй". Манзь ханада:

- Сюдбя Хэтанзи, талей Хэтанзи, һылека Хэтанзи, Хэтанзи, торова.

Мань тарем' мадм':

- Илевани сер', няхар" Санэрэ"э' хадо' варажад нядэко суюхорт яркавэми яңгу. Талей үэвами, сяха' манэ"цар. хумна намдасар. Һылека үэвами, сяха' манэ"цар. Тиканд тяхамна ха' юнахарт' Сюдбя Хэтанзим' нивэранё" намд".

Тарем' хамэдамбаба"ни ненаха"ями пыяни паңган' париде тонараха. Һарка Санэрэ"э⁵, тэта Санэрэ"э манзь ханада:

- Нён нензюв", сит пэрнадм'. Сава лахарюна", вэва лахарюна" мякана мэканан".

Һарка Санэрэ"э савкамда тамдалкая наронда ىыт' сюрнада. Мань үод" си"ив хора' хобам' сэд"ма савками екав. Мят' ядани'. Һарка Санэрэ"э' пумна мят' мятюдм'. Мякы мякана ян' сидярихи' үэвэхэ'. Едм' пява". Һаворць малесь. Һарка Санэрэ"э үани' тарем' ма:

- Сюдбя Хэтанзи, талей Хэтанзи, мань яханани талей үэвар я' нимня турңа. Няхар" ёнре"э ты"ни поңгана сэр" сюнде"э⁶, харида нямдота тэми таня. Сэр" сюнде"э тэми үабцата матота мэта ты. Ты"ни няби пелям' пыда иэкатмыда. Тутна пихиня тэми талеир. Няхар" ёнре"эм' Салте"э то' сэрг' сюрлабтаңгуна". Сэр" сюнде"эм' ниб"нанд тале" юнорка хабтамд мань мэтав. Яханани мань луцаркадм', теда' сер" тарци".

Тикамбай сер" та' валакада. Маньмякани' үэдалэйв". Тэвыв". Ханами нив үэда": пуна талэр" мандадама. Едами үамав. Пин' тарпыв".

(Тюку яхад сёда үани' хэнгада - ярабцаң мэта хана).

Тарем' сырпа"ни Няхар" Санэрэ"э, няхар" ёнре"эм' Салте"э то' сэрг' та" аврэйдо". Няхар" ю" хасава вэнекосавэй няхар" ёнре"эм' сюрлабтэйдо". Няхар" ёнре"эм' хэдрев' сюра". Сэр" сюнде"эти үэдакы - нявотанаханда мэта нямюда маре" үэсомана санабалавы". Нявотабта ихид мере"ңа.

Юнорка хабтами Салте"э то' няби сядо" нимня хайхалав. Няхар" ёнре"э' ертэ' тасламбахая, Салте"э сяд' ни' нултав. Мэта хан' нид тад санавани, няхар" ёнре"э' понд' таңга ха"мыв". Няхар" ёнре"э хэдрев' сюра". Нябимдей' тад санавани, сэр" сюнде"эм' ик' үандэкалд' сарвахалав. Няби үарка үуда' сяланд' мов, үэрида ляңгабты". Техэ ханахани үани' санэйв". Хабтам' ханани пул валџав. Неры то"ма' мюмня хэнгадтав. Мякани' тэвыв". Юнорка хабтами тэми үэдав. Сэр" сюндым' тым' нив үэда". Мякани тюдм'. Едами үамав. Хонэйв". Хонёдахани нум' ялэмы. Үоб" хан' хырна торахаванонда. Пой үутот' нултаванонда. Мятю. Тикаехэв Үарка Санэрэ"э, тэта Санэрэ"э манзь ханада:

- Тэми талевэр. Ненэсянда үод" талейн үэвэн, сит манэ"үадм'. Теда' мань хар"н вэвадама: талэро" маданд няхар" ю" тым' татадм'. Мякани тоин.

Санэрта хая. Нум' пэвсюмая. Едамда үама, хонэй". Хуняна емба"толы". Паныда мале теневына"ма, тиканда сер' ембы". Ханамда подерңа. Няхар" Санэрэ"э' мят' үэдалэй". Танянанда нултада. Едам' ханя пэр".

Үарка Санэрэ"э, тэта Санэрэ"э манзь ханада:

- Сюдбя Хэтанзи, талей Хэтанзи, сюдбя үэвамд үули" манэ"ива". Мэбе"ма" юнар няби я' вэт' няни үаха" тэворңа. Мань яханани мань луцадама. Лобалка луцами таня. Няхар" ю" луцами, үули" пахатур", Лобалка' луцахад тэвэрэнгунава". Няхар" юд' луцам', үобто' нись лад", мал' маном-

бат, сюдбя ныхынд танявам' маня" тикирихина манэтава". Луци маномбат няхар" юд" тым' ңани' татадм'. Няхар" юд" луцам' нибат манос" юнорка хабтамд мань мэстав.

Мань тарем' мадм':

- Ңарка Санэрэ"э, тэта Санэрэ"э харвахавабт ңэбта ңэя.

Тикамбой сер" харта валакада. Мякани хаядм'. Едами ңамав. Хонёваханани хара вуни таня". Хубта' няна немами хэвүү. Тарем' тасламбаба"ни ялэмдата ңэва хадри' ңадимдараха. Емба"толыв". Ханзони няд си"ив сую" хобам' сэд"ма мальцям' нэкалңадм'. Тю"у" туйлав. Си"ив хора' пени сэд"ма пибини ной" тэтна" ңодь' та' мась". Сяйм' иням' ханзони няд ңани' нэкалңав. Сёнзяни ерамня си"ив" пэбтав. Вадумда маламда луца' ювня сярав. Тикани' пуд ханзони няд си"ив хора" хобам' сэд"ма совакм' тальня" нэкалңав. Савка"ями тю"у" туйлав. Сэдоңо" муноць ңодьринда нялңа. Ембааць малесь пин' тарпыв". Пой' ңутокы си"иби тисьңэтам' няби пыяхад тю"у" нэкалңав. Наронда ңылад си"ив тибя иням' ңани' нэкалңав. Юнорка хабтами техэ ханаханда ңани' подерңав. Сидя нюн небя мяkad ңадимя', манзь ханада:

- Сюдбя Хэтанзи, ханя' пяңгур? Ңарка Санэрэ"э серода тикавна вуни" ңа", ңамгэхэвм' пян!

Мань тарем' мадм':

- Сидя нюн небя, туцянд таняб", падэнд таняб", тикид лэ тамбю".

Тикани няхар" Санэрэ"э' мят' ңани' ңэдалэйв". Мякандо' тэвывв". Ерь ңарка мяд' пой ңутот' нултав.

(*Тюку яхад сёда ңани' хэнгэда*). Нултанаңэ си"ми намда вэн" тёрейд". Ңарка Санэрэ"э мяkad ңадимя. Пуданда ңадимда няхар" ю" луца. Манзь ханада:

- Сюдбя Хэтанзи, талей Хэтанзи, мэбета Хэтанзи, няхар" ю" луца пявандид ти".

Мань тарем' мадм':

- Няхар" ю" луцами вунясян хай", харт серод ңэ" ни"им".

Си"ив хора' хобам' сэд"ма савакм' сыран' мов. Сюра ха"мы". Няхар" ю" луца си"ми ня"ма". Ҥобто" нись лад", ма-номбадахани - пуюмдо' тэва". Тикини малесь мань тарем' мадм':

- Ҥарка Санэрэ"э, тэта Санэрэ"э, тюкыни хурка мэндани пэръяд?

Пыда тарем' ма:

- Мэнэрыхыданё". Ныхар ва"мы. Няхар" ю' хасава, теда' нянда" тэд маноңада".

Няхар" ю" тым' ханани пуня' пэнъян. Пэё"махадани, Ҥарка Санэрэ"э манзь ханада:

- Теда' мяканы мэхэва".

Едава" ңамава". Ҥаво"махадана" Ҥарка Санэрэ"э, тэта Санэрэ"э манзь ханада:

- Сюдбя Хэтанзи, ңылека ңэвар я' нимня няни тэворна. Няхар" ю" луцами ё" тер выдара"мам' теда' мэйдава. Мань яханани луцаркадма, теда' Лобалка луцами таня. Лобалка луцани няхар" юр" луца выдара"ма - ёнар" пуд пэ, иласяда маняпэда таня. Тикым' илаин. Сюдбя ңэвамд, ңылека ңэвамд тандая' савовна манэтава". Тикым' илабат няхар" юд' тым' ңани' татадм'.

Мань мадм':

- Ҥарка Санэрэ"э, тэта Санэрэ"э, ет' ханзер" ңэнгуди'. Сяха' вэдендортадм' ?

Пыда ма:

- Хуняңы яля' хэрий пяңгува". Луцина" ңод" ханаңгува".

Мякани хаядм'. Няхар" ю" тэми мякани тэврэйн. Тиканда мат" ю" тэдани хая. Едами ңамав. Хонэйв". Хуняна юркыв". Едами ңаво"махадани ңани' емб"толыв". Тикари" паны" ни-някы" ңа", несэй серыбадакы. Емба"со"махаданда манзь ханада:

- Сидя нюн небя, теда' ембъяда". Ҥарка Санэрэ"э' мят' теда' хандава". Тикахад Лобалка луца' мят' пяңгува". Ҥоб-

кана хэхэва", пуна ханамда" ңод" пуня' татадама". Тикари яхад салами хадри' сяха" ңэвна. (*Сёда џани' хэнгэдэл*).

Нарка Санэрэ"э' мя"амна мэва". Нарка Санэрэ"э мале хэвы. Юнорка хабтава" сехэрэнда мю' ха"аврава". Наводы нон' маня" нива" мий". Лобалка луцани хэхө' мядо" мал" сисяндрев' яралавыд". Лобалка луцана" нё' хэван' нулгава". Хабте"эни иням', сяйм' иням', нё' ня"морцянд' няхар" нало"џав. Мань тарем' мадм':

- Тахабя тэвына".

Сидя нюн небя сырода яңга"џа. Нюхуюда ха"avra. (*Сёда тамина миңа*). Харад' няю' маня" яльяна". Сидер' сивня тарем' сырпа"ни: Лобалка луцандо' хэван', Няхар" Санэрэ"э ңобт' ңамдавыд". Сидер' џыланы, үртина паря' ниня иласядада маняпэ, пэ танявы. Пэ мандалта, сей' тордаб": няхар" юр" луца", луца я"амавы". Ядавани сер' няби џарка пеми ңыламнанда ңэдарав. Няби пени' џабкахалкая ңэвакони нимня няхар" пангабтава' пангабтав. Тетимдэйхана ңэвакони нимня нумд' пидев. Ну"лө" тяхамлабтав. Лобалка луцами мякад ңадимя. Няхар" юр" луца пумнанда џани' ңадимя". Иласядада пэм' яля' ямбахана тэри џатедо'. Няхар" Санэрэ"э пэм' ңате нялидо' няңгары". Ңэрэй яляна" пакалць, нэ"я сэван' ңадимя. Маниеб"нани неры յо"маханда нэ"ха"мота. Няизавэй' мадм':

- Неры ңэсь ямда нирва тахабга".

Няби сюдбя пеми' пили' ха"мокана ңыланда мэв. Няби пени' ни' мэхэя янамбоковна паря' ни' мацибтев. Мань мадм':

- Нарка Санэрэ"э, тэта Санэрэ"э, тюку нэртэми хурка, мэв? Ханябтанадани нэрнэр?

Нарка Санэрэ"э маизь ханада:

- Ненэзянда ңод" сюдбя ңэвэн. Сит ман"џадм'.

Мань луца' вадавна ехэрладама, Нарка Санэрэ"э Лобалка луцаханда ңопой' му"лой". Тиканда пуд Нарка Санаре"э ңани' тарем' ма:

- Нява" ма"нив' мякана мэхэва".

Мятюва". Ҥаворць пэйна". Ҥяхар" Санэрэ"э Лобалка лу-
цандо' ня' ңобт' ңамдыд". Ҥарка Санэрэ"э' ңани' манзь хана-
да:

- Лобалка луце"э, ңани ңаварап янгобтав' ңамгэ? Теда'
нява" тэтнавы ңэ" нив', сяркадамда ңамбта сава ңэдарааханё".
Ҥяхар" ю" луца ханяна хаяда"? Хэтанзинда" сяркад тада".

Луца" нёвна сороков хорм' мяд' мюня' мантэда". Ҥарка
Санэрэ"э сороков' тебам' тубка ладада. Тебанда сана лэёда
тибя' хунат' санэй". Сороков хорм' сидя ңытуркад тад
ня"амавани ерканд ңоб' нылэйв". Няби' нэкалмани пяримда
модм'. Ҥамдёрця' ни' ңани' ңамдыв". Манзь ханав:

- Тюку ңаварамда ңамзь ехэравась саварка ңэвы. Ҥани'
танявы ңэб" саварка ңэись.

Неры хамэдёвы ңэдакы ңани' сороковм' ҥяхар" паҳатур"
манрыла та". Ҥарка Санэрэ"э тулканда тебам' тубка' ладада.
Тебанда сана лэёда сидя тибян' санэй". Сидя ңытурцемнада
ңани' ня"амав. Еркананда ңоб' нылэйв". Нябимдейхана ян'
пяримда модм'. Ҥани' ңамдыв". Ҥани' тарем' мадм':

- Ҥани нядмянда танявы ңэбта, тюку ңаварап" саварка
ңэвы.

Ҥани' сороковм' луцини талья' тирциде". Ҥарка Сан-
эрэ"э, тэта Санэрэ"э тулканда тебам' тубка' ңани' ладада. Те-
банда сана лэёда ҥяхар" тибян' санэй". Сидя ңыторкад ңани'
туйлав. Ерканда ңопой' нултав. Нябимдей' мэва' терсяда пя-
римда ян' модм'. Ҥамгэда ңэвна Сюдбя Хэтанзи хороконда
ня' ңобт' монэйха'.

Сэв" сэйвы". Сэва"ни ңадимзь, сидя нюон небя ңэвакони
ниня яркаявонда. Пыда мамононда:

- Нена" хава"нё".

Тарцям' намда ңамда пяв. Мань тарем' мадм':

- Сидя нюон небя, ңамгэн' хада"?

Пыда тарем' ма:

- Сюдбя Хэтанзи, ҥяхар" хорм' ңаво"махаданд хонарэй-
нась.

Ҥэ"ни ни' санэйв". Лобалка луцана" мят' ҃ани' мятюва". Няхар" Санэрэ"э луцандо' сидя хэвахана тамна Ҥамдёвы". Ҥарка Санэрэ"э манзь ханада:

- Сюдбя Хэтанзи тедахав' сер"мня хаян.

Мань ҃ани' мадм':

- Ҥани' Ҥамгэ серо сертадм'?

- Няхар" юр" луцам' хадан. Мал' хадэйдась. Сер"мня хаянава, теда' падар" мале хаясь. Хадри' Ҥэсь ҃о" Ҥарка нум' нися' мят' сит ханаңгу. Яда Ҥаводы хубта ни ҃а". Ҥари" теда' сит харто' ханана" ханаңгу". Табал' луца' мя"амна хандада". Лахана nibat пирас" сит тамна тяха' ханаңгу".

Мань мадм':

- Тарця ханя ҃а". Сидя нюон небя, сяйм иня ними тахар".

- Нихиданд ехэрадм'. Нит сит пя"ма" яхана ё"мэр Ҥэдакы?

- Няхар" Санэрэ"э, тэта Санэрэ"э ними тара".

Пыдо' ма":

- Ҥоб' ехэрава".

Тикарина" Ҥод" пин' тарпына". Юном' подермы". Мань пухуцяхани мадм':

- Сидя нюон небя, инямда" мань екахарцяв. Яханда" пяра". Сяхари' тоб"нани Ҥод" хар"н тутадм'. Хадари' хэнядм' Ҥэнгудм'.

Юнорка хабтани иням' екав. Нини маряд' пиня' тарпэрэн. Юнорка хабтами пыя' ядан' нюцяв, мадм':

- Хэсями яхана, юнорка хабтав, мань мэтани ныхыни хэбилеб" Ҥарканд ныхынд пелям' мэ"идм'.

Юнорка хабтами пиня' нэкалуада. Мань юно' хан' ни' луцини ня' пилибт" тийв". Тарем' миндяхана" Табал луци" харда"мана Ҥадимява". Табал' луцева" падарм' тола. Манзь ханада:

- Тюку сер" теда' тюкохона тасланана сер" нивы ҃а". Нув' нисян' пясь тараңгу.

Тики яхад ңани" хаява". Нув' нися' марад' понд' пили" пакальяна". Нув' нися' мя' ёпада вуни ңа", мят' тюва". Няхар" Санэрэ"эхэв нянани вуни" ядэр". Яханандо' хайць. Ңарка Нув' нися ңыланда падарм' манз"ңа, манзь ханада:

- Сюдбя Хэтанзи, пыдар ңэвэнанё". Няхар" юр" луцами хадавэнанё", тикар ңарка сер". Теда' Сюдбя Хэтанзим' лэтадада тибя еся хардан', тюкы палкам' тяха' ханара". Лэтадада тибя еся харадахана мэнханда лыда хэдемда".

Лэтадада тибя еся хардан' си"ми пакалуа"нё". (*Сёда хэнгэдэл*). Еся хардами сян' ладаба"ни, харта тайна. Ңамгэ' пирка"на ңарка ненахами пыяни панүган' пидрев' то. Няби сюдабяни, ненавэй' ня' тыра' ладавани, еся хардани пелда нумгана пенэрңа". Ңарка Нув' нися' мят' ңани' яльяв". Ңани' мятыодм'. Ңарка Нув' нися ңани' тарем' ма:

- Сюдбя Хэтанзи ңани' товэнанё". Лэтадада сидя тибя еся хардан' ңани' тяха' ханара".

Тиканда лэтадада сидя тибя еся хардан' си"ми ңани' пакалңа". Еся хардами тыра' ладаба"ни тэрихив ңурна. Нерэни нирцюмна ненахами то. Няби сюдабяни, ненавэй' ня', маха-няю' тыра' ладав. Ладавани сер' еся хардани пелда, нумгана пенэрңа". Ңарка Нув' нися' мят' ңани' тюдм'.

Пыда тарем' ма:

- Тюку ненэць' тарси" нерцякабтевы: няхар" тибя лэт, еся хардан', есь" тахаруйн' тяха' ханара". Тики яхаван' лыда хэдемда".

Няхар" тибя лэт, есь", пэ" тахаруй хардан' си"ми пакалңа".

Тюку харда"ями сян' ладаба"ни тэри тарна. Сян' ненахани тоб", сян' ненавэни ня' ладаба"ни ңопой пирда. Ихинян мадм':

- Пили" пуданамдо' пянарахадамнё". Сеня' ңавнанда юнорка хабтами таняси". Вадисей' тыра' еся хардами, лэтадада няхар" тибям' тад ладавани пелда пенэрңа", нумгана пенэрңа".

Маниеб"нани ңарка ненахами нерэни нимня пыяни паңгахад сэваха" ха"амы". Ңарка Нув' нися' мят' мань сюрбыв". Няби сюдбя тырами едтена нё' сихив ңоб' тахабтамбида. Ңарка Нум' нися толянда тяхана пыда ңамдёвы. Ёлида текалы, ңобо" манзеты:

- Сит хорпидамзь.

Няби ңарка ңудам' толь' нимня ңэдарав. Ңэбтахатата толь' нимня талья' нэкалңав. Харад латаха" няхар' ладав. Ңарка Нум' нися манзь ханада:

- Сюдбя Хэтанзи, ңылека Хэтанзи, си"емд пилю"ңадм'. Тикахав пыдар серод вуни" ңа". Няхар" Санэрэ"Э, Лобалка луца сияк явна сит тюкы ян' тэвраць. Падаркана серта сер" падвыйс: сит хада я"ма тюкан' ңэдараць. Мань ңод" сит пядамнё". Си"ми теда' ңаркавна мэнава. Пыдьюмл си"ми ңарка серт' тэваран. Няхар" Санэрэ"Эм' харт суден".

Мань ңани' мадм':

- Яханд Няхар" Санэрэ"Эм' ңэдараб"ни ңани' саванё".

- Тарем' ет' ңэя.

Хуркари" - хараси" мягкани пяв. Неры яхани юно' ханахана ңани' си"ми харто' тэвара". Лобалка луцани харда"амана ңадимядм'. Мят' ядадм'. Толянда тяхана Лобалка луце"Э тамна ңамдёвы. Манзь ханада:

- Тюкы" пыдар серод ни" ңа". Ңари" мань ңани' Няхар" Санэрэ"Эм' пилюць сит тай' ңэдарадамзь. Няхар" Санэрэ"Э, тэта Санэрэ"Э тикид ңылека". Илева' ямбан' мань пилю"ян. Сяйм' иня нимд мань сюрҗавась.

- Сяйм иня ними тавы ңэбат тарця таңок маяңгат ехэраңгудамзь. Ханасома ями хубта.

Хуркаси" - хараси" мягкани' пяв. Луцини хандами та", мягкани тэвыв". Сидя нюон небя Салте"Э тонда ниня тамна илевы. Едава" пява". Ңамгэ ңавормава" мале"мяхадана" хона пява". Немна" мале, Няхар" Санэрэ"Э, тэта Санэрэ"Э мят' ңэдалэйна". Юнорка хабтами ңани' мэ"лав. Луца' няхабини харто' ханасавэй". Тиканда Няхар" Санэрэ"Эм' хардан' ханэй-

до'. Танянандо' Нум' нися' ян' ңэдарэйдо'. Няхар" ёнре"эхэвм' тэдана" мэйна". Сидя нюvnани тяръян: няби нюми хасаваси", нябими не. Мань юнорка хабтрими тэнэ мэ"ңадм'.

Тиканда ти. Сюдбя Хэтанзи Пэ' малан' та" илелъй". Нюхуюда илебям' пэртэнэ хаяха". Иламда малесь, Хэтанзива" Пэ' мал' хэхэнэ хая.

Та' малда.

Вади", вади" хари хамэди"

¹ Сиби" минахат хэнгэ"лавыда - хадавы хорта ңэва" та' пирувна ңокамы", вэва нумгана хэнгэ"яда.

² Сиби тисьңэта - си"ивм' ңэта хан.

³ Техэ салами мале"мяхадани - ванг няд то"амахаданда.

⁴ Ной" тэтна" - пыхыданда ңарка ңэва' нид паныда, пи-бida тарка нялэрңа".

⁵ Санэр" - пэ" тяхана иленя ңысми тарем' нюмдеби".

⁶ Сюнды - малкты, нямдасяда ты.

⁷ Ик' ңаньдекад - иканда латаво"мавна ня"мада, ик' ңэсо' нюом'.

35. Няңоте"э Вэ"ли

Мая" мя"на" мюня ян' няхарпова": Няңоте"э Вэ"ли мань некав, нябав не"я. Ңари" манъзяван пихий пихид ехэрэдм'. Хуркаси" - хараси" илева-ри сер".

Ся"ны' ңэбта ңод" ңоб" хувы нинякы ңа", инзелеб"нани Няңоте"э Вэ"ли пихиня тансумбованда. Нябав не"я едамда пиремби. Пон' ни тансумбю". Нём' тядэда, мяд' мюня ңэварида тю. Манзь ханада:

- Ненэ, едар пи?

Нябав масынё":

- Едав тамнарка.

- Ёльцеб"нанда едамд тедьир. Паромбаб" ядембада" ңамза" мер' ңавона" ни" ңэсето".

Нё пунда хай. Ханяхав' ялмонда, ябтаковна сюдлавонда. Ңэдалёнзь' хананда сыри яңга"монда. Ңамгэ пирка"на пон' нись мы" - мяд' сиди"мана ты" сюралыд". Нека"ями тымб"нанда ңод" пон' ни тый". Хананда синд¹ ня"аманарака, мят' тю. Нябав едамда тедада. Ңаворо"махананда хара вуни таня". Ңаворць малей". Манзь ханада:

- Теда' тюку хэбяни тарем' ерембата хаванзь хэнядм'. Тру' хардан' мань нэкалџав. Пухуця" мадма:

- Си"ивимдей яля', яля' пэвсюмзь, еданд лохомзие" ңадимзь ниб"нани ту", тикахана ханадм'. Пуй ңу"мананди" ямдэйди'. Няхавар ңамгэ серм' хамэдамбувана. Мюдамд са-вари нютнаха"на" пуйданггурава. Няр ям' ехэрэва. Ңарка Пэ-

ти" хойм' мадаири', тики' талья' нёди' ңэсу". Пунахав ханяри' ңэсыди'. Вади"ни пирдо', ниб"нани ту", ямдари' ямдэйди'.

Нё пунда хай. Мань ңод" хар"н ини сер' пин' тарпыв". Няңоте"э Вэ"ли тет парисе"эм' хананда вэkad ладлабтавыда². Ханамда подерць инямда ня"ма.

Илесь ява" мал вы' ңэвы. Сэрсе"э³ хоркадё танявы. Тет па- рисе"эмда таня' тидахалейда. Хуна санавамдо' нивэв хамэда", тэри мерцяридо' тебе. Хад' мандалаком' нув' ядахана тэри манэ"ңав. Ладана мерцяхадандо' ңарка мя"на" ея" лаб- нолыд". Тадбэй сыра", сыра" хонгада".

Няни хэ"мяхад си"ивахав яля' мани' илени'. Си"ибимдей яля' пэвсюмзь нябав едамда яноць пиреда. Едами лохома. Нябав масьнё":

- Няңоте"э' пебя, юркангодақэн, нями нинё" ту". Теда' ямдав- данисянё".

Хонёвы хибяри тамгутаңгува, юрка ңод" пяв, сэрся' няд мерця тебе. Нё' сивня хырналтада. Нё' сихид, пиҳид вахальй":

- Пухуця", ханами ңэдахарт.

Нябав ханя хань". Няңоте"э Вэ"ли мят' мятю, няби сяланда ваңгахана ңоб" хорм' севолпи⁴. Пыда тарем' ма:

- Еванзадков, тю"уня' ңа", мэдамд тадм'. Теда' си"ив мядондани'.

Мань ханяв" юрк". Тад пэвани' си"ив' мядоңани'. Тюку ңавраг нянд' ха"амбата саварка ңэвы. Нердехэва ехрасавава. Си"ибимдей яляни хувынжэ хэсь нями манзь ханада:

- Тюку яля' мань ңани' ңэдалёртадм'. Хэсь ялями тома. Тад хэбяни, си"ибимдей яляни пэвсюмя' пирка"на ниб"нани ту", тикахана ханадм'. Та'мальңгана ямдангудима. Тики вадида мэсо"махаданда, тыда подеро"махаданда, сеней хэ"мянда сер' ңани' пенды". Мерцярида тебе.

Си"ивахав яля' сыңгрёда яңгу. Си"ибимдей яля' пэвсюмзь, нябав едамда ңани' яноць пиреда. Еданда лохомзие" ңадимңгава манзь ханада:

- Юркаңгодакэн?

Намгэ тикирихина юркава сер" ңэвна, вадам' нидм' мэс". Намгэ' пирка"на нё' панувна хырна товононда. Тики хырна на яберкавонда, пихид тарем' ма:

- Пухуця", ханами ңэдад.

Теда' ңамдавани', Няңоте"э Вэ"ли некани ня' си"ив' ңамдыни'. Си"ибимдей яля' хубтаңэ хэсь, макоданда син икамда вэн"ңа. Манзь ханада:

- Тедамбой' ябе мялонь масярка ңэбта сава ңэдараха. Савовна идарҗани'. Теда' хэб"нани ңани' хаварим' ваде"ңадм'. Ханзер", хумна хэбями намда"мари' янгу. Сеня' Тру' хардан' хаядамзи": Яңгэй Хорэля' падарта товысь, си"ибимдей яляхана хардан' товандась. Тики ян' нисявав то-са". Тру' хардахана нивы ңэвадю", нями пубтавэв. Теда' тандая' мэлава яхата пянгув. Сеня' ңавнанда мань вэваркадм', ңаво" яхадана" мяпой мяканы нисява"м' ту". Тальняңы ян' тэв"мава" ти. Яңгэй Хорэля" пыда яхананда юнда ядэрна. Пэ"мада тарцясь: маня" мюсеваць. Ңоб" мюсева вуни ңа". Нерна" няд ңани' ңоб" мюдм' ядабтаваць. Ңоб" хой' ни', ңобт' ңысываць. Хой' я' ниня хури' савовна ңахар" по' илеваць. Ни"ни хыбя ңэвам' тасиримна хамэдамбиминз. Ңахар" по' ямбан' нини' таю"яни'. Тетимдей поми ңэрёй нувода, нувода пявы. Хонёва ңоб" вуни ңа". Яңгэй Хорэля ңэвакони ет' сябарць' тубкамда ха"авравэда. Тикиринда ңод" мань лэрё санавэв". Ха"мотана тубкам' ханяв ня"ам'. Тикани' пихий пихиня, таңго яхана мани' хэвэни'. Ңадьбята юнда ядэрмы: Яңгэй Хорэля саць ңо" са"мы.

Ңахар" по' ңэсонзь харта пыхыдамда вардедась. Тад сюрбаванда пуданда пявась. Пя маряд' варан' ңэдарарабтавась. Пумнанда нидамзь хань". Неры хаёвы мяк" ңани' хаядамзь. Ю" ңацекэхэнанда хаенами янгуусь. Тас ёнре"эм' мякани танэйнась. Теда' няби пелядо' тэнэ мэтина" ти". Ңавнани тарси" вэваркадамнё": тики яханда Яңгэй Хоролям' нивэв хада". Яхандо' тэванахана теда' саць вэва" ңэнгу". Ңылэда яханда

хадри" ңод" манэтанакэв, пуна ңод" вэва ңэнгоданакы? Еванзадков, пыдар ңод" емб"танакэн?

Наворць ёльцейни'. Пин' тарпыни'. Няңоте"э' Вэ"ли ңахат Мэсыта: мята хэвнякуд ңоб' сюдабтэй", пон' нись мы" сидя ёнре"э мядм' сюрте".

Пон' нини' тый". Некав ма:

- Самбляңг хабтарка тыд тайкуй". Сит тосалпато', тикид хэня". Нито' вар' тяхамна санлангуд", тикид ңоб' торомбэй". Сеней тет парисе"эти" ңэ" ни"им", теда' едэй" тохоламбада". Самбляңг хабтарка няхар" по' сярвам" ңамгэхартгаңэ нидо' мэс". Теда' пыдар сэрсе"э' ваңган' лыңгарад". Хэбто' тики ям' ханаңгу". Нани яхававна хэсяндадо' янгу. Нари" мань ңани' хано" малан' лыңгарангув". Пухуцияңэ, тыд мядм' сюрте сюре"леид.

Нябав тыда хано" малувна вэрналтэйда. Самбляңг хабтарка мале намдавы", нито' пиняңы хэувна янга нявоты". Хано" малувна нябав сидя' сюртейда. Самбляңг хабтарка мань нядани' хаця" ваера". Ив ядэлы: «Нями" маси" - ңэдараана яхана тыд пили" хэня". Тикини хаянё"». Тад сэрся' ваугахад санавани, сянахав еңган' ха'мыв". Есь" тахаруйм⁵ хаця" марць' нимня мирналев. Есь" тахаруй, есь поёте"э неры хабтарце"эм' сидя' тилуав⁶. Тад нэкалманда няхар" тарамъяв". Няхар" сыра' паромдэйм' ярэлабтадм'. Няхромдэйхана неры хабтарце"э' вэта сакада. Савовна манэць, янахав ңэвы. Тет пелейда няданда нюта". Няңоте"э' Вэ"ли сырида янгали. Харта сермнанда лаханаковонда, ямбри ензида, ензида пявы. Нянани тонё". Манзь ханада:

- Тарця ңэнгусь. Наво' яхананд ңани няр вуни таня".

Тыда ханэйда. Хана"махаданда манзь ханада:

- Тыни тедахав' еремя". Пыдар тэдар ня"ма тара. Тет хорсе"эм' ты" варыхы манэтанакэн? Харбёхов" харбё". Хамэдамбабат, тикид ңани' вэдахад". Ңэдараана яхана ңани' ханда". Неры мэ"ма яханд ңани' хань". Хэсянд ядо' ти.

Нябав сидя тас ёнре"эм' җани' сидя" сюртейда. Тет хорсе"э" тальяна җани' то". Нядани хаця" ваера". Тад санавани есь" тахаруй' неры хорсе"эм' җани' тилџав. Няхар' тарамъяв". Савовна манэць тет хорсе"э янахав" җэвы".

Няңоте"э Вэ"ли җани' сырида яңгапи. Тарем' мамононда:

- Тарем' ңэнгү" нисяв', тоса"мами ти. Индата пирта ненэцянэ пебями тахав' хэвы. Хуна яхананда җамгэхэв ненэцянэ хэвандараханё".

Лы юде ңэта⁷ ханахани тыни подерьян. Ханами малесь, Няңоте"э Вэ"ли җани' тарем' ма:

- Еванзадков, теда' хэбянд пэ' сюмб' ни' нултангурава, пэ" пиняю' сыртанава. Пиняюна ха"лоре"э" тир" ңадяңгу". Тики тир" ед' ңэдалангуава. Нянда тэва, савовна манэць тикар тир ни ңа": мал пэ хой Носит пэмбой. Пэ хой' хэвахана ңавнанда Носи" тэта илесь. Тики яхатата ханта нись ңа". Ирихинд тэвабат, Носи" тэта иримд нён лэрбат". Ңари" мань хавами намда, мань яхадани тованды яңгу. Иленя ңэб"ни хар"н тутадм', си"ми нёда" пюр". Носи" тэта ирихинанд илеңгунва. Тэри хэхэва хаванзь хаядм'. Вади"ни валак". Хананд ни' ңамдад", сит парабтаңгудм'.

Тюрми ңудаха"ни тада. Сеней сэрся' ня' тидахаледа, халцо"лэ' ни' инями мода. Тет хорсе"э ңобт' сенэйд". Ху"на хэбями нивэв хамэда". Ханани ябзохо' таня җаха"на ненадорка яха" тебермонди'. Тарем' миндяхани җарка пэ" сюмбан' тэвнархыв". Тет хорахами таль' нэкальян. Саном' ңэдара сэв' хункана тир" танявы". Ха"лоре"э" тир". Тики тир" ед' ңэдалэйв". Няндо' манэць тир" нивы" ңа". Мал пэ хой, хой ңэвы. Хой' маха' ниня ңока"я" ты". Сэв' хун"мана җараханда ты. Ты" няби варувна, ты сябарпа⁸ ңопой ядана. Теда' тю"у" миндя ненэць' ңэвы, манзь ханада:

- Хибян ңэбат?

- Няңоте"э' пебям' тэри нюбе"ңав.

- Ху' пэрџар?

- Тюку яхана Носи" тэта танянараха. Пыда етэ мань пэрџав. Хурка? Еде"џав?

- Носи" тэте"эм' ңули" еде"џар. Ңари" мань ңани' Носи" тэте"э' нюдм'. Тев' ед' хань", мядм' танякуна хонгур. Мань ңо' пунарка тутадм'. Нерционанд сидя мядондаха' тоңаханзь. Ңысы" ңацекы" ябильядца. Ңадьбя"ни мань тэхэ"на мэнадм'.

Ты" поё"мана ңэдалэйв", ңока"я" ты" пон' ерпин. Ты" варан' тэвахава юд' мяд' нимня ңадимядм'. Ю" мяд' ерня ңоб" ңарка мя". Хано" пыярин' та' нултав. Мядондахаюто' хандо' сяравы". Нерденя хан' си" мат" тильцире"э". Ся"ны сяравы" ңэдакы" ңани' ты" ханамдо' сюриле". Савака"ямда хан' ни' лабцедевэда. Мат" сую' хобахад сэдавы савак ңэвы. Тад тяхакуй хан' ты" мат" ха"ло' сэв"⁹. Хабто' ңар" ни" ңа". Тет хорахадани ңодь' пуклары"¹⁰. Савака"ямда мэта хан' ни' та' мовэда, си"ив сую' хобам' сэд"ма хад ңэдараха. Мэтада ханда париденя еся. Тет ёңгданда тетамбой' ңэда. Ив тарем' хая: «Намгэ я' сюдя ңэнгоданакы. Тэри ненэй ханахав ханда ни-нё" ңа". Ханяд товы мядонда ңэдакы? Маня" яна" терахав ниняраханё" ңа". Няңоте"э Вэ"ли тюку ян' тарця ненэцям' ниси" вадес".».

Тет хорахами ханан' сярын. Ерь ңарка мякана мун" са"манодо". Таня' яльяв". Маханяю' нём' тядэдадм'. Ту' няби хэвахана ңяхар" ңамдёда: нита нё' ңяңы ненэць' ңармбэй ңэвы, та"ль' васадэй". Пыда тарем' ма:

- Ңоб' тамна ял".

Тиканда си' ңяңы хэвахандо" ям' тангумда". Ихинян мадм': «Носи" тэта ири ңэнгоданакы.».

Ирими ңани' манзь ханада:

- Едэй вадёвы хибян ңэвэн. Тю"у' миндя ябтако хасев" хамэдито' янгу. Худ ядэртан?

- То"ма' ями ңарка Пэ" тяхана ңа.

- Ңарка Пэ" тяхад хибя товандами таняса? Ңа, тарцями танясянё": ңавнанда Вэ"лимн танясь. Няда ңэдакэн?

- Тарем' тосабат тарем' ңэнгу" нив'.

Ив ядэрңа: «Ханзер" мамба"ни сава ңэдакы?».

Ири вэсакоми хэвыхы няханда ярэй", манзь ханада:

- Ханин' Вэра, нюдя Хэтанзив, теда' пыдари' е"эмнанди" ңэдаравы нибтав' ңа"?

Ив ңачи' тарем' хая: «Ханзер" мандадм'? Няңоте"э Вэ"ли тыра' хэвад¹¹ хамба"ни сава ңэбтав'?».

Тики ңамдёдами, сидя ңамдёдами ңаркаркаха' ңэвэхэ'. Няби сюдбями си"ив' ңу' пойм' сюды" талыбida. Нябими - мат' ңу' пойм' етэя талавы. Тэри хыбярихи' ниняраха' ңа". Но-си" тэта тарем' ма:

- Няңоте"э' Вэ"ли' илехэва иле?

Мань тарем' мадм':

- Хасянд яханда няра" пядась.

Носи' тэта ирими ңани' хонарку:

- Тоса"мами ти. Ңамгэ вадам' некар мэца?

- Тыра' хэванџэ нядамда хаңась.

- Хадри' ңани' хамандада янгува. Ханин' тэта¹², нюдя Хэтанзи¹³ сидди' хай" нив'.

Ханин' тэта таси" нибкалэй".

Нэвамда илась, манзь ханаңада:

- Няңоте"э Вэ"ли хаванзь хэвүүнё".

Няна" хаб" маня" ңод" ңани' вунива" илөнгү". Тарць" харахана хэва' пирнё".

Нюдя Хэтанзи пыда тарем' ма:

- Ненэнзянда ңод", няна" хаб" маня" ңод' вунива" илөнгү".

Носи" тэта ири тэри ханибырна:

- Хандаб"нанда мань нянда мангва мадамзь: «Нивэн хасена", ңули" муңгани нись намд"».

Носи" тэта' ню тэхэтата то.

Ханин' Вэра манзь ханада:

- Ҙари' тедамбой' мань мякани ядэртадм'.

Тиканда мал' хэсь тасладо'. Ңани ңоб" хонаравандадо' Мэдана Вэ"ли ңэвы. Носи" тэта ири масьнё":

- Ненэнсямбой тобта тара" нив'. Теда' нюми таня' манэтада. Мэдана Вэ"лира" ватосяда хыбява товада пунси. Вэ"ли мюсюркад: нерде намдаванд тюкухона мята палы, няби' намдванда мале тайна хэвы. Сидяхавари' мякти' хэяха'. Пыдар, нюңэ, ирир хосая". Мани', такы хасава нюни ня' мядондани'.

Носи" тэта' ню тиканда хэбянда. Нябихи' ңод" хаяха'. Мани' ирини' ня' си"ивахав яля' и"лим' пэрҗани'. Си"ибимдей яляни' сэя, мани' ланомани'. Тарем' мэнахани' Ханин' Вэра, няби нюдя Хэтанзими тоңаха'. Няхаю"ни' тось ңани' ңамдына". Тамна няхар" ялям' маня" тарерим' ңэдарава". Няхар" ңэсонгана Носи" тэта' ню, ню тованонда. Мят' ханя тю". Носи" тэта ири манзь ханада:

- Мэдна Вэ"лимд хурка, хор?

- Вэ"лим' ховась. Минахани хонарасавава: Вэ"ли ватонись ңа". Си"ив яля' хавода ңасибин.

Си"ив' ңэсонгана пыда тарем' мась:

- Ханин' Вэра¹⁴ ханзер" ңэда са"ла: тад хэб"нана" Няңоте"э Вэ"лим' ханяд хованзы ятнабта"? Ңута мю' хаванзы миңава".

Тики вадамда пили" ваде"ңада. Си"ив яля' ваерахава, ватора пэяць. Мангва мась:

- Хавыда ет' мань ңо" тутадм', нибта" сянаку" ңарка" пэ" сюмбан' хар"н тэвэнгув".

Ханин' Вэра мань пудани ңани' тарем' ма:

- Хадри" ңэсь ңо" пясь тара" нив', вуни нензеломд".

Сян' ңамгэмда ваде"манава". Ханин' Вэра нерденяңэ нява" ңэдалэй". Тад ңэдалавана" ңарка пэ" сюмбан' тэвына". Пэ" сюмбахана Мэдана Вэ"лир тюмда нароңоць мале хонёвы. Ханин' Вэра нянда хэувуна нултада. Вэ"лир няханда ярэй", манзь ханада:

- Ханин' Вэра, Няңоте"э' Вэ"лим' ханяд хованзы таслам-бир? Манзъван нянани тарця:

- Няна" ңуд' мю' хавандарахава", хаванзь миңава". Тедахав' тарси" манзадава"ма, ет' техэ яха" манэтанакэва".

Ханин' Вэра ма:

- Няна" хаб", тальняңы ява" вуни хасенанғу".

Тиканда ңани' ңэдалэйна". Маньмякани маня" тэвына". Тики яхана си"ивахав яля' толина" вэнгаль". Си"ив' ңэсонғана Мэдана Вэ"ли макода' син' ңудида вэн"ңа, манзь ханада:

- Ханин' Вэра ңаво" яхадана" хонёванзь вуньсяна" тэв", хэсь тара.

Тиканда емб"яна". Ху' ед' ңэбта ңод" ңэдалэйна". Сянад' хунат' ңэдалёб"нана" ңод" тас юр" мядо' нимня ңадимява". Хано" маларин' нултава". Тарем' сырпа"на": мядо" нё' сихиня сянахав ха"ама" таня нэрцорта". Ерь ңарка мят' маня" тюва". Мякы мякана ңарамбэрка не, не танявы. Ханин' Вэра хонарада:

- Тюку" хыби" мяд" ңэбто"?

- Ңавнахаванда тас юр' Түңгос¹⁵ ңэ" нисям'. Тедахав' ңанидо' хаць, ңанидо' неда ханэйдась.

Тарцям' намда ңани' ңэдалэйна". Неры хэвы ңудо ханава". Тарем' миндяхана" ңани' тас юр" мяд' нимня ңадимява". Тики яхана илена ненэцям' ңани' нива" хо". Ңудо ңани' нёдальяна". Тад нерняна тамна мат" юр" мядм' хова". Тики хэня" тад хэбяндо', тас юр" мяд" нё някумна ңоб' хэвы". Мядо" няю' таерава". Тас юр" мяд" сиңганя ңоб" ервотамдо', нямдо' ңамдалмы".

Ханин' Вэра мядо" нё' ня' нулта" нидав', та' минаханда тёрм' ңэдара:

- Пыдамбоховар, янд тер" хась сеяр сава ңэвы!

Тикаринда ңод' ервотадо' нядо' тёrm' намда, ңэта ни' санэй", манзь ханада:

- Мань тамна ңатенадамзь. Тики' тяхакуна Яңгэй Хорэлям' ехэравакэра". Ханин' Вэра, сит ңатедамзь.

Тас юр" тер" харто' ңынахато' маймбадараха". Тас по' ямбан' маня" енерјава". По' томзь - няха"ни сылыв", нини" мал' хавы". Ян' сидяриңэ Ханин Вэра' ня' иле хаёвэни'. Илеба"ни" ңод" пон' нини' пере", сэв" сэйвы".

Ся"ны ңэбта ңод" сэвани' ңадимя". Пон' хамбвэдм' ңэдакэдм', нинякэдм' ңа", ңамда пяв. Мань ңо' ңамдыв", Ханин' Вэра ңани' ңамда порцеръй". Нянда пуд Мэдана Вэ"ли ңани' ңамды". Сидя няхавава": Носи" тэта' ню, нюдя Хэтанзи нихи' юрк".

Мэдана Вэ"ли манзь ханада:

- Нер" тоса"мами ти, сеня' мадамзянё": «Хаванзь миндява". Теда' ханя' хандава"?».

Ет' ханя' ялпа"на" ңод" яльяна". Сянад - хунат' яд"махадана", ңарка Пэ" тэлан' тэвына". Нерна" няна юр" мян мядо' манэ"ңава". Мяк" тэва, ерь ңарка мят' маня" ядава". Мят' тюва". Мякы мяканы Носи" тэта ири таня ңамдёвы. Няби хэвахана ңоб"ляри хонёда, ся"ны' хонавы ңэдакы ңани' тонда ңылана ңаркарка ңэвы. Ирина" хэван' та' ңамдына". Носи" тэта ири пыда тарем' ма:

- Ңаво" яхатани' пыдара" е"эмнянда" тодамзь. Ям' хахаяльтемба таль"няку' ңэсываць, ху' хавамда вунив ехэра". Сидя няхавара" хась еремдархаханё", илевы ңэбти' - тут" нисяхам'.

Тяханяңы ва"ав' ниня хонёвы хасава юркы". Тюкуехэвами Няңоте"э Вэ"ли. Пыда тарем' ма:

- Еванзадков, сеня' хэб"нанд няхавадами вуньсядм' хай". Нена" вомдaranё": «Яна" терм' тарохона манзабтаранё".».

Ңавор"маханана" хара вуни таня". Тад хонавана" наңэдя по' пеля' хонёвари сер". Няби ңэрёй сырода ха"мы". Ся"ны ңэбта ңод" - нё' няюнд саю" нензамби". Ханона" малан' та' нуладо'. Яңгэй Хорэля ңэгоданакы, тёрм' ңэдара:

- Няңоте"э Вэ"ли, тю"уня' ңа", тандая' пэнгуна", савовна пэнгуна".

Тикаринда ңод" емба"толына". Тад енелавана": ялям' нива" тола", ирым' нива" тола", тасахав по' мале пэрһава". По' ңэсонзь Мэдана Вэ"лива нява" хавы. Саю" ңэдапада" муңг", пайды' ядувна ибця хан"ңа". Тад манэ"ңав: Ханин' Вэра' манзда суса, нями хавы. Мани' сидяриңэ, некани ня' хаёвэни'. Яңгэй Хоролям' сидя саркодахад сидя ян' вэнапа пями'. Наңэдя тас по' нина" ня"амбина". Нена" сидянима Яңгэй Хорэлям' тет ңэнда ни' ха"аврами". Ха"амамахаданда я' ңыльня' взвако"явана тёrm' ңэдара:

- Хасяда ирив, ханяна хаян? Манзетынанё": «Хась ерембат нидм' ехэрангу"».

Ңамгэр ңэса! Хэвамбонани яда лекэй", ңэва ңадимя. Тюкуехэвани ха" вуни" таня", сэв" вуни" таня"

- Яңгэй Хорэля, ебта" хась пявлэнё".

Сейкоми хая. Сейкони хэсь хуна санавами нивэв хамэда". Сэв" талкадавы". Сэвани ңадимб" седакоця' ниня юсидавэдм'. Санони' няна ябтамбой ям' ңэвы. Тяханяны хэвада саля ңэвы. Тики салякоход ңоб" ңэдалёда ха"мы". Тики нянда пуна ңоб" ямб мюд. Тас юр" хабт мюд хэвахана харто' лылңу". Ңэдалёда' хамбари" я"лэрңа", яв' ит' ңоб' ха"амавы". Тет тэму"ре"энда ңыламна итэханенгэ. Яв' ябта сём' ңоб' мадади'. Ңари" хэвувнани мюсеңаха'. Маниеб"нани ханоти' саңэ харти' тыти' едю мэ"ңаха". Мюдади' хэвахани сүртэйди'. Не мята мярада. Хонёсь седакоми ңули" синд' еремя. Хасава манзаида малесь тикарихина седако' няна то. Ихинянда ма: «Седако' ний ңамгэ ңэбта? Ңавлакав нибтав ңа"».

Тад манэ"манда тикада хамбада ненэць' ңэвы. Си"ми сидяңэ мят' илаңаха'. Си"ивахав яля' мань хоныдама. Немани тахамана ңоб" лахананам' намдадм', пыда тарем' ма:

- Юркадама, лаханава' пируэ хаця" нин хань"?

Тарця вади намдахава, тю"у' ңамдыв". Хонарковы нями ңани' манзь ханада:

- Ңамгэ' маядярт?

- Ңуда' маядяртм'.

- Хибян ңэбат?
- Няңоте"э Вэ"ли пебям' тэри нюбе"ңав.
- Пыдар хибян?
- Ңари" маньзяван я' хэв Вэ"лидм'. Я' хэв нями пүрнадм'.
- Няңоте"э Вэ"ли Яңгэй Хорэлямда ня"амба хаись. Теда-хав' ху' хэвамда ехэрэв.

Тиканда Я' хэв Вэ"лихина иле хайдм'. Ся"ны ңэбта ңод" нями манзь ханада:

- Илеванд сер' маниеб"нани ир пили" ядэрџа. Ир ңамгэвна ядэрцеты?
- Няңоте"э Вэ"лим манэ"ман' харвадм'. Нями хадри' ңод" пюлаңгув.

Я' хэв Вэ"ли хонёдалрев' маханяку' харцарабтэй". Ңамгэ" пирка"на ңамды", ма"нив":

- Няңоте"э Вэ"ли ха"махавада я' сяр' ниня яңгу.

Тики вадида мэсо"махаданда Я' хэв Вэ"ли тэри тэмзы". Няни хэ"мяхад ханани' ни' сидя тюсипой' тэри ңамдыв". Иб" хэидамзь, Няңоте"э Вэ"лим, Я' хэв Вэ"лим' ханяд хонгухуюн? Ихиваханани хэван' харвадм'. Мэта хан' ниня пили" ңамдыдм'. Няхар' ңэсоңгана, яля' ңэсоңгана тю"уняюмд сүнгрём' намдадм'. Тад сырнадм' ңари' хэвахани тет сыра хабтм' теда' манэ"ян. Мэта хан' ниня хасава ңамдёвы: сэроко паркада таси сыра' ед' енахалмэраха. Манзь ханада:

- Няңоте"э' пебя, ир ңамгэвна ядэрџа?
- Няңоте"э Вэ"лим' манэ"ман' харвадм', таддикахад Я' хэв Вэ"ли' ханя' хэбям' тасла я"мадм'.
- Няхаод теда' мале пёда пэйханзь. Ялахаванд няхаод вунхиод хонгугу". Ңобкана хандани'. Хэб"ни' ңод" Салте"э то¹⁶ сяд' ниня пыдо' пёданггу". Нит хэван' тэвабат хэвахандо' нён харва". Ся"ны ңэбта ңод" Яңгэй Хорэля тет ңэнда ни" ха"мангу". Ха"амахаданда Салте"э то' няю' тёренгугу". Пыда манда: «Нарка ид' ерв, ханяна хаян?». Манзетынанё": «Хась пяб"нанд нидм' ехэранггу", тось ңо" тутадм".». Тарем' тёры-

со"махаданда Салте"э то' итя пирамда, ңэва' мал ңадимда. Ладта ңэсомана ири ңадимда. Пыдар нянда вэвако"явана тёреин, тарем' манъинась:

- Ңарка ид' Ирив, я' сяр' ни' тось вато яңгусянё", ханя' тарпотан?

Тарем' маманд сер' ңарка ид' Ири таси иканда ңани' сэяңгу. Яңгэй Хорэля тэри манда:

- Хава' мальңгана ня яңгода, савовна илева" мальңгана ня ңока ңэнгү".

Няхар" пёднар тамна таня пёдангу". Яңгэй Хорэля' пэянда ян' тебахава я' ңыльняю' тёрм' ңэдарангү. Пыда манда:

- Хасяда нисяв, ханяна хаян? Манзетынанё": «Хась пяб"нанд нидм' ехэрэнгу"».

Няхар" пёдна" хэувуна я пирмда. Хасяда ңылека пин' тарпотаңгу. Сеня' ңавнанд манэ"ңарсянё". Няхар" пёданан' пыда ялты". Нюмда нядавнээ ятнаңгу. Тадахава пявардад ти. Няхают ня' ңули" нёр ңэдара". Теда' мань сикавами ңамгэ манэ"со"мар ңэвна, ңари' маньзяван нумгад туртадм'. Теда' тю"у' тид", ядахава тики' нид нид хонгү".

Тад тивани, ханямна хэвами нивэв хамэда". Мерцяхав ңяни тэба. Таняна хунанда Салте"э то' варан' та' ха"мыни". Си"ми пэмбавэми хуна хэнякы, мэ"мартида яда сэв" ё"ңав.

Тарем' сырпа"ни Салте"э то' сяд' ниня няхар" пёднав таня пёдавы". Пёдани' хэван' та' ңамдыв". Сэроко хасава' вади" сер": няхани нидм' харва". Тет пёданами сянад - хунат' пёдабато' ңод" Яңгэй Хорэля тет ңэнда ни' пили" ха"мы". Салте"э" то' ид' ңяю' тёрм' ңэдара:

- Ңарка ид' ерв ханяна хаян? Манзетынанё": «Хась пяба"нанд нидм' ехэрэнгу"».

Салте"э то' итя пирма. Ид' ңылад ңамгэхэв ңылека ладта ңэсонд тарпы". Я' ңяю' ятнолы". Вэвако"явана мань тёрейв":

- Ңарка ид' ерв, я' сяр' ни' тарпа вато яңгусянё".

Тарць вади намда, Ири пиня' хамбидей". Неры явнанда сэя. Яңгэй Хорэля тэри ма:

- Хава' мальңгана ня яңгода, савовна илева' мальңгана ня ңока ңэнгу.

Няхар" пёданами тамна пёда". Ся"ны ңэбта ңод" Яңгэй Хорэля' пэяды тэбэ, ян' тэбэ. Пэянда ян' тэбась я' ңыльня вэвако"явана ңобо" тёрей":

- Хасяда нисяв тахабя хадм', ханяна хаян. Вадахатани нинанё" ехэррасето'.

Няхар" пёдна" хэзвуна яда пирамъй". Я' ңыльняд ңамгэ ңылека ңэдакы: ха" вуни" таня", сэв" вуни" таня". Пёдани" няю' ятнолы". Манзь ханада:

- Хэ - хэ, Яңгэй Хорэлями хась пявшданё"?

Ху' санавами нивэв хамэда". Пёдани" хэван' тэваванда нерня, хасядам' лэмбаражаданда мань ня"амвэв. Хасяда' ня' ңобт' лабцейни'. Сянад - хунат' пёдаба"ни" ңод" техэ пёданини" няна сацов хэвы. Яңгэй Хорэлям' ңыланди' мэвэди'. Мэб"нанди" ңод" ңыланди' тэринди' ё"ңади". Таси' сэрер' ңылана мулномононда:

- Тю'уй тир' ни' сян' нидм' тут". Няңоте"э Вэ"ли нядани са"мэн.

Тики сидя нями пэдёди' пэраць тэри ңамдаяха'. Я' хэв Вэ"ли манзь ханада:

- Тайкуй няхаюни' хадиди' тас". Хэвкари нувм' мань е"эйдани пэрцетыв. Пыда ситя я' хэв няни е"эйнэ пэрнадм'. Тарц" харахана хадиди' тас".

Намгэ пёдвами мале"мяхадани Хасяда Ирими ңылани мэв. Хорака' ванған' хар' тыретавась ңани' ярим' тыре"ңадм". Хасяда Ирими я' ңыл' няна лаханакованда:

- Няңоте"э' пебя, тю"уй я' сяр' ни' сян' нидм' тут", нядани ва"мэн.

Я' хэв няхаюни яда"ма' мюмня хаядм'. Мят' тэвыв". Няхаюни хонёвэхэ'. Намгэ хонёвава" ёльце"махадана" маня" ямдэйна". Носи" тэта ирина" мяд' ңэ"ма яха" тэвывна". Тэва"махадана" Няңоте"э Вэ"ли вадамда мэ"ңада:

- Мань яни хобацян' ханданакэдм'. Пухуцями мале җаха"на яханда ңэдаравась.

Тахабя, Сидя Вэ"ли илебям' пэртязэ хаях'. Та' илельяха'.

Та' малда.

Вади", вади" хари хамэди"

¹ Хананда синд - хананда тэд.

² Хананда вэkad ладлабтавыда - тыда ханаханда сяравыда, хэвня' ладарна".

³ Сэрсе"э' хоркадё - салаба' хоркадё.

⁴ Хорм' севолпи - ябе ид' хораком' сяланда ңылана минарць то.

⁵ Есь тахаруй - тынзям' паңгалпава' мальгана сота тахамана еся иням' ңэдарамба пэрна".

⁶ Тилаџав - нерняны нымдахата, пиялёхота яркада.

⁷ Лы юде ңэта - лэхэд, я' нымдахад мивы юдм' ңэта хан.

⁸ Ты сябарпа - ты танаба, ты' варувна ирт' миңа.

⁹ Ха"ло сэв - ха"ло - сэвата вар париденя хабэвко; сэвато вар" ха"ло сэвадарев' париде".

¹⁰ Пуклары" - ңэдо' ңодь' ламдорка".

¹¹ Тыра' хэвад - няданда, няд"манданда.

¹² Ханин' тэта - нюдя я' тер ненэць', Ханин саля' тер ненэць'.

¹³ Хэтанзи - пэ' тяхана иленя ненэцие" еркар.

¹⁴ Ханин' Вэра - нюдя я' тер ненэцие" еркар.

¹⁵ Туңгос" - Таймыр' няна иленя ненэцие" тэнз; вадидо ненэй ненэцие вадахат ңоб' яуга".

¹⁶ Салте"э то - салясавэй то.

36. Сэр" я' Ңацекэ

Няхар" тэта Нохо си"ми вадавы". Нябакоми таня. Тэхэвава" тэва" - тет ёнре"э. Ханахавава" тет ю" хүрёда.

Хуркаси" - хараси" няхар" ямб по' таня илева". Ся"ны ңэбта ңод" няхар' Нохоми ңобт' ңамдавыд". Немами малесь, хар"ни ини сер" пин' хан"ңадм'. Инзелеб"нани няхар" Нохоми тарем' тасалкурна".

- Ҥарка Нохонэ недамд пюркава".

Ҥарка Нохо пыда тарем' ма:

- Мань нянани не ни тара". Мяканани мань си"ив неми.

Латани таборт¹ хось я"амадм".

- Ёнэй Нохонэ, не нянанд ни тара"?

Ёнэй Нохо ңани' тарем' ма:

- Ҥари' мань ңод" неми, тет неми. Са"ен' са"лемядм"².

Нюдя Нохо ңани' тарем' маси":

- Нянани не ни тара". Мань сидя неми.

- Тикахавахана Сэр" я' ңацекэ няна" нед пюркава".

Ҥарка Нохоми ңани' тарем' ма:

- Си"ив ңэсонгана, юрkad яңганя си"ив Сэв сэр" си"ив не нядо". Нюдя не нямдо', няби ҥарка не нямдо' хоць тараңаха".

Тарц" харахана мань сер"ми яңгу. Мяканы тюдм'. Хуняна Ҥарка Нохо мякани товы. Си"ми юркабтамба няби ҥарка пенда пайдэни ңыламна ңэдабтавэда. Ҥамда пяв. Едава" пява". Едава" ңамава". Ҥарка Нохоми манзь ханада:

- Теда' тюку яля' ядэртава". Ҥадяда я"амна ңэдалёртава", пыдар ңод" тутан.

Ҥарка Нохоми тиканда хаянё". Тет ёнре"эм' сюрлабтэй-до'. Пой ңутокы ханами сидя пыяхад тю"у' нэкалңав. Наронда ңылад мюданда савакам' нэкалңадм'. Есь" тахаруй тынзямы ня"амадм'. Тиканда Ҥарка Нохоми ты ныдабта. Тына ёркальяна". Пыда тет хорсе"э тым' сяра. Ёнэй Нохоми тет падвы' тым' сяра. Нюдя Нохо тет парисе"эм' хабтам' сяр" нив'. Ҥари" манъязван ёнар' помна сэвари мэ"ңадм'. Ёнар" понгана мэ"мани пир тым' нидам' манэс". Ты" техэ' варувна тет ладсэр" ты" няватормы". Нерня мэтамдо', есь" тахаруй' ярка пяв. Тынзями тад мовани салтана мярада ңодь' серибтей". Нерня мэтадо' тад нэкалманда няхар" тархальяв". Тахав' янема. Тарси" манэць янахав" ңэвы". Мэтидо' пелейдо' пунда яльяд". Мэта ханахани подер" нивав". Няхар" Нохоми, ханодо' подерць ханодо' валңа". Хэсянд яхана" пили" ңэдалэйна".

Сёда хэнгада. Тет ладсэр" сава" ты" ңэвы". Няхар" ңэдалёда хараси" ңэдалы". Няхар" си"ивахав' пиняри' миңава". Пангарка соты ниня" харбилы". Нерденетава" сотэ' ңэва' ни' варцаатеда. Миндана" е"энэ си"ив юр" мя". Я' тер" мандалавы". Тарем' сырпа"ни: Си"ив юр" ерня си"ив ю" мя". Си"ив юд' ерня си"ив ҥарка мя". Си"ив Сэвсэро" мяд" ңэнгодаанакы".

Ҥарка тэта Нохоми пыда тарем' маси":

- Мядона" такы".

Мядо' нё' няд маня" ңадимява". Вадо' няби хан' нултава". Вадо' махарин ха"мась пяв. Нюдя тэта Нохо' савакам' екась, мят' яда" нив'. Ҥарка тэта Нохо нита маханяңы мят' мялкада. Нини мят' тю', мяк" мяту". Мань ханани ниня та' ңамдё хайдм'. Тюми нароңоць манзелабтав. Харини ярэлы". Мякы мякана Ҥарка тэта Нохо тарем' мамононда:

- Ваян Сюдбя, ңамгэ серо" нид тев' тэвүн?

Ваяр масынё":

- Нендава' е"эманя тев' тэвүүв".

Ҥарка тэта Нохо пыда ңо" масынё":

- Ҥари" мань ңод" ңани' тарця сер' нид тев' тэвъяв". Мань сидяхавм' хонгудм'.

Ваяр масьнё":

- Ҥопойм' хонгудм'.

Ёнэй Нохор инзелеб"нани, няби мякана тарем' мамонон-да:

- Тавысо" Сюдбя, Ҋамгэ серо" нид тев' тэвын?

Пыда тарем' маси":

- Ядэро"мадани Ҥопойм' ходм'.

Ёнэй Нохор Ҋани' тарем' маси":

- Ҥари' мань Ҥод" сидяхавм' хонгудм'.

Инзелеб"нани нюдя Нохоми маси":

- Туңгусо" Сюдбя, яр хубтасянё". Ҋамгэ сер' нид тюкон' тэвын?

Пыда тарем' маси":

- Нюми Ҥоб' нюми нюни неңэ Ҥобкавм' ходм'.

Тики' ямбахана идам' пэрңа"ма. Сёёдо' сахама". Манье-хэван тики" ямбахана харини мэ"Ҥадм'. Тарем' мэнэхандо' пыдо' ябилмондо'. Инзелеб"нани: сятаняны мякад Ҥоб"ляри не"я тарпы". Ерь Ҥарка мят' яда. Маханяны мякад Ҋани' не Ҥадимя. Ерь Ҥарка мяд' нён' Ҥобт' нултади'. Лаханакурңаха':

- Теда' товы" хасава" сидани хосая товы" Ҥэдараха". Теда' хонарахами'.

Ҥаркаюм' не Ҥобанда пикцим' сякалпа то. Вахалць пяда:

- Сидани' хосая товы Ҥэхэваб"нанд нянанд тоб"ни сава Ҥэбтав'?

Мань Ҋани' мадм':

- Харвахавабати' тут" нидим'.

Ҥаркаюм' не маси":

- Ҥока мядо" тер" пунари хаванда"!

Нехэ' туцяӈоди', падыди' ня"амаӈаха". Тет ладсэрми ман-забтэян. Танянани хунанани нё' паӈгувна нултав. Мят' тё-рейбтейв", мадм':

- Нябако', нядамд тадм'.

Едами Ҥамзь неры то"ма' пумна тет ладсэрми Ҋани' ха-рейн. Ҥока"я" мяк" нулта" нивав'. Ханани ни' тюми нароjoоць Ҋани' манзелабтав. Мякана марнадо' я"авлы". Си"ивахав' яля'

тамна ябе" ни"им". Ҥамгэ пирка"на мунодо' хансе", полкада-нараха".

Харасядахад ңоб" ңэдалёда. Мэта тэхэвада тет харёй. Маниеб"нани ламдорка ңэвы, сырма' е"эмня тёндерм' сэхэвы. Хан' ңэ сэхэрт' ңэда хэбillerы". Пон' нись мы" тюковна товы. Вадо" маларин' ханамда сярада. Наронда ىылад ненэйм' панжатам' тыбкам' вэрда. Манзь ханада:

- Мядони хадавы тахабе хоян.

Ламдик' Ларар ерь ңарка мят' тю. Мякы мяканы сярна ңадибелыд", вэя" лохолыд". Нюдя Нохор Ларамда ия"мада, пыди' пёльяха". Пёданаханди' пихиня хаяха'. Тарем' мэнэханди' Ларда ян' тада. Сидя ңэда, ңудахаюда ян' тадаңаха', паряңэ хая. Ядувшанда ханта' вэн ңанзапидо'.

Сидя Нохоми' хан' ни' хураңахаюн. Тиканда маня" тетңэ мяканы" хаява". Мякани тэварэйн. Пүняны мяк" ңани' ңэдалэйв". Ламдик Ларми тамна тадамбавы. Си"ив яля' тады. Ҥавэ" пирка"на манзь ханада:

- Си"ми хонгас". Тики ё'эйңэ тыни татадм', не нями тайдм'.

Мань мунм' нидм' соя". Ҥани' си"ив яля' пыда тадамби. Ҥобо" манзеты:

- Лары' сядотам' не нями тайдм'. Няхар" юр" тым' ңули" татын.

Няхар" тарем' ма. Мань ңани' мадм':

- Ненэся ваданд ңэб" мяканд манэтав? Недко сядотам' нив ңыдаңгу"?

Пыда маси":

- Тюкохона хахадм'!

Ңэдалёванда мюмня хаядм'. Тэвыв". Яха' танаਬць' саля-хана ңоб" ңарка мя". Тэхэвада няхар" юр" хабт. Ханами сяра мят' ядадм'. Мякы мяканы не сэдоравы. Пелей' нямна мань хаядм'. Мань тарем' мадм':

- Няр таня?

Вахалманда сер" нянда варан ту" есада":

- Сяха' си"ми ңыдаңгун? Няни ханяна мэвахад ниннё" ехэр".

Сэв" сэйвы". Сэвани ңадимзь юрка пяв, си"ивахав яля' хамбвэ-рахадм'. Неры мя"ми тайку' ңэсовы. Ихинян мадм':

- Ңани' манэкав. Нянтерта савась.

Мят' тэва мят' мятюдм'. Ңани' ңопой вадада.

- Хыңгарте"э Саля' паңган' сяха' си"ми ңыдаңгун?

Сэвани ңани' сэйвы". Сэвани ңадимзь тарем' сырпа"ни, мя" тайку ңани' ңэсовы. Мят' ңани' ядалм'. Лары' сядотам' тарси" хов. Мят' тюхүя ңани' хонарав. Вахалманда сер', пе"эм' ту' ңар" ту" ңани' енсада". Сэв" сэйвы". Сэвани ңадимя". Пыхыдами ңоб' манзабта я"амав. Тад' манэ"ңав тет саркодами вандако' ни' сяравы" ңэвы". Тикини ека мят' ңани' ядалм'. Тю"мяхадани ва"ав' ни' ңамдыв". Мань ңани' тарем' мадм':

- Ңамгэ си"ми хадабин?

Пыда маси":

- Харт хонаранганаңё".

- Ңамгэ си"ми сярасан?

- Ңамзамд маторпа выдара"махаданда ңэдалёда сит сярась. Нюомда Сусой Парико.

Тиканда едам' пире. Едами ңамав. Тикани' пуд си"ивахав яля' толими вэнгаль. Немами малесь мань тарем' мадм':

- Ларыко"я, едадами пире". Сусой Париком' пуданда пяңгув.

Едам' ханя пире". Едами ңамадм'. Ембакая пин' тарпыв". Тет ладсэр" нито' варахана янга хадырць нинзярңа". Хабтони сярын. Няхар" юр" хабт хадо' варувна Сусой Парико' ңэдалёвам' хов. Тикахавад тад нёдалмани няхаркав' яля' ңу"лимда нёдадм'. Ңавэ" пирка"на хораңэ тэмзавы". Панг сотэ' ни' тэва лембя ңута тэвра. Тамна тяха' хэ"мя ңута ханяхартана янгу. Хэ"мямда та' ё"ңав. Мякани хаядм'. Мякани тэв"махадани си"ив яля' хоныдм'. Немами мале"мяхадани, едами' ңаво"махадани тет ладсэрм' подер" нинав". Лары' сядотан' мань тарем' мадм':

- Харт илеин. Мер' нидам' тут". Тюку яхаданд ханяхарт нён хань". Сяха тоб"ни ңод" хар"н тутадм'.

Нэдала" ни"вам'. Си"вахава яля' пиняри' миңадм'. Нумда хури' савакако, хаер". Я' пензя" ваңгасавэй ңади". Мимани ямбан' хасрём' ходм', сядоте"э том', том' ходама. Техэ сядода ңодърито' ңади". Сёсавэй то ңэвы. Тикахад хэбяни тамна няхар" хасрём' манэ"ңадм'. Хасрё' лабтахана ңоб"ляри хасава. Мэта тэхавада сидя парисе"э. Ихинян мадм':

- Сусой' Париком' хонарахаванё".

Таси' лынгэрэйв". Савакам' ека, тэвода пяв. Ңули" хахая тэвахава тю"у' порцеръяв". Си"ми манэкава юр" тибян' ңуя ха"амы". Инямда екась, вырнарида хая. Ханахани санэйв". Пуданда пяв. Нэдалёваримда нёдалңадм'. Тарем' мэнэхани' мяд' нимия ңадимядм'. Мяпой мя" таня налавы. Ханами сярав. Мят ядадм'. Мякы мякана сидяри хасава. Тикахаваха Түңгусо" сюдбя, няби Сусой Парико ңэвэхэ'. Хибя ңэвахадани ехэранаraphаха'. Едам' пэријава", лаханакурнјава". Ңамгэ' пирка"на ңобт' пёльяна". Ялям' юрвэдм'. Сэвани ңадимзь, тарем' сырпа"ни' ңэрм' парандэй" си"ми синдавы". Ңамгэхэрт мяд' вада янгу, мале ямдавыд". Мякани пяв. Ханами ңани' ханавэди'. Сянд хунат ядабани ңод" тахав тэвыв". Едами ңамав. Ңопой похов' толими вэнгалы. Немами мале манзь ханав:

- Лары' сядота, едадами пире". Сусой" Париком' тарси" пяв. Теда' мер' нидм' тут". Тюку яхаданд ңули" нён хань".

Емб"толыв". Лары' сядота ханда мюд ңынам' вэрда. Несэй ханани тэд подерңадм'. Нэдалэйв". Няхар" си"ив яля' пиняри' миңадм'. Нердани' ня' ңоб" ябта неда, неда нярахаль". Няхар" ңарка недам' мададм'. Тамна тяхакумна си"ив ңарка неда нярахальяд". Мань яни ед' минда' ңэдараха. Ңани' ңэдалэйв". Нердани ня' ялморе"э сохо ңадимя. Сохо' яля' няны хэван' тидахалембив. Савовна манэць сохо' ңэва ний, хэхэ" я ңэвы. Сядэй' ёркан' тюми нароңоць хона пяв. Ңарноли" сябарңа". Нема' тахамана ңоб" лахананам' намдадм'. Тарем' мамононда:

- Тарем' хонёхова Лары' сядотам' яханд сяха' тэвраңгур. Си"ив җарка ңэсым' сяха' хадэйд? Инзелехаркар":

- Теда' ханданава. Ялморе"э хойм' ханаин. Мядм' хонгун. Мят' ядаин. Мякы мякана сидя не таняңгуху'. Няби не җарка ңэнгү, няби ламдикако ңэнгү. Җаркаюм' не едам' пиренгү, Җамзида ялариндо' туд" ңэнгү". Едам' нёр ңав"! Ламдикако не нивда сюртыда. Едам' пиренгү. Тикахавахана тивар сабад. Тики яхад тад хэбянд, си"ив җарка ңэсым' хонгун. Җобт' ңэсовы" ңэнгү". Неди" лекыркана ңоб" мя" таняңгү. Ейда сий ңэнгү". Сярнуй савакам' мэта. Нямд тыра' хэвнээ мэир.

Вади намдахава ңэ"н ни' ни' санэйв". Ялморе"э хойм' ханадм'. Нерни няна ңоб" мя". Мят' тюдм'. Ненэсянда' ңод" сидя не танявэхэ". Няби не җарка ңэвы, няби ламдикако не, ма-хада терва' ямбариң эхара. Җарка"я не едам' пире. Җамзида җархандо' туд". Едам' нив ңав". Ламдикако не нивда сюръяда. Едам' пире. Еданда пись, едами пяв. Җаворць мале"мяхадани хона пяв. Юрка"махадани ламдико не нялида пыдабты, манзь ханада:

- Мани' пыдар е"эмнянд ңадимяниэ. Сусой' Париком' тедахав' нертер. Мань теда' сэрер' няд мэнадм'. Нями нув' няд ядэрта.

Тики яхад си"ми ңани' табэдаңаха'. Нердани ня' си"ив җарка неда нярхальяд". Недам' нёдалңадм'. Мяд" ңэсовы". Ненэсянда ңод" неди" лекыкана мядикоця палавы. Ейта сив-ня туда ялкадарна. Мятю" нидам'. Мякы мякана сидяха' ңэвэхэ". Хасава ва"ав' ямб сер' халцэковы. Тювани сер' вэта нэхэда. Ва"аванда синяңы хэван' си"ми ңабта. Манзь ханада:

- Мя"ами няр' еде"мэр. Теневанаха"нани тарця ненэць' яугусь. Хыбян ңэдакэн?

Мань ңани' мадм':

- Җавна, няхар" тэта Нохо си"ми вадавы". Сэр" Я' ңацекэнэ си"ми вадецеты".

Пыда ңани' тарем' ма:

- Мань ңани' си"ми Сэр" Я' ңацекэвна пэрцеты'.
- Теда' ханя' пэрнэр?

- Сусой' Париком' пюрҗадм'.

- Тики няхавар тюку мядо" ерваңэ тара. Теда' няхар" Нохом' пюрҗа. Нерденя хэ"мядо". Няби ервотадо' - Тунгусо" сюдбя. Мер' ни" тут". Пясь пяб" тикид ңылека", тикид сеиси". Пирсана" ни" ңа".

Мань ңани' мадм":

- Тыра' хэвнэ тараңгобтав'?

Пыда тарем' маси":

- Тикахав ңэява. Тики сюдбини си"ив яля' янгода. Сусой' Парико' сеямда пюргадм'.

Няни хэ"мяхад си"ив яля хоныдм'. Ңамгэ' пирка"на Нарэй мальця торахаванонда. Сидя лоңэ пиям' сидя ңудахана санабалата. Пыда тарем' ма:

- Иде" ерваха"на, Я' ерваха"на, нуво" ерваха"на ханалисадама. Ңа" ерваха"на ханацадама. Хонами янгусь. Ңарка"я нер танявы. Тики не таңахаюда. Туцянда мюд тюхулңахаюда. Пыди' ма" нихим':

- Няр турҗась.

Си"ив' ңэсонгана харасядя ян' вэн" тёрейд". Не ма"нив":

- Ядэртина" то".

Мани' едами таңга ңамами'. Сусой' Парико няби Тунгусо" сюдбя ңопой мякана илевэхэ'. Инзелеб"нани тарем' лаханаковонди":

- Няхар" тэта Нохом' таня тосэйнаць. Теда' хось я"амына". Сэрг" я' ңацекэхэвм' хадасавама". Сян' ни" илеңгу".

Едамди' ңаворҗаха'. Хури' ермеңаха'. Мань тарем' мадм':

- Сусой' Парико тю"уня' ңа", тедахав' хан!

Нарэй мальця ңани' тарем' ма:

- Тунгусо" сюдбя, тю"уня' ңа". Тахабя хан!

Пон' нись мы" сейди' сябу' ханзадо' ед' ютыни'. Сэвади' то' сэртрев хая". Гэри' маханяку харцаяха'. Ңэсы' тер" тодо' яха" хая". Харто' яха" ямдэйд". Ңобкана мюсярць масярка ңэя. Тэкоцядамдо' ми"ңани'.

Няхани мадм':

- Нарэй мальця, харт мюсебцун. Та' ед' пэрэлт. Ҥоб" ядэръями мань таня. Ҥоб" ңу"ни хара тамна таня.

Едава" ңамава". Ҥэдалэйв". Нердани ня' пэдарата яха нярхалъй'. Яха' танабця саля' ниня Лары' сядота' мята тамна палавы. Манзь ханада:

- Понарка' янгун. Няхар" по хая. Ламдик Ларар яханда хаясь.

Мань няни' мась:

- Сит тики яхад ханая.

Ҥоб" по' таня илени'. Ларыко"я хасава нюм' хо. Мале сян ялям' мэсо"махадани' ямда пями'. Мюсенахани' недам' хони'. Тикахав Нарэй мальця' неда ңэвы. Танянанда ңэсовы. Мя"ми' няби мя"аңэ мярами. Сян яля' мин"махадана" ңани' ямдэйна". Тад хэбяна" сыра' ямбан' мюсева". Ҥамгэ' пирка"на, нерна" ня' няхар" тэта Нохо' мядодо' ңадимя". Мядо" хэувуна нултава". Няхар" тэта Нохо сингандя ңамдёвы". Тале, харто' помнандо' лаханакурңа":

- Сэр" Я' ңацекэ сяханя хаңгоса. Я' сяр' ниня сите хадавнада харта янгу. Тики' хавна саю' вадавым' ңарка нямда ховы. Тедахав' сидя' сава нява" товэхэ". Няна" харвана" саю" янгода".

Мядона" мярава". Таддикахавад илевари сер". Сэр" Я' ңацекэ' нюдя ңарма. Сидя явна хаяхя'. Нюдя тыда мэ"ла. Илебям' пэртяңэ хая. Ҥари" пыда Сэр" ңо' ерваңэ хая.

Та' валакада.

Вади", вади" хари хамэди"

¹ Латани таборт хось я"мадм' - нюдамда хось я"ма.

² Са"ен' са"лемядм' - тэри мэнэханда, серципой" ядэртэханда пэдэй", са"лемя.

37. Вэвако Сусой

Сэва"ни тяхад няхар" Мандо"я си"ми вадавы". Няхар" Мандо"я няхар" ю" Мандодо'.

Таңони, сырени варехэ"ни мадабин. Маяндорць иледм'. Ҕоворпа"ни паравы пирцим'¹, тоховы лэдым' Ҕоворцетыдм². Няхар" ю" Мандо си"ми пяхана мадембасеты".

Ся"ны үэбта үод" няхар" Мандо"я үобг' үамдавыд". Ңарка Мандо манзь ханада:

- Тюку ялява" хури' саванё", Вэвако Сусой тыда хо"ңая.

Тикани мань тыни хо"манзь хаядм'. Инзелеб"нани пуни' үяюмд тарем' мамонондо':

- Вэвако Сусой ханзер" хая, Ҕавортада яңгу ханзер" үарма? Тарси" лэмда вадада. Хадаб" сава үэдараха, пуна тамна сахамда. Маня" ялахана вунива" пират. Нядмаңэ Сэв Сэр" сюдбям' хонрабана" тара. Теда' тюку яля' ямдаба"на" сава үэдараха.

Ет' ты"ни сарпя' мюмня тэри ядадм'. Тарця вади намда ими үули" вома. Тыни пон' ма"ламбин. Сюрико тыни мяк" яноць тэврэйн. Ңарка Мандо"я манзь ханада:

- Нер' мадамзянё" тыд мерку' тэвраид. Сыркар", нумда пэвсюмзь пяда. Хуркари үэя, несэй яхад ядэрьидм'.

Ңари" мань тики яхана мунм' нидм' соя"³. Мандор үани' масынё":

- Теда' тюку пи' тэхэнат еб"нанд сава үэдараха. Хуняна ямдангуна", тыд мер' таид.

Парадавы пирцими ңамадм', лэдэми тоходм', тэхэ"ни хаядм'. Мэта панэми няра, мальцами ңадсуй. Тарем' ты' варахана мэнахани ңули" ханимядм'. Хоркыдрев' сыра' ванғам' сабкадм, тикан' хонэйв". Хонаравэв", сыра' ванған' та' тоховэдм". Тад юркавани, тарем' сырпа"ни' тыни' ңаха"на хэвы". Ңопой сарпян' ты" ха"амвыд"⁴. Тыни танякуна ма"лэйн, мякандо' танэйн. Мяд" мале ха"амвыд". Си"ми ңатеняхандо' ху' ялёвы". Пон' нись мы" хабтодо' мюдахато' пуйда". Мюд" манзада". Пи' ямбан' мюсева". Тарць" ямбахана мань ядари пэрнав. Ты" пуняна танырнадм'. Ты ңэри' пэръян. Ты" ңэбто' ёльце танета. Мюсенахана" яляда ялэма. Тамна яля' ямбан' мюсева". Тарем' ты" пумна сюрамбадахани нерня' сулмыв". Неда' мюня та' хаидм'. Тикамбони' хэ"мяхад ңани' яльяв". Тарем' сырпа"ни; нерни' няна мяд' ңэсовы". Мяк" тэвыв". Мят' мятюдм'. Ңарка Мандо"я' пухуця манзь ханада:

- Едава" ханзе. Мэр ти.

Паравы пирцими, тоховы лэдыми ңамъян. Пелей' няны вэно" юдерт' хонэйв"⁵.

Хуняна тыни ңани' тэврэйн. Мяд' ямдэйд". Ңарка Мандо"я ңани' тарем' ма:

- Ңани' ядаин. Терсяда ханава" яңгу.

Мюд" манзада". Си"ив яля' тедахав' мюсе". Тики' ямбахана сян' хан' ни' тиб"нани' си"ми ян' мосеты". Тарем' сюрамбадахани ңани' выдарадм'. Нерня' сулмыв" сэв" талкадавы"⁶.

Сэвани ңадимзь мяд' мюня юседавэдм'. Мяд' няби хэважана няхарто' ңэвы: вэсако, пухуцяда, не нюда. Не нюда ңаркарка ңэвы. Не сядо"мы. Тяханяна няхар" ңацекы хасава. Вэсако си"ми манзабта, ма"нив":

- Еванзадаков, юрка манэт. Ңаворць ңамдад'. Ңопой теда' ңокавна нён ңавор".

Ңаворо"махадани ңани' хонэйв". Сянанд' - хунат' хонёба"ни ңод" немами хэвы. Ңамда пяв. Мяд' тер" ңавормы". Си"ми хонара":

- Хибян ңэбат? Ханзер" тарем' еремян? Ҥари" мань нися вэсакодм'.

- Мань си"ми тэри Вэвако Сусойвана пэрцеты'. Ҥяхар" Мандохона иледамзь.

- Тикыд ңылека", пыдо' ңавнандо' тэсявы", ненэцие" ты ма-ро"мидо". Маня" неданда" мюмня мюсеваць. Тикахад сит ховаць. Ян' сит тебармыць. Сит илебте"мява" ти.

Си"ивахава' яля' толими вэнгаль⁷. Си"ив' ңэсоңгана юрка пяв. Нися вэсакова" манзь ханада:

- Теда', хэвэхэр мань не нюми. Тяханяңы" хасава" нюни. Ҥари" теда' маня" ҥяхар" Мандом' хадаванзь миңава".

Ҥяхар" хасава тыдо' тэвара". Ҥока тэдо' яңговы ҥяхар" ю" тэридо' ңэвы. Ембасо"махад пин' тарпыв". Ҥаябадаңэ тым' хадавы". Ҥамзами мимба ты' ибэй вэям' ңамадм'. Пэвсюмя' няна едава" ңамава". Хонавана" нерня нися вэсакова" ма:

- Теда' хона тара, неда тохода.

Хона пява". Тебтад⁸ няна юркына". Едм' пэрҗава". Ҥаворць малейна". Вэсако' ҥяхар" ню мяд' няби хэвахана харто' иле". Нися вэсакова" ма"нив":

- Теда' тюку яля' маня" тюб"на" сава ңэдараха. Вэвако Сусой не нюми неданд мэнгоданакэр?

Ҥаворць ңамдына". Ҥарка"я нем' хэвахани ңабтадо". Ҥамгэ ңавормава" мале"мяхадана" хона пяв. Си"ивахав яля' толими вэнгаль. Си"ив' ңэсоңгана ңамзами мив. Хубта' няна манзь ханав:

- Ҥарка"я не, тудава" тумая.

Ед ханя пи". Едава" ңамава". Нися вэсакова" манзь ханада:

- Ҥяхар" Мандо"я нерцякабтавы". Недандо' ибэй⁹ ңэдан' хадавы" ңэя".

Ембтолавыд". Нися вэсакова" есям' сера¹⁰. Панаси есяда нянанда ңули" та мась.

- Не ңацекы, нянд еся панэд мис"?

Мань тарем' мадм':

- Нянани еся ни тара". Тикаханда ңэя.

- Няхар" хасава, тыда" хокарнада". Ханзер" ңэнгуда": тэхэ" харвасетыданё". Хо"оманда мынгав' пуна яңгода¹¹. Ты' ңавараң тарана. Тына" пуня' марпа"на" сававна илелтына". Не ңацекы, ңараканда еся ңында тахар".

Ңынм' ханя та". Мань тарем' мадм':

- Тарця ңынам' мэкаваб"ни ся"ня хаңгудм'.

Нися вэсакова" тет парисе"э хабтм' подерңа.

Нися вэсако ңани' маси":

- Не ңацекы, тет ябта сэр" тыд таняченё".

Тет ябта сэрм' подер" нинав'. Нини ңод" ханодо' подерңа". Мале"мяхадана" манзабта" нивам'. Си"ив яляхав' пиняри' миңава". Нердана" ня' няхар" юд" мядм' манэ"ңава". Мядо' нё няңы хэван' маня" нултава". Мядото' сиңганя Мандо' ңамдёвы". Ңобо' манзеты":

- Нена" хаванё". Ңылека" товы".

Ңоб" марнаңэ хая. Ңэсы' тер" ңынодо' пида". Маня" ңод" ңынона" мэва". Нися сюдбява" ңынамда нэкалңа, тёрда лэрха:

- Няхар' Мандо"я теда' еремядада". Тына" ханадаци", тахабя хада"!

Енда пенды". Ңарка Мандо"я нита тяха' сакада. Нися вэсакона" муңгада сёбта¹². Ңарка Мандо"я манзь ханада:

- Еданд терад ңули' татадм'¹³.

Нися вэсакова" ма:

- Хавар тара. Едана" терахавад пуна тарем' ңод" ханяңгува"ма.

Ңарка Мандо"я мань няюни саңода ха"мы". Няхата масынё":

- Такы са"лахав хадавы ңэя!

Ңани' енелыд". Нися вэсакова" ңоб" тубка' лембям' ен' ни' мовы. Енада хэндрев' пенды"¹⁴. Няхар" ю" ңацекэм' мал' хадэйна". Ңарка Мандо"я лыруць санарңа: ңобо" манзеты:

- Ңылека" танявы". Тарси" хава". Ханяд ңадимя"? Тад ңо" ңэсь ңо" ңоб' ни" ңадю". Тарця ниня ңадяди пираць нин тоса". Ханява" ха".

Маня" яля' ед' едембива". Сэвадо' пэсьда" сыраць я"амадо'. Мал еся ңынани ни' ңоб' ёхоте"эм"¹⁵ модм'. Ңарка Мандо"я ик' сэхэрт тидахалев. Енами тёрей"¹⁶. Ңэвада санэй". Ңоб" тубка лембям' ен' ни' ңани' модм'. Ёнэ Мандо"я' ңэвада санэй". Ңэванда мандалюй"я сыра' ни' ха"мы". Няхаромдэй' ңоб" тубка' лембям' ңани' ен' ни' модм'. Мал' еся ңын хэнд-рев' пенды". Нюдя Мандо"я' ңэвада санэй". Тубка' лембя' ни-ни тюпине хая. Няхар" Мандо"ям' мал' хадэйн. Тад сылыв", няхар" нями, нися вэсакондо' ня' ңаха"на хавы". Тадахава' ңухуна сярда вэнм' нидм' хae". Мандо' няхар" не" ңули" ңацекы". Пудандо' нёраку"лын. Тэва"махадани пыдо' тарем' ма":

- Ңули" ябтъен сидна" нён хада". Та' мальңгана нянд тале ңамзи тасетыва"нё". Пибит си сэдасетыва"нё". Маня" пыдар нябакуд.

Маня" тетаңэ тына" танэйна". Мятава" ханава". Хавы ни-на" хано" мю' пэнъяна". Ңоб" мю' хаява". Ңэсо пява". Ху-няңы яля' ңаха"ни мадм':

- Теда' тюку яля' ни"ни хальмер мякандо' ханаңгудм'.

Ңэдалёвани сер' вэнолэйв". Си"ив ты хано¹⁷ си"ми' нё-далмы". Ханани' ябцохона мале товы". Пон' нись мы", нися вэсакони нюм' вадана ханани' мюд ян' нэкалнадо'. Та' хаере-до'. Тикамдо' ңаво"махадандо' пумнани ңани' нэкалңадо'. Тыни' я"авла харебахава харебин, пудани ңани' си"ми тэва". Вэсако' няхар" нюм' тарем' мал' ңамъядо'. Ңэдалёдахани ну-ми ялэма. Няхар" ты ханохов хаеревыдо', ңаворць хай". Тет сюдбями¹⁸ пумнани си"ми тамна нёда". Тет ты хано нися вэ-саком' тэва пядо'. Мяд' хэван' тэвахава тёре пяв:

- Ханяна хаяди'. Теда' еремядм'!

Пухуця яңгацямда мине няни сюрамби. Тёреванда сер' тет ты хано тэри та' юху". Нултав. Манзь ханав:

- Няхар" ты хано няхар" нями ңамаць. Няхар" Мандоховм' хадэйнаць.

Пухуця масынё":

- Няхар" ты хано хумбанзи' мэ". Няхар" хасавам' сяха' ңамдыдо'. Не ңацекы, нисяр мят' илад.

Нарка''я не нисямда мят' илада. Мякана нямди' сидя мэхэйхата петеңади'. Вэсако ңамда пяда. Тарем' ма"нив":

- Хонаравэва"нё".

- Вунясян хонара", ха" нисянав'.

- Няхар" Мандо"ям' ханымна ханэйна"?

- Мал' хадэйнаць. Ңопой няхар" нями, няхар" ты хано ңамъядонзь.

- Таня ңэя", пилибт" нидо' ңамд".

Таня илева". Вэсако масынё":

- Няхар" хасавам' няхар" не харто татыдо'. Мат" сюдбяр тюку явна харто' ңадимда". Няна" харваванда тедахав' хыбяхарт яңгу.

Тамна няхар" яля' маня" илева". Навэ" пирка"на харасядахад няхар" ямб мюд нихибтэйд". Мюд' пумна ты" миңа". Самбляңг ёнар" лохорта' то"олха"²⁰. Ты" пуна вэсако' ню" танырмы". Тарць манэць вэсакохо' тарем' маңаха':

- Тюку нява" сава иланд' сидна" тэвара.

Тикандо' мюддо' ңэда"нё". Няхар" не мядодо' мяра". Няхаркав по' илевари сер".

Тетимдей пом', пова" пява". Сырэй" ңэвы". Харасяда ян' вэн' тёрейд". Вэсако масынё":

- Ңамгэ тобта?

Тарем' сырпа"на" тет ңэдалёда. Тюкуехэбина" Няхар" Мандо"я. Нита пу' няңы Сэв Сэро' ерв. Вадо" хэварин' нултадо'. Ханодо' сяра", манзь ханадо':

- Ханяна хаяда"? Теда' еремяда"!

Не" масынё":

- Нена" хава"нё".

Емба"толына". Нися вэсакова" манзь ханада:

- Пухуця мадама, едава" пия.

Едана" пись, ңаворць пэйна". Таңга ңаворјава". Нися вэсакова" ма:

- - Савовна ңаворпа"на" тара. Тябихобто' харто' тюбцу".
Пихид ңобо" манзеты".
- Пин' тарпыда". Сейда" хэя".
- Маня" ңаворјава". Пыдара' ңод" ңаворман' нида" харва"?

Мале пон' пихиня мэ"махадандо", нита нерде Ңарка Мандо мяту. Нися вэсакова" ңавормана" сер' пыда тарем' ма:

- Ңарка Мандо"я хаванд нерня савовна ңавор".

Нумда пэвсюмзь мал' мяту". Тарць' харахана мань муми вуни таня". Ңарка Мандо"я сян' манзеты:

- Сяха' пёданғуга". Пон' ңаворјан. Мэдава" тахар".

Мякана" товы" ңавормадавэй" ңамды". Маня" мума" ңоб' яңгу. Ңарка Мандо"я ңынамда нинмянда ниня ня"амбида. Тарем' ңамдёдахана" нума" ялэма. Нё' няю' вэн" тёрейд". Ңоб" ңэдалёда. Вадо' пыян' нултада. Пыда си"имананда лаханаковонда²¹:

- Мядонда" танявы". Хибя" ңэбто"?

Мят' яда. Минюй сырал' пулы" пирувна нензalamбida²². Мят' мяту. Хасава" ембадёвы": мэта паныда пе' ңар няравахад сертавы" ңэвү". Лэрё санэй". Нём' ңани' нэда. Мятю. Маня" мума" яңгу. Нууванда сер' вахальй":

- Сидда" нидм' тасла": ңанида" ңаворја", ңанида" ңынасавэй" ңамды".

Маня" тарем' мава":

- Савовна иленява" нива" ңа". Маня" теданди' пёдувдава".

Пыда тарем' ма:

- Мань си"ми Ңарка Пяся" ңэ пэрцеты".

- Мань ңод' Ңарка Мандодм', тайкуй ңамдёдам' маня" вадаваць. Ниня тосанахана" сидна" хадаць. Ңадъяна" тюкон' товаць. Хавэваць. Сидна" Сэв Сэро" ерв илебтесь. Няхар" Мандова", ңопойва' Сэв Сэро" ерв ти мэна.

- Тарцяда" ңэвэда". Теда' нини хотадм'.
 - Ихинян мадм':
 - Нямэхэна ңоб' нивын пя". Тедахав' тикид ңылека".
 - Намгэ' пирка"на неры хэвы нява" нултавонда. Ҥарка Пяся" ханода сяра. Мяд' няю' тёрам' ңэдара:
 - Няхар" Мандо"я ханяна хаяда"? Хабта" сава ңэдараха.
 - Пин' санэйд". Мяд' си' няна хуб"надо' ңадимя. Ҥарка Сэв Сэро" ерв ңэта ни' санэй". Мань тарем' мадм':
 - Ханя' хаян? Са"лан ңэвэн!
 - Нобт' пёльяни'. Пихиня хаяни'. Сэв Сэро" ерв тад ңо" са"мы. Мяд' мюня' тёребтейв":
 - Не ңацекы, ханяна хаян? Харап тахар".
 - Харам' ханя та". Сэв Сэро" ервам' ңылани та' лясабтав. Сэвата сихид хар' ерав. Сидя сэвамда тюхулңахаюн, сепани мю' мэнжалаюн. Ханда ня' питарңав. Сэвасипой" яханда ңэдарами'. Нянда ма"ни":
 - Яханд хань". Маня" яхана" сян' нён ту".
 - Ҥарка Пяся" Ҥарка Мандо"ям' пыда ня"амбавэда. Ҥарка Мандо"ям' ня"маванзь маханда нямна хаядм'. Ня"ма пяв. Ҥарка Пяся" ма"нив":
 - Вэвако Сусой хасенахаркар", хар"н пирдаленгув.
 - Си"ивахав яля' ңопой хуб"надо'. Инзелеб"нани Ҥарка Пяся" Ҥарка Мандомда ңыланда мовоонда. Ҥани' сидя Пяся" сидя Мандом' пэрңаха'. Пэртиди' хадэйди'. Ҥэвдо' ңани' илелмонгадандо' сябу" няртак' сярыдо²³. Няхар" яля' ңэсонгана сярди" ңэва" манзара ңэвадэйд'. Мань тарем' мадм':
 - Няхар" Пяся" теда' си"ми илбтеда"ма няхар" нябакоми нянда" татадм'. Ҥоб" ёнар" тэдамда" таидм'.
 - Тикандо' вэсако' няхар" ню тыдо' хо"ңа". Тыдо' тэварэйдо'. Ты" поңгад ңайта тым' тэрава". Тэва" ңаябадава". Няхар" Пяся" харто' мякана иле". Тодо' пухуцидо'. Ялэ" ямбахана маня" ңоб" хан' ниня ңамдёсетьва". Си"ив' ңэсонгана манзь ханав:

- Няхар" няв, яханда" хэбянда" ёльцяңэ хэняраха. Яханда" хаяда". Няхар" Мандо' не, мядода" ха"амыдамд".

Ты" ханя" ту". Ханодо' подерпи". Тэдандо' ёнар" тым' ныкалңадм'. Мюд" манзада". Сэван' тяхама". Нина" хэ"мяхад маня" ңоб" ялям' мэ"ңава". Неда' хэ"мя" мюмня ңоб" ңэдалёда. Тикахав Ңарка Пяся" ңэвы. Пуня' товы, пыда тарем' ма:

- Вадами таня, нянтел сава ңэвы²⁴. Яхани тобат сава ңэбтав' ?

- Яр хубта ңэдакы? Нися вэсакоми хонарайдм'.

Нися вэсакоми манзь ханада:

- Тикахав харт серцевэн: харвабат ханас", харвабат тур". Харт мяцавэн, тэсавэн тикахавахад ңамгэ тара. Ңобкана хаяда".

Вэсако' не ню мята ха"авра. Мята сиди"мана ңарка"я не сидямбой хая. Мюдна" пуйдава" пили" манзадава". Тад мюсельмана" ңэсовахана" ңэсосетыва", ямдавахана" ямдасетына". Техэ мюдна" тахав' тэвэйна". Тедахав' ңобкана мюсева". Ңарка Пяся" ңудондасеты. Ңари" мань лаха ңэдалыдм'. Ихинян мадм':

- Пэртями янぐунё". Нултаб"ни сава ңэдараха.

Тарем' нунахани хэвахани Пясяд' не нябакоми тэвавы", янамбоковна пыда тарем' ма:

- Ңарка Пяся" пухуцянд е"эмня сит хадаван' харва.

Няхар" не нями мал' тарем' то". Мюд' ядахана сисьето' мара" екарана" тотрев' сюрико пуняна хаёстеты". Нита пуд вэсакона ню няни' то. Ма"нив":

- Теда' хавандан. Хуна манэт. Теда' ханар тад. Ңани' несэй тэдар подер". Мерку' паромбю". Савкар тад, сырахана сабад.

Савка"ями хан' ни' ңабтада. Ханами ңэдарада. Мань ңани' ханани тэд подерңадм'. Пухуцями ңани' ма:

- Сававна инзеле". Яха сэrm' ңоб" хана". Тю"у' яха' лаңг' ни' ңули" нён танаңг, пиняри' мий". Минанд ед' нем' манэтан. Не ңоб" нёя хань". Вадини валакадо'.

Тет ңарка хабтм' яха' сэр' мюмня пиня' харейн. Яха' сэrm' етри' минредм'. Ив ядэлы".

- Ханямна хэбто'?

Тад тю"у' танавани ңари" хэвахани ханами тэводанам' манэ"ңадм'. Ңарка Пяся" пыда тарем' мамононда:

- Тикахана мэвэннанё". Тамна терсяда савкахана си"ми нельтем- бавэннё". Сит хадаңгудм'!

Миё"мя минни ед' ңани' пидев. Сян' хареба"ни: тет ңарка хабт ңодьри' яда". Ңарка Пяся" санопада иням' сано"падараха²⁵. Ю" тибян' си"ми пилибт" тэва. Тет хабтами ңобт' мо"нэйд. Сюрба пяв. Пуни няд тёрда лэраха:

- Ңоб' нин хань". Тяха' мэд!

Намгэ, пирка"на тет хабтада ңани' мо"нэйд". Няхабида пуняна ңаха"на хаёвы". Пыдьеда ңод" си"ми пудани ңани' сюрамба пя. Сюрамбадахани тальбям'²⁶ еде"ңадм'. Ихинян мадм':

- Маси" санабцув".

Латадада юр" тибя. Тад санавани техэ яхани' ңуя ха"амыв". Пумнани Ңарка Пяся" ңани' санэй". Ңодь' ңамгэвна талтеда, ңыльняна тэррида хая. Сидя Пяся" лаха-наковонди':

- Нями' хадавэда. Тальбя' хоркэдён' тикан' хавы. Пыда пыхыдамда тедахав' ними' хонгу". Хуркари ңэя пуня' хэхэни'.

Нуми ялэма. Минни сер' ңани' яльяв". Нерни' няна хой танявы. Хой' ядахад пензя ха"амвы". Пензя' малахад не сан-эй". Пуданда пяв. Мань тарем' мадм':

- Нулахаркарт!

Пиняри' сюрамби. Ңавэ" пирка"на писяңэ тэмзы²⁷. Пися-кор пиняри' хунамби. Нёданахани яля пэвсюмя. Сюрамбадахани ялэмдата ңэва ңадимя. Хахая тэва ңули" я"мав. Нерни' няна ңоб" ңэва сохо. Нийда хэхэ" я ңэвы. Ихинян мадм':

- Сохो' ядан' тэваванда нерцю' хада тара. Нени ваде"мыти ңэдакы?

Нёрцю неми маси":

- Нем' хоб"нанд ңоб' хадад!

Сохो' ядан' тэвавада ңоб" тибяри хай. Тад санавани сохо' ядрин' та' ня"мав. Не мирбяханда ңани' ха"амы". Не сядо"мы. Вахальць пыда, пыда ма"нив":

- Си"ми хамзан? Тедахав' нянанд тутадм'.

Ирими ядэрна:

- Нена" хаданана нинё" ңа". Тад ңо' ңэсь ңо" ненё". Ханзер" мэнгув?

Вэсако' не ню сававна маси":

- Ңоб' хадад. Пуна вадами мадабат ханан ңэнгун. Пухуцяни вадавна ңэя.

Харами нэкалңадм'. Хорака' ванган' хар' матидев. Я тарабтэй". Савовна манэць, Ңарка Пяся' тикахав ңэвы. Пыда тарем' маси":

- Тахабя ва"мэн! Тю'уй тир' ни' сян' нидам' тут". Сэрер' ңыламна нют ню пяңгудм"²⁸.

Я' ңылана валэмда хая²⁹. Харасядахад тёр ялцяда. Вэсако' не ню тальня' сюрамби. Ядахани' тэвахава тарем' ма:

- Пэртэя нямд иле ня"лавэр ңэбат та' минанд хангунась. Тедахав' тарси" мэвэр. Сидя Пяся" пюлавэхэ' ңэяха'.

Тад яламани сидя сюрамба"мам' едтени'. Ядами нёдалңани'. Тарем' яданахани нерни' няна си"ив юр" мядм' манэ"ңани'. Мядо' хэван' тэвахава тёре пями':

- Сидя Пяся" ханяна хаяди' ?

Си"ив юр" тер' тад лэрёвандо' ңопой марнадо'. Ханахато' санэйд". Ңыно вырда". Маня" енелына". Пухуцяни тэваравы мал еся ңынм' тад ңэдаба"ни техэ яхато' лырартамбин³⁰. Вэсако' не ню, ңарка"я не ңани' енерна. Си"ив юр' тераха"на', ңацекэсавэй хаенами яңгу. Сидяри Пясядм' саналабтани'. Мань тарем' мадм':

- Ёнэй Пяся" е"яр тэвы".

Товандам' ңате нялида няңгари. Ңоб' тыбка лембям' иканда сэхэрт' ха"аврав. Ңэвада санэй". Сян' тики яханда ни тора". Нюдя Пясядам' ңани' пяв. Халцокэй ңэвы. Мэ"мада яханда муңгари тэберңа". Сибимдэйхана яноларавы" ңэвада санэй", тубка' лэмбя' ниня тюпине хая. Таддикахад ңухуд сярда вэнм' нини' хae". Ңарка Пясяд' пухуцям' хадани'. Ңахат нехэданда нюдя танявы, ңацекым' манэ"ңани". Ңэваханда тубка' сапав. Мантэна ңэвамда яхад ңани' ня"мада. Ңобтики яханда ңани' талкадтада. Си' нэ"мавна пин' санэй". Пухуцямى ңэхэданда варехэта ня"мада. Ңылани' мэми'. Харами нэкалңадм'. Хорака' сихид ерпюлав. Сян ерба"ни, итрев' ңоворңа³¹. Ңамгэ пирка"на ңыладани' тэри ё"ңами"³². Ңобо" мамононда:

- Ңобкав товахав' ңани' тутадм'. Вэвако Сусой вэсод лэтара".

- Нена" вэванинё" тедахав' хани'.

Пин' тарпыни'. Ты танэйни'. Мюсельяни'. Мюсевани сер' ты' иня' няю' саңоми хэвы. Миндани' ед' юр" ңэдалёда пэрнадо'. Няни тебе". Нито' нерня си"ив ңэдалёда ваць пэрнадо'. Ңэвахана миндядо' ңаркарка ңэвы: тет хабтада варехэто' яда". Юр" ңэдалёда нито' пуд' ңани' нуладо'. Мань тарем' мадм':

- Хыбяда" ңэдакэда"?

- Маня" си"ив Сюхунейва". Мань Ңарка Сюхунейдм'. Вэвако Сусойм' пүрңава".

- Тикахав мань. Ха"манзь пюра"?

- Сэв Сэро" ерв янэ"ми таня. Сэвада хаңась. Ма"нисяя":

- Сэвани тэвараид. Хуна мальңгана сэвани ханась. Сэвасипой' си"ми ңэдарась. Сэвасипой" илевахав тарси" вэва ңэвы.

- Сэвада нин тат". Нямда хадаңгу. Вадини нянда тарем' тэваран'.

Сюхуней маси":

- Сел, харт сел. Пуна вэва нёя ңа".

Юр" ңэдалёда индо' вэрда". Си"ив Сюхуней' хадридо' хая. Тики ярин' мя"ми' мярами'. Хуняңы яля' ңани' ямдэйни'. Нися вэсакона" мят' тэвыни'. Нися вэсако' ңахат мэсыта, ңобо" писяласеты": ңыхы", ңыхы". Манзь ханада:

- Нюхуюни' сяха' хангосаха'. Ниди' тэваравэхэ'. Пясядо хадавэхэ'. Тэдава" тавэхэ'.

Тет ңарка мятана" хая. Та' илельяна". Си"ивахава яля' толими вэнгалы. Сибимдей яляни пи' ерня ңэвани' е"ня лаханам' намдадм'. Пыда тарем' маси":

- Вэвако Сусой теда' еремян. Саць сахамэн. Си"ив Сюхуней сит хадаңгу".

Ихинян' мадм':

- Нена" хаванё"!

Макода' сивня ид' яракоми' мось пяв. Мяд' сарвам' муңг" мададо'. Яракони пумна сана пяв. Ханани ябцох" ңуя ха"амыв". Нарони ңылана ңынами янговы. Мал еся ңынасипой" ңамгэм' налангудм³³. Мань пумнани ңарка"я не нани' санавы". Муңг" пубтадо'. Хано' поё"мана сидани' нёра-ку"ла". Хано" хэвня' пилибт" сидани' тэвара". Мякэ тоета, мякэциета³⁴ харасяда ян' сюрба пями'. Мирв" вуни" таня", ет' пиняри' миңани'. Ңарка Сюхуней ваць пэрчада. Сюдбя ңынамда няр" тив" юталмэда. Сюдбя ңынамда няңгарць пяда. Ңэдана муңгада пайдэвнани ибця хая. Вэсако' не ню тин-дилавы". Манзь ханада:

- Маньди пирми.

Тюхуданда мань нэкалңав. Ңани' сюрбыни'. Си"ив яля' ңэсонгана Ңарка Сюхуней тынзя' хункана то. Мань тарем' мадм':

- Вэсако' не ню, тадебяхаван нинякэн ңа"? Сидани' нёдана тарси" нерцякабтёвы.

Ңарка"я не нув' няю' ңоб" тёребтей'. Сэр" яра' тумбэм³⁵ не ңадимде.

Пуня' марцянда нимня мирцяхбтеда. Тет ся" ямб нямда-ха' тэба. Пэ ся"ңэ яралэй". Ңэдалёдади яд" сер" манра хая".

Пэ сяд' тяхана пэдёди' мэйди'. Ҥарка Сюхуней тарем' мамонда:

- Вэвако Сусой нерцякабтёвэн. Тамна нин хань".

Си"ив Сюхуней, ҃ацекыто' ня' тикан' сюральяд". Идю" тодакы": пэ' сядм' хэрлбадо'. Мани' ҃ани' сюрбыни'. Сидани' пудани' ҃ани' пя". Си"ив яляхав' мани' сюрамбини'. ҃ани' выдара пями'. Си"ивимдей яля' пэвсюмгава Ҥарка Сюхуней сидани' не' мэта инян³⁶ тэва. Ҥарка"я не ҃ани' тёребтей". Ҥоб" ту' еся нумгад ха"мы". Марцянда нимня мирцядтеда. Тыта нямдаха" лакада, тунэ табцы". Ҥарка Сюхуней ҃опой' сярцевонда. Пэдёни' мэйни'. Инзелеб"нани' сыңгарё яңговонда. ҃ани' ет' яльяни'. Си"ив' яля' ҃есонгана ҃ани' мо"нэлыни'. Пэдёни' пэраць ҃амдёлабини' ха"ё поё' хун³⁷. Пухуциями тарем' маси":

- Теда' сит илебтедама, сит манэкадм': тадебян харобта ҃эдакэн.

Сюдабцаң э ҃эдахалав. Си"ив инганей тюковна нихабтэяд". Мань тарем' мадм':

- Сидани' яхани' тэварада".

Масито' ни' тийни'. Си"ив яля' сидани' минре". Си"ив' ҃есонгана выдaranакы", нултадо'. Ҥэдабтэйни'. Яхандо' хая". Тики' хэ"мяхад сыра' ямбан ядани'. Нердани' ня' няхар" ю" мя" ҃адимя". Мяк" нялодавасавэй' тахав' тэвыни'. Няхар" юд' тер" ҃эвадёвы". Мяд' си' няна мэвы". Няхар" ю" хасава ҃ысындо' ервотам', нямдо' ҃амдалмы". Вэсако манзь ханада:

- Нууда", ҃а' маядярти' ҃амгэри' хадкэ?

- Юр" Сюхуней, ҃ысындо' ервота си"ив Сюхуней сидна" хадаба пяць. Мани' сидяң э хунынинзь.

- Ҥари' мань Пучи вэсакодм'. Няхар" хасава нюми.

Ҥарка Пучи мят' тёрей":

- Едава" пия. Мядондаха' тоңаха'.

Ед ханя пи". Мят' тюва". Едава" ҃амава". Мани' ҃амгэ енармана ҃аворманани', сян мункэцям' няңгани' мони'. Тикахад Пучи' мят' илельяни'. Илевари сер".

Торикоковна сырода ха"мы". Ся"ны ңэбта ңод" тува" муно"монда³⁸. Туна" ңамгэда хадкэ? Тарцяда яңгуси". Ихинян мадм':

- Юр' Сюхуней нивня"ам' ту"? Малари' пунда вуни таня". Теда' вэсако хонара тара.

Мань тарем' мадм':

- Вэсако' не ню ладыбада серм' ехэртав³⁹?

Пучир масынё":

- Пухуця, пензярми хокар".

Вэсако' не ню симзы' паханд' ңамды". Пензерта ладада: нумгана, яхана хаенада яңгу. Тэлтаңгодада масынё":

- Нява" ңэдалёди хана. Мат" Сюхуней ңацекыто' ня хабэй няхандо' тебе". Тыта ңэва", пыда ңэвада лекавыд". Тарцям' манэць ңэвадо' ха"морңа". Пуня' хэвы". Ңарка Пясяд' ню то-вась хамэды. Ню нюсавэй' мал' ңопой мят' хо"яды". Ңули" нёйда" хонара".

Нёпой мят' мал' ма"лыва". Вэсако' не ню пензерта ңани' ладада, манзь ханада:

- Пясяд' ню нись ңадю' миңа. Тобта нёна" сим' нэнгу. Си"ми ня"маңгу.

- Хадона" варан' тэвы". Тына" мал' ха". Теда' тюкохона то.

Нёна" си харта ңэсохонда нэй".

Вэсако' не нюм' ня"амнакэда, не пихиня нюхала хэсь пяда. Пиня' миндяханда пухуцями ня"мав. Пучинд ңяхар" ню махани няд си"ми ңани' ня"ма". Пихиня хаява". Пясяд' ню' пармам' тахав манэ"ңав. Тедахав' пилийт" ня"мав. Тет яхад тетаңэ ня"мава". Ңамгэда ңэвана пи' тидараха. Ңяхар" яляхав' нена" пэрңава". Яля' пэвсюмзь ңыланы" мэва". Еся миравахавана хада выдарава". Мардамбари хадава". Та' малева". Пудана индакананда ма"нив":

- Тю"уй тир ни' сян' нидм' тут". Ныхара" ва"мы.

Пилийт" хасеръй".

"Пэртява" мале "мяхадана" тад сырҗава": неры хавы" ты" хадырьць нисярңа". Ңамгэхэрт хава яңгу.

Таня илева". Ңоб" сава яляхана мань тарем' мадм':

- Яни' хобацян' харбилыв".

Пучи вэсакоми маси":

- Тикахав харт сел: ханд" нинав'.

- Няхар" Пучир' нянани тоя". Няхар" не нями ңули" татын. Си"ми теда' нядадама, няхар" ёнар" тым' татадм'.

Мядиком' ханава". Ңоб" ёнар" тым' танава". Сянад' - хунат' мюсеба"на" ңод" яхана" тэвына". Нуултава". Тына" тамна ңокамы": ярха илебя. Нися вэсакова" тамна тангавы. Ңобо" манзеты:

- Сяханя ханғосаха'. Нядамди' тавэхэ'.

Няхар" Пучими тикандо' сенгга". Си"ив' ңэсоңгана манзь ханав:

- Няхар" янэ"ми яханда' пяңгоданакэр"? Няхар" не Сусой мядода" ха"аврада".

Няхар" ёнар" тым' ныкалңадм'. Тикандо' нини яхандо' нэкалңадо'. Яля' пэвсюмзь хона пява". Хубта' няна мань тарем' мадм':

- Тюку яля' ңадяда я"амна ңэдалёртадм'. Серо сертадами": Сэв Сэро" ерв' сэв хайредамзи".

Вэсако' не ню манзь ханада:

- Нядахаваданд вунидм' хаёд".

Ты" ханя" ту". Ханами подерць ңэдала пяв. Ханани вэня' не сакада. Сэв Сэро" ерв' я ё"лава вуни ңа". Нерни' няна ңоб" юр" мя". Мядо' сава ерня ңоб" ңарка мя". Ңэсындо' ервота' мя" ханя ңа". Мяд' сиңганя ңоб"ляри ңамдёда. Ңарка ңэвы' ябта мяд' лэтнэ харва. Хэзвувнанда хынарав. Пыда тарем' ма:

- Сэвасявахав вэва уэвы. Хыбян ңэдакэн? Ңари" мань ңавнахавани Сэв Сэро" ервадамзь. Вэвако Сусой сэвани тась нига харва". Сэвани танявы ңэхэваб" ңоб' хадаңгувась.

Мякад не ңадимя. Манзь ханада:

- Вабцодо' хамэдамба тара! Тикар Вэвако Сусой.

Пана"рүй есям' ня"амба няни яда. Вэсако' не ню есям' хэвня' ладада. Мань есям' нэкалџав, худуганзу' паңгабтав. Сидя не ңобт' ядаңаха'. Няби ма:

- Ңобкана илехэни', татынэ тараидм'.
- Тарем' ни ңа".

Пили" пёльяха'. Вэсако' не ню нямда ңыланда мэда. Сидя тарка хуңгом' вэрдада. Нямда та' хадада. Сэв Сэро" ерв няни санэй". Си"ив яля' мани' пёдани'. Си"ив' ңэсоңгана мань ңод" нями ңани' ңылани мов. Хорака' сихид хар' ерав. Сидя тарка хуңгом' ңани' нэкалџав. Сидя ңэва"ям' нянани' ханэйни'. Юр" Сэв Сэрм' иле хаейни'. Няндо' мани':

- Тад нерня' нида" нёйда" хадабю". Вэвада" ңэбта" нини' ехэраңгу".

Мякани' ңэдалэйни'. Мякани' тэвыни'. Нися вэсакоми' ңобо" манзеты:

- Ңыхы", ңыхы", нюхуюни' ся"ня' хаңгосаха'.
- Тедахав' сидна" пыванда хыбяхарт янгу. Та' илельяна".

Малда ти.

Вади", вади" хари хамэди"

¹ Паравы пирци - ты' пирцим' (нянком') парадахая ңаворңада.

² Тоховы лым' ңаворңадм' - нита тоховы (ңавормы) лы ңаворңа.

³ Мунм' нидм' соя" - вадам' ни хэт", ңоб' мунзи.

⁴ Ҥопой сарпян' ты" ха"мавыд" - ңоб" пумна ты" ңаха"на хэвы".

⁵ Вэно" юдерт' хонэйв" - вэно" поңгана, пелей' няна хоны.

⁶ Сэв" талкада" - ныхысяламзь мо"нэй", имда ё"ңа.

⁷ Си"ивахава' яля' толими' выңгалы - си"ив яля' хоны.

⁸ Тебтад' няна - хув' няна.

⁹ Есям' сера - еся паныда сера.

¹⁰ Ибэй неда - тоховдавэй неда.

- ¹¹ Хо"манда мыңгав пуна яңгода - пихид хамбада җавор (халя", нув' сармик", ханеда").
- ¹² Муңгада сёбта - ядабадаханда ни" тэв".
- ¹³ Еданд терад ңули" татадм' - тэдамд татадм'.
- ¹⁴ Хэндрев' пенды" - хэхө" мунлаха.
- ¹⁵ Ңоб" ёхоте"э - ңопой таркасавэй муңгм' мо.
- ¹⁶ Енами тёрей" - ңынахана енерңа, ңынанда ен муно"ңа.
- ¹⁷ Ты' хано - сармик.
- ¹⁸ Тет сюдбями - сармик ваде"ңа.
- ¹⁹ Мюд" нихибтэйд" - лакари' ңадимя".
- ²⁰ Самбляңг ёнар" лохорта' то"олаха" - муноць мер' миңа", сяйна".
- ²¹ Пыда' си"иманда лаханаковонда - харта инда сер' лаханаку.
- ²² Минюй сырал' пулы' пирувна нензalamбида - лэда ңарқа, саңговота ненэць' тарем' яда пэрңа.
- ²³ Ңэвадо' сябу' няртат' сярыдо' - ся"мэй сябун' сяравы сян' ни" илөңгү".
- ²⁴ Нянтел сава ңэвы - лахарёр сава ңэвы.
- ²⁵ Санопада иням' санопадараха - сита паромба тэвода.
- ²⁶ Тальбя - яха' ванг (хоркэдё).
- ²⁷ Тэмзась - писяңэ хая, несэй мирбям' мэ"ла.
- ²⁸ Сэрер' ңыламна нют ню пяңгудм' - Ңарка Пяся" ңаңэ хая, нюта ню я' ңылад ңавортыда.
- ²⁹ Я' ңылана валэмда хая - я' ңылана лахана хая.
- ³⁰ Техэ яхато' лырартамбин - ңопой муңгахана ңока" ере-берңа", мэ"мадо ядо' лырэйңэ ханңа.
- ³¹ Итарев' ңоворңа - ни ханг, ңамзида ңобт' тораңга".
- ³² Тэри ё"ңами - тэмзы", нись ңадю" хая, тадебя ңэвы.
- ³³ Ңамгэм' налаңгудм' - ңамгэм' мэнгудм'.
- ³⁴ Мякэця - мяканы мэта" пива".
- ³⁵ Тумбэ - тум' тюнеба мэта пэ.
- ³⁶ Не' мэта инян' тэва - хахая то, не' мэта иня' пирувна сидди' тэва.
- ³⁷ Ха"ё поё" хун - ныланабити' пой ңули" хахай".
- ³⁸ Тува" муно"монда - Ту муно"ма ңамгэхэв вэва серм' пэрңа.
- ³⁹ Ладыбада серм' ехэртав' - пензеретанан ңэбтав'.

38. Харючи Вэсако

Харючи Вэсако нисями таня. Небями таня. Недко папами ңани' таня" нив'. Ңоб" таханава" - Тысья ңацекэ. Ңари" тайкуна Харючи' Ңарка ню нями танявионда. Ңоб" таханада - Лэхэ ңацекы. Тамна тяхакуна Харючи' Ёнэй нями танявионда. Ңоб" таханада - Вэ"ли ңацекэда. Няхар" ңэсихына няхар" ю" ёнар" тэва" ңэ" нив'. Ңэсина" ңацекы" няхар" ю" хасава.

Няхар" по' илева". Ңавэ" таняхуна мань тарем' мадм':

- Тысья ңацекэ сидя ңэсихы' нид хокаркар", ңацекэсавэй мал' тэваран".

Пон' нись мы", сидя ңэсы' тер" тикандо' то"нё". Мят' хая" тю". Ңамгэ' пирка"на харасядада ян' вэн" тёрейд". Тарем' сырпа"ни ңока" ңэдалёда" итрев' хамдома". Нита нерденя Тавысо" Сюдбя. Тад нянда пуй Марьико" Сюдбя не' тэмдавэда. Пин' тарпыв". Мэта хан' ни' ңамдотанахани, хэвамбовани нулта" нидом". Мань тарем' мадм':

- Хибяда" ңэбта"?

Нита нерденя манзь ханада:

- Ңари маньзяван Тавысо" Сюдбям' тэри нюбе"ңав. Хэвэхэми нями Марьико" Сюдбя.

Ңани' вахальяв":

- Ху', пэрчара"?

Тавы" ванёбтей":

- Харючи' Няхар" ню' ян' пэрчава". Ңоб" не нядо' мирие" хэбилие"ма, ңэв" салаво"ма ңэрахавонода. Пүнине" мядона" маня" хоб"нам"?

Мань џани' мадм':

- Пюнида" хойда".

Тавы" џани' ма:

- Ңоб" не нямда", ныхы матакана маня" ханаңгува".

Нари" тайкуй Марьико" Сюдбя ныхында е"эмня не' тэмдавэми.

Мань тарем' мадм':

- Ңоб" не нява" мирквавнанда сянда вуни ңа". Тэри џабцата ныхыхававна няхар" не няни юбто' нидм' тат". Тысья џацекэ мялондит мэд" ня"мыбтахаркар".

Тахана хасава ңавэ" пирка"на сидя менаруйм' нюдерць џадимя. Хасев" уавортан' я' сид' ян' саңоми хэвы. Ңока ңэдалёди сэв сёбтыда. Нита нердэн Туңгосо" Сюдбя. Ңоб" тики вада", џани' нендувнээ товы". Ңамгэ' пирка"на џани' ңэдалёда" мядона" синда". Нита нердена Нюдя Хабт Пари. Ңаркарка ңэвы, техэ нумда хэв етэ едеворца.

Намгэ пирка"на Тавысо" Сюдбя манзь ханада:

- Нэкалта пяхана сит хоркадм': «Выдараб"нанд Ңоб" не-нямд мирици" ханаңгув.».

Мань џани' мадм':

- Вэ"ли џацекы тикар хор". Ет' ңэда nem' ханаван' харва".

Тет тыра' мяям' сидян' пяди'. Вэ"ли џацекы тад нэкалманда. Тавысо" Сюдбя' ңэваконда нимня сидя енядада выварць хаяха'. Туңгосо Сюдбя выдаравы нянда ңамдю"мян' ңамда пяда. Тад нэкалманди' Вэ"ли выдара. Вэ"ли ңамдю"мян' Лэхэ џацекы паромбадараха. Лэхэ' ңэва' нимня Туңгосо" Сюдбя сидя енядада выварць хаяха'. Тики нянда пуд Марьико" Сюдбя џани' выдара. Нюдя Хабт Пари' манзь ханада:

- Мань яханани ныхыни пирад хось я"мадм'. Ңарками ныхыми сеяць то"мами нив' ңа". Мань манэкав.

Лата пя' ядан' та' ңамда" ни"им'. Лэхэ џацекы нянда ядахана пан'ну' сянэрэхаха. Тад нэкалманди', Лэхэ џацекы сэргрэм' санэй".

Мань тарем' мадм':

- Тысъя ңацекы тикар хор". Недко папами ет ңэда не.

Тет тыра' мяним' сидя я' вэт вэнпюлади'. Хуюмгартахана ха"мандана яңгу. Наңэдя ялянди' вэнпю" нидим'. Та' ңэсоңгана Тысъя ңацекэ' сидя монзаңгада манзадальяха'. Ңамгэ пирка"на пилибт" санэй". Нюдя Хабт Пари манзь ханада:

- Харючи' Нюдя ню, сит хоркадм'. Выдараб"нанд ңоб не нямд мирци" ханаңгув.

Мань ңани' мадм':

- Ныхыхавахана няхар" не няни ңобто' нидм' тат". Миркавнандо' ңули" нин сяй".

Тарця' ядан' пили" намдыв". Нябири ңудами вэнгала" ни-дам'. Нями тарем' ма:

- Нён ңандесад". Ңопой ңудахана ңацекэ нидм' ңа".

Ңари' маньзяван мунм' нидм' соя". Нюдя Хабт Пари нидё тохобэ. Тад нэкалманда ңудани харахартм' нивы вэнгала". Тад нэкалмани сидя енядада ңэвакони нимня выварць хаяха'. Маханда латан' пикадаванода. Наңэдя ту"монда манарида леды". Та' ңэсоңгана пангарахава' тахав' юркы". Манзь ханада:

- Теда' харна" вэвава"ма. Хадарэйна"ма". Тына" ңэдкана".

Ңани' тарем' мадм':

- Ханеңгахабида нёйда" ңэдас".

Таңок" хасава" ханодо' ңэдыдо'. Ханадо' нюдерць неры то"мандо' мюмня яда пядо'. Харючи' сидя ню ңацекэсавэй ңани' хэ" ни"им". Та' ямбахана таня илева". Ңамгэ' пирка"на ңэрёй сырава ям' синдавы. Ңоб" ңэдалёда торахаванода. Тий-кахав ңэвы Харючи' Ңарка ню. Тики нянда пуд Харючи' Ёнэй ңани' то" нив'. Мят' тюңахама, недко папами едм' ханя пире". Харючи' Ңарка ню манзь ханада:

- Неңэй Лэхэй неми панэсялма. Лэхэ' ян' мань ямдаңгув".

Ңока тэхэната Лэхэ ңацекэми, нями хаёда.

Харючи' Ёнэй ңани' тарем' ма:

- Хурка мань ңод" ңока Вэ"ли ян' ңани' ямдаңгув". Вэ"ли ңацекәми тыда лэтамбаңгу.

Мань тарем' мадм':

- Тикахав хаяди'. Хурка мань ңод" луца' ңэва мирми ханаңгу" нидам'. Не няни' ня' ханданакэн'. Тысья ңацекэ нями хаёда. Тюку мякавами' хаёдава. Несэй мятами' сертаңгунима. Тысья ңацекэ, не няни' мюд харво" панго' нимня нэхэдахаркарт.

Пон' нись мы", ңока тына" то". Ёрколавама". Тысья ңацекэ не няни' мюдм' ялари' падвы пуйда" нидав'. Хурка мань ңод" тет падвым' тым' сярадм'. Маня" мюсельяна". Сыраны ямбан' хайхалами'. Ңоб" ңэсовами' нинякы ңа", мя"ми' палңани'. Хуняна мани' минани'. Мякана мэдм'. Ңамгэ' пирка"на вэн" тёрейд". Мань тарем' мадм':

- Пин' сыркар". Ңамгэ тоб"нанда?

Нями тарем' маси":

- Харасяхад ңоб" ңэдалёда. Мэта тэхэвада самбляңг матий.

Мань ңатев. Нём' тядэда. Ямбарка ңэвы. Муноцяңгабида нихиданда пере. Ямб Санэрэ"э ңэнгоданакы. Манзь ханада:

- Тюку яхана тарци' ненэцям' нијдм' хосету". Хыбян ңэбат?

Мань ңани' мадм':

- Сэвани тяхад Харючи' нюдя нюом' нюбе"ңав.

Ямб Санэрэ"э вэнсу письмана ңоб' лыхыдэй", манзь ханада:

- Я' вэнгогохона сит еримдедамню". Ңоб" не нямд ныхы' маткана мирци ханаңгув. Мань яханани ныхыни пирад хось я"мадм"!

Мань тарем' мадм':

- Маткававна ңоб" не нями ңули" нив тат". Мирквавнанда такы яхани тода ңэб"нанд, ханзели' ңэись. Сянда вуни ңа". Си' няңы хэвахани пыдар ңамдад", не ңацекы едаха" пия.

Ңани' вахальяв":

- Пинна едами хубта ңэдараха. Ңани ңаварава" яңгосав' ңамгэ"?

Недко папами сетьвар пэм' ханзонда няд тюхул" нидав'. Сидян' пями'. Ңамгэ пирка"на мани' ябильяни'. Ямб Санэрэ"э ңопой вадамда нянганда хода, ңобо" манзеты:

- Ңоб" не ńямд мирци" ханаңгув.

Мань манзетыдм':

- Ныхы' маткана мипадами ни' ңа".

Ңамгэ' пирка"на ниркавэдм' тоса". Ямб Санэрэ"э няби хавоцянд си"ми лад" нив'. Ненаха"ями париде то. Терсяда' тю' садахалав. Ид" ңэвэйда ян' сехэда". Ниркавэв ёльце". Пин' илав. Ханконда мю' та' хурав. Сехэрэнда мюмня парабта" нивав'. Хуняна ңани' ямдэйни'. Си"ив мюм' хаени'. Нерани' няна си"ив ю" мя". Си"ив Хардяңг мяд" ңэнгоданакы". Мядо" вар' ня' ңэсукулыв". Недко папами мята мярыбida. Ңарка Хардяңг тарем' мамонода:

- Тай' сырнада". Тарця ненэцям' тюку яхана нивэдм' манэс". Мядм' пэртяда хыбя ңэдакы. Недя ңэбтав'? Нядя ңэбтав'? Нена" мэбе"мы! Ңопойриңэ мята есебида. Нюдя Хардяңг нява" несисяяню". Няна" неңэ ёльце саванё"!

Та' ямбахана таня' илева". Няхар" юр" тэни' хадодо' яңга. Ңэрёй сырода торикаковна, сырода ха"амавы". Ңарка Хардяңг тарем' мамонода:

- Теда' тюку яля' ңарка хардаха" луца' ңэва мирма" ханаңгу" ни"ивам".

Ханодо' подерңа". Хуркаси" - хараси" хадандо' ңылама".

Сидя си"ив яля' сыңгарёдо' яңгу, ңамгэ' пирка"на торахаванодо'. Ңарка Хардяңг яберкавонода, тарем' мамонода:

- Тёняңы нява", Харючи' нюдя ню хунортакои нява" ңэвынё". Ямб Санэрэ"эм' хадарахавы, тики ненэць' парандахана ңарка"я ерв.

Тики харанда та' валакада. Ся"ны ңэбто' ңани' тарем' ма:

- Теда' тюку яля' луца' ңэва мирма" ңани' ханаңгуга". Харючи' нюдя ню' ядэртабтав'.

Мань ңани' мадм':

- Ядэрт" нидам'. Ехэрана ям' манэт" нидам'.

Си"ив Хардяңг тикандо' хаянё". Пин' тарпыв". Тет падвэми мань сярын. Сехэрэндо' мю' тэри ңамдыв". Яля ерманянда хад' хэньяраха. Си"ив Хардяңгм' пудандо' тэвын. Пон' нись мий", миндани ед' хэхэ' мядо' сарва" пилибт" ңадимя". Нув' няран' табцотанаrapha". Си"ив Хардяңг харад' лыруйм' нёраку"ла". Юрётадо' луца' мяд' хэварин' нулта" нидём'. Ик нярморе"э харданда мюд писянзь ңадимя. Си"ив Хардяңгм' мят' тюлейда. Хурка мань ңод мят' тюдама. Ямб толь' тяха' маня" ңамдына". Няхар" ямб яля' маня" ябева". Ңамгэ пирка"на нё' лабна" ңадимя". Сидя солдат пыди' тарем' маха':

- Харючи' нюдя ню ерв сит хаңа.

Тикири мингана тю"ури' пяв. Сидя солдат мань пыхыдами понганди' сюрңаха'. Тайна хунана" ерван' тэвына". Пыда тарем' ма:

- Харючи' нюдя ню Ямб Санэрэм"э хадарахавэн. Тарця ңэбтав'?

Мань тарем' мадм':

- Ненэсянда тарця! Харта вэвам' хада" нисядам'.

Ерв ңани' ма:

Ямб Санэрэ"э саць ңарка ерв. Харючи' нюдя нюом' лэтирида терва еся бочка' мю' тяха' ладара". Бочка' мю' си"ми лад" ни"им'. Индани ханацям' парэнжо" си"ңадо'. Сянат' - хунат' мэб"нани ңод", ңоб" лаханана тарем' мамонода:

- Харючи' нюдя ню маньзяв хаядм'. Ханзер" ңэнгун?

Мань тарем' мадм':

- Хурка мань ңод" вунидм' хаёд"!

Ноб" пары"ыв". Тар' яңэ мань хаядамнё". Парэ' сивана пин' тарпыв". Тики яхад ңахат миркани ңани' ха"мыв". Марад' нёхона тет падвэми тамна сяравы". Инями мэв. Ханямна мимами нив хамэдамбю". Яля' ерманянда, яля' хэхэва мядони ңадимя". Пой нутокани нултамахад тыни ңэдэйн. Ңавормаханани хара вуни таня". Мань хонэйв". Си"ивхав яля' толими

вэнгаль. Си"ив Хардяңг торахаванодо'. Нюдя Хардяңг яберкаванода. Тарем' мамонода:

- Теда' тедахав Харючина" нюм' еся бочкан' лад" нися вам'. Тики яханда лыда' хэдемда".

Мякы мякад Хардяңг" не ня тарпрахавонда. Тарем' мамонода:

- Харючи' нюдя ню җаха"на тось, мякананда мэ.

Нюдя Хардяңг җани' вахалмонда:

- Не җацекы ян' сиякан. Ся"ня тута.

Тикари' минанда тальняюна торахаванода. Ңуда' маханя' нём' тядэда. Няби җудахана пэмда ня"амбид. Ту' хэварин', лат' ни' җамды". Нердения терм' тю"у' нэкалңада. Ҙани' вабтада, пыда тарси" ма:

- Не янэ" җэ тикар хор".

Недко папами пиняку' паңгамий":

- Тики җаварамд вунив пэр". Ябе няңэ ва"ав ний няр хынибэй җэнгу.

Мань няюни пыхыдасавэй вэсы сюрахалъй". Тикари минда җэта ни' санэй". Нё пунда хаи.

Ҙамгэда җэвна парандахана" няхар" ханаңадм'. Ся"ны җэбто' ямданолына". Си"ив Хардяңг' не няндо' мюдм' харво" паңго" нимня нэхэда" нидём'. Маня" няхар" җэ хуркаси" - хараси" мюсельяна". Сиби ханенгани яво маторңава". Нерни няна юдмян" мяд". Тэта Тавысе" э җэнгоданакы". Вары мя" җэ, мя"ма" мярава". Ся"ны җэбто' Тэта Тавысе" э тарем' мамонода:

- Теда' тюку яля' җарка хардаха" ханд" нивам'.

Хара вуни' таня". Мал' хэбянодо'. Пон' нись мы" торахавонодо'. Тэта Тавысе" э яберахавонда, патекарманода:

- Харад' няна Нёр Тавысе" эм' нями ходамзь, нями тарем' мась:

- Тавысо" Сюдбя Харючи' яхана тэси" хаёвы. Тыда" мато" лабтавы. Ҙадябянда тюку" тенд' нява" янговы. Тики' хавна Харючи' нюдя ню Ямб Санэрэм" эм' хадарахавы.

Няби яляхана Тэта Тавысе"э пыда тарем' ма:

- Ҥарка Хардаха" ханд" ни"ивам'. Харючи' нюдя ню ядэртабтав'?

Мань ҃ани мадм':

- Ядэрт" нидам'. Ехэрана ям' манэтадама.

Тет падвэми ҃ани' подеръян. Хара вуни таня". Тайна хунана" юрётадо' луца' харад' хэван' ханона" сярава". Еся вад' мюня ҃об" ненадорка хан сяравы. Мэта тэхэвада сидя хабтарце"э. Ҥари" тарця тым' нивэдм' манэс". Тибити' ҃ыламна пя' Саля' ҃ади'. Харад' мюня ҃об" ненадорка ненэць' ҃амдёвэ. Нёр Тавысе"э ҃энгоданакы. Ипойм' пява". Ҥамгэ пирка"на сэв" сэйвы". Сэвани' ҃адимзь, еся бочкан' си"ми пакалмы". Нёр Тавысе"э тарем' мамонода:

- Тюку яханд' лыд хэдемда"! Хасяндар яр!

Тарем' лаханана нена" нерцькабты. Вадисей тырам' ҃эдара" нивав. Еся бочка' пусода тияд". Тики есь" пеля" луци хоб"нандо' ҃эвадо' санарџа". Мань тарем' мадм':

- Нёр Тавысе"э, пыдар нянанд харами яңгуси"! Ҥамгэр хадкэ?

Пыда ҃ани' ма:

- Ябилъ" явэв"! Сит хорпидм'! Хуна мальңгана тенева мя-нан хаця' ҃о" ҃эвэн. Хар"ни вэвадама. Сидя Хабтарце"эм тэхэюни' татадм'.

Тикири' минани' пин' тарпыни'. Сидя Хабтарце"эм' хан-кони пу' сярҹахаюда. Мякани хаядм'. Тэва"махадани си"ив сян ялям' екар мэпа"на", ся"ны ҃эбто' нё панувна Ялморе"э Сотэ"ям' тэри манэ"џав. Сотэ' ҃эва ни' сидя ҃эдалёдам' манэс" нидам'. Мэта тэхэбиди' сидя хабтарце"э. Нянда нерденя Нёр Тавысе"э. Няби ҃эдалёда Нёр Тунгосе"э, тарем' мамонода:

- Харючи' нюдя ню ҃амгэ хадайта таняди". Тэри ҃абцата манда" манзеты", няхар" мирбяды. Тай сыркар" - ҃об" мирбя-да ҃ок" ты" поңгы! Няби' мирбяды сингы' хан' ний ти

џамдёданё"! Няхаромдэй мирбяда мякнанда хоны! Тарць" харахана тюкори яхад салпани саванё"!

- Ет' салканима. Хадаита янгу!

Нёр Туңгосе"э џани' тарем' ма:

- Пыдар сидя хабтаркамд тэмд' ми"џанаси". Хурка мань ѡод" сидя хабтарками тэхэюни митадм'. Пыдар мяканд хэхэр".

Лаханавэюм' тальняю' пыда ѱэдалэй". Пон' нись мы" пой нутокани нултавонода. Тарем' мамонода.

- Хананд тэнэ сидя хабтарками ѱэдацахаюн. Хури' пяб"нанд саваха' ѱэгнхү'. Ибэй иканя нихи' табдёд"!

Мань тарем' мадм':

- Юр" Вэя Сэв' ян' мань пяб"нани', тыра' хэваңэ харваңгобтав'?

Нями тарем' ма:

- Ханядм' харва"!

Мят' ни тю", Нёр Туңгосе"э тикири яхад хэрахавонода. Ся"ны ѱэбта ямдонолына". Маня" мюсельяна". Пырдариов' сиби' ханенгани яво маторңава". Тайна хунана" яхана" тэвына". Нябитид' тэва, няхар" ѱэсы' нёридо' хоярңа". Нися вэсакоми пухуцянда ня' ва"авконди' нид нивэхэ' пунов. Тысья џацекэ' ха"ма вуни таня".

Хэвнякубта мя"ма" мярава". Таня илева". Ся"ны ѱэбта пиши - пишид ѱоб" ѱэ" мун" торахавонодо". Нём' тядэда. Текаехэвами Тысья' џацекэ мякы тоёта. Пыда тарем' маси":

- Яраха" саю" сидна" хадаць. Илевндијэ ян' валаками. Серм' пэртидо' ти" ѱэ" ни"им": Тавысо" Сюдбя, Марьико" Сюдбя, Туңгосо" Сюдбя, няби я' вэкы Вэя Сэв Нюдя, Тет Хабт Пари. Тад џанихив" си"ив я' тер". Няхар" по' ямбан' си"ми нёраку"џа".

Ся"ны ѱэбто' мань тарем' мадм':

- Няхар" ю" ёнар"ни едядо' сэя я"ма.

Тысья џацекэ пыда тарем' маси":

- Ҥари" маньзяван Ҋамгэм' мэннадм' Ҥули" нидм' Ҥа".
Хоёда- накэдм'.

Нёр Тунгосе"э' силя хабтарце"эм' подернахаюн. Недар-
ме"э' мюмня харенчаюн. Сянанд' - хунат' Ҥэдалёб"ни Ҥод",
Ити Ҥабтенями нерни' нямна пили" нярахалъй". Силя Хаб-
тарками ибэй ямд' пидахаюн. Тобти' Ҥыламна ити ханенга.
Си"ивахав яля' пиняри миңадм'. Ҥамгэ' пирка"на миндани ед'
Ҥоб" Ҥарка саля' харта яралэй". Саля' пыя' ниня Ҥоб" Ҥарка
мя". Мэтида ейда, явэ' хобат сэдавы Ҥэвы". Мят' тюдама. Вэ-
сако', пухуцяха' Ҥоб" ёхорт' ёхортавэхэ'. Пелей' няна няхали
хонёда. Вэсако масынё":

- Хуна манэцяда ненэць' Ҥэвэн. Хыбын Ҥэбат?

Мань Ҥани' мадм':

- Харючи' нюдя нюом' тэри нюбе"Ҥадм'. Пыдар хибын?

- Явэ" хоба еям' мань нюбе"Ҥадм'. Ху' пэрчар?

- Параңодахана" еся Ҥэва мирми хан"ладамзь. Мюсяртае-
хэни мядони хавы". Няхар" ю" ёнар" тыни пюладм'. Тыра'
хэваңэ тараңгобтав'?

Вэсако масынё":

- Ҥари" маньзяван Ҋамгэм' мэннадм' Ҥули" нидм' Ҥа".
Тяханяңы няхар" нюхувами ти" Ҥэ" ни"им'. Тосяда ханим'
хадаехарта тамна ехэра". Тад' Ҥо" Ҥэсь Ҥо" Вэя' Сэв' не ню не
нив' таня". Хабэй халъмер илебтембавонда. Нюдя Вэя Сэв
Ҥамгэхэрт мирван' хаңгана ни' Ҥа".

Пихи - пихиня Ҥоб" лаханана тарем' мамонода:

- Харючи' нюдя ню тарем' нулаңга тэводана ямд' сяха' тэ-
вар".

Нёр Тунгосе"э Ҥэрахаванода. Пин' тарпыв". Ҥамгэхэрт
яңгу. Салям' танда Ҥэдала" 'ни"ивам'. Сянанд' - хунат'
мимб"нани Ҥод", нерни' няна Ҥоб" Ҥарка мя". Ҥобтики вада.
Нёр Тунгосе"э Ҥани' тарем' ма:

- Харючи' нюдя ню тарем' нулаңга тэводана ямд' сяха' тэ-
вар.

Пин' тарпыв". Нёр Тавысе"э сидя хабтарканда иням' ня"амбida. Ңэдала" ниним'. Тарем' миндяхани' ты' вэ' няна Тет Хабт Пари' мяd" таня хai". Нердани' ня' юр" Вэя' Сэв' мяdodo' ңадимя". Юр" Вэя' Сэв пой ңутоканда Нюдя Вэя' Сэвм' нямдо' ңамдалмы". Нюдя Вэя' Сэв' ңамдёdi' еркад ик-да ямбума. Пыда тарем' ма:

- Ңысы' ңацекы" ңамгэм' ңатеда"? Харючи нюдя ню вэ-ямда тавы. Си"ив ңэсы' тер" нида" хо"карңада".

Ңамгэ пирка"на ханяд - таняд яраха" саю" ңа"ңо' пыяраха". Ненда" енана" нена" тебе". Мани' сидяңэ тад ңэдаба"ни", харад' нёдрев' лырартамбини'. Си"ивахав яля' енри" ха"ярңа". Ңаво" пирка"на Вэя' Сэв' ню манзъ ханада:

- Не ңацекы ханяна хаян. Тюкохо' са"монди".

Еркы ңарка мяd нё пехэбтэй". Мякы мяcad не Вэя' Сэвы' ңадимя. Вар мадавэмда ниси' тамда"пида. Нид' ядри нимда сярыбида. Маниенахани сидя я' понд' тэри та' юху. Нув' няби ядан' ңоб" ту морём' ңодь' хэдамңадм'.

Нани' си"ив яля' енри" ха"ярңа".

Си"ив ңэсонгана нув' няби ядан' саюми ха"мы". Нув' ядахана сидя еся нюня падвэ савним' ниринди' пявэди'. Таси' пяб"нанда сидя хэвахад сидя пыя' тю"у' илыбиди'. Нюдя Вэя' Сэвм' пулы' ядан' хамотанаханда сидя хэвахад тю"у' илади'. Мань хэвахани' сидя еся нюня' хадади' палъй". Няби еся ниня Тысья ңацекэ, няби еся ниня Недко папами. Падвэ савни - не Вэя' Сэвы неканда хэван' сюра ха"мы". Няда тарем' маси":

- Не ңацекы са"лан ңэвэн. Тю"уй ялян' харваенахани си"ми хадан!

Нани' сян яля' енри" ха"ярңа". Ңобо" ңэдаба"ни, яраха" саюв" техэ малахандо' лырартамбин. Ңаво" пирка"на ңэсохондо' суса". Ңоб"ляри сюдбям' санлабтава". Мань тарем' мадм':

- Вэя' Сэв ню пыдар нянанд харами яңгуси"? Ңамгэ сер' нид' мяdonи хадэйд?

Пыда тарем' ма:

- Ңули" ябтаен'! Туми хабтёда! Ңари" маньзяян' вунисядм' харва". Нюдя Хабт Пари няхар" по' ямбан' си"ми нялыбись. Ңоб" не нями' мирци татав!

Тарем' хыноданам' ңэвадалава". Ңавэва яхана" маня" мюсельяна". Ңоб" мюсевава" нинякы ңа", яв' сяд' ни' мядо' палңава". Ңавормана" сер' хэвыхы няни няюв' ңэвами ярэй":

- Нёр Туңгосе"э, ңани' тавандами мань янгу" нив', Не Вэя' Сэвым' ханаңгодакэн. Хэбянди' нерня ха"мава' явна хандадима. Манда" манзеты" Не Вэя' Сэвы' халмер илебтемби. Вадани пирда.

Яхана" пява". Тайна хунана яхана" тэвына". Няхар" юр" тер" ңацекэсавэй пивня санарңа". Не Вэя' Сэвы ненэся ңэвы, тадебя ңэвы. Та' илелъяна".

Та' малда.

39. Ңэ"ли Ңая тар"

Сэвани' тяхад няхар" Ңая тар", няхар" некав си"ми вадавы". Си"ив' хункана, яля' хункана Сюдбя вэсако ирив иле. Сюдбя' си"ив ню тидин таня" ни"им', Сюдбя' не ню няв танява. Ңари" маньзяван Ңэ"ли Ңая тарм' тэри нюбе"ңадм'. Мядома яляхана тидя" турцеты", нея тосеты. Няхар" неками ялэ" хонёсеты". Хоё няюмна пыдо' ханебато' ханесэхэвадо' илебця" ңэнгү", ненэця" ңэнгү". Яво' няю' ханлиб"нандо' ңарти хадасеты", няко ханецеты".

Ся"ны ңэбта ңод" няхар" Ңая тар" яля тюку яля' пыдо' ңэвадёвы". Хар"н ивняни пи' някумна ядэсумбидамнё", ңаво" пирка"на яв' маран' саңов хэвы. Нер" тяхакуна нивэв хамэда". Сюдбя' си"ив ню ю" тибя ңано теда' нултэй". Мят' тювахана хара вуни таня". Теда' тюку яля' Сюдби" не ня нея нивы ту". Ихинани мадм':

- Мядомари ңод" малда танява, ңани яляхана пыда тутнакэ. Наңэдя си"ивандо' тидя" мядоңа"нё".

Си"ив ңэсонгана такы мято' ня' хамекулыд", пыдо' тарем' ма":

- Пыдамбора" ңод" мядонзь турңада".

Няхар" Ңая тар" манзь ханадо':

- Ңа", тобцакэва".

Тикаринда ңод" Сюдбина" ңано ю" тибя ңано идм' лядапа хамб пудабта.

Тидин хэ"мяхад пон' нива" иле". Ңабцата ңод" няхар" неками ханериб"нандо' си"ив сян яля' пыдо' янгосеты". Теда' тюку яля' пон' нивы" хане". Ханени"ни ңаном' манэ"лихива

иками паңгаць Ҥэ"ли ңэбцахани нэкал" нивав'. Мань тэварись ңаркан' маран' пулм' вэнгала". Тарем' сырпа"ни Ҥяхар" некани җано пана"мы, ялриндо' хора", тики полихина сидя ябта Ҥацым' мань манэ"ңадм'.

Пыдъеди' ңод" сава мирбиди' ёць ңо" ё"мыди' хадри' ңэсь ңо" пон' нёдавэхэ' нер" ңэдакэхэ'. Ив ядэлы":

- Сюдбя вэсако ирин мэнэ лэтамбабани саваха' ңэвэхэ'.

Тикаринда ңод" манзь ханав:

- Сидя ябта Ҥацым' Сюдбя ирин ңуди" тернэ харваңхаюн.

Ҥарка неками, ҥарка ңэбцаханда пыда тарем' ма:

- Пиркавабат вэва вуни ңа".

Сидя ябта Ҥацым' сидя марцихат нэкалжаюн. Такы мя"лихини ңодри' тэвыв". Сидя ябта Ҥаць тарахалпананди' пя салараха', ненэсянда ңод" сацярка са"мэхэ'. Тики' тяхакуна тарця яебтэрг' мань пэрмэдм' вунсядм' ңа". Ҥавормахана хара вуни таня", теканда хонэйна".

Хуняңы яля' ҥяхар" неками тиди"н мят' мядоманзь хамеку"лавыд". Ҥабцата ңо" тики" тяхакуна хумна сырмэдм', сававна нисятивэв хамэда", си"ив тибя җано, Ҥая тари" җано яв' хухат мивы" ңэвы", матадм' лавта җано ңэривы.

Җано"я' мю' ханяна ти". Ҥяхар" нинеками, ҥяхар" Ҥая тар" тад нэкал"мандо' си"иво" хамб" нимня җано хынворңа. Мима' ямбахана җано' пыяхана сисёри" харулы". Тайна хунана" ханяна тэв".

Нултава", ҥяхар" Ҥая тар" сюдбя' си"ив ню' мядо" няю' пыдо' ханя" хань". Маньехэван ваңгари я"мана варцядтев. Сидя ябта Ҥаць нена" хэнамбихи'. Пыди' манзетыхы':

- Ҥая тар" то"олахан нена" нин ңа", мэтар яляхаван' ңули" харвани', сидани ңэдара".

Ив ядэлы", мань тарем' мадм':

- Пиркавабати' ңули" ңо" хаяди'.

Тикаринди' ңо" ваңгари я"мана пыди' сюрбаяха'.

Тайнани' хунанани' тёркосавэй" Сюдбя ирини мят' тюдамнё":

- Ирикэхэюн хадакэхэюн мэкоцядамди минредамзь, хади"ни поңгад ңэдараңахаюн, ңахакавахана ниванңгабяха' хань".

Ирихи', хадаха' нялиди' няңгары":

- Ханьевнов, ханьевнов, тедари' нюдякоцяен нинав' ңа", ханьевнар ңэдаработка".

Тикаринда ңод" Сюдбя вэсако пано" ңэсомана яңесь панэцида ти сяръяда, пирин' пяда. Тарпотаванда сер" мамбата масынё":

- Ңавнахавани си"ив яляхана хэвы тэвэрцетыдм', теда' хэвыкоехэва" ңамгэди' таня. Вадада пуда.

Неяни няна мань хаядамнё". Товами манэць нея май" ни"им":

- Еванзадаков ңарамгаявэн.

Едм' ханя пире". Ңавормани сер' неяв масынё":

- Еванзадаков, техэмд паңгамд пыдар вунир тенев". Ңая тарт пыдар нин ңа".

Ңавна хунанда Яво" тэта" танявы". Итя ңабтене"э' яв' хэвувна пили" мюсярмы". Тэхэвада тэдо' луца' ю" ёнар" ңэвы". Неда танявы, няхарм' потакода нанакода нюда, нюда танявы. Хэваханандо' сидя маңгабада Мандо илевэхэ'. Ңули" маңгабавэхэ'. Яв' тэтажаданди' подерпади мэцетавэхэ', ханяңхэна ңамзако ханя' ңа".

Ся"ны ңэбто ңод" Ңюдя Мандор некаханда тарем' мамы:

- Ңабцата ңод" тэтами хадахами, луца' ю" ёнар" мани' тыни' ңэнгу".

Нябир мамы ңэ" нив':

- Тэтами савасянё", ханя' хадаңгуми"?

Нюдя Мандор няхар" яля выктывы, няхар' ңэсоңгана яля' ңэсоңгана Ңарканд Мандонд хавода есьмакы" ма"нив":

- Ет' ңо" хадаңгодакэми.

Мандокохоюд пи' сава еркана мядм' талавэхэ', тэтанди' ңэва' ет' тойсумбавэхэ', сыңго яңговы, ңаво" пирка"на Яв' тэта' не вахальй":

- Тэтанди' пэнчада ханюй, ңаха"на хаясь.

Тарця вади намдахава пэвдя' помна хадом' сюртевэхэ'. Тэтанди' яд"мам' ханяди' ху". Итя ңабтене"э яв' няю' пилибт" пявлэда.

Тиканда сидя Мандор тайна хунанди' тэтамди' яв' маран' манэ"мэди', тамна мякы тоёставы. Сянанд' хунанд' нёдавакэди' ңани' ибэй ид' тяха' пилибт" ңэдарабтавэди'. Тамна тарем' мамэхэ':

- Ңудасяда и" харта хадаңгуда.

Тикахавахад сидя маңгабада луца ю" ёнарм' мяканди' танавыди', немда ханавэхэ'. Сыңгарё' сусамахад Яв' тэта я' няю хэвы, макананда нанакомда нюмдя тамна минармэда.

Нэрэй ңэвы", нумда ипикако, ханя' хаерако ңэвы. Яв' тэтар мара' ни' ханаараавы". Хане сарвоёрмандо' сер" няхар" Ңая тар" ховэдо' ңэ" нидом', та' хадавэдо'. Макаданда ңацекым' ховы". Ханя' мэkadako ңэвы. Няхар" Ңая тар" помнандо' тарем' мамы":

- Тюкохов нена" мэkadаконё", нядана" мэхэва", вадаңгу" ни"вам'.

Тики ңацекэця пыдар ңэ" нинав', сит вада"мадо' ти". Ңэ"ли Ңая тарм' ңадьбят нюбе"ңан. Сюдбя' не ню Нея падарм' пада, няни' тада мамбата масьнё":

- Сяхари' паранодан' тэвриб"нанд тюку падарм' ңадимдингунава, ёльце сававна лэтрамбъир. Нер" тоб"нанд сидя ябта Ңацьм' ңэдаранаси", тикэхэюд сидя маңгабада Мандохоют нюхү'. Тикэхэваха' серти' ңули" яңгу, мара" ңэдаравэхэюд, ир лата ңэвы. Яханд тэванан ңэбат сидя Мандомд ханзели' мэхэюн, тедахав' вэсэймахама ңод", ялэди' хая". Тыд, харт тыд тэхэбид мэн". Вади"ни валак". Тад нерня' си"ми ңани' нин хонгугу", нема юдэхэна нини' хомбахани'.

Пин' ңод" тарпангуваць, пихий пиҳид Сюдбя ирини' тёрм' намдорңадм'. Тикаринда ңод" мят' мялкада, сяканда манэць ирикэни сяд' вэясяда яда яңгу, паныта наңэдядо' яңгу. Манзь ханада:

- Нюкцияев мэдами' тавы, мань"ян ңэдараработаахаюн, ёхо пэдэйв". Тэваванзь ңод" мэнхаахаюнась, ханяд ңэбта ңод" есь" хадиңота Минлей ту" нив', тиканда ңод" ңамгэ сяндаахаюда ңэвэхэ', ңопой еңгам' танахалць ни тамбю". Си"ми ңоб" хаде"ңа. Илевани ямбан' ңабцата тарцям' нивэдм' манэцету", хадри' ңод" тад' нерня' ненэця' ню ңаворць нинакы серос".

Ирини вади тэри намдын, пирин' пяв. Няхар" Ңая тар", Сюдбя' си"ив ню яво" няю' ханеванзь пявэдо'. Сюдби" ңанон' тадди ңамдына".

Сянд' миндакэва" ңани' нердана" ет' парисе"э ңо нина" яралэй". Ян' нулта"махадана" Сюдбя' ңарка ню мамбата масьнё":

- Сеней минна" хонё"мява" яңгу" нив', теда' хонайтебана" сава ңэдарааха.

Нябид нямдо' тэри няндадо':

- Тарем' мамбат ңамгэда вэвади.

Таддикахад ю" Сюдбями тюдо' нароңоць манзелабтадо'. Маньехэван нема вуни харва". Я' тир' нимня ңодикоцимана вадрырңадм'. Ю" Сюдбяхавани ңарңоли" сябарңа".

Тарем' ядэртахани ңахакуна хэвэдм', ниркавэдм' тоса", махани' няд ңамгэни ңэса", си"ми ня"ам" ни"им". Тюкуехэбини хуна манэцяда" юр" солдат" тунири" сарку", манзь хананадо':

- Нинякыд ханяна мэ"?

Нись ңод" ман" вэва ңэ" нив, ет' ңо" табэдэйн. Сыртакохони нининди есјева ин" та' манонъядо'. Тикахавахад есја ңано' мю' пилибт" түлэйдо'. Мань си"иев ңани' тюле" ни"им". Хамэдамбаба"ни сидя' я' помана миндараахава"нё". Пон' нива" мий". Хадри' ңод" миндяд яхана" тэванакына", ңано"ява" нултаванонда. Няхабини юно' хано" мю тэри моё"ядо'. Мань-

ехэван си"ми сидя солдат паранода мят' си"ми тюлеңаха". Паранода"я няръяна толь', толь' тяхарина пыда ңамдёвы. Толь' хэварин' ханяв" ңамд". Няби сеп' мюд Сюдбя' не ню' неяни тавы падарми паранода' пыя' ңыл' та' мованё". Паранода"я толабадаханда сидя хайлада мунзи" хамыд". Манзь ханаңада":

- Тарця нями танясь. Еванзадаков, Яв' тэта' ню янд хоба-цин' пяңгодаиакэр. Тедахав' индат харт пирас" нирав". Такы яханаинд, янд вэвакоци харт судебан". Няхар" Ңая тар", Сюдбя" си"ив ню илева' ямбан' ңока сава нямдо' нямдо' маяда". Тики няхабид харто' вэва"ма, нид иёд сяй". Еванзадков вади"ни валак.

Сидя ябта Ңаць тыни пэртյңэ пыди' тараљъха'. Я' няю ңыхытана саля', саля' панҗрин' та' илельяна". Тарць' харахана хуркаси" маянзи" минзянд яхани' ханяв" тэв". Сидя Мандохов товани' иерцю' сейти' лы" маля хавэх'. Сидя ябта Ңацяхав тыни пэртյңэ та' тараљъха'.

Яв' няю ныхытана саля', саля' панҗарин' та' илельяна".

Та' малда.

40. Нядангы' не ню

Нинякав мась:

- Хуняңы яля' талараңгува". Похө' ханте"э тёням' талаңгува". Хурка пыдар ңод" ядэртанакэн.

Мань тарем' мадм':

- Тарця нюрцямңгад хибя хадёда. Ханядм' ту".

Тики вадини мэсо"махадани пирива" мадава".

Хуняңы яля' хонааркавэв". Хув' мерувна ңэвани' екад ңоб" лаханана лаханаванонда:

- Хонаарэйнанё". Маня" ёрколава".

Ңэ"ни ни' санэйв". Пин' тарпыв". Иняв ня"мадм'. Ңока" ңэдалёда" мале товы". Ханодо' хамэды". Хурка мань ңод" вад' ёркахад мат" ябта сэрг' тым' ня"мадм'. Мэта ханами подерпюлов. Вары пелейми подерпадахани' ңока" ңэдалёда" ңэдала" ни"идам". Хурка мань ңод" ханами подерць ңэдалёди" пумна ңэдала" ни"ивам'. Мат" ябта сэргни ханкони ни' ңамдавани сер' сёни ховэдм', харад ховэдм': ңхы" - ңхы" - ңхы".

Мат" ябта сэргни мэтидо' нямдодо' пыңгэй пяраха". Сид" хаво" ний" хэвананаrapha". Ңэб"нанда ңод" тет тибя хоми' няр" юталлив. Ңобо" манзетыдм':

- Ңыхы" - ңыхы" - ңыхы".

Ңока ңэдалёди ханян тэв". Нуулта" ни"ивам'. Хурка мань ңод" ңани' нултав. Тарем' сырпа"ни хано" вар' няна ңоб" хан сяры. Тет сэрг' мэ"мы. Намна"ам' ңамгэ"эм'. Панэццида пендуийяв' ңамгэв'. Тамнакоехэрт сэванда ялику" няни' ха"морңа".

Пон' нись ёа" нинякав ма:

- Похө" ханте"э тёням' талаңгува". Йули" тосада".

Мань тарем' мадм':

- Ненэй тёня' ню јэхэваб"нанда ханя' ханда.

Йэдала" ни"ивам'.

Наво" ирка"на тёр яльцяда:

- Тёняти тода!

Тарем' сырпа"ни тёня нявоты. Мань тарем' мадм':

- Ненэй тёня' ню јэхэваб"нанда ханя' ханда!

Мат" ябта сэрми тёркосавэй" тад харевани' тёням' тэвав. Йоб" матидева' няби ейнганды матиденгуясь сэв" сэйвы", ялям' юрвэдм'.

Сэва"ни јадимб" ёока ненэця" си"ми сюртевы". Йоб" лаханана тарем' маманонда:

- Тюкоховар хайгу. Наря си"мэданё". Йари" тайкуна, саць хубта ни ёа", нядэна Няданыгы вэсако иле. Йоб' не нюда јэрахаванонда. Едю маторэй - тяхари' ва"лёт. Таня' ханахава".

Тики вадахаби намд" нисянав', ялям' юрвэдм'.

Сэв"ни јадимб" ёули" ипикако. Мякана мэвэдм'. Йоб" ябта не тум' пятаби. Мань маньзыван ва"ав хун сер" халцэко"явэдм'. Мерё" сяравы".

Пин' тарпыв". Ихиняни мадм':

- Нядэна Няданыгы' юб" не нюда јамгэми јэнгоса.

Мат" ябта сэрми тамна сяравы". Юний" таредо' тамна минаръядо'. Мат" ябта сэрни инямдо' ня"мадм'. Йэдала" ни"ивам'. Мань тарем' мадм':

- Няданыгы' не ню јамгэми јэнгоса.

Йоб" јэдалава' маси" хэвакэдм'. Наво" пирка"на едуюцие"мана вэя" ханседа", мерю" тэяра" юани' тэяра". Сэв" сэйвы".

Сэв"ни јадимб" мякана мэвэдм'. Хури' ипикако. Йоб" ябта не тум' пятаби. Хар"н пыхыдами хорпюловав - мерю" со-

яравы". Ҥэ"ни ни' санэйв". Пин' тарпыв". Мат" ябта сэрми тамна сяравы". Иняв ня"мадм". Ихиняни мадм":

- Нядангы' не ню ңамгэми ңэнгоса.

Ҥэдала" ни"ивам'.

Сидя ңэдалава' маси" хэвакэдм', ңаво" пирка"на мерю" тэяра" ңани' тэяра", вэя" сехэда". Сэв" сэйвы" ңани' сэйвы".

Сэв"ни ңадимб" мякана мэвэдм'. Хури и никако. Нядангы' не ню тум' пятаби. Хар"н пыхыдами хорпюлав. Мерю" со-яравы". Ҥэ"ни ни' санэйв". Нядангы' не ню манзь ханада:

- Теда' хэб"нанд пилиbt" хангун. Ңани' илебте сит нидм' пирас". Сеня' ңавнанда хар"н е"эмняни сит илебтедамзь.

Тиканда нелейв". Нядангы' не нюм' недани мэв.

Ся"ны' ңэбта үод" нарэй" ңэвы". Пой ңутокана мань ми-рнадм'. Тарем' сырpana"ни тёнязы мят' не ядавы. Ненадори яха" ңэда ха"мола. Едкүцие"мана үопой ня"малма. Мэта сядокада тю"уй сюрням' ядэланараха. Ихиняни' мадм":

- Тарця сава неми хаценядм' хае"!

Та' малда.

41. Ңацямбой¹ Мандо няби Ябтако Вэнга

Пензяте"э яха' хэвахана таня илева". Сидя Мандо"я нями таняцахада. Ңарка Мандони неңэй Пякой' неда таня. Ну"умарана Мандом' тэри нюбе"ңада. Ёнэ Мандо танява. Мань сикавами Ңаць Мандонэ си"ми ваде"цеты". Тэхэвава" тэва" няхар" ёнре"э. Ңацекэхэвава", няхар" ю" хасава². По' ямбахана илевари' сер". Тики" хавна няхар" ңэсыва" таня" ни"им". Маня" хэваханана" няхар" сюнэ Вай пыдо' иле" ни"им". Ңацекэхэвадо' няхар" ю" хасава. Ӣяхар" ю" мято'. Тамна таня" ни"им" ңани' таня" ни"им": няхар" Вэнгани, тида Вэнгани няхар" ю" мято'. Тики" хавна няхар" Тохосе"э мяңгани таня". Хынасу' илева"³.

Ся"ны' ңэбта ңод" сырэй" ңэвы". Нё' няю' вэн" терейд". Харасядахад няхар" ңэдалёда. Няхар" сюнэ Вай тикахав" ңэвы". Вадо"на" ёркан' ханодо' сярыдо'. Няна" яда", ёлидо' теклы"⁴. Манзь ханадо':

- Ялэ" ңэвалё ху' тябихува".

Ну"умарана Мандо мят' тёребтэй":

- Неңэй Пякой, едава" пия.

Ед ханя пи". Едава" ңамава". Ңаворць малесь няхар" сюнэ Вай манзь ханадо':

- Сидяв Мандов, тындава серкана маня" товаць.

Ну"умарана Мандо маси":

- Тындава сер"я" ңахат таня". Няхар" ю" хасава тыда" хокарңада".

Няхар" ёнре"эм' сюрлабтэйдо'. Хабто ёркалџава". Ну"умарана Мандо вад' мю' пакаль". Намгэ' мян хабто сяра. **Нарка Вай маси**:

- Тики" ты" нянани ни" тара"! **Нацямбой** Мандо хабтот еваком⁵ хаманзь тодамзь.

Нари" мань мадм':

- Тикини мэтини.

Ну"умарана Мандо җани' тарем' маси":

- Хабтод мисан". **Няхар**" ёнре"э' поңгана хуркари' таня".

Ирими ядэрџа:

- Ханзер" ңэб"ни сава ңэлакы?

Ты" поңгана җани' тарця тым' ңули" нидм' манэс". Мандоми тынзямда ижилца: хабто"ни еваком⁵ ия"амнидав". **Набцата** ңод" ияхар" шелейнда ия' иё' хэвахана пыда ва"ансеты. Тет хабтами мал' сярыца: хабто"ни еваком', хабто"ни" нядэком⁶, хабто"ни" яхажам⁷, хабтони' варюцим⁸. **Нарка Вайми** ханамда подерџа. **Ёнэй Вай маси**:

- **Нацямбой** Мандо' ңынамд ханадм'.

Мань җани' мадм':

- Ҙынами мэтами, хане мэтами.

Ну"умарана Мандо маси":

- Ҙынам' иёр сяй".

Пякой неями җани' тарем' маси":

- **Няхар**" хүрёдами ңынари терџа".

Мань җани' мадм':

- Сиесям' маситам' Ҙынами' сяндами. **Намгэми** мэтадм'.

Ет' ңэнгодаанакы!

Ёнэй Вай тиканда сиесям' маситам' Ҙынами' хана. **Нюдя** Вай нита пуд маси":

- Маньзялан тикахани хэхэдм'. **Нямди** тэси", мираваси" хаери".

Тикандо ияхар" Вай мякандо' хая".

Хуняна нум' ялэмы. Едами җаво"махадани пин' тарпыв". **Няхар**" ёнре"эм' ты" тэваравы". Сюрлабтэйдо'. Ханани тэд

пюладм'. Тет тэравы хабтам' саңо' манэ"ян. Тыни сярын. Манзь ханав:

- Пякой неяв ңынод хына"?

Хано ипара. Ңыно мал' манэ"ян. Тад нэкалпа"ни няби малдо' ңяхато' теберңа". Сава ңынам' ңули" нидм' ху". Тет ңынам' ңобт' таңгабтадм'. Тикыни малесь харасяда ян' уэдалэйв". Няхар" сюнэ Вай' мядо' ед' няв' (нёв) выйрыдм"⁹. Яля' ямбахана пиняри' миңадм'. Ирив ядэрңа:

- Няхар" сюнэ Вай мирвани ханаци", ңамгэ им' мэпато'?

Тарем' сырпа"ни, хасрё' ерня ңобляри хоре"э. Ихинян мадм':

- Ңын таняб" ханесэй ңэвы.

Ханами сярав. Таңгабтёди ңыно нэкал" нинав'. Лэмбара-ни' ниня хорам' тэвав¹⁰. Тад ңэдавани, ңынани' ирсу' марды". Мунга"ями хэхэва хая. Тарем' сырпа"ни хорами нерня' сулма пяда. Мэдами нена" хадаманё", няхар" Вай' мят' нибцудм' хань". Хорами ңаворць пяв. Туд" хэвам' няңгани мэнгудамзь ңод", сейми лакари' ныдамъй". Ңамгэми хадкэ? Ю" тибя пиран мань санавэв". Тарем' сырпа"ни: ңамгэхэрт яңгу. Ту"ни хэвам' ңамав. Няби ту"ни хэвм' ңани' пяванё". Сей"ями ңэсохонда ңани' ныдамъй". Ңани' лэрыдамнё". Манэтами яңгу.

Ёмзя' хадңэ тад ладаванда. Сярда ханами нив манэс". Ханани' сяр"ма ян' яльяв". Хан вуни таня". Ханани сяр"мам' хури савовна манэсарңав. Тики яхана ңоб"ляри ядама. Сыра' яңо"мана пыда ядавы. Ңынам' няңгармы. Мань санавани сер' пыда лэрёвы ңани' лэрёвы. Пуня' хэвны. Ханарими ханавы. Тарем' таслав: тикахав нюдя тэта Вай ңэвы. Мань тарем' мадм':

- Вэнд ңэвэнанё"! Хар"ни ңынаханани си"ми хадаба пя-вэнанё".

Тикари минани ялаць пяв. Яданахани нумда пэвсюмя. Пи' ямбан' ядадама. Тарць' пирка"на ңока тэ"ни нимня ңани' ңадимядм'. Тэ"ни понд' мань ңамдыв".

Ҥамгэ' пирка"на мя"ни няна марна" ӈадимя". Тарем' сырпа"ни яраха" саю"¹¹ мядони талавы".

Пыдо' мамонондо':

- Ёнэй Мандом' муңго" пубтава".

Ирими ядэрңа: «Тикини хыбини? Иб" хантадм', мирвами яңгунё", нена" хадамнё".».

Парандэй" понд' пакальяв". Пи' ямбахана ӈопой марнадо'. Хонааркавэв". Няхар" ёнре"эм' нимнани танэйдо'. Сыра' ваңгахана немарим' мэ"ӈадм'.

Маньрихиртан илевы ӈэидамзь. Ну"умарана Мандо' таняхав хая. Ҥынами мипабата харванаrahась. Maxa' сиесям' мэ"мы ӈэб"ни теда' тюку яхана вунисядм' мэнгу". Хабто"ни еваком' мэ"мы ӈэб"ни теда' тарем' яда вунисядм' ядэрт"! Ҥэ" ни' санэйв".

Мядо"ни пала"ма ян' тад тэвыв", мядони мал' хавы". Сидя Мандони мядэхэна ха"мади яңгу. Хури' савовна ха"ма ям' манэсарңав. Тарем' сырпа"ни' Пякой неяни' ха"мада ӈани' яңгу.

Няхар" Тохоми, няхар" мяңгами таняцянё". Мякандо' сюрбыв". Няхар" Тохони мядодо' ӈани' хавы". Нёридо' хоярңа". Хурина тарина хабэй" нэрцорта". Ҥухуд сярада вэнм' нивы" хae". Нюдя Тохони ха"марим' тикахана нидм' манэс".

Няхар" Вэнгани мяд" таняци". Нюдя Вэнгами, нюдя ӈэбя' маляңгана сянакоб"нани нями сёбраси". Мякто' сюрбыв". Мякто' тэвыв". Няхар' тидяни ӈани' нёридо' хоярңа". Нена" хавэванё". Нюдя Вэнгани ха"мада тахав яңгува. Не няда таняси, ӈани' нирахавы ха". Ихинян тарем' мадм':

- Теда' пудандо' нёдалпа"ни сяханя хонгун. Мирвами ӈод" яңгува. Тедари' тикахандо' ӈэя".

Хуркари" ӈэя". Пензь" поңгана, похօ"на сюрда" ханони таняць. Тикини манэпа"ни сава ӈэдараха. Тад яламани пиняри' миңадм'. Суюндалава яхани тахабя тэвыв". Тарем' сырпа"ни: пензя' малахана ӈоб"ляри хо"лэрта. Не"я ӈаркарка

ңэвы. Ңоб" нямда ңадпи. Тарцям' манэць пензя' ваңган' тэри мо"нэйв". Мирвакоини ңани' тензебтейн: сиесям' маситани нянани ңэвы ңэб", такы хавыдана вунься ханд. Маниенахани нямда та' хадада. Хальмерм' нэрцорта хаеда. Тики' хэ"мяхад манэ"ңав, Ёнэй Мандоми хавы. Тедахав' мале хава, ханзер" мэугув. Сидямбой нями хунавэхэ". Мяды" хэван' тахав' тэвыв". Ңадяда яхана ты" пэрмам' манэ"ңадм'. Юд' мяян ты ңэвы". Тики тэхэт мэдами хададм'.

Нанидо' яля' ямбахана ңыёмдэйн¹². Хано"ни хэван' тэврэйн. Ханха"нани ңу" танявы". Мюйко", таретей"¹³ хано' мюня сюравы". Мядм' мярадм'. Тыни мято' хэвахана хадырцеты". Понгандандо' ңаркамбой яхадейм', нензадым', хабтаркам' манэ"ңадм'. Тыни янемдэйн. Хано"ни мюня талбэй ңамза ңока ңэвы. Илевари сер". Ялэ" ңэвадё тябихудм'. Няби' яхадейни мал' нюта тохолэйн. Тикахавад пили" мюсельяв". Сянанд' хунат' мюсеба"ни ңод" недам' ходм'. Недар ңод" ңаркарка ңэвы. Ихинан мадм':

- Хыбини ңэбто' ?

Ирими ядэрца. Няхар" сюнэ Вай ңэнгоданакы". Тики' хавна си"ив Пяками таняци".

Неда' ядувна мань мюседм'. Мюсеняхани, пэдаран' тэбадм'. Ненза харв ңэвы. Ңынами' яңгуси". Теда' ңынадами сертаба"ни сава ңэдараха. Ябтамбой харвм' тэри нявоңав¹⁴. Муңгадани нидим'¹⁵ сертадм'. Яля' ямбан' мирңадм'. Мирць мале"мяхад, ңынами хорпа пяв. Ёрколабця' варахана, юр"тибя' хункана сырэця нувы. Ня"вомы харвм' няңгар" нивав'. Ңоб" тубка' лембям' ен' ни' мов. Енами тёрей". Тарем' сырпа"ни сырэйкоця тэри мо"нэй".

Ңынами савахав ңэвы. Сюрңав. Тюку ңынаханани мал' сензаңгун¹⁶. Ңобкартадо' ни ханд". Манзани мале ңани' ямдэйв". Неда' ядувна тамна мюседм'. Нерни' няна неда' ядахана ңоб"ляри хонёда. Мэта хан' ниня пыда манзена¹⁷. Маниеб"нани ңаркарка ңэвы. Тарця ненадо ненэцями яңгодасянё".

Хадри' Вэнга тидяв ңэдарааханё". Хонарахая юркабта" нивав'. Лэрё санэй". Си"ми хамэда. Ёлида теклы. Манзь ханада:

- Ңацямбой Мандо пыдар ңэвэн. Мань ти хадм'. Саю" си"ми хадаць. Мякы тоета варехэ"ни хуныв". Си"ми нёдалцаць, си"ми ёс" ни"им'. Мядони мал' хаць. Мякы тоета пудандо' нёдалъян. Недарим' нёдадм'. Тикыт юр" мято'. Ңысыто' ервота": Няхар" Вай, Туңго", Ңэбт Ямб Хаби. Тикимякат ты ханам' ханадм'. Ңацямбой Мандо, ханя' миџан? Тикыд ңылека"!

Мань тарем' мадм':

- Мирвани таня": ңынами, муңгони.

Ябтако Вэнга ңани' манзь ханада:

- Ңари" маньзяван тамна тяха' нийцүдм' ту". Хар"ни яханани' халям' пэргадм'. Тюкори яхад салми ңэңгу.

Мань нерня' ңани' мюсельյав". Мюсева' ямбан' ирив ядэрңа. Нуултав. Нумда пэвсюмя. Тюми нароңоць, мэта хан' ни' хона пяв. Хонааркавэв". Нема' тахамана муунм' намдадм'. Пыда тарем' маси":

- Ңацямбой Мандо' сей нёя хань".

Лэрё санэйв". Тикахав тей Ябтако Вэнгами ңэвы. Манзь ханада:

- Техэ яхани ңобкана хэхэни'. Си"ми сямандами яр' нями яңгу¹⁸. Ха"мини ңобкана ңэя".

Мядо' ңадь ян' мани' ңэсыни'. Нумда ялэма. Мядо' ня' ңэдала" ниним'. Неда"я' мюмня хадрими' хая. Тарем' тасла хубта я ңэвы. Мядо' хэван' нултами'. Тасалку" ниним'. Тарем' мэнэхани' нумда пэвсюмя. Хадо' варахана ханони' сяры". Тамна тяхав' тидерманда сер¹⁹, сяберо ханоць²⁰ нялода хабарпюлами'.

Няни мэта ңында ңани' яңговы. Няни маси":

- Ңацямбой Мандо, хынибэй"²¹ тыйд ңамгэ' яңгосам'?

Мань ңани' мадм':

- Хабтони таняць. Евако, нядэко, яхаця, варюци хабто"ни ханяна мэбто'? Мяд' хэвахад ханта" ниць ңа".

Нями ңани' маси":

- Таняхвабто' тюку пи тыд талеини'.

Мядо' нё' няд минами' ңэвы. Пензя' вангувна миңани'. Инзе- леб"нани' юр" мяд' тер" ңопой марнадо'. Писяли" ся"ларңа"²². Пэвдя пихиня теда' талэртани'. Пидя ңули" тид. Вадо' ёркакхана хабто"ни евако таня ва"анавы. Няхар" пелей- да хэвахананда ва"аны". Тыни сярын. Няхани тарем' мадм':

- Ябтако Вэнга, теда' Пякой нябани хан' мюня ңынами ңэнгү. Тикыни хосан".

Тиканда нями хая. Не' хан' мюд сидя ңынам' нэкалиа. Есяко паныда, мал' муңгасавэй тайда. Мань' ңани' я' нямд ханм' нюхледм'. Хабто"ни ханахандо' подеръян, хэвняку' пензя' ванган' сярын". Ңэсы' ңацекы" тарць" ямбахана тамна сянаку". Ябтако Вэнга манзь ханада:

- Ябтако тэраха ңынами' ня"амахаваба"ни хибяри тоя!

Мань ңани' мадм':

- Сиесям' маситам' мэковаб"ни ся'"ня хаңгудм!

Сидябы' еся паны серани'. Пэварими' хай. Нями масынё":

- Ңари" пэвсюмъя.

Ңарка ерь мяд' нёда тядара²³. Пякой нябами тикахав ңэвы. Пин' тарпы". Сёнда ңардан' манзь ханада:

- Юр" мяд' тер", ңамгэ" лэтюдам"?

Пыдо' ма"ним":

- Лэтыва"!

Ңарка"я не ңани' тарем' ма:

- Нума" пэвсюмъя. Няхар" сюдбямда" хада"мара яңгу: Ңацямбой Мандом', Ябтако Вэнгам', Нюдя Тохосе"эм'. Теда' тюку пи' ңули" нёда" таңг". Тики' вадетини хуныдаци". Ңопой пихиня лакари' хаңгува" !

Пыдо' тамна писямондо'. Пякой ңани' маси":

- Муңгани ет' вунида" намд", сидяхартадо' ңылекаха"!

Инзелеб"нани мэта ва"ав' нид хабир санэй". Манзь ханада:

- Мэта ңудахана мань ня"амвэми ханта ни уа". Ңарка сюнэ Вай, хурка ембдын? Сюнэ Вай' хавна муңгани намдорт ңани' вуни таня". Хабтот еваковм', хабтод подер". Харобта подермакыд?

Няды маси":

- Нинась подер".

Ңэбт Ямб Хаби ңани' маси":

- Са"лан ңэвэн, тедахав' хава"!

Пин' тарпы". Пякой нябами хабин' масьнё":

- Не' хан' мюня сидя ңынами таняңаханзь.

Тад манэ"ңада ңын вада янгу. Мале талеревэхэ' ңэвэхэ'.

Яр' варңэ Пякой тёрей":

- Ханяна хаяда", тедахав' хава". Ваде"мэми ти. Ңыноди' мале талевыди'. Тедахав' ңопой пихиня хась пява".

Вадида мэсо"махаданда мят' мятю. Манзь ханада:

- Хаби, ембасад". Нюдя Түңгусе"э, ңани' ембасад", тикахад Нюдя Пяк. Тад' ңанихив' мал' хангу". Вайми таля. Ңыно талевыди', хабтод ңани' талевыди' ңэнгуди'.

Ңарка сюнэ Вай мят' мятю. Ембтолыд". Ңыно нэхэда". Яр" ңуркада"²⁴. Пякой нябами хайлада та"мыби"²⁵. Ңари" маньзвани' хано" маларин та"маръяни"²⁶. Ялями Ңарка' Пэта ни' теда' танта.

- Хаерад' ед' «нясиго тэрахам'» манэ"лихирнамдо': Ябтако Вэнга нями тарем' маси":

- Ңоб" ёхоте"эм"²⁷ ен' ни' мо. Ңынамда нянгарңа. Енда тёрей"²⁸.

Тарем' сырпа"ни мат" юд' мян' ңобт' мо"нэйд". Пыдо' тарем' ма":

- Ңоб" нихи' ңадю". Ханяна мэбати'? Ниня ңадядахавм' сяха' хадаңгува".

Хурка мань ңод" ңоб" ёхоте"эм' ен' ни' мов. Тад ңэдавани ха" талкада". Сидян' лекэйд". Тэри мамонондо':

- Мат" ю" ха". Тедахав' хава". Тарця ңылекаха' манзабта-вэнанё".

Нэбо" ңэдаба"ни тодо' мат" юд" хаңга". Яля' ямбахана ңопой лаб"нами. Тарць" харахана Ңарка Хаби маси":

- Ниня ңадядахаваха' сяня' хадаңгухуюна'. Тахабя хава". Теда" вадамбой" хунахана". Харасяда ян' сюрбахана".

Пякой масынё":

- Нер" мадамзяне": ңопой пи' тяха' нива" хант". Пыдара" тамна писяңадацянё".

Нита нерде Ңэбт Ямб Хаби сюрба пяда. Сюрбана' пумна муңгами ңэдав. Танянанда ңамгэхэвада маркадаванонда. Тад манэ"ңав, ңында малявы. Няндо' пуд мал' сюрбыд". Ңынодо' мал' марды". Пыдо' харасяда ян' сюрбыд". Паромба ханаха"ни' хаяни'. Няхани мадм':

- Тюку" нерцякабтёвы". Тедари' таня хэя", яд"мидо' ңади". Ядна" ңаха"на ни" ханд". Немани' харвани тедари' мэхэни'. Пуна пюльини'.

Хэвняку' ты' варан' хонэйни'. Немани' малейни'. Вэнгар маси":

- Ханамд пыдар мэ"ир. Мань хадо' няби варувна хандадм'. Пыдар хадо' няби варувна ңани' хэин. Танянанда нини' хоини'.

Тикани ңэдалэйв". Нями сюрамбари пэрҗада. Пон' нидм' мий". Нерни' няна ңоб" сюрамбадам' манэ"ңадм'. Тюкоехэвами Ёнэ сүнэ Вай ңэвы. Са' ёркал芻ав. Сяламда тибте. Та' хадав. Тамна тяхакумна ңани сюрамбада' яд"мам' ходм'. Пуданда пяв.

Нюдя сүнэ Вай теда' нин хань", - мань тарем' мадм'. Си"ми хадабабат харванаси"!

Хабто"ни еваком' ңаха" нив хана". Нюдя сүнэ Вайм' пуданда тэвав. Сыран' ңамды". Сяламда тибте. Пыда мандараха:

- Ет' си"ми хада", хар"ни вэвадама.

Нябимдей тэводанами ңани' хадав. Хадо' варувна ңани' ңэдалэйв". Хомбадахабини ет' хадабин, мале сяям' хададм'. Тарем' ңэдалёдахани нерни' нямна ңоб" сюрамба"ма ти няра-

халъ". Ямб ңэдалава' мань нёдав. Ңамгэ' пирка"на сэв манэ" ңав. Нерэндо' нимня хабтони харейн. Тахав тэвав. Тад лэрёванда юр" тибян' ңуя ха"мы". Сиесям' маситам' нянгар" нивав'. Тад ңэдавани ңоб" нига намд", ңамзада и"лаха. Тёре пяв, мань тарем' мадм':

- Хибян ңэбат? Тарси" ва"амэн. Е"яр тэвы"! Тюкор хорас". Я' хора' хэвады' ңэдарада янгу. Тикахад хэбат таня хандан.

Нынами нянгарjav, енами тёрей". Техэ сюрамбада лясё ха"амы". Сян' ни" юрк". Тад манэ" ңав ңани' сэвада то' сэртрев' хэвы". Ябти хэвады ядавы сян' нивы тора".

Тамна нерня' ңэдалэйв". Нердани" нямна ңоб" сюрамба" ма ңани' нярахалъ". Тибяха" ха"мормы"²⁹. Я' пеля" хэвня' санаармы". Тикым' манэць хабтами харев. Ханани ябzon' хад" хашибтей", мерцями тебе. Ңаводы пон' нив хана". Хан' вэня' саңоми хэвы. Ңоб" сюрамбада' пунда хадада хаюрja". Техэ сотэ' ни' нини нертембини'. Пили" та' мэсь ха"ябтарэй". Ябтако Вэнга тикахав ңэвы. Хан' вэня' вэ"лимда мо. Манзь ханада:

- Ханзер" си"ми нертен? Сит нертеvan' харвадамзь.

Мань мадм':

- Тикар хибяр? Тарця ненэцям' нивэдм' манэс". Ңэйт Ямб Хаби ңэнгоданакы. Ябтако Вэнга хыбидо' хадан?

Пыда тарем' маси":

- Си"ив Пякам' хададм'. Нюдя Пякари са"мы. Тарси" мэбе"мы варехэ"ни хадав.

Ябтако Вэнга нёхомда та"мыби. Хабтони харейн. Сюрамбадами тахабя сэваха" ңадимя. Нями тарем' маси":

- Иняр тахарт. Тарем' санговоць сяха' тэвангуми'. Тэрихив яханда ңэдараңгуми'. Пыдар, Ңацямбой Мандо ядахар". Ңэдалёвэнава ныланахаркар".

Ты' иням' тиканда пяда. Тад сярцеванда, тет хабт ңобт' санэйд". Мань хан' ванохот хаё нидм' харва". Ханяңэхэ"на

варехэ"ни тэвөръян. Техэ сюрамбадами тахав тэвами'. Тёре пями':

- Ху', хунамбин? Теда' нин хань"!

Тале' ёңгабтэй", сисёри" харна". Сюдбя Хабим' пили" иртеми'. Хаби' мунда яңгу. Вэняңы хэувунанда ңэвада мадры. Пелей хабтани хэвахана сюрамби. Сыртахани тырамда ила. Пелей хабтами лада пяда. Вэнга тидяв ха"мотана тырам' та' ня"мада. Ңудахаданда тальня' нэкалңада. Ңамгэм' ңатевнани' сидя ңудахад мани' ня"мами'. Пыда ңод" сидани' ңани' ня"ама. Сидя' ня' ңудахаюда мэнхаюда, ңобня' тэва я"амами'. Маханда ня', сята ня' тэва ңули" я"амами'. Яля' ямбан' маня" пёдава". Мань сава няв ңопой' масынё":

- Тюкы палка нерцякабтавы.

Ңоб" ңуданда таркам' тибяри' ныкалңада. Тики' пуд ңудита тарк мал' ныдъяни'. Мэта пыхыдамда пили" ня"амами'. Харасяда ян' саңоми хэвы. Хал тям' тода. Няхар" сюрамбада. Нярини', е"ни' пэрңадо'. Хахая тось хар"ни не нями тикахав ңэвы. Пякой нябами няхаюда пявы. Тикым' манэць ңудаси Хабими ңылани' мэми'. Хар' ерпа пями'. Пили" хадами'. Сидани' манэць не няхаюни' не Пякойм' ңани' ня"амади'. Пон' ниidi' пэр", хадади'.

Тикина" хадась, неры хаёвы мяк" хаява". Маня" тетңэ яда нэкалҹава". Няхар" ңэсонгана, яля' ңэсонгана мядо' ним-ня ңадимява". Хавыдаван' харвавыдо' мал' хадэйна". Ңока илебямдо', ненэциңгат ма"лавыдо', мал' танэйна". Пу' няңы яхана" мюсельяна". Яхана" тэвына". Небойна" тогрев' пензяте"э яха' хэван' ңани' илельяна". Сидя мятаны" хая. Не нями Ябтако Вэнгахани ми"ңав. Пыда' харта не нямда няни тада. Не Вэнгым' недани мэв. Тикахавад пензяте"э яха' хэвахана илевари сер". Няна" харвана хибяхарт яңгу.

Та' малда.

Вади", вади" хари хамэди"

¹ Нацимбай - ңацекэрка ненэць'.

² Ңацекэхэва" няхар" ю" хасава - манзаранидо'.

³ Хынасу' - ңоб" хэвахана ирсу' мядодо' ңа".

⁴ Ёлидо' теклы" - писянзы миңа".

⁵ Хабто"ни евако - евако сую' ңарво"ма.

⁶ Хабто"ни нядэком' - пили" пуда соявы сую нядэнэ нюомдидо'.

⁷ Хабто"ни яхацям'- ңопой небяд ңоб" мальңгана соявы суюху' яхацяңэ пэрцетыдо'.

⁸ Хабто"ни варюци - ңамгэхэвада вэнзер' ңэдам' варюциңэ нюомдеби".

⁹ Мядо' ед' няв' (нев') выйрыдм' - тарем' миндяханда мядо' няю сюрхаледа, ирт' ни хань.

¹⁰ Лэмбарани' ниня хорам' тэвав - нялода хорам' тэвада.

¹¹ Яраха" саю" - ңока саю".

¹² Ңыемдэйн - ты" сита ни" пилюсь (торомда").

¹³ Таретей - мяд' ея.

¹⁴ Нявоңгав - хобамда ха"авра.

¹⁵ Ниди - пя' тоенана пеля.

¹⁶ Сензаңгун - хадаңгун.

¹⁷ Манзена - юсида

¹⁸ Яр' нями юнгу - хуркахарт няда яңгу.

¹⁹ Тидерманда сер" - пэвсюманда сер".

²⁰ Сяберо ханоць - нялодарць.

²¹ Хынибэй тыд - саварка тыд.

²² Писяли" ся"ларңа" - письңа".

²³ Тядара - ңаркавна нэй".

²⁴ Яр' ңүркада" - ярума".

²⁵ Та"мыби - тэпи.

²⁶ Хано' малрин' та' маръяни' - нултади'.

²⁷ Ңоб" ёхоте"э - таркасавэй муңг.

²⁸ Енда тёрей" - енерманда сер' ңын' ен муно"ңа.

²⁹ Тибяха" ха"мормы - тибя' пирувна санармы.

42. Ңацекы

Сэва"н тяхад Носи" тэтхана илевэдм'. Носи" тэта' сидя Сята сава, сидя не нюда. Няхар" Сята сава, не-дя таня".

Нари" маньзялан та' пирувна нюдядм': пэта я"амсетыв, тубкав ңодь' илыбив.

Юд' по' илева". Юд' по ңэсонзь пэта пэйв". Пи ңопой' са-пасетын. Тад сапаба"ни пя" тянсетыд". Мань хыно"ңадм':

- Тедахав' ныхыв ңокама. Пям' ңопой сапаба"ни' пя" тя-нарна".

Няхар" Ся" сава ңаварахранандо' неңэ вэва". Ненэй ңавараход ехэрасетыдм'. Вэно" таре ңаворцетыдм', лы мобто' лы ңаворцетыдм'. Нюдя Сята сава няхатата вэва. Вэнота ңавар вэнекорихита моёцетыда, манзеты:

- Ңани' ңопой хора яндова" танявынё".

Лы хоцеты, лэхэ"на си"ми ңавласеты. Носи" тэтан мяка-нанда нидм' иле". Иба ңэбта пихиня хонёсетыдм'.

Юд' по' ваерась харасяда ян' вэн" тёрейд". Я' сидкад ңоб" ңэдалёда. Лэхэвада ңарка, тэхэваданда тет хора малкам' мэ"мы. Носи" тэта' хэван' нултада. Носи" тэта ма:

- Хор тэта, ңамгэр яңгума? Тосяданасенё".

Хор тэта"я ма:

- Хар"ни ядэрңадм'. Ңамгэхэртав ни яңгу". Ңопой юд" по' тяхана ңылэв папав ханевань хаясь. Тев" тенат яңгу. Тэ-ри нюхувада ебцахана мэна нанакода нюда танявысь.

Носи" тэта"я ма:

- Тарця хыбярим' нивэва" манэс". Ха юнахартахана нива"
намд".

Носи" тэта нехэта тёрей":

- Едаха" пиреда", мялонда то!

Хор тэтам' мядоманзь тюледо'. Ҥарка Сята сава недя пин'
тарпы", ҥарка хорм¹ тюле. Мят' тю"махадандо' ихинян
мадм':

- Хор тэтав ехэравэв, хурка хыбя ңэбта? Пыда пумнанда
мят' тюбциодм'.

Мят' тюдм', лата' малан' ҃амдыв". Сэварин' мэ"҃адм'. Но-
си" тэтав Хор тэтанда ня' ңоб" ҥарасади'. Нюдя Сята сава
си"ми манэ"҃а. Си"ми лада, ма:

- Хибяри² мальңгана ҃амгэ тон? Хыбярин' сырмананав'.

Си"ми пя' малахана пин' ху"на³. Хор тэта няхар" яля' мя-
доңа. Сян хорм' ҃амдакы". Тарем' мэнэхандо' мялондамдо'
пин' ńюхуледо'. Си"ив юр" тер" ңопой хыбярин' мал' лаб-
цейд". Яля' ямбан' нямдо' вэнъладо'. Си"ив юд" тер" не-
няңгадрев' лабцесетыд". Яля пэвсюм янен та' ханзелабтадо',
хададо'. Хаедо'. Мят' тю". Хабэй хыбярин' хаядм'. Хури' ха-
бiku"ув⁴. Мань мадм':

- ҃авнанд ңо" ҃амгэм' пюрмэн ңэбат? Пыдар
ҥаркахартанэ хадарэйн. Мань пыдар ҥарап ңэвы ңэб"ни сяха'
ханғосадм'.

Тики яхана хаев. Хаби" мят"⁵ нялкарадм"⁶, сея' пахакон"⁷
та' хадеръяв'. Хуняна сидыдм', ихинян мадм':

- Тей хальмерамдо' ханяна ханавэдо' ңэбто'?

Пин' тарпыв". Хальмер янгувы. Носи" тэта"я тыда та-
на, тэдамда ня"ма. Я' сид' ян' ңэдалэй". Тики' хэбянда сыра'
ямбан' янгу. Нарэйнэ хэхэвась Носи" тэта то. Ти то, nem' та-
вы, ңока ты тавы. Nem' табта ңо' не юседа. Танякумна ядэ-
рнадм'.

Носи" тэта не' мюд ңэда. Тики сырава" хаева". Та' ваера.
Тики не пили" юседа. Хурка та' ямбан' илева". Ҥани' сырремя.

Носи" тэта" я тыда танавы. Сеней тавы нендя тет парисе"эм' ты' сяравы. Няхар" Сята сава ты ня"амвы".

Носи" тэта ма:

- Нюдя Сята сава, хадавндава" ңацекэва" харта ханахана вада- ңгодакэр. Носи" хэхэ' ян' ханаңгува"⁸.

Нюдя Сята сава тяхаку' паңгамъй" пиняку' паңгамъй"⁹, ма:

- Хадавндум' хыбяри вадамда. Юседана не вадъида.

Тики не' хан' пу' ханами хамэдадо'. Ханани вануда яңгу", пыида яңгу"¹⁰. Носи" тэта нерде ңэдалэй". Няндо' пумна мал' ңэдалэйд". Мань мюд' мю' тёrm' ңэдарадм':

- Ңавэ пэрҗан? Няхатани' хайнин!

Ной пита мюд не тарпы". Пыда манзь ханада:

- Еванзадаков, нена" паромбин. Хаванзь миңан.

Мань мадм':

- Си"ми таня хадая". Тиканда ңаворман' нидм' харваңгу". Нидм' ханътаңгу". Илева" то"олаха ңоб' ни ңа".

Ңэдалёда" сэважа" тяхама". Не тыда нига харебю", тэрихив ярца.

Мань мадм':

- Мерку' ңэдалю", мань ханимядм'.

Пыда ма:

- Ханимбат ханахани ту".

Нултада. Ханаханда си"ми пэнэ, ңаварадами та. Ңавормав ёльцев. Ма:

- Инзеле", вади мэтадм'. Сохо' ңадимб" харт ханаханд ңамдаин. Ханами хано' пиняңы варан' сяраңгув. Ханондана" едм' пиреванзь хой' ни' танаңгуд". Ңэванд тяха' иням' ңыдаңгу". Нюртей нэкалмарихина нин хаңгу". Няби нэкалмарихина иня ныкланғу. Индат таняб" ханани ня' хань". Тэми мер' екава' пирувна сяраңгув. Ханани ни' мер' ңамдаин. Тадтикахад ты" сит харто' ханаңгу". Мя"амнандо' ни" ханд". Харто' минда", нёд харебю". Ханан мюния мальца" таня", ңавар" таня". Ембынава. Ңэдалёдаханд яхам' хонғун. Мадо-

рота яха¹¹ ңэнгү. Тики яхам' тю"уня' ханаңгур. Тикахавахад ехэрдм', харт тэваңгун.

Тарем' ңэдалёдахани' седе"эдо' ңадимя. Вэвакоця ханахан ңамдыв". Тэвыни'. Носи" тэта нен' тёрей":

- Ханзер" ңэда сер"? Маня" тына" ңоб" тарця", ңаха"на тэвынаць Ңамгэм' пэрцан?

Не ма'нив':

- Пыдра" ваданаара" янгу. Хан' пуй" таракалы". Ңэдалё я"мав.

Носи" тэта ма:

- Ңацекэр тад.

Не ңудаходан си"ми ня"ма. Пирця' ни' си"ми хана. Носи" тэта ңудаходан си"ми варцядте. Икан тяха' иням' ңыда". Ңопойко' ңэкалңадо'. Сэван пэвсюомя". Ңани' индав то. Няби мэва' ңани' ңэкалңадо'. Инядо' ныклы. Седе"эндо' сидя хэван' мал' мантэяд". Мань хаця" хангуутаць ханан' тэвыв". Иням' вэрдадм', хан' ни' хась мо"нэйв". Яльнятив хая. Носи" тэта тёррида хай:

- Ханм' хана, ня"мара".

Си"ми ни" ня"ам'. Пэвсюомя' няна хадиэ хая. Ңяхар" яля хадни помна ңэдалыдм'. Ихинян мадм':

- Ңаха"на хэньярахадм', панздав серахардядм?

Мальцим' серадм', пиби серадм'. Ңаворнадма. Ңани' ңэдалэйв". Иры ямбан' ңэдалыдм'. Хумна пэртакэв, ям' ехэрдм'. Тын харто' танета. Иры' ңэсоннана тын сахама". Ханяңэхэна сид"ңэтёсеты", ханяңэхэна нявотасеты". Мадорота яхам' нярахаладм'. Ңули" ңарка ңэвы, ңули" лата. Яхам' тю"уня' ханав. Тын пилийт" сахама, нявоты". Яхами си"ив яля' тантамбив. Си"ибимдей яляхана яха' харахана юр" тым' ходм'. Ты" хадырмы". Ты хо"махадан сюртейн. Тэхэ"на мэнам' пюрнадм'. Ңэдалёвахарт янгу. Ты" хэ"мядо', то"мадо' янгу.

Тики яляв пэвсюомя. Тын ңэдэйн. Ңаворнадм'. Ханахани хонэйв". Нумда ялэма. Тын сенейндо' тотрев' тамна тикахана

мэвы", ханяхарт' нивы" хань". Ҥани' һаворңадм', ихинян мадм':

- Мятав пюрпан тара. Тюку" мяцяда" ты" вуни" ңа". Мято' танянакы. Иб" тэдав ня"амъидамзь, хибяри манда: «Тына" мэ"ңан !».

Тет парисе"эв ңани' ня"мын. Яхам' тальняңы хэувунанда тандав. Яля' ямбан' ңэдалыдм'. Нумда пэвсюмя. Яхам' тяханя' мадав. Яхам' ты"н ңэсонд ха"аврав. Тын ңадимя". Яхами пуня' мадав. Тын ңэдэйн.

Пи' сенгадм'. Яляв ялэма. Ҥани' һаворңадм', ихинян мадм':

- Яхани тасиняңы манэ"мадавэй. Ты" ервдо' нивняв' таня"?

Иб" ңани' ты мэиманзь, хыбярим' хоба"ни манда: «Хэвняңы ты мэ"ңан.».

Тет парисе"эм' ңани' сярын. Яхам' няби хэувна ңыльня' ханав. Няңы хэувунанда ха"аврав, няби хэувунанда тандав. Ҥамгэхэртм' нидм' ху". Ҥамгэ' пирка"на ңэдалёрць ңэвадэйв", ихинян мадм':

- Ервсяда" ты" ңэвы".

Нарэй нувода пя. Ҥамзин ңамъян. Ҥаворцидм'. Тым' хададм'. Тикан' илельяв".

Ҥэрёйңэ хая. Торикаковна сырода ха"мы". Тас по' иледм'. Ихинян мадм':

- Ңэдалёрманзь хандадм'.

Ҥэдалёрманзь яха' тальняңы хэувна ңыльня' хаядм'. Ҥамгэ' пират' ңэдалёрңадм', ңамгэхэртм' нидм' хо". Ихинян мадм':

- Хой' няку' хэбцудм'.

Хой' няку' хаядм'. Ҥэдалёвам' ходм'. Ҥамгэ яхат товы ңэбта сатавна ңэдалёвы. Тыга сахамла"махана пелейнда санада мат" тибян' ха"мормы. Ихинян мадм':

- Ҥамгэ тарця ңэдалёда товы ңэбта?

Тын харедм'. Вары пелейн санада си"ив тибян' ха"морңа. Ңоб" ңэдалава' ңэдалыдм'. Тики ңэдалёда хувы хэ"мя' ңэдалёвахани' тэвавы". Ңэдалёварив ханавы. Ңамгз' пирка"на тын ңадимя". Товы тын' хэзвувна ядэрңа. Ханда ңэдавы. Тикан' тэвыв". Савовна манэць тикаехэвав си"ми ңэдаравы нев ңэвы. Тудамда пятавы едам' пиревы. Маньзяван ңаябэй ңамзам' ңаворңадамзь. Ңавораць ңамдыни'. Вадида ңобкад вэталы", ма:

- Носи" тэтахана илеванд мальңгана тован нерня хыбяри тосав"?

Мань мадм':

- Иб" ңобкав ненэць' тось, ңарка ңэвысь. Пи' ямбан', ябильхэя си"ив юд' тер" пэрңадонзь. Ңавэ" пирка"на хададонзь.

Не ма"нив":

- Тики мань нисялась. Муно" поңгана нисяв намды, ма-мыць: «Носи" тэтахана ңацекы таня.». Сит манз"манзь тось. Нисян няда тики" тяхана юхусь. Мань тенев, пыдар хобанд мюния ңудид сярыць¹². Теда' нясаха' хибирихи' нюни'. Ңавнанда сидя Хор тэтась. Мань ңарка Хор тэта' нюдм', пыдар нюдя Хор тэта' нюн. Тюку ты Носи" тэта си"ми табта пи' яңгрейнась. Ты" яңговы ңэб" ханяна илөңгосан. Теда' тас пом' хаен. Тас по' ямбан' хуна мэйваць, хуна я"мываць. Ңодь' тодм', нисян ты ня"мадм'. Ет' инд ханя' нись ядэр" хонад".

Мядиком' мяра. Ти хоным'. Ңяхаркав по' немарив мэ"ңам'. Немав хая. Мань тарем' мам':

- Теда' Носи" тэта' ян' хантам'. Сеня' ирив хадабабта нена" сава хибярахасянё". Теда' хортав.

Нябаков ма:

- Теда' тамна худил нероко¹³. Тамна ңоб" по' ңатен". Ян' тедарихив' нён хань". Сава похот тэзвувдавэйн.

Мань ет' нябакони мунд' намдам'. Ңани' хонэйв". Тас по' хоныдм'. Юркыв", мам':

- Носи" тэта немав ныдпи. Ирив хадаць. Си"ив' юд' тер" мал' лабцесетыд".

Нябаков ма:

- Тамна сян по' хонёбат сава ңэись. Тедахав' вунин харваңгу". Ет' харванава, хантанакэн. Тет парисе"эм' тым' мэтан, мань не' ханав мэтан.

Мань мадм':

- Ирин хан нена" саванё". Мань ненэцяндм', ханзер" не' ханм' мэтам'? Хибяри" си"ми писедаңгу".

Пыда ма:

- Иринд хан тет парисе"эхэна ни перенぐу", мардода.

Мань ңани' мадм':

- Ханамда мэтам', тыда мэтам'. Не' ханахана ңули" ним' ханд".

Пыда ма:

- Тет хора малкуво"ма мань тэхэтан тэвдо' хэв".

Тет хора' малкуво"мам' тым' ня"мадм'. Нябаков ма:

- Тедахав' хаванзь хаян.

Ти ңэдалэйв". Пон' ңэдалёсадм', хэв' ңэдалёсадм' неран' няна паңграха хой ңадимя. Ңули" ңарка хой. Хой' ңэва' ни' выцарэдав¹⁴. Няби хэвахад ламбэй" ңадимя". Сидя хабтаркам' мэ"ңа. Ңобт' нулами'. Тикахав ңэвы' Носи" тэта"я. Пыда ма:

- Еванзадаков, ханяд тон? Тас по' сит пюрҗам'.

Тики вадахат нензюмям'. Нянда маңгая лабцийв":

- Теда' евансададм' ңэвэдм'. Носи" хэхэ' яхана си"ми хадаванзь мэнэси". Тикахана нивакэдм' евансу".

Сидя марциханда лабцийв". Носи" тэта"ям' ныхытаңэ ңамгэ пон' пэрманав ңылан мэв. Та' хадав. Ңынамда ня"мав. Ңынанда малан' та' ңыдав. Мань мам':

- Хибя манэпата манзакы: «Хор тэта Носи' тэтам' ти хадавэда. Харта ңынаханда ңыдавэда.».

Сидя хабтаркамда ханани пуд вэтахаюн. Ңэдалёван мюмня ңэдалэйв". Нер" хэб"ни мя" янгусь. Ңэдалёван ңадь' ян' мя" ңэсовы. Ихинян мадм': «Хыбя ңэб"нанда? Таняку' хэхэрцюдм', манэкарцяв.».

Мят' тэвыв". Вэсакоця"я мята си' няна хасавады¹⁵. Ханахан сыласеты", мань няни сыласеты". Пыда ма:

- Хибян ңэбат?

- Техэ пангами нив намдасету". Пыдар хыбян?

Мяканда тёрей":

- Пухуця, едар пире". Мядонда то. Маньен Паханзеди" тэтам'.

Ед пинякы. Мят' тюни'. Мяд' няби хэвахана пухуця едта, няби няна нюда ңэбта, мейда ңэбта не ңацекы ңамды. Си' някуна ной то' вэнгалы. Ңоб"ляри хонёда. Вэсако ңани' масьнё":

- Пухуця, луца' ңаварава" яңгосав' ңамгэ"? Танябата хос".

Пухуця няняраха хорм' та. Няхарңэ пява". Тас яля' пэрјава", пива" хая. Вэсако ябелъй". Няни хади сарво"ла. Пыда тарем' ма:

- Носи" тэтам' хадавэр. Тавы сидя хабтаркар нюон ми"мэхэ". Пыда ңарка Сята савам' пэрја.

Мань манзетыдм':

- Нивась хада". Тики тэхэ' пили" вадарңахаюн.

Маня" идарңава". Не ңацекэн' мадм':

- Луца' ңаварадва" тамна тахар"!

Не ңацекы ни тамбю", манзеты:

- Мась ңэя, ябелтын. Мяканд хань". Няв сидёда, сит хада пирта. Иб" таидамзь, няв сидёда.

Мань мадм':

- Ңамгэм' сяңан. Няр нидм' ңа", нюор нидм' ңа".

Не ңацекы ма:

- Сикавамд нидм' сяй".

Мань ихинян мадм': «Ңацекы хибяри илеван' харванакы.».

Не ңацекы луца' ңаварм' тамна ни тамбю". Мани' муңгани' хонёда сиды. Паханзеди" ню ма:

- Ңамгэмда сяңан, ңоб" мис"!

Не ңацекы вадам' нись мэс" хорм' тэвра. Нянда хэван' манзядтеда. Тикым' хонёвы хасава харта тярпа пя. Ҥопой хорм' ңамдакэни', нябим' ңамдакэни', ив ёховы. Сэван ңадимзь ңэдалёвэдм'. Тамна савовна ив тад то, пун няд тёр яльцяда. Паханзеди" тэта' ню мамонда:

- Хор тэта, ңаха"на нин хант". Сит тэваңгудм'. Тамна ии-вэнанё" ха".

Иб" тын харебин, мат" тибяхад ңока санам' ни" хомбю". Тюкохона товы. Нарямда ила. Си"ми матидебта ив танясь, пухахав ив ё"мэв. Сэвани ңадимя". Сырңадм'. Я' ед' си"ми тебавы. Иб" манзадасетыдм', едякор едя. Яхана лясёвэдм'. Манзадаб"нан ив ёхосеты. Ҥоб" лаханана тебкадаванонда:

- Сеня' мадамзянё"? «Мань ханав мэс", тын мэс", тыни сит тэвраңгуць.».

Нябаков товы. Пыда нарям' тюхулңада. Нянкон ха"амэхэй ңобт' ня"марңа, ңобтики яхандо' мэйда. Мерёв пуйхалңада. Ҥопой ңаяңэ хая. Ихинян мадм': «Нябаков тохобэй ңэвы.». Ҥопой ханан' тийни'. Мякани' хаяни'. Едяв ңоб' янгу. Тас по' хоныдм'. Нябаков тыда харта пэръяда. Юркыв". Нябакохон мадм':

- Паханзеди" тэта' ню си"ми хадава ихинян вэва. Нянда манэтав.

Тедахав' нябакон ханм' мэ"ңадм', тет парисе"эм' ты ханадм'. Ҥамгэ тикири яхана ңэда мя" ңэвна. Ихинян мадм': «Сеня' нем' пэрңась. Паханзеди" тэта таняна Носи" тэта' яхана хэнякы?».

Носи" тэта' ян' тэвыв". Си"ив ю" мята сэван' ңадимя". Паханзеди" тэта' ню Носи" тэта' мяд' сиңганя ни ңамдю". Харта мята сиңганя ңамдёвы. Паханзеди" тэта' ню ма:

- Няхар" Сята сава, едаха" пия, мялондара" то. Пыда мяцавэй, мяканда тюңгу.

Мань мадм':

- Ненэцяндо' янгу, пыдар ջо" тю".

Мят' тюни'. Ти мядоңани'. Няхар" Сята сава едта". Паханзеди" тэта' ню сяркадамда хаңа. Ненахами париде тосеты. Хэвыхы няхан хади" сарволасетыв".

Няв манзеты:

- Сеня' сит ябе хадавэдм'. Сит хадахавань нидамзь пэр". Нёр волтамбю", тюку ңысыхына мэбан ңо": хуюмгарт прибтям' нидамзь мы".

Таня идарңава". Нюдя Сята савам' толь' тяха' сарвадаван' харвасетыв, ңэбтахатата хацасетыв ня"ам. Паханзеди" тэта' ню ңудав ня"амсетыда. Хамэдамбаба"ни си"ивахав яля' мядоңава".

Паханзеди" тэта' ню ма:

- Поёни' савумбато' тара. Мякани хэхэни'. Не няв татадм'. Тюңгува". Хэхэни'.

Мяканда си"ми тэвара. Едм' не няда пире. Не' хэван' си"ми ңабта. Си"ив яля' тюнтаава". Мань мадм':

- Мань ңод" нябаков таня. Пыдар ңо" нер янгунё". Мяканд хэхэни', тюнтахава". Теда' ямдахана". Мянь мякан ңэсодава".

Си"ив юд' тер" мал' ямдэйд". Паханзеди" тэта' ню' не няда ма:

- Мя"ал ямдалад.

Няби мят' хаядм', мадм':

- Няхар" Ся" сава, ямдэйда".

Пям' ня"мадм' ңобт' ладоръян. Нюдя Сята саван' мадм':

- Хора яндомд ңавласарав'? Хувы', ңаворман' харваван' хабя.

Вэито' тэса, тарем' ңо" манзара". Мядодо' хавда", мадм':

- Паханзеди" тэта, пыдар нерде". Мань ями вунир ехэра".

Мадорота яхам' тандаңгур мя"ми тикахана ңа.

Мюд" хая". Няхар" Сята сава мядэхэ"нандо' ну". Мань таняна хаядм'. Няндо' тарем' мадм':

- Ңамгэ мядэхэ"на нуда", тыда" танабида"!

Нюдя Сята саван' мадм':

- Хора яндомд танырма' нерня җавласар? Ҙаворман' харва.

Мюдни җани' тэвын. Неми нултада. Ҙаво" пирка"на мюд" то", ты" то". Няхар" Сята сава' вэнекодо' вуни таня", тыдо' җэри' пэръядо'. Ты' варувна сюрамби", идэридо' тядаңга". Хэвувнан то". Ня"махая, тикан' ладоръян. Нюдя Сята саван' мадм':

- Хора яндомд җавласар? Яда"махаданда җаворман' харва.

Сян яля' мюсеб"нана" җод", няхар" Сята сава' сядодо' тет пота хора' сятрев' посэйд". Ихинян мадм': «Тедари' җэвадахарцяв'. Ядвандо' мальңгана вэва җэдакы». Тарем' мюсева". Няхани мадм':

- Харта" мюседа". Паханзеди" тэта, мань мюд' нерня' хантадм'. Нябаков җаха"на нивы мы".

Ҙэдалэйв". Нябакохони тэвыв". Пыда ма:

- Понарка яңгун.

Мань тарем' мадм':

- Мань мюд минредм'. Носи" тэта тюкон' җэсода. Паханзеди" тэта тосава. Пыда җани' тюкон' җэсода. Волтангобатав', нибтав': мань сит Паханзеди" тэтан' ваторңадамзь. Паханзеди" тэта не нюм' недани мэдамзь.

Нябаков ма:

- Тедахав' җарман. Ҙопойринэ иленя" вуни" танясету". Ет' таня ваторт" нинав'. Мань җо" җопойринэ вунидм' илеңгу".

Мюд" то". Нябакохони мадм':

- Мя"ла" вэтара", теда' тюңгуга". Си"ив' юд' тер" хыбяри" мал' тюбто' тара.

Нябаков Паханзеди" тэта' не ня' вэтавы мядм' мярҗаха'. Сядодо' посёда" җод" нядаңгу". Паханзеди" тэта' нюм' нябакони хэван' җабтав. Вэтавы мят' си"ив юд' тер" мал' нялңа". Няхар" Сята сава не' манзаранакы", едтанакы". Нюдя Сята саван' җани' мадм':

- Хора яндомда" җавласарам'?

Синяңы хэвахад нябаков си"ми манэ" ѫа, ма:

- Еванзадаков, тюни" маляңгахартахана нёд ладорпю".

Хуркари" ңэя", мядоңая".

Нябаков ңани' ңамды". Тикахавахана тюни" ямбан' нин ладорпю". Тюня" ваера". Тына" та' пирувна ңока" табрим' ңаворңа". Нядам' ни" хае". Мань мадм':

- Паханзеди" тэта тодо' ңысыхы" хантанакэн". Тына" ңока", табрим' ңаворңа". Вынахала ханғу".

Хуняна мядоңа" сидя ян' тяръяна". Паханзеди" тэта' няхар" ю" мята, мань тет ю" мя"ми. Нябаков ма:

- Теда' мась ңэя. Няхар" Сята савам' нёд ладорпю". Мерюдо' соярэйдамд". Пяхавм', икавм' пэрңая".

Тас по' илева". Ив вомзеты, ладорман' харбиласетын. Нябакон вади тензебте ңани' ңэвадасетыв". Тас по' ңэсонғана нябакони мяд' ет' сидя ңэдалёда ңадимяха'. Тикахав нябакоми, няби Паханзеди" тэта' ню ийми ңэвэхэ". Нябаков хэвахан нултада, нянан то. Пыда ма:

- Еванзадаков, нянд вадам' мэ"ман' харгадм'. Ивнянд ңэнгобатав', нибтав'?

Мань мадм':

- Вадар мэтва. Вадахава' пир вуни ѫа".

Нябаков ма:

- Нюдя Сята савам' пыдар мэнгур, ңаркаюм' мань ханаңгув. Тарця" сава" не" ханзер" иламдо' манзара мэтадо'.

Мань ңани' мадм':

- Пыдар мамбат, ңамгэда вэвав'?

Нябаков мят' хая. Мят' тюва", сидя ва"авм' мивы. Сидя Сята савам' ва"ав малан' ңабтавы. Есята ңэвдо' тивы". Сидя Сята савам' маниеңхаюн: иб" сядоди' сава", мадахартаб" вэя ни хант". Нюдя Сята сава' хэван' ңамдыв". Нябаков вэсакомда ңарка Сята сава' хэван' ңабтада. Сидя тюнм' мэ"ңава". Тюня" ваера". Паханзеди" тэта' ню ма:

- Юнм' намдадм'. Хыбяри" ма", пыдара' янда" ед' я ила-вы". Нюдя Носи" тэтам' манэ"мы". Теда' саю ма"ламби.

Намгэ' пирка"на саю" то". Паханзеди" тэта' ня' сайнолыни'. Тики яхана тас пом' хаева". Тарем' мэнхана" Нюдя Я' мал хаёвы, Нюдя Түңго' хаёвы. Ҙанихив" мал' хавы". Пыди' я сид' ян' сюрбыхы'. Паханзеди" тэта' ню ма:

- Пыдар Я' мал ян' хань", мань Түңгосе"э ян' хантадм'.

Я' мал ян' тэвыв". Тас пом' хаедм'. Тас по' ңэсонгана Нюдя Я' малри хаёвы. Нюдя ма:

- Теда' ханяхарт' нидм' хант". Хади" лабцехэни".

Хади" лабцейни". Нена" мэбе"мы. Пыда нэкалпата мань выдангадм'. Тарем' мэнхани' си"ми ңыланда мэ. Тикахад ив ёховы. Идав то: нидани наретана еся яңгацянгана си"ми ян' тебармы. Ладласетыв", ив ёхосеты. Хасерпан ив тосеты. Намгэ' пирка"на нябаков товы. Еся нарям' нэкалчада, ңэ"ни ни' санэйв". Пыда ма:

- Тедари' яд". Паханзеди" тэта' ню мале хась поховы.

Таня' няхани тэвүни'. Нябаков вэсакомда илебтеда. Ңэта ни' санэй". Тикад харна" яна" няю' яльяна". Я' мал", Түңгосо" ты ханава". Паханзеди" тэта' ню нерде, нябаков пумнанда миңа, мань танырчадм'. Паханзеди" тэта' ню нябакон ня' нултавэди', ханяхав сырчаха'. Тикан' тэвыв", нябаков ма:

- Техэйда", пили" хабцяңона" тедахав' товы". Саю" миңа". Пыдари' хаяди'. Тыди' мяканди' ханэйди'. Си"ми нёда" пюр". Сяхаңгав' тутадм'. Тобати' хаңгуди'. Мань хаб"ни техэд яхана" тута". Мань илеба"ни ни" тут", маренгун.

Нябаков хай, мани' хаяни'. Мякани' тэвүни'. Сидя нехэдан сидя нанаков сюрбелавэхэ'. Паханзеди" тэта' ню' сидя нанакода сюрбелавэхэ'. Ңарка Сята сава сидя ңацекым' пэрмы.

Тас по' илева". Нябакон сыңгарёда яңгу. Тас по' ваерась Паханзеди" тэта' ню мякан товы, ма:

- Хор тэта, пыдар ха"маңан? Нява" яңгунё", хавакы. Пүрпа"ни сава ңэдакы.

Мань тарем' мадм':

- Сеня' няни маси": «Си"ми пюрманзь нёди' ту". Тароси" хангууди'.». Сюдини хэвахани җатехэнүү.

Паханзеди" тэта' ню мяканда хая. Сыра' җамгэ пиркон' ти илева". Ҙамгэ пирка"на сыра' пеляхана нябаков то. Пыда ма:

- Тедари' ныланангув".

Мань мякан хаядм'. Тас иры' илева". Иры' җэсонгана хасава җацекы ма:

- Няби җэсихыдана" няхар" җэдалёда миңа.

Сидя немда содахая Паханзеди" тэта' ню товы. Ҙани' мядоманзь җамдына". Си"ив яля' мядоңава". Нябаков ма:

- Хор тэта, хавод мэс", вадам' мэтадм!¹ Теда' мань сидда илебтедамзь. Хавэдм'² җэбан тюку сидя җысы мал"³ хангуць. Сидя җэсихына теда' җэсихы' җарктанэ тараҳадм'. Ханя' хэван' харвабата", няни юнра пэрҗада".

Мядомава" ёльцева". Нини' мякандо' хая". Ҙари' мань ханя' хэванзь мэба"ни нябакохони юнраванзь хэсетыдм'. Нябакоми җэсина" ервотаңэ таралъй". Та' илельяна".

Малда ти.

Вади", вади" хари хамэди"

¹ Ҙарка хор" - сярка' хорако, ябе ид' җэся'.

² Хибяри - нюдя я' тер" ненэцие" вада - ненэць'.

³ Ху"ңа - питарңа.

⁴ Хабику"ңав - манэсарңада.

⁵ Хаби" мят' - манзаранидо' хабиүэ нюмдебидо'.

⁶ Нялкарадм' - мунзи" тарпы", хибяхарт сита ни манэс".

⁷ Сея' паха - вэно" мэлава я.

⁸ Носи" хэхэ' ян' ханаңгуга" - хэхэ"я' ханаңэ хадаван' харвадо'.

⁹ Тяхаку' паңгамъй", пиняку' паңгамъй" - җэвамда сид"ня' паңга"ңада, вада' сер' җэван' ни харва".

¹⁰ Ханани' вануд яңгу", пыида яңгу - халмер" хан" тарем' тахабтамбада".

¹¹ Мадорота яха - харадяңг, пэдараты яха.

¹² Хобанд мюня ңудид сярыць - тандая' соявы хобатна ңаябэй ңацекы ңэвы.

¹³ Худил нерако - тамна нюдян, уарамадавэн.

¹⁴ Хой' ңэва' ни' вышарэдав - хой' ңэва' ни' тэвы".

¹⁵ Мята си' няна хасавады - мята си' няна, хананда ниня ңамдё лаханакурна.

¹⁶ Луца' ңавар - ябе и".

¹⁷ Маня" идарјава" - ябе идм' пэрна".

43. Нямд Пай Вэсако

Нисяв-Нямд Пай' ню. Небяв не Тавысе"э. Маньзяван мякана мэб"на" ирин пулы" ниня ңамдесетым'. Ирин пихина мэб" ирин хан' пыям' яркокуцетым'. Нямд Пай вэсако' ңокаханда сидя ю" мята.

Нисяв Нямд Пай' ню ңэвамда еделңа. Ңани ялям' мэ"ңа, ңани' тасику". Си"ив яля' ңэсоңгана нисяв ха. Сидя ю" хабида' тиндамда серта". Ңэтана паря' ни' тинамда төръялтадо'. Ирив, хадав ярцетыхы'. Мань манзетым':

- Мань тикаркахана мэдаманю", ңамгэ ярңади'?

Сянд' илеб"на" нисян ха"махад пон' илесава", хэв' илесава" вунив тене". Небяв мюдда пуйдалтавы. Си"ми' ной пис' мю' ңабта.

Ирив ма"нив":

- Нена" нюдяен. Самбляңгри пор.

Тарем' сырпа"ни, ирив тет нямд пай тым' сяра. Небян сямян нерний хурюда маханяңы хэван' сярыда, ма"нив":

- Тет нямд пайм' нюн ню мэ"эйдамда.

Ирив сидя пайдэн' си"ми нюцярja. Небяв тет сэраконда иням' лабиде. Ханя' ңэбта ңод" сензита марнари" миңа". Ся"ны ңэбта хонё"махадан немав хая. Ңарка' хой ниня няхар" ю" мя". Небяв ма"нив":

- Няхар" Тавысе"э иринат мяд" ңадимя".

Надяда мят' ңамгэ пон' мимнани'. Небяв мядо' сямян пуня' мята мярада. Ңопой пи' сенгани'. Гаддикахад нита мят хэсеты, пон' яңгосеты. Ңаваран ханюй" ңэсеты". Ханюй

ңамзако нирңыбасетыдм'. Небян не няда танявы, ңацекэхэттарси" хэвы, пирибти" ёльцянд нивы" тэв".

Си"ивахана ңопой' хуна ңаворадав пиресеты. Ва"авханан небян хорецияхана си"ми' юйцеты. Мер' хэсеты.

Сыра' ямбан' тарем' илем'. Ханьтасетым'. Ся"ны ңэбта յо" пивна ядэрңам'. Тад ңэдалёда" ңокавна товы". Мядо сюртевы". Хано" помна ядэрңам'. Ңарка Тавысе"э мят' тюм'. Мя" пан' сисавэй' пана"ңа", хыбяри" ңамды". Ңадябата небян пано ңамдалць хасава ңамдавы². Малцана тэта" ню ңэнгоданакы. Хэвахананда хасава ңамды. Марцеда си"ив ңум' талыби". Ңарка"я хасава ма"нив":

- Нем' пэрңан, нюда таня. Нямд Пай вэсаконд нюонда ню.

Малцана тэта" ню сидя пенда ни' сабця, ма"нив":

- Тикьехэвар ңаркав'. Сабць' посёкодрев' хабтаңгув!

Тарця вадаха"на пин' сакададм³. Ңани' мякан хаям'. Ханюй ңамзи"мана нирнорңам'. Ханюй ңамзи ңамзь тэци ханимядм'. Небян хореция' мю' хадеръяв".

Нумда пэвсюмя. Небян хореция' мю хонаравэв". Ңамгэ' пирка"на небян ня неяков, си"ми сиде" нив'. Пий" ңэвы". Едм' пиревы, ма"нив":

- Ңавор", епдя евэйком' ңамдан.

Си"ми ңавламбванда сер' лахана, ма"нив":

- Хэванд нерня сит ембтам'. Теда' сит ңэдараңгум', сэва"н хэвняна ха"мар ңэя. Тэхэ"нат сит ңэдараңгудм'.

Си"ми емба"ңа, ңэдараванда хэвахана тюхудан си"ми валңа, пин' тарпара. Тет нямд пай' нё' хэвахана сяравы". Хан' ни' си"ми тибте, ма"нив":

- Хананд мюня ңаварад таня". Сянд' - хунат' перебато' ңод" переңгу". Тикахад ңаварадамд ңаворцун.

Ёнэвнан хуркохона си"ми талвэда. Няхарм' ңэсоңота тюр' нярхалада.

- Ханяхав' тет нямд пай сит тэврангү". Тэри тарця хыбяри' ңудондава' нид сит ня"амараңгу".

Тет нямд пай' иням' пи"нда, ма"нив":

- Ервара" сэва"н хэвня' ханара"!

Тет нямд пай' ханя мимбато' ңод" хадридо' миңа. Ялям' ним' тола", пим' ним' тола". Мерцятив миңа. Тет нямд пай ңамгэ' пирка"на янимя". Хадырмаханандо' хадырцеты", ва"анваханато' ва"ансеты".

Нарэйңэ хая. Тарем' мэнханда та' няңэңэ хая. Та' ямбан' ха- дырмаханандо' хадырцеты", ва"анваханандо' ва"ансеты". Ти ңани' сырэйңэ хая. Сыра' ямбан' ңэдалёрџам'. Тас поңэ хая. Тас по' ңэсонгана си"ив юд' пир" мяд" ңадимя". Хано' малувна тет нямд пай миңа". Мяд' сингана няхар" хасава ңамдёвы". Ңопойдо' тюнда мал ңобт' петиңа, нян яльй", ма"нив":

- Нямд Пай вэсаком' хадабаб"на" тет нямд пай ңадьбяндо' янговынё". Ңамгэ мэ"мыданё". Тедахав' мань ня"амаңгун, мэтын.

Тарцям' намдась мэта иням' нэкалңав. Тюрав тэхэ"н ни тэвэр". Хан' недециям' токадтам'. Тет нямд пай ңопойдарев' санэйд". Пуний хан' тёндеркад хасава хадарида выркада"⁴. Мань хав ярэлам'. Пыда мамонда:

- Тяхакуна ня"амбан тарась.

Ңани' ңамгэ' пиркавана тет нямд пай янемя". Хадырпato' ха- дырцеты", ва"анбато' ва"ансеты". Тарем' тас по' ңэдалёрџам'. Тас по' ңэсонгана самбляңг ю" мядм' хом'. Хано" мало' ед' тет нямд пай ңэваридо' яры". Мядо" нерняңы хано" малувна пэрҗадо'. Хано" малахана си"ив хасава хасавады"⁵, ңопойдо' тюда лабде. Сюрбахая лахана, ма"нив":

- Нямд Пай вэсаконд нюнда ню то. Ня"ма тара. Тет нямд пайм' мань мэтын.

Тэ"н иням' нэкалңам', тюрав недецияң" токадтам'. Тет нямд пай ңопойдарев' санэйд". Хасава си"ми ня"ма пубта. Пуня' ярэйв". Хасава ниня якада ңэвамда хадепи.

Ңани' сыра' ямбан' ңэдалёрџам'. Тет нямд пай хадырпato' ха- дырцеты", ва"анбато' ва"ансеты". Ңамгэ пирка"на нерни'

няна ңоб" ңарка мя". Ңоб" ңарка мякана ңопой хасава хасавады. Тет нямд пай хурёди⁶ пыян' нульяд".

- Тет нямд пай харто' то", ңамгэхэв ңацекэцям' тавы".

Няни тарем' маңгая яда. Тэн иням' сятаняю' нэкална. Ханан недецям' ңани' токадтав. Тет нямд пай лерёдадрев' санэйд".

Хасава' пуняны тёндермана хадарида выркада". Пыда мамононда:

- Вэй, тяхакуна нивэв манэс". Миндяханда ня"ма тарась.

Тад хэбяни ңани' тас по' ңэдалёрџам'. Тыни' хадырмажанандо' хадырцеты", ва"анаваханандо' ва"ансеты". Ңамгэ' пирка"на ңани' ңоб" ңарка мял' нимня ңадимядм'. Ихинян мадм': «Сеня' ңопой ңарка мякана си"ми ня"амван харваць. Ңани' тарця ңарка мякав нинякы ңа", хадри' манэтанакэв». Ңани' хаям'. Тет нямд пай' ңабцато' хурёди' пыяха" ңэваридо' яры".

Пой ңутокана хыбяхарт яңгу. Тад хано" малан' тэвыв". Лыңгарёвы хасава санэй", мэта инями ня"мада. Тадахава ханав мер' сярада. Си"ми сёбяцяхадан ня"ма. Хананда няна нюдерць хана. Наронда ңылад сябарць тыбкамда тюхална. Ңэвав сапада, пыя' вэя пирахарт ни' ха"м". Ңэвав сапасетыда, ңобтики яханда ңани' ңомзеты". Пэвсюмя' ямбан' си"ми сапапи. Нё' си' няна си"ми хана. Пи' ямбан', няхар" яля' ямбан' си"ми сапапи. Няхар" яля' ңэсонгана мят' тёрей":

- Не", падыда"⁷ тада"! Пады' ед' сапатав.

Не падэмда нюдернэ, не ма"нив":

- Хабтаркаця тэта' ню, ңамгэт сер" ңэсеты"да"? Ңаха"на ва- дангурась, хэнгар ңэись⁸.

Не падэмда мода, ма"нив":

- Манав' хадабцур. Нир хадаңгу", хэвдэг ниня сяхангава' тараңгу"⁹.

Пады" ед' си"ми сапа. Ив ёховы. Тад ив то, ся"ны ху"ны хавэм' ңэвэм' сиди"манан ңумзеко"¹⁰ соявы", ңамдэд" вадёвы". Хурка ңамгэхэрт еяды ни со". Юркыв", я' хамболон' си-

дя хэвахан хури' пэръян. Месури¹¹ яльяв". Ся"ны хуны со-яравы неда ни ңадю". Панын нини тимы". Тецьдар теци, нянуён тоярџа". Ңэрёй" ңэвы". Ямб ңувоци сидя хэувунан сярсетым¹². Тарем' ядэртахани сыранэ хая. Сыра' ямбан' ядэрнам'. Ханяңэхэна сыра' ңыл' си"ңатасетым'. Тарем' ядэртахани нарэйнэ хая. Таңомава. Таңэ хэмя"вахад ханику, писяку ңамзь пэръян. Танда ңани' ваера, ңани' течяхама. Сидя хэувунан ңумзеко сярсетым'.

Ңавэ" пирка"на ңани' ңарка мя" ңадимя. Ңамгэри мя" ңэя, нена' ханьтам'. Тики мят' хаям'. Мят' тэвыв". Хасава ма"нив":

- Манзаяв товыню".

Тыбкамда ня"манё". Си"ев паңг' ед' сапа. Ңани' пи' ямбан' сапторџа. Ңудада есьмя. Хабтарка тэта" ню пыда тарем' ма:

- Не, падэр та".

Не тэдорџа, ма"нив":

- Ңамгэт сер" ңэсеты". Нюдякоця ңацекэцям' вадавэр ңэбат ңаха"на хэнгэр ңэнгусь.

Не мят' тю. Нёмда лакадта. Хабтаркаця тэта" ню си"ми ңани' паңг' ед' сапа. Сэва"ни ңадимб" сыра' ңылана хаевэм'. Сыра' ңылад ти юркыв". Ти харасяда ян' яльяв". Сидя ңарвэреми нёраку"лам"¹³. Няхар" по' ядэрнам. Няхар" по' ңэсоңгана яв' варан' тэвыв". Яв' варан' тэв"махадан яв' маравна ядам'. Яв' ся"ңэ хая. Сяд' ни' танэйв", сяд' нимня ядам'. Наңэдя иры' ядам'. Иры' ңэсоңгана пи ходм'.

Сюре"леян. Мюнянда ты' тивак" ңади". Пя' мю' пакальяв". Нидани си"ми пя юталңа¹⁴. Юрка я"мыв". Пя' мюня таня ютлым'. Сырпа"ни нарэйнэ хая. Ңайңэ хая, варёко" ңадимя". Ңэдалёда то. Сидя хабтаркада ңалеко" ңаленд" Пям' манэсарџада. Хасава ма"нив":

- Хусей нохо, нюдав еремы.

Си"ми тюхулңа. Ңуда' хара' ниня си"ми' хананда ни' ила. Тадхава тики хасавар сидя хабтарканда иням' иэкалңа. Та-

рем' мидяханда сидя варё' пан" юбт' вэталъяд". Нерни' няна сидя җарка мя". Тики мяк' ня' тэвыни'. Няби мяд' нё' сивна хая. Нуда' хара' ниня ханамда җэдавдавэй' си"ми мят' тюле. Пыда тарем'ма:

- Пухуцёв", нюдамд тамэй'. Пухуця, тур пята".

Пухуця тумда пятада. Си"ми лимбикако панэхэ' емба"җа. Саңь тянюмбовна си"ми җавалаңаха'. Ҙавала"махаданди" си"ми хонабталаңаха'. Ҙани' пи' сенгава". Юркына". Тейхад җокаркавна җавалаңаха'. Си"ив си"ми тарем' җаволамбихи". Си"ив җэсонгана си"ми ненэйвана җаваламба пяңаха'. Ти илем'. Мерция мунли со¹⁵. Тас по' илева". Тас по' ямбан' хоным'. Тас по' җэсонзь мань тарем' мадм':

- Пин' тарпаба"н вэвав'?

Ирив тарем' ма:

- Хадар ембдяртаданд тата, тикавахана тарпаңгун.

Мань тарем' мадм':

- Хибяди' җэдакэди'?

Ирив тарем' ма:

- Мань си"ми Ҙарка Сэв Сэрмана пэрңа", няби мякана Нюдя Сэв Сэр" няв таня. Тедамбой' ядэрңа. Небой похона сит ховани нерня ныхытадамда пюрманзь хаясь. Мань няв вэва. Илева' ямбан' няхадан пина илем'. Теда пин' хэван' харвананё", нян тованды ёльциңэ хая. Харвобта тута. Пыда няни' манда: «Пыдар җарабцодамд вадабавэнанё?».

Мань тарем' мадм':

- Няханд вуним' харваңгу", хэвахананд җамдёдам'.

Хадав ной танзитана мальциям' та" нив'. Ирин хэван' пин' җамдыв". Яля' ямбахана тарем' җамдыни'. Мале пэвсюмданы". Ҙамгэ' пирка"на җэдалёда җадимя. Нултада. Тикар Нюда Сэв Сэр" җэвы. Мань хэвахан нултада. Ханахартамда ни сяр". Ҙобда тамдалпи¹⁶, җарка няханда ма"нив:

- Нядани тале җарабцодамд вадавэн.

Сидя я"выкани' лабцей", мань ңо" лабцейв". Хасенава сер" вуни таня". Тадахава ңобт' лабцейни'. Си"ив' хабтаркада таня ну". Ңаркарка" ңэвы".

Няхаркав яля' мани' пёдани'. Няхар" ңэсоңгана нюдя Сэв Сэрм' ңылан мов. Нюдя Сэв Сэрм' хадав. Си"ми хадабадам' вунив савадаңгу". Ңарка Сэв Сэр" пыда тарем' ма:

- Маньди илеван ямбан' пинаманзь. Тедахав' хадар такы ханда ханар ңэя, мята мя"л ңэя, неда ңани' нер ңэя. Сит нюдани мэнгум'.

Вэсако' ня' мят' тюңаха', нен' ма" нихим':

- Вэсакор харта харвась. Теда' ңацекы пирдаледа, хадада. Ңацекым' пирдалевы ңэбта нюдя Сэв Сэр' ңацекым' хадаңгудась. Не, сит ңацекэн' митани'.

Харна" сермняна мядоңава". Та' илелъяв". Ңани тас по' иле ва". Тас по' ңэсоңгана мань мадм':

- Ири', мань ңо" тын таня" ни"им'. Тарси" тенейн. Нямд Пай вэсако' ю" ёнарта тыда таняць. Тыни пюрманзь хантам'.

Ирими ма"нив":

- Теда' Нюдя Сэв Сэрнэ хань". Паныда сер", ханда мэс", тыда подер". Хыбяри" юнраб" манзь пэр": «Нюдя Сэв Сэртм'».

Тыда тана" нинав". Нюдя Сэв Сэр" си"ив хабтаркамда подеръян. Подеро"махадан ирив хэвахани то. Пыда тарем' ма:

- Тэхэв" таня". Тэхэбини мэ"махани мась", ңамахани мась". Хаёвы сер" хуркари" ңэя".

Мань тарем' мадм':

- Ирив, хадав, сидди' вуним' хаенгү".

Ти ңэдалэйв". Сыра' ямбан' ңэдалым'. Ңамгэ' пирка"на нярахалёда хой' ни' нултав. Хой' ядувна ябтако яхако хэвы. Яхако харахана ңоб" ңарка мя". Тыда мяд' хэвахана ва"анвы". Тики' мят' ңэдалэйв". Вад' ня"авахана ты" ва"анвы". Вад' малан' нултав. Вэн" тёрейд". Вэно" тёресь не тарпы". Хабтарка тэта" не ңэвы. Не ма"нив":

- Нюдя Сэв Сэр", тев' тэвавэн. Небой похона турманорсенью".

Мань тарем' мадм':

- Небой похона турџадамзь. Нид ху' хэся"?

Не ма"нив":

- Няхар" Тавысе"э нюдяко не нядо' таня. Нямдо' нюдя Туңгот' мипидо'. Тюванзь хаяць. Хубта ни ңа". Няхар" Тавысе"э мядодо' хой' тюнд' пинякуна ңа".

Мань тарем' мадм':

- Мань тыни хубта яхад мэтини'. Сянахав тэдав та"ма.

Не ма"нив":

- Тэдар харт ня"ам".

Тынзями нэкалнам'. Си"ив хабтаркав ңэда" нинав'. Сидя хабтарками подерҗахаюн. Ңэдалёби" мюмня ңэдала" ни"ивам'. Ңадяда тюнд' ни' танэйв". Няхар" Тавысе"эт мядодо' сэван' ңадимя". Ңадяда мяк" ңамгэ пон' мимнам'. Ненэсянда ңо" ханъер ңока. Сидя' мяд' ңобт' вэставы". Мяд' мюния ңопой марнадо'. Мят ядава' сер' сырҗам': тет нямд пай си' няна сяры", ңахат хандо'. Нём' тядэдам' ламдо лы' пират', пирци лы' пиран'. Малцана тэта" ню ту' хэвхана наро' ниня ңамдёвы. Мядонда"мананда пэм' хамдапи. Малцана тэта" ню пыда тарем' ма:

- Нюдя Сэв Сэр" ңани' товэнанё". Небой похона тюкохона тур- манолсеню".

Мань тарем' мадм':

- Небой похона турџадамзь.

Пыдо' тарем' ма":

- Мядонда хасава, ңамдад"!

Мань тарем' мадм':

- Ңамдңгувма.

Нё' сава ерт' ти ңамдыв". Пыдо' тарем' ма":

- Ңари" тю"уку' ңамдад"!

Мань тарем' мадм':

- Сырасавэм' ңэдакэм'.

Таня нё' ерня ңамдёхом'. Небяв не"я нёхобтарё едм' пиремби. Харта нюмда ехэрана вуни таня". Ңадябата си"ми тумда. Небяв вад' нё' няку', вад' нё' няку', пин' сакада. Небян пумна мань җо" пин' санэйв". Тет нямд пай сярыць, небяв таняна хэвы. Ңадябата ханм' ңэдаби, мэта иням' екаби. Хунтаванзь мэй".

Сянари еңгари' таняна хаям'. Ханм' екабадам' небяв тырахалңав. Нивэв ёльце", небян ңэвэйда тяныд". Тет нямд пай' иням' екав. Хэвня' ңэдалэйв". Ваңган нултав. Ңаха" ним' хань". Инзелем'. Малцана тэта" ню пыда мамонда:

- Мят' тюсь, тикан' ня"ма тарась. Маня'" маваць нюдя Сэв Сэр" ңэдакы. Ңамгэ яхананда вадёхаявы, тарси" ңармы. Нюдя ңэдаханда хадаб"на" тарась.

Ханав мэёвна сярам', ңынав тюхулңам'. Ңока мядо" няю' ял" ни"вам'. Юр" тибян' нульяв". Си"ив яля' ямбхана тюни мал' хадэйн. Неяков хаирев. Ханахан хаям', харасядя ян' ңэдалэйв". Сидя си"ив ңэдалым'. Сидя си"ив ңэсонгана самбляңг ю" мяд" ңадимя". Мят' нултав, мадм':

- Ңамгэрт енар" хыбя янгу? Нери", ңацекэри"?

Пыдо' ма"ним":

- Ервутава" тюняха" хаясь, няхар" Тавысе" э мят' хаясь.

Мань тарем' мадм':

- Нида" ни" тут", сян' нёйда" ңате". Харта" инда" сер" иледа".

Ңани' тяха' ңэдалэйв". Си"ив ю" мядм' хом'. Ңани' хыбяхарт ервотадо' янговы. Пыдо' ма"ним":

- Ңаркан" тюняха" хаяць.

Мань мадм':

- Неда" ңэбта" җо" нюда" харта" вадэйда". Мань яни' ед' миндяра" янгоя. Нюта" нюхурт нёда" ңэдарамбю".

Пуня' хаям'. Мяк" тэвыв". Неякон' мадм':

- Тюку мя"л мань е"эйми. Ты ңани' мань е"эйни.

Ты танам', неякон' мадм':

- Мя"ал хавда".

Ти мюсельяни¹. Хабтарка тэта" мят' тэвыв". Мят' тюм'.
Хабтарка тэта" нем' ханав. Нянда мадм':

- Сит ханаңгум². Ямдангуна". Тудав пурмани³ маляңгана
сава вадам' хэтанась. Тики вадит е"эмня сит мякани⁴ ха-
наңгум⁵. Нехэвадни нинякэн тараңгу", не хабими ңэин.

Ялэма. Хабтарка тэта" не ты танаби. Тикана" ямдэйна".
Сыра' ямбан' мюсева". Мюсеняхана" ты" нисельц⁶". Сэв Сэр"
ян' тэвына", неяков недани мэв. Сидя неми. Та' илельяна".

Та' малда.

Вади", вади" хари хамэди"

¹ Сидя" ю" хабида - сидя" ю" манзаранада. Ңавна ненэй"
ненэця" хаби" ня" помнандо' сайнорцетавы". Пирдалевы" ни-
до'хаби") манзаранадандо' таралцетавыд".

² Небян пано ңамдалць хасава ңамдавы" - текахананда
хасава нем' харвобтада, неданда мэван' харвада, хахаялтем-
бода.

³ Пин' сакададм' - паромбари пин' тарпы".

⁴ Хадарида выркада" - ня"ама пубтада.

⁵ Хасава" хасавады" - мяд' си няна хан' ниня ңамды" ла-
ханакурңа".

⁶ Хүрёда - ңамгэри" хан.

⁷ Пады - не ся"мэй пиби" пад. Сяблавы мере ни тораңг".

⁸ Хэнгар ңэись - сит сяндар, сит нядабадар ңэнгү.

⁹ Хэвдэт ниня сяхаңгав тараңгу - сяхари' сит хадаңгу.

¹⁰ Ңумзеко" соявы" - ңув" соявы".

¹¹ Месури' яльяв" - сэвда ханя' сырңа", таня' яльй".

¹² Сидя хэвувнан ңумзеко сярасетыдм" - паныда тимы,
ңуво паны"ңа.

¹³ Сидя ңарвэми нёра"ку"лам' - сэвта сер" яда, ханя' ми-
маханда ехэра.

¹⁴ Си"ми пя ютаңга - пя яңгон' еремя.

¹⁵ Мерци' мунили со - сававна илельи", таңга иле.

¹⁶ Ңобада тамдали - пёддаванзь мэна" тарем' ңэсеты".

44. Паханзеди" Папа

Мэта мя"на" мюня маня" тетава". Паханзеди" тэта нека"ями, пухудянда ня', пыди' нюсавэхэ'. Тетам' тивтяди' нюди' нив' таня". Мяд' сиди"мана сидя ю" хурёда¹. Тэхэвава" тэва" няхар" ёнре"э. Тёняны мя"на" ерв Тай² мянгацями. Не нянда ня' ян' сидярихи'.

Ярабцм' хо"махад няхар" по' илева". Хубта' няна нека"ями манзь ханада:

- Едва" пия.

Ед ханя пи". Едва" ңамава".

Паханзеди" тэта җани' тарем' ма:

- Ненэ, Тай мянгацяр тюкон' хотва. Мэ"манда вадами, мань таня" нив'.

Пыда ханя ту". Паханзеди" тэта җани' тарем' ма.

- Ялэ" ңэвадё тябихоркадм'. Юд' по' техэ еся ңэва мирми³ хана харвадм'. Теда' неянд ня' няхарңэ хаёдадама".

Тай мянгацями няхар" ёнре"эм' сюрлабтэйда.

Мя"ма" ха"мы". Нека"ями мюдамда ненадорка ты" подернада. Тикамда мале манзь ханада:

- Пумнани нёда" ту". Илена ңэб'"ни' тудадм'.

Тай мянгацями пыда тарем' маси":

- Хананд си' хабтод мал⁴ ханэйд? Самбляңг хабтарка тыд хаёя". Сит пюлаба"ни нянани тараңгу".

Тиканда самбляңг хабтаркамда хаейда. Хэ"мяхаданда пуй недарида хай. Тики' хэ"мяхад Тай мянгацями, пихиня пой' ңутокы хананда ниня ңамдёвари сер". Си"ив ңэсоңгана инзелеб"нани тыда ма"лаванода. Тарем' сырпа"ни самбляңг хабтаркам' тым' сяравы. Ңавормадавэй' ңэдалаванода. Ңоб"

си"ивахав хэঁо' мундрев⁵ ханда лаб"нэрџа. Няби си"ив үэсонгана паңгарка соты⁶ тяхад самбляңг хабтарка ты' ни-хамъяд"⁷. ҂об" ямб мюдм' пунда теревэда. Тамна пунда няна няхар" үэдалёда. Ирими ядэрџа: хадари' үэбта сер"мня хэвы хад' үэдараха.

Тай мяңгацями манзь ханада:

- Паханзеди'' тэтам' маня'' хадаваць. Яво'' сёран⁸ тэвраваць таняна харта хангу.

Серодо' мале"мяхадандо' няхар" Тай' ню" мякандо' хая".

Нари" манъзявана" илевари сер". Тай мяңгацями пи' хонёба"на" няби паңгалярми⁹ тяңгаданда тяха' пэбтарисетыда. ҂об" пи' сава ерьня ямб" паңгалярми хар' мадав. Харасяда ян' сюрба пяв. Сюрамбадахани тёр үуркада¹⁰. Тай мяңгацями тикахав үэвы. Си"ми тэва, са' сюрте¹¹. Няда' яңгацямда¹² үэвани ни' ха"авравахавм' тенене" нисявав', ялям' юравэдм'. Сэвани үадимзь, тарем' сыра"пани үэвами сидя ян' лекавы". ҂обтики яханда талкадтав. ҂э"ни ни' санэйв". Нани' илей-яв". Нерни' няна мядм' ма"нэнадм'. Тай маңгацями мя" үэривы. Си"ми ханяхарт ни' үэдарамбю". Хун"махадани мяканда си"ми үани' тэваравы үэсеты. Няхар" хуныв", няхар" си"иев хада. Тетимдейхана үэвами няхар" ян' лекавы". Сэв"ни үадимзь үобтики яханда талкадтав. Тарем' сыра"пани' мя" вада яңгу. Сэвани ху' сырџа" та' ед' пяв. Тарем' яданахани сидя үарка мядм' нердани ня' мань манэ"үадм'. Пон' тэводаңахаюн. Няби мят' тюдм'. Сея' нямна хаядм'. Манзь ханав:

- Тюку хибя' мя"?

Не' мунда юңгу. Ханзер" сэдораса үани' тарем' сэдора. Үамдё тябиховани сер', тёняңы мят' хаядм'. Тёняңы мяканы үоб" нямбара не танявы. Мят' тювани' сер' таминда вахаль".

- Үамгэ' маядирт, үа' маядирт, үуда' маядирт?

- Үуда' маядиртм'! Тай мяңгацями си"ми хадась. Тюку хибя' мя"?

- Тёняңы мят ерв Пайхы" тэта. Тюку мят ерв' Палкуро" тэта.

Ядэрта" хасевдо' пэвсюмя' няна то". Едва" ңаво"махадана" хонэйна". Пи' сава ерьня, пэвдя пиҳиня Пайхы" тэта' ңэва' ед' Тай мяңгацями тойбтёванонда. Пыда тарем' маси":

- Пайхы" тэта тю"у'ня' ңа"! Няби мя"ма" няхар" Тай' ню" таланархадо'. Саюхув" ңока" ңэдараха".

Лэрё"явэдм'. Харасяда ян' сюрба пэвэв. Хаёда мякавахана сярнаридо' сярна", яртидо' ярңа". Ңавэ" пирка"на мунодо' суса". Пэвдя пиҳиня си"ми ни" манэс". Няхаркав" яля' хараси" ядадм'. Тарем' яданахани яха' танабцяңгана мядиком' ходм'. Мят' тю" нидам'. Мякы мякана ңопойри хасава. Ңули" некани то"олаха ңэвы. Хонра" нивав:

- Паханзеди" тэта некацајеми илиехэва илеевэнанё".
Маньязван мадамзъ хавакэн. Пон' яңгунась.

Иле"мямда серокута сер' вэрда" нидав':

- Мюсеняхани тет Тай ню" си"ми пяць. Самбляңг хабтарка тэри ңабцато' сюрмбаб"нани нядани тянёрка". Тай мяңгацяв си"ми нёдалнась, хайбтарэйць. Тэ"муре"э сэрг" тэвамахадани ю" тибя' лэтувна сэр" ныклавы. Тикым' сана"махад тамна тяхакумна няхар" тынзя' хун"мана сэр" ңани' ныклавы. Ңоб" сюрамба ңани' санав. Тай мяңгацяв пумнани тамна ңэдалы. Тад' нернямна тадбэй сэр" юр" тибя' лэт ңани' ныклавы. Ендана сюра, итя париде. Пу' някуд хаця" сюрамба тад санавани, техэ яхани, салаба' варан' ңуя ха"мыв". Тай мяңгацями сэр' варахана сюра хаись. Тай сюдбями пыда ихинянда тарем' мандараха:

- Яво' сёрахана лыд' хэдемда¹³. Маньди хаядм'.

Тетам' тивтяни нанакони ня' ян' сидяңэ сэр" ңо' ниня хато-карңанинзь. Ңоб" хонёвами нинакы ңа", сэр"ями хасермы". Хасенана салаба варан' харьвэни'. Сёвна ханта мы вуни таня". Сырам' ңаворңани'. Ныхы" вуни таня". Салаба' няд, тана"махадани' ян' танэйни'. Тарем' сырпа"ни теневана я",

яхав" ңэвы". Похօ"на сёда"¹⁴ ханони' ходм'. Мятами' сертани'. Хано"ни мюня, тырабтавы" ңамза", халя" таняць. Тюку ян' илело"мами' ти.

Маня" няхарңэ таня илева". Ңоб" хувэхэна ңэдалёда то. Ханамда сяра. Мят' мятию. Паханзеди" тэта' сейда хаця хань". Товы хасава манзь ханада:

- Вэва им' мэта мань нидм' ңа". Явонгад' тэтаңэ си"ми пэрцеты". Ңэдалёртахани мядони саю' хадавыць. Теда' ханахана"ни иледамзь. Ты' мандалаком' ходамзь.

Явонгад' тэта ңани' тарем' маси":

- Тыра' хэвнэ¹⁵ савади' ңэвэди'. Тына" пюлаба"на" сава ңэдараха.

Паханзеди" тэта пыда тарем' маси":

- Сава ңэ" нив'. Няхар" ёнре"э сейхана со", тет мяңгацями немахана хурцы"¹⁶.

Пыдо' няхарңэ тикандо' хая"нё". Хэбяндо' нерня мань тарем' мадм':

- Тай мяңгацями иле тэвраира", хаванда нерня мэ"манда вадами мань таня" нив'.

Си"ивахава яля' сыңгарёдо' яңгу¹⁷. Нябимдей си"ив яля' ңэ- соңгана нини' ту" ним'. Тай мяңгацямдо' сябун' сярвэдо'. Паханзеди" тэтам' няримдо' ё"мы". Тай' не ням', Палкуро' тэта nem', Пайхы' тэта nem' нянандо' тэвравыдо'. Танавы тэхэвадо' луца' ю" ёнар", саляко" пан"ңа", пензяко" тарка".

Не' яңгацями ня"амба Тай мяңгацяни няю' яльяв". Мань тарем' мадм':

- Си"ми ладорпабат я"авлынсянё". Мань ладвэми ңани' ни тораңгу".

Нэванда ни' яңгаця"ями ха"аврав. Ид' ңэвэйда ян' сехэда". Та' хадав. Хар"на" ина" сер" илельяна". Пайхы" тэта не пява", и"ма" пэрңа. Явонгад" тэта неданда мэнада Палкуро" тэта не. Харта яханда хая. Ты' пелям' ныкалца.

Тетам' тивтияв Тай' не ням' неданда мэда. Ҥарка мядм' сертава". Саля' ни', пирця ян' мярава". Тад' нерня' илевари сер". Тына" пел маңгабадаха" митеръяна".

Та' валакада.

Вади", вади" хари хамэди"

¹ Хурёда - сюрада җамгэри" хан.

² Тай - пэ"тер, пэ" тяхана илена ненэцие" еркарахад җадимы вада. Тайбари.

³ Ҥэва' мир" - невыхы похона вы' тер ненэцие" парандан', парандода' васкуйха" есяхана, ханесэйхана салдамбавы мир". Луци" вадавна нюомда ясак (налог).

⁴ Хан' си' хабт - мюд' ты. Мэта хан' пуд миндя хан' нютната.

⁵ Хэно' мундрев' - «һэдалёрти"», «муноти» мунлаха.

⁶ Паңгарка соты - паңгараха соты, саьц пирця ни җа".

⁷ Ты" нихимъед" - лакари' җадимя".

⁸ Явоёран - ясяда яво" ёря ян' тэвравэдо'.

⁹ Паңгаляр" - не' та"нё.

¹⁰ Тёр һуркада - ҥарка тёр сульи".

¹¹ Са' сюрте - ханамда сяра.

¹² Няд' яңгаць' - хасава мэта җамгэ; сырам' сирыба, нядам' манэсарць мэта.

¹³ Яво" сёрахана лыд хэдемда" - ясяда ямгана харт ханғун, пуня' ян' тось нир пират".

¹⁴ Похона сёда хан" - ненадо яхана похона сюрда җавэри" хан.

¹⁵ Тыра' хэваңэ - няд"маңэ савади' Ҥэвэди'.

¹⁶ Няхар" ёнре"э сейхана со", тет мяңгацями немахана хурцы" - ида писавэй ялэ" җоб" танымна ядэрча, таңгада яңгу, немам' ни мэс".

¹⁷ Сыңгарёдо яңгу - пон' яңгу, юнда ни су".

45. Няхар" Сюхуней

Няхар" Сюхуней, няхар" неками, няхар" неками, няхар" Сюхунени џока тэдо' яңгу, няхар" юр" тэдо'. Няхар" Сюхунени ңэдо' вуни" таня", ңуда" вуни" таня". Пин' тарабата пин' илыбин, мят' тарабата мят' илыбин. Ся"ны ңэб"нанда няхар" Сюхунеми манзь ханадо':

- Не ңацекы! Маня" нянана" не" тара" ни"им', недва" пюба"на" сава ңэдакы. Нем' мэб"нана" пыдар сидна" нин манзаят". Хар"на" нена" сидна" манзаят" ни"им'. Хуняңы яля', яля' ямдаңгуна". Тебта ялэмбата пирива" мэтава".

Мань хуняна ямданалъяв": мяд' сиди' ня' сидяри' хайдм¹. Мя"ми ха"аврав. Няхар" юр" тэми мят' тайнанё". Мюдм' пуйдась няхар" Сюхунеми пуни' вэтэйн. Нюдя Сюхунеми манзь ханада:

- Не ңацекы, тев' ед' мэд!

Ңарка яля' ңыл' ңудам' санабта.

Табеконда ед' ңэдалэйва"нё", си"ивахав яля' инда"ли хаце². Си"ив ңэсонгана ты"ни вэня' няхар" юд' мян мядо манэ"надм'. Мядо иртейн. Нюдя Сюхунеми манзь ханада:

- Не ңацекы, нуйбтехарңая. Мяд" такы"ти", тюкури ярин' ңэсоб"н сава. Такы мяка"на Ядне"э ерв' ңоб" не нюда, мэвандава"ти.

Тики ярин' мя"ма" мярава". Ңавормаханана" хара вуни таня". Тарси" ялярка... Нюдя Сюхунеми манзь ханада:

- Не ңацекы, тарси" ялянё", Ядне"э ерв хонрахаркарт, ңоб" не нюомда татаңгобтав'?

Сидя тынз' хабтам', хабтам' ня"амадм'. Юхуна' ханан' подерңахаюн. Такы мядо" ня' лабнарими хая. Ядне"э ерв' ңэсүү ңацекы" сидя хэвахана ңобт' ңамдавыд". Ханав сяра, еся яңгацями хан' латахад вэрдаванё". Ядне"э ерв' хэван' тэвыв". Ядне"э ерв манзь ханда:

- Не ңацекы, ңани' ңамгэ вада вадам' танакэн?

Мань тарем' мадм':

- Нюдя Сюхунеми си"ми ңэдабта, мамба"нанда мась: «Нөб" не нюмда татаңгобтав', миртия ңэб"нанда, ңамгэ ңэб"нанда?».

Ядне"э ерв манзь ханада:

- Миркавада миртия няхар" юр" ты, ты ңэ" нив'.

Мань тарем' мадм':

- Няхар" юр" ты, иб" ңэнгү" нив', няхар" Сюхунени тэдо' няхар" юр", харта няхар" юр". Няхар" юр" тэмдо' ңопой невна тад таба"нандо', пыдо' няюндо' хаюртарахадо' яңгодарааханё".

Ядне"э ерв, манъязв нянани ңоб" юр" ты ңэвы, ңэбата савахав савась. Ядне"э ерв тэта тарем' мась:

- Няхар" юр" тэндо' ңэхэваба"нанда, ңоб" юр" ты ңэбата саванё".

Мякани хаядм'. Няхар" Сюхунеми ңани' ни ман":

- Хурка нем' хон?

Мундо' вуни таня". Тиканда хонэйна". Тад няби яля' ңани' ямдэйна". Нюдя Сюхунеми манзь ханада:

- Ңани' тев' ед' ңани' манзабтад.

Табеконда ед' манзабтаванё", ңани' си"ив яля', яля' ңэдалыва". Си"ив ңэсонгана тэ"ни вэн я ңани' юд' мян мядо' манэ"ңадм'. Нюдя Сюхунеми ңани' тарем' ма:

- Не ңацекы, тюкори ярин' мя"ал мярахарт. Такы" мядод Пясядо" мяд", ңоб" мэвандава", мэвандава" нева" тикахана мэ.

Мя"ми мярав. Ңавормаханана" хара вуни таня". Ңаворць малесь Нюдя Сюхунеми манзь ханада:

- Не җацекы, тарси" ялянё". Ҙани' яля' ңод", яля' хэсянда-ва". Пясядо" ерв ңули" манзкарт, хонарахакарт!

Сидя тынзы' хабтам' юхуна' ханан' подерңахаюн. Юхуна ханани лаб"нарида хая. Пясядо' ервм' ңэсү' җацекы" нинда ңамдалмэдо"... Ханав сярадм', таняна хаядм'. Мань тарем' мадм':

- Пясядо' ерв' Нюдя Сюхунеми мамба"нанда мась: «Пя-сядо' ерв' ңоб" не нюнда мирти ңэб"нанда, хумна ңэб"нанда?».

Пясядо' ерв манзь ханада:

- Миркавада мирти няхар" юр" ты, ты нив' ңа".

Мань җани' мадм':

- Няхар" юр" ты иб" ңэнгү" нив', няхар" Сюхунени тэдо' няхар" юр", харта няхар" юр". Няхар" юр" тэмдо' тад таб"нандо', пыдо' няюндо' хаюртарахадо' яңгодараҳанё". Манъзяв нянан ңоб" юр" ты ңэвы ңэбта савахав савась.

Пясядо' ерв манзь ханада:

- Няхар" юр" тэдо', тэндо' ңэб"нанда, ңоб" юр" ты ңэбата саване".

Мякан хаядм'. Няхар Сюхунеми җани' ни ман":

- Хурка нем' хон?

Мундо' вуни таня". Пирива" мэ"җава", тад җани' яля' ма-ня" ямдэйна". Нюдя Сюхунеми манзь ханада:

- Не җацекы, җани' тев' ед' җани' нэкалкарт!

Табеконда сер' мюдм' нэкалңав. Си"ив ңэсонғана ты"ни вэня" юр" мян' мядо, мядо манэ"җадм'. Таддикахана Нюдя Сюхунеми махани няд тарем' вахалмонда:

- Такы" мядол Тасиняңы" тэта³ мяд" ни"им ңа". Ңоб" мэ-вандава", мэвандава" нева" тикахана мэриңа. Тюкори ярин' теда' ңэсохова".

Ңэсо"махадана", җавормаханана" хара вуни таня". Ҙа-ворьц малесь тамна ялжрава, Нюдя Сюхунеми манзь ханада:

- Не җацекы, тарси" ялянё", Тасиняңы" тэтам' хонрахар-карт, не нюнда мир" хумна ңэба"нанда?

Сидя тынзъ' хабтм', хабтм'⁴ ня"амадм', юхуна' ханан' подерңахаюн. Юхуна ханани лаб"нарида хая. Тасиняңы" тэта' ңэсү' ңацекы" сидя хэваханда пыдо' ңамдавыд". Ңэсү ңацекы" ирт" еръян, Тасиняңы" тэта' хан' лад' ни' ңамдотальяв". Ниркавэдм' тоса, Тасиняңы" тэта' няби найдэн' ненавэй ңуда' си"ми лад" нив'. Хананда лехэн', сидя нин' понд' ңамдё ха"мыв". Вадам' нись мэс" пуй цу"манани ңэдала" нивам'. Мякани тэвыв". Хувы" ңэвы"... Нихи -nihи-на Няхар" Сюхуней тарем' мамонондо":

- Не ңацекы, ңамгэ хонын, тю"у' юркада"ма. Хонааркаян.

Мань ңо" ңэсь ңо" хонааркавэв. Вадам' нись мэс" пин' тарпыв". Явэко" явонд! Тюкуни цавчи! Няхар" Сюхунеми теда' манэ"пани: ңудасавэ" ңэвы", ңэсавэ" ңэвы"! Тэ"ми сяро"маха" ты" тана"мы" сыра хоркадаря. Манзъ ханадо":

- Не ңацекы, тела' хэвандан. Нясядо' ерв мер' мере"ңая, нийб"нанда харва" луца ю" ёнарта тюкон' танэйда. Тикахад хэваханд Ядне"э ерв мер' мере"ңая, Тасиняңы" ервам' нямда нядая. Нийб"нанда харва" луца ю" ёнарта тюкон' танэйда, тына" маня" тына".

Та' малда.

Вади", вади" хари хамэди"

¹ Мяд' сиди' ня' сидяри' хаядм' - мята мер' ха"аврада.

² Си"ивахав яля' инда"ли хаце - си"ив яля' ңэдалы", тэцяда нумгана тыто' индали' хаце".

³ Тасиняңы" - Саля яв' ня"авахана иления иеной иенэцие тарем' нюмдебасеты".

⁴ Тынзъ' хабт - а) мяд' хэвахана мя"ена, яна хабт (ты),
б) малко мэта ты.

⁵ Хоркадаря" - Лэда ңарка, санговота, мэбета иенэцие нямна тарем' манзеты".

46. Няхар" Хэно' папа

Сэва"ни тяхад си"ивм' салте"э то' сядо" ниня маня" илеңава". Сэва"ни тяхад няхар" нинеками - няхар" Хэнокоми таңото'-сырито' халярим' пэрна". Ханяңэхэна хор хадасеты". Ңари" маньзяван няхар" Хэнокони не папакодо'.

Няхар" нинеками - няхар" Хэнокоми мал' несавэй". Ңарка нинекани нанакода нюдя, нюдя танява. Сидя нинякани нюди' вуни таня". Ини' то"махад мя"на" хэвахана тэва" янговы. Мя"на сиди"мана няхар" ю" ханава" ңамзари тер"ңа", халярим' тер"ңа". Хурка тэсяба"на" ңод" хорна" лэкуци сиби' минахад, ңуво" минахат мя"на" хэнгээ маня" мэ"рияна".

Таңы нумгана си"ивм' салте"э халякода ңока. Сывы нумгана хыйва" яхана нохода таня, ханеда ңокава. Няхар" нинеками - няхар" Хэнокоми таңы нумгана халям' пяб"нандо', халякорин мо"нарисетыд". Сывы нумгана ханедарихито' мо"нарисетыд". Ңамгэдо' ңэвна няхар" нинеками иleva' ямбан' ңэридо' хано"ңа". Тики тарця ңэсь яндо' ханедаком' нена" пира"ңадо'.

Ңамгэ' пирка"на си"ивм' салте"э' халяда суса. Няхар" Хэнокоми ёраць поңгамдо' сян' моб"нандо' нилак нюкцим' ни" хадасету". Тарем' мэнахандо' салте"э томдо' тябибтадо'. Хора ханедамдо' ңани' ни"им' пя". Хыйна" хоёна' си"ивм' салте"эм' хэтыдотараха". Хомбададо' янгу. Няхар" нинеками яля' пу няна сидяри ңудидо' минарць пыдо' тосеты". Тарем' илениярихина ханона" тер пилибт" ңамъяна".

"Ноб" илевава" нинякы ңа". Ся"ны ңэбто, хубта ңэвы. Няхар" нинеками ханеванзь хая"нё". Яля' ямбахана сыңгарёдо' янгу. Нув' пэвсюмзь ңарками нябами нивда сюръяда. Манзь ханада:

- Пудана нохони хэвком' пиренгодакэдм'.

Тикаринда ңо" едтолъянё". Едана" пирись ңарка нинеками ңуда' маханя' нём' тядэда. Ва"аванда ни' пэдюць ңамды". Пыда тарем' маси":

- Яля' ямбахана хоркы" есье манэсарңадамзь. Ңули" ңопойхарт нивы ерев". Тад ңо" ңэсь ңо" яля' ямбахана хуна хухуртана яда"мадо' янгу. Ңэлта ңэвады.

Ңарка нинеками ңамгэ лаханавамда ёльце"махаданда пин' тарпъяв". Ёнэ нинеками мят' хаядамнё". Тюварини сер' ёнэми нябами нивда сюръяда. Пыда тарем' ма:

- Пудана халяни хэвком' пиренгодакэдм'.

Едани ңадимя" лохомзяңгабида ёнэ нинеками нём' тядэда. Ва"аванда ни' сидя тюсипой ңамда пяда, пыда тарем' ма:

- Халэ"ни поңгаци ватабидамзь. Ңули" ңамгэхэрт нивы ерев".

Ёнэ нинеками тики вадида мэсо"махаданда ңаворць лаб-цей". Ңари" мань ңод" пин' тарпыв". Нюдя нинякани мят' тюдамнё". Нюдя нинеками тамна янговы. Нюдя не нябами тумда пятабавэ. Си"ми манэ"лись манзь ханада:

- Пудана тёняни хэвком' пиренгодакэдм'.

Лаханакуртхани нюдя нинеками нём' тядэда. Ва"аванда ни тарэнзясипой ңамда пяда. Пыда тарем' ма:

- Тюку яляхана пя янгоцини манэсарңадамзь. Ңули" ңамгэхэрт нивы ерев". Ңопой нохоко иб" еремы, тикаехэртами ңамлаараавы".

Маня" няхарңэ ңаворць пэйна". Ңамгэ ңавормами ёльце"махадани пин' тарпъяв". Илесь мякани мань яльяв". Мань маньзяван няхар" мяд' тавна хури' сававна ңули" ңаворңадм'. Такы мякани тэва"махадани, хонаваханани хара вуни таня". Хубта' няна немами' хаянё". Тикаринда ңо" мэтами ңэвами

тю"уку' илав. Макода' сивня хаерта тювы. Ҥарка мяд' тер" мал' ҃окахандо' макодандо' син' тибяри" хаеры". Тарцям' ма-нэ"лись яркосавэй пин' санэйв". Ҥяхар" ҃арка мя"ми мал' ма-нэ"ян. Ҥухуна сярда вэ' нивэ хай". Ҥани' пуня' мякани' тюдм'. Тюб"нани ҃од" нер" ҃авнани нивэв манэс", ҃арка ни-некани нанакода нюдя, нюдя илевы. Нанако папами си"ми манэ"лись ҃эта ни' санэй", манзь ханада:

- Ҥяхар" мяд' тавна ҃аворо"махаданд тамна ҃аворман' нин харва"? Сит хадаңгудм'!

Тикаринда ҃од" нанако папами няни санэй". Сейконы хэсэй пин' санэйв". Хано" поёмана' нанако папами си"ми нё-раку"ла. Ня"амванда нерцю' ҃одь' хэсетыдм'. Сюрбертахани тю"уй сюрня' пырянда санан' пилибт" ха"мы". Тарц" хара-хана хэцялмадм'. Харасяда ян' мань сюрбыв". Ҥоб" сюрамба мань тарем' мадм':

- Нанако папав, маньзяв хаядам'. Тованды ҃эбат ядамани' мюмни харт тобцакэн.

Нанако папами ҃удам' санабта, пыда тарем' ма:

- Хэб"нанд хань", хананар яңгу. Ҥари" маньзяван тюку яхадани нидм' ханд".

Нанако папами пуняю' сюрахалъй". Си"ивм' салте"э то' сяд' ныл' пили" ха"мыв". Ҥяхар" нинекани пядавы нямзэхэй тю"у' ватэйн. Ҥули" ҃арка"я идюрцям' ня"мадм'. Нябимда пелямда няңгани мэв, нябимда пелямда салаба ютер' ни' ма-сибтеванё. Ихинян мадм': «Нанако папами хуна тоб"нанда таня ҃амзакэда.».

Сидя ҃арвэми нёраку"ладм'. Тад яламани тас сыра' ямб' пиняри' миңадм'. Ҥули" ҃амгэхэртм' хось я"мадм'. Я терся-вы. Ҥэлта ҃эвады. Пись хоб"нани ҃об" ҃аворъян. Ҥам-доно"ни пой" ха"ё" поё" хун". Ҥоб" ядавами нинякы ҃а", ялей" ҃эвы". Нерни' няна ханебцё' ҃амдарма лорцем' ма-нэ"ңадм'. Ихиняни мадм': «Лорце' ҃эва' ни' тэвахаваба"ни та' ҃о" хаидм'. Лэкоцяхартани хасуй яхана юсидариңгума".».

Надядада лорцэн' си"ивахав яля' мань миңадамнё". Си"ив' ңэсоңгана лорцэ' ңэва' ни' ңодь' танэйв. Ся"ни яля' няюв' сядоць тюми нароңоць манзелабтав. Ңамгэ' пирка"на немами хэвы. Ңоб" юсида инзелеб"нани сидни' няна нув' сармикэци" ңопой марнадо'. Мэтами ңэвами тю"уку' мэв. Нум' нарэймы. Ханяна - таняна мыры" яхако"я" вангу сер' ңарка небяхато' хэнгадаривы". Неро" мандалако" иде" поңгана маларидо' ңади". Лорцэни хэзвувна мадорота яха' пили" ха"амвы". И"лида тялабты. Яха' тяханяюна юдмян' мядо манэс" нидам'. Таня ңадябато' сидя хасава поңгам' моёпихи". Ңобо" моб"нанди' ехэни", сявти" ябцото' пи"нари". Ңари" маньзялан ид' варахана тэри выраидм'. Сидя хасава си"ми маниебтим', ет' ёрнажа'. Ңамгэ пирка"на няби хасава си"ми манэтакэ, няханда мамонда:

- Яха' тяханяна ңылекам' манэ"ңадм'. Мякани' хэхэни'!

Нянда вадарихи' няда та' васэдэй", маси":

- Такэхэвар ңылека нинё" ңа"!

Няби ңани' маси":

- Сидана" ңаманда. Мякани' хэхэни'!

Сидяри хасава поңгамди' ңадан' моди'. Ңопой халяком' мань няюни, нябиом' хасава няби' марць' нимна ханилебте" нив'. Халякоця"я нярхалцеты", тидахалцеты". Ңарвэни ңыл' ёмзя' сэвадарев' халяко ха"мы". Сидяри хасава' тикахавахад енядати' пу' таб хадади' сюра тебе. Няби' сывала' мядоти' няна мале хэвэхэ'. Тарць" хара хана мовы халямда венекодрев' тив' ңырнав. Мядо' няюв' харини ярэлы". Инзелеб"нани мядо' няюна ңоб" ңарка вабць тэбкадарманонда:

- Нена", са"ладинё"! Хуна ни" ман", ненэця' нюон' сей хэриви, маяндорта хыбям' мерку' хо"ңари".

Сидя хасава нёхова харва" пырдариюв' сюрахальяханё". Миё"ма минанди' ңанокомди' ти' хатамлади'. Мань няюни тидахальяха'. Я' хэван' тидахалкава, ңано' мю' вэ"лими модм'. Сидя хасава тяханяюв' си"ми вэхэраңаха'. Тарем' сырпа"ни хасаваха' сейди' ңули" пина", ңуда" ледре", пан" ледре". Яха'

лангтан' тэвавана сер' сидя хасава ңэти' хадари" мядоти' няна хая". Ңадяда мядо' няюв' янамбавна ял" ни"ивам'. Юд' мяд' вэн" вадо" маларихи" си"ми ядабта". Вэно" мадарихи" еркы мякад нё паҳабтэй. Ңарка"я не, марььте"э не, парисе"э не пин' тарп" ни"им'. Тарпа"ма минанда нянани тонё". Няби тюхудани еркы мяд' ня' си"ми валаџанё". Мят' тю"махадани" манзъ ханаҗада:

- Не ңацекы, ёховы нен' евэйкодада ми"мы ңэя.

Не ңацекы евэйкодами ңули" тянёвна хыдя' мю' вабта. Ңули" нив" мале".

Ңарка"я не ңани' тарем' ма:

- Не ңацекы, ёховы нем' нёра" пэр", пуна мыңгаданды хась пиртада.

Ту' хэвахана ңамдёдарихини хонааривэв". Нема вэхэра хувы" ңэвы". Ңарка"я не сидёданэ си"ми манэ"лись хэвахани то. Манзъ ханада:

- Ёховы не ңуда' маядярт, ңа' маядярт ңэридабтав?

Мань ңани' мадм':

- Ңа' маядяртм'. Епадя тудами пүрнадм'.

Марььте"э не ңани' тарем' ма:

- Епадя тухувм' ханарахананё". Техэ пангамд намдарихивава.

Мань вахальяв":

- Техэ пангами енар" ни ңа". Няхар" Хэно' папам' тэри нюбе"ңадм'.

- Няхар" Хэном' хани' намдахана намдарисетыдм'.

Ңарка"я не мят' та' илелъяв". Тет си"ивахана ңамзами мив. Ся"ны ңэбто' ялей" ңэвы". Ңарка"я' не' ня' тэхэ"на мэвэни'.

Ңарка"я не ңули" нямбара хибяри ңэвы, ңамгэ тики"мана тэри лаханаку. Нями ңани' ма:

- Ёховы не - няхар" Хэно' папа тай' сыркар". Ты' варувна париденя тёня ти санабарта. Ңамзи" ңэт ниня тэвариб"нанд ханя сава ңа".

Ирими ядэрца: «Навахаванани' ябтабэй ябту си"ив салте"э то варувна тад нёдалпа"ни тэвасетынанё". Париденя тёням' хортанакэв.».

Тикаринда ңо" нянзавэй' мадм':

- Я"амба"ни ңо", хортанакэв.

Ты" вар' ня' варцядтев. Париденя тёня си"ми манэ"лись тартрем' пу"лэй. Пон' нив нёда", паё" неру" понд' пакалтана-ханда пуй ңэхэданда таль' нэкалџав. Та' хадав. Ңарка"я не ёлида теклы. Пыда тарем' ма:

- Ёховы не ян' сюдбян. Тад ңо" ңэсь ңо" хад' нехэртан' ңэбтав"? Хасавахаван нинякэн ңа"? Маня" тюку яханана" харан' харвана ненэцяма" нива" ңа". Си"ми неданд мы".

Мань ңани' мадм':

- Мара пыдьюл нехэртан ңэбтав"? Хасавахаван нинякэн ңа"? Ңари" маньзяван сёбям' нидм' мэс", ненэсяри недм'.

Тарць" харахана ңарка"я не вадам' ни соя". Хуркаси" - хараси" мякани' хаяни'. Тики мякани тэвамахадани' ңарка"я не ңоб' тёрибтей":

- Ңэсы' ңацекы", сёбям' мэтаңэ, таңы яляхана тосяда ханим' нига" ня"мсете". Сыркарңада", ёховы не ңамзи" ңэта ниня тёням' тэвась.

Ңоб" сидя яля' ваерахава ңарка"я не' ня' ңани' тэхэ"на" мэвэни'. Нями ңамгэ тики"мана тэри лаханаку. Ңани' тарем' ма:

- Теда' тай' сыркар". Ңок" ты" поңгана малк сюндым' нирав' мание". Нюдя нинеками илеванда мальңгана малк сюндым' юр" ты' тяха' ёңго"лисетыда. Малк сюндым' яркахава-бат' ханя сава ңа".

Мань тарем' мадм':

- Ярколахава ехэраенадм'. Ет' хортанакэв.

Тикаринда ңод" ңарка"я не есь" тахаравы тынзям' танё". Тынзямы саноць ңарка"я не' малк сюндым' хэувунани тана-ри" нидав'. Малк сюнды тохобэ ңэвы. Тынзям' манэць юр" нянда тяха' тэсахалаңада. Еся' тахаравэм' хасавадрев' хэня ты'

пумна ханилбтев. Тарем' сырата"ни сусанана мяра ёңэнда тяхама. Вэта сакада. Ҙарка"я не ёлида теклы:

- Ёховы не нена" хынибэн! Нехэртан ңэбтав". Хасавахаван ңэ-ридаб"нанд, ңоб' тидпой" хасаван ңа"ма. Си"ми неданд мы".

Мань ңани' мадм':

- Мара пыдьюл нехэртан ңэбтав"? Хасавахаван' нин хале ңа"? Ңари" манъязван сёбям' нидм' мэс"!

Тарць" харахана не ервакоми вадам' ни соя". Тикарини" ңо"мякани' хаяни'.

Намгэмда харамда ваде"ливнадм', не ерв ня' тэхэ" сян' нини' хань". Илевари сер". Ся"ны' ңэбто' сывы" ңэвы". Хуву тухуна Ҙарка"я не манзь ханада:

- Ёховы не няхар" Хэно' папа, инзелехэркар, вадам' мэтадм'. Хув' няна ңэвтана" хибя" ңыланы" тута". Ха-няңэхэвамда" ңэвтана" ханда".

Пирива мада, нё' няюв' вэн" тёрейд". Мани' сидяңэ пин' санэйни'. Харасядахад ңэдалёдамбой" вэто' выяңга". Пон' нись мы" вадо"на" ёркан' нултариңадо'. Нита нерденя Тысья вэсако янэ"ма" ңэвы. Нисянда пумна Тысья' нюдя ню теда' тю"ү' миндя ябтамбой ңаць нултариңада. Таня ңадябата Тысья' нюдя ню сядм' сядо"мы. Сава сякаданда таси сырода хэвонанараха'. Сидяда сэвда' ябта пя' хар енахалмэрахаха'. Самбляңг сэрта ямдёкохотато' ңадядо' янгу. Мани' сидяңэ мят' сакадани'. Намгэ пирка"на ти' сярамаха" нё тядэдэй. Тысья вэсако мят тю" нив'. Ядциекомда миё"ма минанда таси сырал" пакал" нидав'. Пыда тарем' ма:

- Сидя не янэ"эм' яноларабан"? Ңули" намдахав.

Не ервкоми ңани' тарем' ма:

- Тысья вэсако нин янолара". Мани' сидянинё".

Тысья вэсако ңани' вахальянё":

- Хибяри ңэя, нянана" мал' ңобтики! Сидяңэ хаюпаван' харвабати', сидди' ңобкана мэнгува".

Ҙарка"я' не ңани' вахальянё":

- Ҥари" маньзяван нянанда" тутадм'. Нями ха"манданакы. Мань вахальяв":

- Пыдар мамбат ҃амгэда вэвади". Хаюпа ҃ули" хэхэнима.

Ҥэсы' ҃ацекы" тыдо' танэйдо'. Не' ервкондо' мюданда сиңэ юр" сэр" хабтм' подеркаяңанё". Мань маньзяван ҃амгэ таняна мюдаханани хэридавнадм'. Тысья' нюдя ню самбляңг сэрг' харей явна тэвада мань тёры" ҃адм'. Нябитинд тэва хасава масьнё":

- Не ҃ацекы, ханани вэня' тиванда ҃эбат самбляңг сэр"ни сеёто' ҃ыламна ниенась хань". Самбляңг сэргми сеёто ҃ыламна хэли хыбяхана маторпада ни" ҃а".

Тысья' нюдя ню хан' вэня' тикирини но" вэ"лимий модм'. Тысья вэсако си"ми манэ"лись хаця" ванибтей", пыда тарем' ма:

- Ёховы не - няхар" Хэно папа харто' няханато хаюпадахав" яңгорисетынё". Сеня' ҃авнанда няхар" ниняканд хэдо' хабцияңгана хава' мальңгана нюдяко папар хаёвысенё". Тики яхад мэта мантани хосаявась.

Хуна санавами нивэв хамэда". Нанако папами сидя падухата лабциртав. Манзь ханаџав:

- Няв папаков, нядахаваданд вунидм' хаёд".

Ҥамгэмда харамда ваде"ливнадм', Тысья вэсако' Ҥэсын' тэвьина". Не' ервкоми Тысья' ҹарка ню неданда мэда. Ҥари" маньзяван ху' хэвнядм', нянандо' иледм'. Хад по' пеля иленярахава". Хув' юркына" Тысья вэсако' манзь ханада:

- Вадавэв нюв, сянд ҹопойриңэ иленгунди. Пулэнд хэвад любна" саванё".

Папами масьнё":

- Тысья ирив, тарем' мамб"нанд ҃амгэда вэвади".

Тысья вэсако ҹани' вахальянё":

- Хыйва яхана Мандоко хасава янэ"ма" иле. Пыда не няда танярахавонда. Хубта яля', хубта. Тыд хокаркар".

Тысья вэсако вадари нивэ ңа". Намгэ янда ед' ңэб"нанда ңод" ха"ланда тяхама. Ялэмдад' ңэва' пакалтанарин нулта" нидав'. Вэсэй седеларавы", манзь ханада:

- Мандоко хасава' сер" яңгавы"! Не папакомда тикахана татада, ңамзи ңэ' ниня тэва тара. Сюрамба меретава" таняриб"тав"?

Не ервкоми лэрё санэй":

- Ёховы не пират" нидав'. Маси" тэваңгодакэда. Сеня' мальңана сюрамбахава париденя тёням' няби пукахад ня"амрисеты.

Тысья ңани' тарем' ма:

- Няхар" Хэно папа хортанакэр?

Мань ңани мадм':

- Вэва ңэ" нив', хортанакэв.

- Мандоко хасава мята хэвыхы лаңготе"э то' сяд' ниня сидна" ңатенгу.

Пирива мадава. Хубтакохана тэдава" ня"амава". Ланготе"э то хубта нивэ ңа". То' сяд' ни' нултариңава". Я' пиняюд Мандоко хасава' сидя хабтарце"э тэхэ' нихимъяха'. Хэвабовнана" хынахалада. Не папакомда хан' вэня' нямда пэнливы. Мани' сидяңэ то' сэрг' пили" ха"мыни'. Ненэй Мандой сидя паңгалярта мэта нинда тяха' теклиревы. Том' сюрте варилебтеда. Тынзя хунат' хэ"мярихиданда хурка мань ңод" ңэвами паңгарць нёдал" нивав'. Ненэй Мандой пиняри' харва. Сюрамбадахани Ланготе"э том' тяханда нямна сюрте" нимим'. Сюрамбами ями сэван' ңадимя. Нэнэй Мандой сидя паңгалярта нохо' тэвадарев' санабалвэхэ'. Пиняри' сюрамби. Нерэни' ницимна тамна нэкалҗав. То' сяд' ни' тантанаханда паңгаляркаданда Мандойм' ня"мав'. Няби' паңгалярта таль' нэкалҗав. Тысья вэсако' ңудаха" ми"ңав. Мандоко хасава тарем' сырпа"ни няби сята хэв хаця' пармавы". Пыда тарем' ма:

- Не папаков ня"амрааянё"! Хаюпаварин' харбиланакы"!

Мандоко хасава мэта хан' нид ңэда ха"авра, ңани' тарем' ма:

- Не янэдако', сит хоркадм'.

Нёхова харва" ныланавдавэ' то' сяд' үүл' җани' ха"амыв". Неры сюрамбамавнани нэкал" нивав'. Мандоко хасава пуни' тёре" ни"им'. Юр" тибярин' поми ёльцеми. Ҙамгэ пирка"на сюрбамами ями сэван' җадимя. Няби марць нимна пуняюв' ёңгабта" ни"ивам'. Мандоко хасава тальня' товы, сидя нянда вар' мунзи" тамамъяха': «Та"ли я' понд' сит тэваба"ни, сит хадаңгудм'!». Сейни лэрё нерэни' ницимна нэкал" нивав'. То' сяд' ни' тантанахани Мандоко хасава' пуни няюна пятамда намдадм'. Паңгаляркадани си"ми ня"маңгусь, җэда хоркада. Пуняюв' җани' мань ёңгамъяв", си"ми нёданами хади тамдабтемби.

Тысья вэсако' хан' ябцу"мана җадив" нидам'. Мандоко хасава җэмда вэрда. Ҙани' сюрба" ни"им', нанако папани хан' ябцу"мана минда җэвы. Нанако папами я' нямд тюрм' нинмявнанда нярахалада. Пыда җани' маси":

- Ерв янэдоко", я' нямд тюрами маторпада ни' җа". Мадарийб"нанд вэвами, савами нив такалпаңгу". Мандоко хасава җэда' мадабте.

Тысья вэсако манзь ханада:

- Мандоко хасава нева" мато"җава". Ханаңгододакэва".

Та' малда.

Книга төр”

Предисловие.....	5
------------------	---

МИДИРТАСАВЭЙ” ЛАХАНАКО”, ЛАХАНАКО”

1. Хаби вэсако	15
2. Хабей’ не	21
3. Вэсакохо’, пухуцяха’	24
4. Вано сава	26
5. Мангабада вэсако	34
6. Туңгэвыхы	39
7. Мангабада вэсако	44
8. Хаби вэсако	59
9. Сэдко няхар” ню	63
10. Сидя Сэрм’ Мэта	66
11. Есьтана поп вэсако	70
12. Василеця	76
13. Сидя не	89
14. Няхар” ненэй не	91
15. Пухуця Ҙоб” ню.....	95
16. Луца вэсако	102
17. Вынахалуй Хабиця	104
18. Неле”мяко	108
19. Мэбета ханена	110
20. Нядэна хасава	114
21. Писяко’ вомдё”ма	116
22. Писяко	123
23. Писякохо’, хорекохо’	125

24. Халэв' сё	127
25. Харңэ не ню	128
26. Шаньгы" ёмзя' вакця	129
27. Маңгабадако	133
28. Ёхоборта ңацекэхэ'	137
29. Сидя тосанда	140
30. Купец' няхар" ню	142
31. Вэсако' табеко	146
32. Лаханако	148

СЮДБАБЦ", ЯРАБЦ"

33. Лэхэ'Няхар"ню	151
34. СюдбяХэтанзи.	160
35. Няңоте"э Вэ"ли.	171
36. Сэр" я Ңацекэ	186
37. Вэвако Сусой	195
38. Харючи Вэсако	213
39. Ңэли Ңая тар".	225
40. Нядаңгы' не ню.	231
41. Ңацямбой Мандо няби Ябтако Вэнга.	234
42. Ңацекы.	246
43. Нямд Пай Вэсако.	261
44. Паханзеди" Папа.	271
45. Няхар" Сюхуней.	276
46. Няхар" Хэно' папа.	280

Научное издание

**НЕНЕЦКИЕ СКАЗКИ
И ЭПИЧЕСКИЕ ПЕСНИ
СЮДБАБЦ", ЯРАБЦ"**

Редактор В.С. Сумарокова
Компьютерная верстка: Л.Н. Проскурина

Лицензия ИД 04617 от 24.04.2001 г. Подписано в печать 25.06.2001 г.
Формат 60x84 1/16. Бумага офсетная № 1. Печать офсетная.
Печ. л. 18,25; усл. печ. л. 17,0; уч.-изд. л. 17,2.
Тираж 3000 экз. Заказ № 2077.

Издательство ТГУ, 634029, г. Томск, ул. Никитина, 4
ОГУП «Асиновская типография», г. Асино, ул. Проектная, 22

